

**O‘ZBEKISTON RESPUBLIKASI
OLIV VA O‘RTA MAXSUS TA‘LIM VAZIRLIGI
TOSHKENT DAVLAT SHARQSHUNOSLIK INSTITUTI**

Is‘hoqov Mirsodiq Mirsultonovich, Alimova Rahima Ruskulovna

ARXIVSHUNOSLIK

O‘QUV QO‘LLANMA

5120300 – Tarix (Sharq mamlakatlari va mintaqalari bo‘yicha)
5120300 – Tarix (Markaziy Osiyo mamlakatlari bo‘yicha)
ta‘lim yo‘nalishlari bo‘yicha tahsil oluvchi talabalarga mo‘ljallangan

Toshkent – 2017

“Arxivshunoslik” nomli ushbu qo‘llanma oliy ta‘lim tizimining tarix yo‘nalishi talabalariga mo‘ljallangan. Unda jahon sivilizatsiyasining qadimgi o‘choqlari hamda Markaziy Osiyo mintaqasida qadimiy davrlardan boshlab hozirga qadar arxiv va arxiv ishi tarixi tizimli ravishda bayon etilgan. Qo‘llanmada birinchi marta Turkmanistonning Eski Nisa xarobalaridan topilgan qadimgi Parfiya podsholigi arxivi, Kushonlar davriga oid Ravatak arxivi, qadimgi Xorazmning Tuproqqala va Tojikistonning Panjikent shahri yaqinidagi Qalai Mug‘ qasri xarobalaridan topilgan ilk o‘rta asr Sug‘d arxivi materiallari tahliliy ravishda jalb qilingan. Bulardan tashqari o‘rta asrlar hamda hozirgi zamon arxivlari haqida ma‘lumotlar berilgan. Bu shaklda birinchi tajriba sifatida ushbu qo‘llanma ta‘lim mazmunini to‘ldirishga xizmat qiladi, degan umiddamiz.

Mas’ul muharrir:

O‘zbekiston Respublkasi Fanlar akademiyasi tarix institutining yetakchi ilmiy xodimi, t.f.d. S.Shodmonova

Taqrizchilar:

*Nizomiy nomidagi Toshkent davlat pedagogika universiteti dotsenti, t.f.n. Z.IIhomov
Toshkent davlat sharqshunoslik instituti,
Markaziy Osiyo xalqlari tarixi kafedrasi mudiri, tarix fanlari nomzodi
I.Haydarov*

O‘zbekiston Respublikasi Oliy va o‘rta maxsus ta‘lim vazirligining 2017-yil 24-avgustdagi 603-sonli buyrug‘iga asosan nashrga tavsiya etilgan.

O‘quv qo‘llanma Toshkent davlat sharqshunoslik instituti O‘quv-uslubiy Kengashining 2017 yil 30-mart 8-sonli bayonnoma qarori bilan nashrga tavsiya etilgan.

© Toshkent davlat sharqshunoslik instituti, 2017

SO‘Z BOSHI

Insoniyatning tamadduniy davrlari turli jabhalarini qamrab olgan iqtisodiy, ijtimoiy, siyosiy, huquqiy munosbatlarni hujjatlarsiz tasavvur etish qiyin. Besh ming yildan oshibdiki, yozuv madaniyati bilan yonma-yon hujjatchilik amaliyoti davom etib kelmoqda. Jahonning turli mintaqalarida ko‘plab hujjat jamlamalari vujudga kelgan. Ular uzoq tarix varaqlarini zarur mazmun bilan to‘ldirishda muhim ahamiyatga ega.

Markaziy Osiyo hududida ham arxiv ishining vujudga kelishi va rivojlanishi qadimiy asoslarga ega bo‘lib, davlatchilik tarixi hamda kichik va katta davlat uyushmalarining barpo qilinishi bilan bog‘liq. Markaziy Osiyoda yozuv paydo bo‘lishi bilan muhim voqea-hodisalarni qandaydir qattiq ashyolar yuzasiga – devor, tosh, sopol buyumlar, metall, po‘stlog‘i yo‘nilgan yog‘och tayoq yoki yog‘och taxtachalarga qayd qilib borish amaliyoti paydo bo‘ldi. Shunday qilib, muhim voqealar hujjatlashtirilib borilgan va hujjatlarni saqlash an‘anasi paydo bo‘lgan. Bu esa xo‘jalik hisobi yoki huquqiy taftish, soliq nazorati, mulkchilik mubosabatlarini boshqarishga xizmat qilgan.

Markaziy Osiyo hududida qadimgi davrlarga oid bir qator arxiv majmu‘a- to‘plamlari topilgan. Masalan: Eski Niso arxivi (Turkmaniston), Ravatak arxivi (Afg‘oniston), Tuproqqal‘a arxivi(Xorazm) kabilar shular jumlasidandir. Arxiv hujjatlarida parfiyoniy, xorazmiy, yunon-boxtariy va b. yozuvlardan foydalanilganki, bu qadimiy yozuv madaniyatning yuksakligini ko‘rsatadi.

Qoraqalpog‘istonning Ellikqal‘a tumanidan Tuproqqal‘a xarobalaridan topilgan III-IV asrlarga taalluqli hujjatlar kompleksi fanga 1930 yillar oxirida ma‘lum bo‘ldi. Zarafshon daryosining yuqori qismida VII asr oxiri-VIII asr birinchi choragiga oid sug‘d hujjatlarining ulkan arxivi topilgan. Tarix fanida bu arxiv “Mug‘ tog‘i sug‘d hujjatlari” nomi bilan ataladi.

Arablar bosqinidan keyin devonxona ish yuritish va arxivlashtirish ishlari yanada rivojlandi hamda kengaydi. Ayniqsa, ma‘muriy-xo‘jalik tizimi rivojlangan somoniylar davlatidagi davlat boshqaruvini alohida ko‘rsatish joiz. O‘z navbatida, bu mahkama hujjatchilik ishining yanada rivojiga olib keldi. Jumladan, somoniylar davriga oid vaqf hujjatlarini arxivchilikning yorqin nishonasi deb baholash mumkin.

Oʻrta asrlarda Markaziy Osiyo mintaqasidagi barcha davlatlarda devonxonalar ish yuritish va arxivlashtirish ishi keng tarqalgan. Mazkur qoʻllanmada Buxoroda Boxarziy vaqflari, Joʻybor shayxlari arxivi, Buxoro amirligining Qushbegi arxivi, Xiva xonligining Qozilik arxivi, Turkiston general-gubernatorligi arxivi va boshqa arxivlar qamrab olingan.

Tashkilotlarda hujjatlarni saqlash va arxivlashtirish ishiga sobiq shoʻroʻlar davrida katta ahamiyat berilgan. Biroq, arxivlar faoliyatida davlat siri, mahfiylik, mutlaqo mahfiylik kabi tamgʻlar ostida aksariyat hollarda turli fondlar hujjatlaridan ochiq, emin-erkin foydalanish mumkin emas edi. Mustaqillik sharoitida, yaʼni 1999-yilda Oʻzbekiston Oliy Majlisi tomonidan “Arxivlar toʻgʻrisida”gi Qonunning qabul qilinganligi munosabati bilan Respublika arxiv ishida jiddiy oʻzgarishlar sodir boʻldi.

2004 yilda Respublika Vazirlar mahkamasining 49-sonli “Oʻzbekiston Respublikasida arxiv ishini boshqarishni yanada takomillashtirish toʻgʻrisida”gi Qarori qabul qilindi. Qarorga muvofiq Oʻzbekiston Respublikasi arxiv agentligi “Oʻzarxiv” tashkil qilindi. Uning tarkibiga Oʻzbekiston Respublikasi Markaziy davlat arxivi, Oʻzbekiston Respublikasi Ilmiy-texnik va tibbiyot hujjatlari markaziy davlat arxivi, Oʻzbekiston Respublikasi Kino-foto hujjatlar markaziy davlat arxivi kiritildi. Ushbu tuzilmaning Qoraqalpoq Respublikasi, viloyatlar, Toshkent shahri hududiy boshqarmalari hamda Qoraqalpoq Respublikasi, viloyatlar va Toshkent shahri davlat arxivlari hamda ularning filiallari tashkil etildi.

Mazkur 2004 yil 3 fevraldagi 49-sonli Qarorga Ilova sifatida “Oʻzarxiv” toʻgʻrisida Nizom qabul qilindi. Nizom 4 boʻlimdan iborat. I boʻlim “Umumiy qoidalar”, II boʻlim “Oʻzarxiv” agentligining asosiy vazifalari va funktsiyalari, III boʻlim “Oʻzarxiv” agentligining huquqlari va javobgarliklari, IV boʻlim “Oʻzarxiv” agentligi faoliyatini tashkil etish kabi nomlangan. Nizom Oʻzarxiv agentligi faoliyatining barcha sohalarini qamrab oluvchi hujjatdir.

“2008 yil 26 avgustda Vazirlar mahkamasi “Oʻzbekiston Respublikasida arxiv ishini yanada rivojlantirish toʻgʻrisida” yana bir muhim qaror qabul qildi. Qarorga muvofiq 2008-2011 yillarga moʻljallangan “Oʻzbekistonda arxiv ishini va uni boshqarishni takomillashtirish dasturi qabul qilindi.

2009 yil 3 noyabr kuni Oʻzbekiston Respublikasi Oliy majlisi “Arxiv ishi toʻgʻrisida” Qonun qabul qildi. 2010 yil 7 mayda bu

Qonunni Senat ma'qulladi. Qonun arxiv ishining takshiliy asoslarini, vazifalari va funktsiyalarini, huquqiy jihatlarini belgilab berdi (Mustaqillik davrida qabul qilingan arxiv haqidagi hujjatlar qo'llanmaga ilova qilinadi).

Ushbu qo'llanma arxiv ishiga zamonaviy talablardan kelib chiqib uzoq o'tmishdan to hozirgacha davlatchilik bosqichlarida ijtimoiy, siyosiy, iqtisodiy, huquqiy munosabatlarning hujjatlarda qayd etilishi, mahkamachilik tarixi, hujjatchilik madaniyatini o'rganishga xizmat qiladi, degan umidda yaratildi.

Arxivshunoslikning o'quv fani sifatida joriy etishdan **maqsad** – talabalarda Sharqda, jumladan, Markaziy Osiyo mintaqasida arxivshunoslik va arxiv ishining yo'lga qo'yilishi arxiv materiallaridan tarixiy ma'lumotlar olish masalalari bo'yicha tasavvur, bilim, ko'nikma va malaka shakllantirishdir.

Fanning **maqsqdi va vazifasi** talabalarga Markaziy Osiyo mintaqasida qadimdan to hozirgacha iltimoiy, iqtisodiy, siyosiy, ma'muriy boshqaruv, davlatchilikda mahkamachilik ish yuritish tizimi, devonxona ish usullari va arxivlashtirish tarixini yoritishdan iborat; talabalarni devonxona va arxiv ishining taraqqiyot dinamikasi bilan tanishtirish; qadimgi zamon arxivlarining tarixiy funksiyalari haqida ma'lumot berish; arxiv haqidagi materiallar orqali manbashunoslikning muhim sohasi haqida bilim berish, davlatchilik jarayonlari rivojida arxivshunoslikning ahamiyatini ko'rsatib berish bilan yosh tarixchi-sharqshunos kadrlarda arxiv tarixi faktlaridan o'z ilmiy, va amaliy faoliyatlarida samarali foydalanish malakasi hamda ko'nikmasini berish.

O'quv qo'llanmaning tuzilishi

Mazkur "Arxivshunoslik" o'quv qo'llanmasi uch bo'lim o'n bir paragrafdan iborat bo'lib, birinchi bo'lim to'rt paragrafdan tashkil topgan bo'lib, unda qadimgi va antik davr arxivlari tog'risida, ikkinchi bo'lim to'rt paragrafni qamragan bo'lib, unda Markaziy Osiyoning ilk va rivojlangan o'rta asrlar arxivlari, uchinchi bo'lim uch paragrafdan iborat bo'lib XIX asr so'nggi choragi va XX asr 90-yillarida O'zbekistonda arxiv ishi, hamda Mustaqil O'zbekistonda arxiv ishining takomillashuv holati to'g'risida ma'limot berilgan. Har bir bo'lim oxirida mavzuni o'zlashtirish uchun savol va topshiriqlar, mustaqil ta'lim uchun savol va topshiriqlar berilgan. Har bir mavzu boshida darsning maqsadi, tayanch iboralar keltirilgan. Qo'llanmaning oxirida glossariy, adabiyotlar ro'yxati va ilovalar berilgan.

I BO‘LIM. QADIMGI VA ANTIK DAVR ARXIVLARI

1-§. Arxivshunoslik kursining predmeti, metodologik asoslari, maqsad va vazifalari

Darsning maqsadi: *Arxivlar va arxivshunoslik ishi haqida tushuncha hosil qilish, arxivlarning tariximizni o‘rganishdagi o‘rni, Markaziy Osiyodagi qadimgi va o‘rta asr arxivlari to‘g‘risida ma’lumot berish, dars davomida erishilgan yutuqlarni tadqiqot ishlarida qo‘llay olish malakasini shakllantirish.*

Tayanch iboralar: Arxiv, arxivarius, arxivshunoslik, “Arxivlar to‘g‘risidagi” qonun, “O‘zbekiston Respublikasi Fanlar Akademisi-ning tarix institutining faoliyatini takomillashtirish to‘g‘risida”gi qaror, O‘zRMAF.

Arxivshunoslik – arxivlar haqidagi fan bo‘lib, arxiv ishining tarixi, arxiv faoliyatining vazifalari va xarakteri, ularni komplektatsiya qilish tamoyillari va arxiv hujjatlaridan foydalanishni o‘rganadi. Arxiv so‘zi atamasiga kelsak, bu lotincha “arxivium - hukumat binosi so‘zidan kelib chiqqan. Lekin “Arxiv” atamasining hozirgi qo‘llanish ma’nosi birmuncha kengroq. 1999 yil 15 apreldagi “Arxivlar to‘g‘risida”gi O‘zbekiston Respublikasi qonunining 3-moddasida “arxiv” tushunchasiga quyidagicha ta’rif berilgan; “Arxiv – arxiv hujjatlari majmui, shuningdek arxiv muassasasi yoki korxonalar, muassasa va tashkilotning arxiv hujjatlarini qabul qiluvchi, saqlovchi va ulardan foydalanuvchi tarkibiy bo‘linmasi”.

Arxivlar bu mustaqil muassasalar, tashkilotlar, korxonalar bo‘limi bo‘lib, hujjatli materiallarni, shuningdek muassasalar, jamiyatlar va ayrim shaxslarning ish faoliyati natijasida paydo bo‘lgan hujjatlar to‘plamlarini saqlaydi. Shuni alohida aytish kerakki, arxivlar manbalar to‘plami sifatida ilmiy izlanish maqsadlari, xo‘jaliklarning, davlat boshqaruvining, alohida shaxslarning, jamoat tashkilotlarining ehtiyojlariga xizmat qiladi. Arxiv hujjatlaridan foydalanish – bu tarixchi izlanishining poydevoridir. Mustaqil O‘zbekistonda tarix fanining rivojlanishida arxiv ma’lumotlari katta ahamiyatga egadir. Ma’limki, O‘zbekiston Respublikasida tarix fanini rivojlantirishga, tarixiy o‘tmishni ob’ektiv, xolisona o‘rganishga katta ahamiyat berilmoqda. Ma’naviyatni tiklashda, davlatimizni ma’naviy rivojlantirishda tarix asosiy elementdir.

O‘zbekiston Respublikasining prezidenti I.A.Karimov doimiy ravishda tarixiy qadriyatlarning dolzarb ahamiyatini ta’kidlab kelmoqdalar.

I.A.Karimovning asarlari va chiqishlarida, shuningdek– bir guruh tarixchi olimlar bilan 1998-yil 26-iyunidagi tarixiy uchrashuvida, O‘zbekiston Respublikasi Vazirlar Mahkamasining 1998-yil 27-iyuldagi “O‘zbekiston Respublikasi Fanlar Akademiyasi tarix institutining faoliyatini takomillashtirish to‘g‘risida”gi qarorida, tarixni o‘rganish ilmiy dunyoqarashni shakllantirishda, milliy mafkura asosida ma’naviyatni rivojlantirishda katta ahamiyatga ega ekanini ta’kidlangan edi.

Arxivshunoslik arxiv hujjatlashtirish ishlari, arxiv hujjatlariga ilmiy-texnikaviy ishlov berish uslublari va ularning tarixiy qimmatini aniqlash ekspertizasi, tarixchi-arxivchi olimlar faoliyati sohasi va arxiv ilmiy ma’lumotnoma apparatini tashkil qilish masalalari, arxivda tadqiqotchilik faoliyati, qimmatli arxiv hujjatlarini ommalashtirish va boshqalar bilan bog‘liq masalalarni tahlil qiladi.

O‘zbekistonda “Arxivshunoslik” fanining o‘quv qo‘llanmasi birinchi bor 1997-yilda I.A.Alimov, F.R.Ergashev, A.Bo‘tayevlar muallifligida nashr qilingan. Ikkinchi marta I.A.Alimov muallifligida 2005-yilda chop etildi. 1999-yilda O‘zbekiston Oliy Majlisi tomonidan “Arxivlar to‘g‘risida”gi Qonunning qabul qilinganligi munosabati bilan respublika arxiv ishida anchagina o‘zgarishlar sodir bo‘ldi. Davlat arxiv xizmati rivojida ayrim muvaffaqiyatlar qo‘lga kiritildi. Arxiv ishi bu davlat va nodavlat korxonalar, tashkilotlar va muassasalar arxiv hujjatlarini saqlashni tashkil etish, hisobga olish, markazlashtirish hamda ulardan foydalanishni tashkil qilish bilan bog‘liq faoliyatdir.

O‘zbekistonning milliy davlat sifatida rivojlanishi va bozor iqtisodiyoti yo‘liga o‘tishi arxiv ishidagi islohotlarni belgilab berdi. Sho‘ro’lar davrida xususiy tashkilotlar, korxonalar bo‘lmas edi, shuning uchun nodavlat arxiv fondlari ham yo‘q edi. Shu sababli ilgari O‘zbekiston Davlat arxivi fondida faqat davlat tashkilotlari, korxonalar va fuqaro’larning arxiv fondlari saqlanardi. Mustaqillik davrida O‘zbekiston davlat arxiv fondi o‘rniga O‘zbekiston Respublikasi Milliy arxiv fondi (O‘zRMAF) tashkil qilindi. Qonunda O‘zRMAF davlat va nodavlat arxiv fondlaridan tashkil topadi deyilgan. Nodavlat yuridik shaxslarning faoliyati natijasida to‘plangan arxiv hujjatlari, shuningdek fuqaro’larning shaxsiy arxivlari nodavlat arxiv fondini tashkil

qiladi. Demak, O‘zRMAFda davlat va nodavlat tashkilotlar, korxonalar, muassasalar, shaxslar arxiv fondlari saqlanadi.

Markaziy Osiyo hududida arxiv ishining vujudga kelishi va rivojlanishi davlatchilik tarixi, kichik va katta davlat uyushmalarining paydo qilinishi bilan bog‘liq. Har qanday arxivning asosida yozuv yotadi. Yozuv paydo bo‘lishi bilan muhim voqea-hodisalarni qandaydir qattiq narsalarga – devor, tosh, sopol buyumlar, metal taxtacha, yog‘och va yog‘och taxtachalarga qayd qilib borish an‘analari paydo bo‘ldi. Shunday qilib, muhim voqealar hujjatlashtirilib borilgan va hujjatlarni saqlash an‘anasi paydo bo‘lgan.

Kursimizning maqsad va vazifasi Markaziy Osiyoda arxiv ishining shakllanishi va yo‘lga qo‘yilishi, arxiv ish yuritishi tarixini o‘rganishdir. Arxiv ishi bu yangi davrda paydo bo‘lgan emas. Arxivlar qadimgi davrdan boshlab shakllangan. Markaziy Osiyo mintaqasi miloddan avvalgi I ming yillikning birinchi choragidan, ya‘ni ilk temir davridan boshlab hududiy davlatchilik jarayonlariga kirib kelgan. Manbalar Xvarasmiya, Sug‘uda, Mauri (Marg‘iyona), Baxdi (Baqtriya), Sakastana (Seiston), Xarxusha (Araxosiya) kabi davlat uyushmalari haqidagi ma‘lumotlar xronologik jihatdan mil av. VII-VI asrlarga taalluqli siyosiy tuzilmalar to‘g‘risida tasavvur beradi. Jahon miqyosida davlatchilik va davlat hujjatchiligi tarixi mil.av. IV ming yillik oxiri – III ming yillik birinchi choragidan boshlab kuzatiladi. Lekin u davr hujjatchiligida amal qilgan yozuv tasvir ifodali iyerogliflardan iborat edi. Mesopotamiya hududlarida esa dastlabki bo‘g‘inli, ponasimon belgi tizimlari yaratilgan edi. Markaziy Osiyo davlatchilik mahkamaviy ish yuritish haqida gap ketganda, bu amaliyotda yozuv madaniyatining yuqori saviyasini belgilovchi alifboli yozuv tizimlaridan foydalanilgan va bu davr miloddan avvalgi birinchi ming yillikning o‘rtalaridan boshlangan.

Ma‘lumki, Ahmoniylar saltanati O‘rta Osiyo va O‘rta Sharq mintaqasining katta qismini ham o‘z tasarrufiga olgan. Bu mintaqada Ahmoniylar davlatida amal qilgan oramiy yozuvli hujjatchilik saqlanib qolmagan. Biroq saltanat doirasiga kirgan Parfiya, Xorazm, Sug‘d va Baqtriya o‘lkalarida tez orada oramiy yozuvi asosida mahalliy tillarga muvofiqlashgan yangi alifbolar paydo bo‘lgan. Ayni shu alifbo tizimlarida yozilgan davlat hujjatlarini arxivlashtirish jarayoni miloddan avvalgi ming yillikning so‘nggi asrlarida va milodning I

asridan boshlab ko‘zga tashlanadi. Jumladan, Parfiya, Kushon, Xorazm, Sug‘d arxivlari fikrimizning dalili bo‘la oladi.

Ahmoniyalar salatanatida amal qilgan oramiy yozuvli va oramiy tilli hujjatchilik arxivlari saltanatning g‘arbiy qismiga taalluqli bo‘lib, bizning mavzuimizdan tashqaridadir (bular Elefantin arxivi - mil. avvalgi V asr, Suza arxivi - mil av. VI asr, Persepol arxivi - mil.av. V asr va boshqalar)¹.

Ahmoniyalar davlatidagi davlat hujjatlarini arxivlashtirish an‘analari Markaziy Osiyoga ham o‘z ta‘sirini o‘tkazgan. Jumladan, Afg‘onistonning shimolidagi Ravatak qishlog‘idan kushonlar davriga oid katta arxiv topilgan. U yerdan 80-yillarda 100 dan ortiq baqtriya hujjatlari topilgan, ular teri, mato va taxtachalarga yozilgan. 1948-yilda M.E.Mason rahbarligidagi Janubiy Turkmaniston arxeologik ekspeditsiyasi vakillari Eski Nisodan bir necha oramiy yozuvli sopol bo‘laklarini topishgan. Eski Nisodagi vino omboridan yozuvlar bitilgan 3000 dan ortiq sopol bo‘laklari topilgan. Fanga Eski Niso arxivi nomi bilan kirgan parfiya arxiv hujjatlari qadimgi tariximizni o‘rganishda muhim manba bo‘lib xizmat qiladi. Qadimgi Xorazm vohasining Ellikqal‘a massivi (hozirgi Qoraqalpog‘istonning Ellikqal‘a tumani)dan topilgan Tuproqal‘a arxivi va Mug‘ tog‘i Sug‘d hujjatlari arxivi tariximizdagi kam o‘rganilgan sahifalarni to‘ldirishda muhim hisoblanadi.

Zarafshon daryosining yuqori oqimida sug‘d hujjatlarining ulkan arxivi topilgan. Tarix fanida bu arxiv “Mug‘ tog‘i sug‘d hujjatlari” nomi bilan ataladi. Arablar bosqinidan keyin devonxona ish yuritish va arxivlashtirish ishlari yanada rivojlandi va kengaydi. Ayniqsa, ma‘muriy-xo‘jalik tizimi rivojlangan somoniylar davlatidagi davlat boshqaruvini alohida ko‘rsatish mumkin.

Tarixdan ma‘lumki, Buxoroda IX-X asrlarda Abu Ali Ibn Sino foydalangan arxiv – kutubxona bo‘lgan. Markaziy Osiyoda arxivlar XI-XII asrlarda Xorazm davlatida, keyinchalik Oltin O‘rda, Temuriylar, Shayboniylar, Ashtarxoniylar davrida ham mavjud edi.

O‘rta asrlarda Markaziy Osiyo mintaqasidagi barcha davlatlarda devonxona ish yuritishi va arxivlashtirish ishi keng tarqalgan. Jo‘ybor shayxlari arxivi, Buxoro amiri Qushbegi arxivi, Xiva xonligining

¹ Дандамаев М.А, Луконин В.А. Культура и экономика Древнего Ирана. – М., 1980; Дьяконов И.М. Люди города Ура. –М., 1990.

Qozilik arxivi, Turkiston general-gubernatorligi arxivi va boshqa arxivlar arxiv an'anasining davomiyligidir.

O'zbekiston Respublikasi Markaziy davlat arxivi o'zbek xalqining qo'lyozma hujjatlari saqlanadigan eng katta xazinasidir. Bu yerda saqlanayotgan eng qadimgi hujjatlar vaqfnomalar bo'lib, ular Somoniylar davridan boshlanadi. Shu davr vaqfnomalari O'zFA Sharqshunoslik instituti fondlarida hamda Madaniy Meros ob'ektlarini muhofaza qilish va ulardan foydalanish boshqarmasida ham saqlanmoqda.

Qadimgi davlatlarning, o'rta asr saltanatlari va so'nggi xonliklarning XIX asrgacha bo'lgan hujjatli manbalari bizgacha to'liq saqlanmagan. O'zaro urushlar, vayronagarchiliklar oqibatida arxiv hujjatlari yo'q bo'lib ketgan. Qo'qon va Xiva xonlari arxivlari, Buxoro amirligining qushbegi arxivi saqlanib qolgan. Podsho Rossiyasining Markaziy Osiyoni bosib olgandan keyingi davr arxivlari to'la saqlanib qolgan.

Xulosa shuki, mazkur "arxivshunoslik" kursida biz Markaziy Osiyoda paydo bo'lgan davlatlar va ularda arxiv ishining yo'lga qo'yilishi masalasi bilan tanishamiz va tarixni o'rganishda ulardan foydalanish imkoniyati hamda zaruriyati haqida fikr yuritamiz.

Savol va topshiriqlar:

1. Arxivlar haqida tushuncha bering?
2. Arxivshunoslik fanining predmetini bilasizmi?
3. Arxivshunoslik fanining maqsad va vazifalarini so'zlab bering?
4. Arxivlarning huquqiy-me'yoriy asoslari deganda nimani tushunasiz?
5. Arxiv ishi bo'yicha qanday manbalar va adabiyotlarni bilasiz?
6. Ahmoniylar salatanatida amal qilgan oramiy yozuvli va oramiy tili hujjatchilik arxivlari haqida ma'lumot bering?
7. O'tmish tariximizni o'rganishda arxiv hujjatlarining ro'li.
8. Arxivlarning hozirgi jamiyat hayotidagi ahamiyatini so'zlab bering?

Mustaqil ta'lim uchun savol va topshiriqlar:

1. *"Arxivlar to'g'risida"gi Qonunning qabul qilinishi va arxivlar sohasidagi o'zgarishlar.*
2. *Tariximizni o'rganishda arxiv hujjatlarining o'rni va ahamiyati.*
3. *O'zbekistonda arxiv ishining rivojlanish dinamikasi.*

2-§. Markaziy Osiyoda qadimiy yozuvlar, yozuv madaniyati va arxiv ishining vujudga kelishi

Darsning maqsadi: *Markaziy Osiyoda yozuv belgilarining paydo bo'lishi, yozuv madaniyatining shakllanish bosqichlari, oramiy yozuvi, parfiyoni, xorazmiy, sug'diy, oramiy-boxtariy, yunon-boxtar, arab yozuvlarining paydo bo'lishi to'g'risida ma'lumot berish.*

Tayanch iboralar: iyeroglif, ideograf, petroglif, issiq yozuvi, oramiy yozuvi, parfiyoni yozuvi, xorazmiy yozuvi, sug'diy yozuvi, oramiy-boxtariy yozuvi, yunon-boxtar yozuvi, arab yozuvi.

Yozuv insoniyat tarixida eng noyob kashfiyotlardan biri. Shartli chizma belgilar yordamida inson o'z fikrini tosh, yog'och, suyak, sopol buyumlar sirti kabilarga muhrlash tajribasiga erishguniga qadar million yillar ibtidoiy yovvoyilik holatida bo'lgan. Avvalo tafakkur-ning, so'ngra esa nutqning xossalarini anglash odamzodning olam ichra sharafli o'rnini belgilab bergan desak mubolag'a bo'lmaydi. Nutq inson va faqat insonga musharraf etilgan beqiyos ne'mat ekan, yozuv uni makon va zamonlar osha uzatish, o'tmishni bugungi kun bilan bog'lash imkoni sifatida yanada muhim va noyob madaniy hodisa bo'ldi. Ayni yozuv insoniyat sivilizatsiyasining yaxlitligiga xizmat qila boshladi.

Jahon miqyosida yozuv yaratilganiga besh ming yildan oshdi deb hisoblanadi. Umuman inson biror belgini chizibmi yo o'yib va yoki bo'yab qoldirsa u o'zidan iz qoldirdi demak. Bu ma'noda tosh asri-ning turli bosqichlaridayoq odamzod bir muncha tajribaga ega edi. Jahon bo'ylab qoya toshlarda saqlangan son-sanoqsiz rang-bo'yoq yoki tirnab – o'yib ishlangan suratlar ham ma'lum ma'no tashish vazifasini o'tagan. Ularda ham voqelik, turli xil munosabatlar aks etgan. Masalan, odam nimanidir e'zozlagan, nimanidir daf etishni o'ylab suratga sirli kuch bag'ishlamoqchi bo'lgan. Qadimiy ovchilar hayot uchun eng zarur faoliyat – ov oldidan o'zlariga omad tilab, qoya toshlar sirtiga o'yib ishlangan baroridan kelgan ov tasvirlari poyida marosimlar qilishgan. Masalan, Zaraut kamar g'oridagi yovvoyi ho'kiz ovi manzarasi, Sarmishsoy qoyalaridagi ov chog'i tasvirlari, ularning oldida marosim raqsiga tushayotgan ibtidoiy ovchilar va boshqalarni eslash kifoya. Biroq qadimiy qoyatosh suratlari hali yozuv emas edi. Ular qandaydir axborot tashishlari mumkindir. Lekin tasvir-

larni istagan kishi istagan tilda tasvirlashi mumkin. Qoya tosh suratlari inson nutqiga bog‘lanmagan edi.

Jahon yozuv amaliyoti tarixida iyeroglif, ideograf tasvir yozuv tajribasi ham olg‘a qo‘yilgan bir qadam edi. Bu o‘rinda tasvirlarning ma‘nosini ochib beruvchi aniqlagich belgilar orqali Misr iyeroglifi suratli tizim Qadimgi Misr tili bilan bog‘langan. Xitoy iyeroglif yozuvi ham dastlab tasvirlardan boshlanib, asta-sekin shartli ramziy chizma shakllarga kirgan. Qadimgi Hindiston suratli yozuvi haligacha ishonchli o‘qilgan emas. Fest diskidagi (doira shaklidagi sopolak yuzasidagi) suratlarning yozuv sifatidagi mazmuni haqida bahslar uch asr yuzini ko‘rmoqda va hokazo.

Yozuv tarixida harf – tovush, ya’ni bir harf bir tovush birligini ifoda etadigan shartli belgilar tizimi – alifbo paydo bo‘lgunicha inson nutqining tabiatini tushuna borish barobarida yozuvning “belgi-jumla”, “belgi-so‘z”, “belgi-bo‘g‘in” va nihoyat, belgi-tovush kabi murakkab izlanishlar bosqichlari bo‘lib o‘tgan. Ayni harf-tovush, bir belgiga bir fonema to‘g‘ri keladigan yozuv bu sohadagi kashfiyotchilikning yuksak bosqichi hisoblanadi.

Markaziy Osiyo xalqlari yozuv madaniyati tarixida ana shu bosqich o‘zining xilma-xil mahalliy yozuv-alifbo tizimlari bilan alohida ajralib turadi. Bu o‘rinda aytish lozimki, genetik asoslari jihatidan asl mahalliy, tub joy va chetdan o‘zlashtirilgan yozuvlar farqlanadi. Masalan, Qadimgi Xorazmda Qora tobe qoya toshidagi chizmalar va boshqalar. Bu belgilar ko‘pincha shu qadar qorishtirib yuboriladiki, ularni diqqat bilan kuzatib payqash mumkin. S.P.Tolstov Qora tobe qoya chizmalarini qisman Moxenjo Daro (Hindiston)ning qadimiy yozuviga o‘xshashligini ta’kidlagan holda piktogrammadan (rasmli suratli yozuv bosqichidan) ideogrammaga o‘ta boshlash davriga oid deb taxmin bildirgan².

Xuddi shu kabi o‘qilishi bahsli bo‘lib kelayotgan Issiq Qo‘rg‘oni (Olmoti shahri yaqinidagi sak shahzodasining qo‘rg‘on-qabri)dan topilgan kumush idish sirtidagi yozuv ham tub joy kashfiyoti deb baholanishi mumkin. “Issiq yozuvi” nomi bilan yuritilayotgan bu topilmada aks etgan “harf” belgilar Markaziy Osiyo bo‘ylab Janubiy O‘zbekistonda, Afg‘onistonda topilgan. Demak, Issiq yozuvi ulkan mintaqada tarqalgan qadimiy tub yer alifbolarimizdan biri, deb baholash mumkindir.

² Толстов С.П. Древний Хорезм. – М., 1948. – С.71-76.

Miloddan avvalgi I ming yillik o'rtalarida Markaziy Osiyoning ulkan qismi, G'arbda Misrgacha barcha Old Osiyo shomiy xalqlar yurtlari ham Qadimgi Eron ahmoniylar sulolaviy saltanati tomonidan bosib olingan edi. Eron saltanati davlat mahkama ishlarida ayni shu Old Osiyo o'lkalarida, xususan, Kan'on (Finikiya) yurtida yaratilib, keyinchalik mil.avv. X-IX asrlarda oramiy qabilalari tomonidan o'zlashtirilgan yozuvdan foydalanishgan. Tabiiyki, Eron ahmoniy humdorlari saltanat miqyosida bir xil, ya'ni oramiy yozuvli mahkama ishlashidan manfaatdor edilar. Shunday qilib, butun saltanat bo'ylab barcha satrapliklarda, jumladan, Parfiya, Xorazm, Sug'd, Marg'iyona, Boxtar yurti va boshqalarda oramiy yozuvi amal qildi. Buning ustiga mahkamachilik ishlarida oramiy kotiblari ish yuritganlari uchun hujjatchilik ham dastlab oramiy tilida olib borilgan. Kotiblar hujjat mazmunini fors amaldorlariga forsha bayon qilib berish odati yuzaga kelgan. Biroq, Eron saltanati davom etgani sari barcha satrapliklarni oramiy kotiblar bilan ta'minlashning iloji bo'lmay qoldi. Kotibiyat asta-sekin mahalliy ziyolilar qo'lga o'ta boshladi. Bular endi oramiy tilini bilmaydigan yangi avlod edi. Natijada hujjatlarni oramiy yozuvida mahalliy tillarda tuzishga amal qila boshlandi. Bu tajribaning bir jihati bor edi. Bu ham bo'lsa, matn tuzishda ko'p takrorlanadigan so'zlar, ba'zi so'z birikmalari oramiycha yozilishi edi. Ammo bu kabi oramiycha so'zlarning jumlar ichida grammatik bog'lanishi uchun mahalliy til qo'shimchalari ishlatilar edi. Ayni shu grammatik ko'rsatkichlar hujjat tilining mahalliy tilda ekanini ko'rsatadi. Mahalliy tillardagi matnlarda oramiycha so'zlar (ular asosan so'z o'zaklari) hujjatni o'qishda oramiycha o'qilmagan. Chunki oramiycha so'z mahalliy tildagi mazmunan to'g'ri keladigan so'zni talaffuz qilish uchun darakchi (signal) vazifasini o'tagan. Masalan;, matnda MLKA (malik so'zi o'zagi) yozilgan bo'lsa, sug'dcha ixshid "podsho" deb o'qilgan; BARI so'zi sug'dcha jote "o'g'il"; XMR so'zi madu "may, vino"; AHN so'zi bratar "aka" yoki "uka" kabi, MRAY – xvabu (xitav) "hokim" kabi o'qish uchun so'z – ishorat (signal) bo'lgan. Matn tuzishda o'zga til so'zlarining "so'z-signal" vazifasida ishlatish yozuv tarixida geterografiya deyiladi. Buning ma'nosi o'z tili so'zlarini o'zga tildan "qolip" so'zlar orqali ifodalash demakdir.

Shunday qilib, Markaziy Osiyoda miloddan avvalgi V-IV asrlardan boshlab oramiy alifbosi asosida, uning harflarini mahalliy tillar fonetik xususiyatlarini ifodalashga moslashtirilgan mustaqil alifboli

yozuvlar paydo bo'ldi. Bular parfiyoniy, xorazmiy, sug'diy, oramiy-boxtariy yozuvlari edi. Keyinchalik bu o'lkalarda, xususan, Hindistonda oramiy asosida paydo bo'lgan kxaroshtxi, braxmi yozuvlari ham tarqalgan. Boxtar o'lkasida esa Yunon-boxtar davlati amal qilgan mil.avv. III asr o'rtalaridan I asr o'rtalarigacha yunon yozuvi amal qilgan edi. Milodiy I asrda Kushon podsholik sulolasi vakili Kanishka davrida yunon yozuvini mahalliy boxtar tiliga moslashtirib yunon-boxtar yozuviga asos solindi. Bu yozuv arab istilosi davrlariga qadar amal qildi. Ayniqsa, uning tezkor ravon usuli eftaliy yozuvi deb shartli ravishda atalgan davri ham bor.

Mazkur yozuvlar orasida sug'd yozuvining mavqei baland, tarqalish maydoni xalqaro miqyosda edi. Buning sababi Buyuk ipak yo'li bo'ylab xalqaro savdo – madaniy aloqalarda sug'd xalqining faol ishtiroki bilan izohlanadi. Natijada sug'd alifbosi asosida uning kursiv (ravon tezkor) xusnixat shaklining bevosita ta'sirida uyg'ur-turkiy yozuv yuzaga kelgan. Sug'd yozuvi ta'sirida keyinchalik yozuv yaratish mo'g'ullarga, manchjurlarga, va nihoyat, koreys xalqigacha yetib borgan. Bu o'rinda koreys yozuvining yaratilish tarixini hozir VII-VIII asrlar bilan bog'liq deb isbotlangani madaniy ta'sirlarning qadimiy ildizlarini bilish ma'nosida muhim yangilikdir. Koreys alifboli yozuvi Koguryo, Pekche, Shilla (Silla) davlatchilik bosqichlaridan keyin bir necha asr Xitoyning siyosiy va zo'rma-zo'raki madaniy ta'sirini singdirishga urinishlar tufayli hayotga joriy etilishi qiyin bo'lgan. Biroq, Koryo va Choson qirolliklari davrida, xususan, Koreyani kuchli mustaqil davlatga aylantirish yo'lida katta islohot ishlarini amalga oshirgan qiro'l Sechjon (1418-1450) davrida koreys yozuvini yanada mukammallashtirib, 28 harfli alifbo sifatida maxsus buyruq bilan joriy etildi.

Markaziy Osiyoning qadimiy yozuvlari oramiy alifbosini davom ettirganlari sababli o'sha ajdod alifbodagi kabi 22 harfli belgilar tizimidan iborat bo'lgan: alif, beyt, gimal, dalet, ha, vav, zayn, xet, tet, yoy, kof, lom, mim, nun, se, a'yn, pe, tsadde, qof, resh, shin, tau – bular oramiy harflarining an'anaviy "nomlari". Asli bularning o'zi kan'oniy (finikiy) yozuvining davomida paydo bo'lgan. Holbuki, hali hanuz ushbu sal kam 3500 yillik qadimiy alifbo tizimlarining nomlari zamonaviy alifbo tizimlarining tartibida, ba'zi siljishlarni e'tiborga olmasak, saqlanib kelmoqda: alif, be, te, se, yu, jim, dol, zol, va h.k.; alfa, beta, gamma, delta.....; ey, bi, si, di....., a, b, v, g, d..... va hokazo.

Yuqorida qayd etilgan qadimiy Markaziy Osiyo yozuvlaridan parfiyoniy, xorazmiy, sug'diy, uyg'ur-turkiy, oramiy-boxtar, yunon-boxtar,

oʻrta fors pahlaviy, nihoyat qadimgi turkiy yozuvlarning tarixiy manbashunoslik uchun, bu sohaning muhim yordamchi ilmiy-amaliy tarmogʻi – arxivshunoslik uchun ahamiyati beqiyos katta. Zero, arab yozuvi kirib kelib, bu yozuvlarning mavqei yoʻqola borganiga qadar bitilgan koʻp miqdordagi yozma yodgorliklarni ushbu qadimiy yozuvlarni bilmay turib oʻrganishning aslo iloji yoʻq. Masalan;, birgina parfiyoniy yozuvida Eski Niso xarobalaridan 3000 dan ortiq hujjatlar, bir qancha qoya tosh bitiklari, xorazmiy yozuvida Tuproqqalʼa arxivi, Aybuyir qalʼa, Oqchaxon, Mizdaxkan, Xumbuz tepa, Yakka Porson bitigi, sugʻd yozuvida Mugʻ togʻi sugʻd arxividan tashqari oʻnlab buddaviy, moniycha, diniy-falsafiy, ahloqiy asarlar epigrafik yodgorliklar yetib kelgan. 25 harfdan iborat yunon-boxtar alifbosi zaminidagi boxtar yozuvining Oʻzbekiston va Tojikistonning janubiy hududlaridan topilgan namunalardan tashqari Afgʻonistonda yaqinda muhim hujjatlar majmui – ijtimoiy, iqtisodiy munosabatlarga oid yuzdan ortiq boxtariy tilli hujjatlar – Ravatak arxivining topilishi favqulodda hodisa boʻldi.

Oʻlkamizga arab yozuvining rasman kirib kelishi (milodiy VIII asr oʻrtalarida bevosita, halifa Xishom II davri) ajdodlarimizning qadimiy yozuv madaniyatini taʼqiqlash orqali amalga oshirilgan. Bir tomondan, bu hodisa mintaqamiz xalqlarini yangi jahon sivilizatsiya maydonlariga olib chiqqani bilan belgili boʻlsa, ikkinchi tomondan, asrlar osha avaylab kelingan yuksak madaniy anʼanalarning chuqur transformatsiyasiga yoʻl ochib berdi. Tez orada oʻlkamiz xalqlari oʻzlari uchun yangi yozuv madaniyati tajribasiga, keng maʼnoda ommaning savodxonlik darajasi yangi arab yozuviga oʻtishda qoʻl keldi. Qolaversa, qadimgi turkiy sugʻdiylar, xorazmiy va boshqalar oʻzlari asrlar osha foydalanib kelgan yozuvlarning arab yozuvi bilan genetik asoslari bir ekani, bir manbadan turli yoʻnalishlarda tarqalganini ongli qabul qilganlar. Natijada oramiy yozuvi alifbo tizimidagi harflarning tovush ifodalash bilan bogʻliq ichki maʼnosini oʻz tillarining fonetik talablariga javob beradigan qilib, harftovush funksional sohasini qisman oʻzgartirganlar. Masalan;, sugʻdlar **bet** harfini faqat **lab-lab** b tovush uchun, **h (he)** harfidan oʻz tillarida xos tovush boʻlmagani uchun 1) satr oxirida boʻsh qolgan oʻrinni toʻldirish; 2) muannas (ayol grammatik jins) maʼnoni koʻrsatish belgisi qilib foydalanishgan. X (xet) harfiga mos tovush boʻlmagani uchun undan sugʻdchada deyarli foydalanilmagan. Xut faqat geterografik oramiycha AXR – oʻzagida “soʻngra, undan soʻng” maʼnolari uchun ishlatilgan. Sugʻd tilida portlovchi d tovushi boʻlmagan. Shu sababli oramiycha dol harfi sugʻdcha matnlarda yoʻq. Lekin sugʻdlar alifbo qatorida dol harfi

bo'lganini bilishgan. Buni VII asr oxiri VIII asr boshida Panch shahri saroy maktabi (dabiriston)da ta'lim olgan o'quvchining sopol parchasidagi mashq uchun yozgan alifbosida dol harfi borligi tasdiqlaydi. Bundan tashqari sug'd tilida l tovushi bo'lmagani sababli oramiycha lom harfi til oldi sirg'aluvchi th kabi tovushning jarangli va jarangsiz variantlarini ifodalagan. Sug'dlar keng xalqaro munosabatlar doirasi bilan faol bog'liq bo'lganlari, shu tufayli o'zlari muloqot qilgan xalqlar tilida mavjud l tovushini zarur o'rinda ishlatishga majbur bo'lishgan. Shu ehtiyoj yuzasidan sug'dlar alifbosida 23 – harf paydo bo'lgan. Bu harf biror kashfiyot emas, balki 12-raqam ostidagi lom harfining takroran yozilishi bo'lgan. Demak, sug'dlar asl oramiy alifbosidagi lom harfining qaysi tovush uchun ishlatilganini bilishgan va bu harfdan qo'shni xalqlar tilidan kiradigan l tovushli so'zlarni yozishda foydalanishgan. Nihoyat oramiycha tsadde harfi sug'dcha R (Sh) tovushini ifodalashga bo'ysindirilgan. Oramiycha q (qof) harfi ham sug'dchada tovush ifodasiga ega emas. Qof harfi hozirgacha ma'lum sug'dcha matnlarda bir martagina ("Eski xatlar" nomli IV asrga oid maktublar turkumining V matnida) "100" (yuz) raqamini ifodalash uchun ishlatilgan.

Arab yozuvi bosqichida ham qadim ajdodlarimiz yozuv madaniyatining peshqadamlari qatorida bo'lishgan. Yetib kelgan kitobat yodgorliklarida, epigrafik obidalarda o'lkamiz hattotlari qo'li bilan o'yilgan, koshin parchalaridan yig'ilgan naqshin bitiklar arab xatining turli grafik usullari va husnixat shakllarida bajarilgan. Ayniqsa, ko'p foydalanilgan xat turlari ko'fa va uning variantlari, nasta'liq, suls va shikasta shakllaridir. Bulardan tashqari arab yozuvi epigrafik yodgorliklari orasida ko'p turli muhra naqshin bitiklar usulidan ham foydalanilgan. Ular imorat peshtoqlari, ustunlari va burchak naqshlaridir. Gumbaz ostidan roviy yozuvlarda va imorat dekorativ yozuvlarida asosan Qur'on va Hadis matnlaridan ibratli parchalar bitilar edi. Umuman imorat bezak yozuvlarining g'oyaviy asosi devorlar yuzasidagi "al-mulk lillah" jumlasiga qo'shimcha dek hisoblanadi.

Arab yozuvining kitobiy husnixat turlari ham bir qancha. Kitoblar nasx, ta'lik, nasta'liq, suls kabi mashhur xatlar bilan bitilgan. Ularning boshlov lavhalarida ko'pincha ko'fa yozuvining badiiy turlaridan hamda shikasta usulidan foydalanilgan.

Markaziy Osiyoda arab yozuvining VIII asrdayoq faol o'zlash-tirilishi va mahalliy tillarga modifikatsiya qilingan alifbolarning tezda shakllanishi bejiz hodisa emas edi. Buning ostida ajdodlarimizning salkam uch ming yillik yozuv an'analari va madaniyati yotar edi.

Savol va topshiriqlar:

1. Markaziy Osiyoda yozuv madaniyatining shakllanish bosqichlari?
2. O'tmish tariximiz haqida aniq ma'lumot beradigan eng noyob kashfiyot haqida ma'lumot bering?
3. Markaziy Osiyoda oramiy yozuvining tarqalishi?
4. Oramiy yozuvi amal qilgan hududlarni ko'rsating?
5. Markaziy Osiyoda yunon-boxtar yozuvining paydo bo'lishi shart-sharoitlari?
6. "Issiq yozuvi" haqida nimalarni bilasiz?
7. Markaziy Osiyoda qo'llanilgan qadimiy yozuvlar haqida so'zlab bering?
8. Markaziy Osiyo mintaqasiga arab yozuvining kirib kelishi.

Mustaqil ta'lim uchun savol va topshiriqlar:

1. *Markaziy Osiyoda ilk yozuvning paydo bo'lishi.*
2. *Markaziy Osiyoda boxtariy yozuvining shakllanishi.*

3-§. Ahmoniyalar hukmronligi davrida Yaqin Sharq arxiv ishi an'analari Markaziy Osiyo xalqlariga ta'siri

Darsning maqsadi: *Markaziy Osiyoning ahmoniyalar davlati tomonidan bosib olinishi, ahmoniyalar davrining turli xil yozma manbalar bilan hujjatlashtirilganligi, qadimgi fors, elam va akkad tillarida yozilgan hujjatlar, Behistun va Naqshi Rostam yodgorliklari, Avesta, Elam hujjatlari, Persepol arxivi, Akkad matnlari, oramiy matnlari, demotik matnlar to'g'risida talabalarga tushuncha berish va matnlarni o'qishga va tahlil qilishga o'rgatish.*

Tayanch iboralar: ahmoniyalar sulolasi, qoyalardagi yodnomalar, Avesta matnlari, Elam hujjatlari, mixxat yozuvlari, Persepol arxivi, akkad matnlari, oramiy matnlari, demotik matnlar.

Qadimgi Eronning ahmoniyalar davri turli xil yozma manbalar bilan kengroq hujjatlashtirilgan. Bular shohlar yozuvlari, tarixiy yilnomalar, qonunchilik farmoyishlari, shohlarning farmonlari va satraplarning farmoyishlari, raiyatning viloyat hokimlariga yozilgan shikoyatlari, eronlik yuqori amaldorlarning shaxsiy xatlari, mulklarni boshqarish yuzasidan ko'rsatmalar, soliqlarni yig'ish va qullarga munosabat, soliqlarni to'laganlik haqida kvitansiya (patta), harbiy majburiyatlarni o'taganlik haqi-

da hujjatlar, sud jarayoni bayonnomalari, nikoh shartnomalari, arenda shartnomalari, qarzdorlik tilxatlari, diniy va ilmiy asarlar, adabiy qissalar va boshqalar. Turli xil tillarda yozilgan bu matnlar Eron davlati aholisining tarixiy voqealar jarayonini, iqtisodiy va ijtimoiy tarixini o'rganish, madaniy hayoti, kundalik hayot tarzi, turmushi va urf-odatlarini o'rganishda katta imkoniyat beradi.

Ahmoniyalar davrida yozuvlar va ularning amaliyoti

Ahmoniyalar epigrafik mixxat yozuvlarining deyarli barchasi qadimgi fors, elam va akkad tillarida yozilgan. Ular tarixiy voqealarning qimmatli guvohligi ekanidan tashqari turli tillardagi ijtimoiy leksikani taqqoslashga yordam beradi. Muhim savdo yo'llaridan, shohlarning qabrlari, saroylarning devorlari va ustunlaridan yoki metal buyumlardan, quro'llar va tosh vazalardan va muhrlardan topilgan juda ko'plab yozuvlar nashr qilindi. Ba'zi yozuvlar saroy poydevorlaridan topilgan, bular quruvchilar tomonidan qurilish jarayonida yotqizilgan.

Qadimgi fors yozuvlarining ko'pchiligi Eron, Elam va Midiyadan topilgan. Ulardan eng kattasi – bu Behistun yozuvlaridir. Bu yozuv Kambiz hukmronligining oxirlaridagi voqealarni va Doro I podsholigining birinchi yillaridagi tarixiy voqealarni o'zida aks ettirgan. Behistun yozuvi Kirmonshohdan sharqda 30 km masofadagi Bobil bilan Ekbatanni bir-biriga bog'laydigan karvon yo'li ustidan topilgan. Bu karvon yo'li baqtriya-hind chegaralarigacha davom etgan. Yozuv 105 m balandlikda tik tog' qoyasiga yozilgan.

Yozuvning umumiy balandligi 7,80 m, eni 22 m. Yozuv markazida beshta ustunli qadimgi fors varianti, ularning dastlabki to'rttasi eniga 2 m dan kam bo'lmagan joyni egallaydi, balandligi 4 m keladi. Jami qadimgi eron matni 515 qator, fors matni ustida balandligi 3 m va eni 5,48 m keladigan relyef (bo'rtma tasvir) lavhasi bor. Unda Doro o'zini podsho qilib ko'rsatadi va unga bo'ysingan shohlar ustidan qozongan zafarini ko'z-ko'z qladi.

Relyefdan o'ngda dastlabki elam variantining o'chirilgan tik qatorlari bo'lib, relyefni kengaytirish maqsadida yozuvni qoyaga yozganlar tomonidan o'chirilgan bo'lgan. Har bir qator balandligi 2,10 m bo'lib, eniga 1,5 m. dir. Elam matni 323 qatorni tashkil qiladi. Fors variantidan o'ng tomonda, ancha keyingi uchta ustun xat mavjud bo'lib, u dastlabki elam variantining nusxasidir va birinchi to'rt ustunli fors matniga mos tushadi. Har ikkala variantda 650 qator elam

yozuvi bor. Relyefdan chapda akkad varianti boʻlib, eni 3,23 m. dan 4,36 m gacha va balandligi 3,16 m. dan 3,37 m. gacha, 141 uzun qatorli yozuvdir. Bundan tashqari 11 kichik yozuvlar boʻlib, ular uch tilda yozilgan va boʻrtma tasvirlar yaqiniga joylashtirilgan. 1963-64-yillarda Tehronda oʻsha vaqtdagi Gʻarbiy Germaniya arxeologiya instituti ekspeditsiyasi yozuvlarni sinchiklab oʻrganib, relyefni rasmga olgan.

Doro I ning boshqa bir yozuvi Persepoldan shimoldagi Naqshi Rostamda yozilgan. Ahmoniylar shohlari qabrlariga kirishda, qoyaga mixxat xatida Doro I ning qadimgi eron, elam va akkad yozuvlaridagi xatlari yozilgan. Unda shoh shajarasi va Eronga tobe mamlakatlar roʻyxati hamda etnik va huquqiy asoslari bitilgan boʻlib, Doro I mamlakatni idora qilishda undan foydalangan. U yerda Doro I ning aksi tushirilgan relef ham bor. Kserksning yozuvi ham saqlanib qolgan.

Doro I va Kserksning Persepol va Suzadagi yozuvlari muhim ahamiyatga ega. Shularning muhimlaridan biri, Persepolda Doro yozuvi bilan oltin va kumushga yozilgan garov xatlaridir. Suzada Doro I ning saroyida yozuvlarning koʻplab nusxalari topilgan. Marmar, loy taxtachalarga va gʻishtlarga bitilgan yozuvlar topilgan. Bu yozuvlarning baʼzilari shoh saroyining turli joylariga, baʼzan poydevorlariga qoʻyilgan.

1970 va 1972-yillarda fransuz arxeologlari tekshirish natijasida noyob yozuvlarni topishgan. 1972 yilda ular Doro I ning 3 metrli haykalini topganlar (boshi saqlanmagan). Unda qadimgi fors, elam, akkad va misr iyerogliflari bilan bitilgan matnlar boʻlgan. Bular saltanatning turli qismlariga turli tillarda jonatilgan deklarativ matnlar va farmonlarning nusxalari hisoblanadi.

Persepol va Pasargadda Kserksning toshga oʻyilgan yozuvi topilgan boʻlib, taʼqiqlangan xudolarning tangrilari bilan kurashi haqida maʼlumot berilgan.

Soʻnggi ahmoniylar podsholarining tarix uchun muhim ahamiyatga ega boʻlgan yozuvlari ham topilgan. Bundan tashqari, Eronda oʻndan ortiq oltin va kumush idishlar topilgan boʻlib, ularda qadimgi fors mixxat yozuvi yoki uch tilli (elam, akkad va fors tillaridagi) matnlar (trilingvalar) topilgan.

Bir qator ahmoniylar davri yozuvlari Midiyadan topilgan. Hamadon yaqinida mixxat yozuvli trilingva, oltin va kumush plastinkalarda yozuvlar topilgan. Bular Ekbatanadagi (hozirgi Hamadon) Doro I

saroyi poydevoriga qo'yilgan. Bobilda shoh saroyi xarobasida toshga o'yilgan Bexistun yozuvi variantining parchasi topilgan. Uruqda mixxat yozuvidagi trilingva bitilgan alebastr vaza (ayoq) topilgan.

Misrdan ahmoniylar yozuvlari topilgan. U Doro I ning Suvaysh kanali qurilishidagi eski fors, elam, akkad va misr iyeroglif yozuvidagi uchta tosh lavhadir. Erondagi Suza shahri xarobalaridan ko'plab vazalar (ayoqlar) topilgan bo'lib, ular Misrda tayyorlanib, Eronga keltirilgan.

1952-1955-yillarda turk arxeologlari tomonidan Kichik Osiyodagi Eron satrapi poytaxti Daskildan ahmoniylar davriga oid 300 ga yaqin farmonlar arxivi topilgan. Ulardan 41 tasi mixxat yozuvida va oramiy yozuvidagi muxrlar (bullalar) bilan tasdiqlangan³.

Xullas, ahmoniy podshohlarining qadimgi fors mixxat yozuvi o'yib tushirilgan muxrlari ko'plab saqlanib qolgan. Jumladan, Moskvada Artakserk (Artaxshastra) II ning tasviri tushirilgan mixxat yozuvli muxri saqlanmoqda.

Avesta

Avesta ilk bora kitobga oramiy yozuvi yordamida yozib birlashtirilgan deb hisoblanadi. Avestaning oramiy yozuvli nusxasi esa yunon-makedon bosqini davrida Aleksandrning buyrug'i bilan olovga tashlangan, degan xabarlar manbalarda yetib kelgan. Bu o'rinda ta'kidlash lozimki, gap Avestaning 12 ming mol terisiga oltin harflar bilan yozilgan va "Doro ibn Doro" saroyi xazinasida (ya'ni xos arxiv yoki kutubxonada) saqlangan nusxasi haqida bormoqda. Shunday qilib, Avesta kitobi yo'q qilingach, uni mobadlar xotirasida (yod olingan holda) avloddan avlodga o'tib kelgan shaklida qayta yozib olishga qaratilgan harakatlar ko'p marta takrorlangan. Dastlabki urinish Parfiya podshosi Valaxsh (Vologez) davrida (miloddan avv. I asr oxiri – milodiy I asr boshlari), keyinchalik zardushtiylik Eronga kirib borib davlat dini maqomiga ko'tarilgan III asrdan boshlab to milodiy VI asr o'rtalarigacha Avestani to'liq tiklashga harakatlar takror-takror amalga oshirilgan. Nihoyat, milodiy 532-579-yillarda podsholik qilgan Xusrav I Anushirvan davrida bu ish payoniga yetib, Avesta 21 kitob (nasklar) shaklida tiklangan. Bu orada O'rta Osiyo

³Hujjat o'rami bog'langan tizimcha ustidan yopishtirilgan loyga bosilgan muhr izlari bulla deyiladi. Bu loy muhr hujjatni adresatga yetguncha hech kim ochmaganiga guvohdir. Adresat hujjatni ochgan paytda loy muhr sinib parchalangan. Ularni arxeologlar shu holda topishgan.

xalqlari ogʻzaki ravishda Avesta matnlari avloddan-avlodga uzatishda davom etishgan. Chunki zardushtiylikda din amali uchun har bir xonadon otasi javobgar deb hisoblangan.

Milodiy VI asrga kelib kitob shaklida tiklangan Avestaning taqdiri ogʻir kechdi. Arab istilosi va islom dini joriy etilishi tufayli zardushtiylik va Avesta oʻz oʻrnini musulmonchilik va Qurʻonga boʻshatib bera boshladi. Bunga islomdagi vahdoniyatning mutloqligi va zardushtiylikda yaratganning yakkaligi gʻoyasidan chekinish (turli maʼbud va maʼbudalarga sigʻinishga yoʻl berilishi) kabi farq katta roʻl oʻynagan.

Markaziy Osiyo va Oʻrta Sharq mintaqalarida islom keng tarqalgan vaziyatda zardushtiylikni saqlab qolishga harakat qilgan ayrim jamoalar islom oʻlkalaridan qochib Hindistonga, uning Mumbay va Gujarot viloyatlariga joylashganlar. Ayni shu jamoalar Avestaning eng muhim nasklarini – Yashna, Videvdat, Visparat, Yasht qismlarini saqlab bugungi kungacha yetkazganlar. Hozirda Avestaning eng qadimiy qoʻlyozmasi Daniyada Kopengagen kutubxonasida saqlanmoqda. Oʻzbekistonda shu nusxa asosidagi faksimil nashrning bir nusxasi Fanlar akademiyasi Bosh kutubxonasida mavjud.

Avesta faqat shu kitobni yozib olish uchun maxsus yaratilgan 51 harfli alifbo yordamida koʻchirilgan va oʻta eʼzozlangan kitob boʻlgani uchun podshohlar xazinalarida, ibodatxonalar (otashkadalari)ning moʻtabar zahiralarida saqlangan.

Avestaning tarixiy manba sifatidagi ahamiyati benihoya katta. Unda asotiriy tasavvurlardan boshlab ulkan tarixiy, ijtimoiy, madaniy, maʼnaviy jarayonlar, huquqiy masalalar aks etgan.

Elam hujjatlari

Suza arxivi. Fransuz arxeologlari tomonidan Suzadagi akropolda qazish ishlari davrida elam xoʻjalik hujjatlari arxivi topilgan. U erdan 300 tadan ortiq taxtachaga bitilgan hujjatlar topib oʻrganilgan. Matnlar sanasi yoʻq, lekin mazmuniga koʻra, ularni ilk ahmoniylar davriga (Kir II podsholigi davriga) taalluqli boʻlishi mumkin deb hisoblanadi. Biroq, bu hujjatlarni soʻnggi Elam podsholigi yillari bilan belgilash mumkin (650-630 yy.) yoki bobilliklarning Suzani bosib olish davri (600-560 yy.) bilan bogʻlash mumkin. Elam hujjatlari qadimgi eronliklar haqida muhim maʼlumotlar beradi. Masalan, bir hujjat ahmoniylar davri Doro I yoki Artakserks I podsholigi davri bilan belgilangan. Hozircha bu taxtacha (табличка)ning boshqa taxtachalar

bilan bog‘liqligi aniqlanmagan. Hujjatlar V.Sheyl tomonidan nashr qilingan, rus tiliga tarjimasi Yu.B.Yusufov tomonidan amalga oshirilgan. Yu.B.Yusufov 1-298 matnlar VI asrning ikkinchi choragiga to‘g‘ri kelishini, 301-307 matnlar VI asrning ikkinchi yarmiga to‘g‘ri kelishini taxmin qiladi. 1950 yil R.Girshman Suzada uchta elam xo‘jalik hujjatlarini topgan, bular ham Suza taxtachalari kabi o‘sha davrga taalluqli bo‘lgan.

Persepol arxivi

1933-1934-yillarda Chikago universiteti Sharqshunoslik instituti arxeologik ekspeditsiyasi E.Xersfeld rahbarligida Persepolning shimoli-g‘arbiy burchagida qal’a devorini qazib ochgan. U yerdan ko‘plab elam yozuvidagi mixxat matnlarini topgan. Ular shartli ravishda “qal’a devori taxtachalari” (“Таблички крепостной стены”⁴) nomini olgan.

1969-yilda R.Xollog mazkur matnlardan 2087 ta hujjatni nashr qilgan. Minglab matnlar chop qilinmay qolgan. Dastlab topilmalar 30000 atrofida deb e’lon qilingan, ammo nashr qilishga yaraydiganlari soni 8000 tani tashkil etgan. Ba’zilar hanzgacha o‘qib chiqilmagan va tarjima qilinmagan.

Qal’a devori hujjatlari mil.avv. 509-494-yillar, ya’ni Doro I ning 37 yil davom etgan hukmronligi davrining 13-28-yillari bilan belgilanmoqda. Ular garchi barchasi Persepoldan topilsa ham ko‘proq Eronning Pars viloyati va qadimgi Elam hududida (shu bilan birga ba’zi matnlar Suzada) yozilgan. Taxtachalarni ikki katta guruhga bo‘lish mumkin:

1) Xo‘jalik talablari va davlat zahiralari uchun bir joydan ikkinchi joyga turli xil oziq-ovqatlarni tashish bilan bog‘liq yirik operatsiyalarni ro‘yxatga olish hujjatalari;

2) Shoh xo‘jalik xodimlari va amaldorlar uchun oziq-ovqat tarqatganligi to‘g‘risidagi vedomost-qaydnomalardan iborat.

Matnlar orasida har xil hajmdagi hujjatlar, ya’ni bir va bir necha qatordan iborat yozuvli yorliqlardan tortib, 80-90 va undan ham ortiq qatorli yozuv bitilgan oziq-ovqatlar xarajatlarining yig‘ma qaydnomalari uchraydi. Mazkur yig‘ma vedomostlarda ma’lum joyda ma’lum qaydnoma asosida oziq-ovqatlarning sarf qilinganligi aks ettirilgan.

⁴ Tablichki so‘zi xumdonda pishirilgan g‘isht ko‘rinishidagi yozma yodgorlik bo‘lib, yuzasiga o‘yib xat bitilgan loy taxtacha.

Bu qaydnomalar ba'zan bir necha yillik xarajatlardan iborat bo'lgan. Oziq-ovqatlarni aniq maqsadda sarflanganligi to'g'risida yozma ma'lumot - tilxatlar ham bor.

Matnlarda oziq-ovqatlarni tashish va hayvonlarni joydan joyga haydash, soliq olish, ishchilar uchun oziq-ovqat berish va davlat amaldorlariga maosh berish va boshqalar haqida ma'lumotlar bor. Ular orasida uy hayvonlarining terilarini omborga topshirganlik haqida hujjatlar, oziq-ovqatlar (don, un, o'simlik yog'i, may, bo'za, xurmo va mevalar) nimalarga sarf qilinganligini ko'rsatib qilingan hisobotlari bor.

Qal'a devorlaridagi taxtachalar orasida yuqori martabali shoh amaldorlarining yozishmalari saqlanib qolgan. Hozircha 78 ta xat nashr qilingan.

Qal'a devor matnlari mazmuniga ko'ra, 1936-1938-yillarda Persepol shoh yo'lining janubi-g'arbiy burchagida qazib olingan xazinaning bir xonasida topilgan qimmatbaho buyumlar haqidagi hujjatlar deb nomlanuvchi hujjatlar bilan o'xshashligi bor. Jami 753 ta yaxlit taxtachalar va 200 hujjatning parchalari topilgan. Shulardan 140 qa yaqini Kamerun tomonidan nashr qilingan. Bo'laklarning aksariyatidagi matnlarni bir-biriga bog'lab bo'lmaganligi sababli nashr qilishning iloji bo'lmagan.

Qimmatbaho buyumlar xazinasini hujjatlari 492-458-yillar (Doro I ning 30-yillaridan to Artakserks I ning 7-yil hukmronligigacha bo'lgan davr) bilan sanalashtirilgan va Persepol saroy xo'jaligi hamda uning viloyatlari xo'jaliklariga kumush va natural oziq-ovqatlar berilishini qayd etgan. Bu matnlar saroy xazinasini bilan saroy ombori o'rtasidagi oziq-ovqatlarni sarf qilish to'g'risidagi hisob-kitoblardir.

Formulyarlarga ko'ra⁵, hujjatlar xatlar va **esdalik yozuvlari** ("*memorial notes*")ga bo'linadi. Xatlar har xil amaldorlardan Persepolidagi xazina mudiriga jo'natilgan. Xatlarda ma'lum miqdordagi pul qaysidir bajargan ishi uchun ma'lum kishilarga berilishi ko'rsatilgan. Esdalik yozuvlarida bajarilgan ish, u qachon boshlanib, qachon tugaganligi, ishga mas'ul shaxs va ishchilarga ularning malakasiga ko'ra turlicha (kategoriya) toifaga asosan ish haqi miqdori to'lanishi (ko'rsatilgan) aks etgan. Xazina va qal'a devorlarining ba'zi matnlari shohning shaxsiy farmonlaridan iborat.

⁵Formulyar – hujjatning boshlov va tugallash qismlaridagi an'anaviy jumladir. Bu o'rinda sarfiyot haqida xotirota yozuvlarining ikki xili haqida so'z bormoqda. Ularning biri maktub, ikkinchisi eslatma shakli.

Hujjatlar muhrlar bilan tasdiqlangan, muhrlar g'olakcha (*silindr*) va to'rtburchak shaklida (*shtempel-tug'ro ko'rinishida*) bo'lgan. Xazina taxtachalarida 199 muhr saqlangan (loy bullalar)⁶. Kamerun muhrlardan 114 tasini nashr qilgan. Qal'a devorlaridagi matnlarda juda ko'p muhrlar bo'lib, hali ular to'liq nashr qilinmagan. Bu turkum yuzdan ortiq muhrlarda yozuvlar mixxat yoki ba'zan oramiy xatida yozilgan. Aytish mumkinki, qal'a devori matnlarining birida (№ 1853) Ashpazan ismli amaldorning muhri aniqlangan. Bu ism o'yilgan muhr xazinaning yana to'rtta taxtachasida ham bor.

Persepoldagi elam taxtachalari tashqi ko'rinishiga ko'ra mixxat yozuvli loy taxtachalar guruhiga mansub. Bobilning ayni shu davrga oid (sinxron) tablichakalaridan farqli o'laroq o'ng qirg'og'i dumaloq, chap qirg'og'i esa yapasqi silliq ko'rinishga ega, sababi u joyga muhr tushirilishi kerak edi. Bundan tashqari bobil hujjatlaridan farqli ravishda Persepol hujjatlari oramiycha ko'chirmalariga bog'lab qo'yilgan. Bunga taxtachalarning silliq burchagidagi teshik va tizimchalar guvohlik beradi. Aksariyat taxtachalarning o'lchami - uzunligi 6 sm, eni 3 sm bo'lgan.

Persepol hujjatlari barchasi biror istisnosiz juda muhim. Binobarin, o'sha davrga oid ko'plab manbalar mavjudligiga qaramay, axmoniylar davri arxivining topilishi katta ahamiyat kasb etadi. Vaholanki, xususiy arxivlar va ibodatxona xo'jalik arxivlari Persepol hujjatlari Erondagi shoh xo'jaligi to'g'risida favqulodda ko'p ma'lumot berdi. Hujjatlar qadimgi eron leksikasini o'rganishda muhim manba bo'lib xizmat qiladi, chunki ularda elamliklar o'zlashtirib olgan ko'plab qadimgi eroniy so'zlar, 200 tacha fors ismlari tilga olingan. Ismlar jamiyatning mafkuraviy g'oyasi, turmush tarzi, madaniyati, ijtimoiy munosabatlariga ishorat qiluvchi materialdir.

Akkad hujjatlari

Old Osiyoning chegaralarida IX-VII asrlarga taalluqli ossur (ashshuriy) yozuvlari eron qabilalari to'g'risida muhim ma'lumotlar beradi. Yozuvlarda Ossuriya qo'shinlarining u yoki bu Eron viloyatlariga yurishlari aks ettirilgan. Masalan, shunday matnlarning birida Parshumashaning podshosi Kir I esga olinadi. Yozuvlardan ba'zilarida Ossuriyaning oliy xudosi Ashshurga qaysidir bir harbiy yurish tafsiloti

⁶Bulla so'zi hujjat o'raining tizimcha bog'ichi ustiga yopishtirilgan loyga tushirilgan muhr izi ma'nosini bildiruvchi atama.

ma'lum qilingan. Shunday matnlar orasida Sargon II ning Urartu va u bilan qo'shni viloyatlarga 714-yilda qilgan urushi haqida ma'lumot berilgan. Eron viloyatlariga uyushtirilgan yurishlarning muhim natijalari, jumladan muhim tarixiy voqealar ossuriya harbnomalarida bayon qilingan. Shu bilan birga, ba'zi shohlar yurishlarining geografik bayoni ham berilgan, g'alabanoma yozuvlarida esa voqealarning qisqa bayoni berilgan. Ossuriya podsholarining yurishlari haqidagi ikkita tosh lavha Midiya hududidan topilgan.

Hamma matnlarda Ossuriya yurishlarining g'alabalari sharaflandi, ammo mag'lubiyatlari to'g'risida og'iz ochilmagan. Lekin ossur ayg'oqchilarining xabarlari, chegara viloyatlari hokimlarining ossur podshosiga xabarlari, shohning farmoyishlari va VIII-VII asrlardagi diplomatik yozishmalar ham saqlanib qolgan. Ossur podsholarining chegara viloyatlardagi voqealar yuzasidan xudolarning karomatli kohinlari (orakul)ga murojaatlari ham diqqatga sazovordir (Masalan, VII asrning ikkinchi choragida Assarxadon va Ashshurbanipalning murojaatlari). 672-yil Ossur podshosi Assarxadonning Midiya hukmdori bilan tuzgan shartnomasining matni ham saqlanib qolgan. Bu matn Midiya hukmdori buyrug'i bilan akkad tilida yozdirilgan bo'lib, qadimgi Midiya hududida saqlangan.

VIII asrdan boshlab Bobilda ob-havo haqidagi yozuvlarda muhim tarixiy voqealar xronologik tartibda bayon qilingan. Shu matnlar asosida 745-668, 626-623, 616-595 va 556-538-yillarda sodir bo'lgan Eronning siyosiy voqealari tarixi bayon qilingan. Bu xronikalarda, jumladan, Midiya va Bobil qo'shinlari zarbasiga dosh bermo'lmay mag'lub bo'lgan Ossuriya davlatining qulashi hikoya qilingan (616-609-yillarda Xronika Gedda deb ataluvchi), shu bilan birga eronliklar tomonidan Mesopotamiyaning bosib olinishi ham tilga olinadi. (556-538-yillarda Nabonid-Kir xronikasi. Bu hujjat Kir II davrida tuzilgan bo'lib, Nabonidga adovat ruhida yozilgan).

Keltirilgan so'nggi xronikalarda Mesopotamiyaning eronliklar tomonidan bosib olingandan so'ng bobil kohinlari tomonidan yozilgan matnlar uchraydi. Bu avvalo so'nggi Bobil shohi Nabonid hukmronligining to'liq bo'lmagan she'riy usulda yozilgan hisobotidir. Matnlarda forslarning, jumladan, Kir II ning faoliyati, Bobilga harbiy yurishlari va mamlakatni bosib olishi haqidagi ma'lumotlar uchraydi. Ayniqsa, Kir II ning Mesopotamiyaning bo'ysundirilgan aholisiga nisbatan tutgan siyosati haqida

hikoya qilinadigan Kir II ning silindri⁷ katta ahamiyat kasb etadi. Kir yozuvining akkad tilidagi tarjima matni Urdan ham topilgan. Biroq, barcha matnlar Kirning foydasiga Nabonidni qoralab yozilgan. Shuning uchun matnlar sinchkovlik bilan taqqoslab o'rganilishi muhimdir.

Bobildan bir qolipda bo'lgan so'nggi ahmoniy shohlarining yozuvlari bilan bir qatorda ahmoniylar davriga oid 4000 dan ortiq xususiy huquqiy va ma'muriy xo'jalik hujjatlari topilgan. Ularning asosiylari (3000) Kir II, Kambiz va Doro I hukmronligi yillariga tegishlidir. Hujjatlar so'nggi babil lahjasida akkad tilida tuzilgan va aksariyati xumdonda pishirilmagan loy taxtachalarga yozilgan. Bundan tashqari, mingdan ortiq ahmoniylar davri babil hujjatlari hali nashr qilinmagan (ular muzeylarda va xususiy jamg'armalarda saqlanmoqda).

Bobildagi ibodatxona va shaxsiy arxivlarda saqlanayotgan 400 ta xat ham ahmoniylar davriga oiddir. Ular uzun ingichka to'g'ri to'rtburchak loy taxtachalarga mayda zich qilib yozilgan. Ularning ba'zilari xumdonda pishirilgan, ko'pchiligi quyoshda quritilgan. Xatlar manzilga muhrlangan loy konvertlarda jo'natilgan, shu bilan xatning maxfiyligi himoya qilingan va shikastlanishining oldi olingan. Xatlarning ko'pchiligi ma'muriy-xo'jalik xarakterga ega bo'lgan. Xatlarning aksar ko'pchiligi Urukdagi Eanna ibodatxonasi va Sispardagi Ebabbarra arxivlaridan topilgan. Xususiy arxivlardan ham xatlar topilgan (tadbirkorlik yozishmalari, oilaviy yozishmalar va b.).

Babil hujjatlarining kattagina qismi yirik shaharlar (Babil, Sippar, Ur, Uruk, Nippur va b.)dan topilgan. Bobildagi ayrim ahmoniylar davri davlat (shoh) arxivlari matnlarini hisobga olmaganda, barcha hujjatlar ibodatxona va shaxsiy arxivlarga taalluqli. Ibodatxona arxivlaridan Urukdagi Eanna va Sippardagi Eabbarr ibodatxona arxivlarini alohida ta'kidlamoq zarur.

Shaxsiy arxivlardan Egibi va Murashu xonadoni shaxsiy arxivlari boy hujjatlar fondiga ega. Egiba arxivi hujjatlarining ko'pi Bobilda va uning atroflarida tuzilgan. Ammo bu arxiv hujjatlari turli muzey va nashriyotlarga tarqalib ketgan.

Murashu xonadoni arxivi bitta xonadan topilgan, shuning uchun to'liq nashr qilingan. Hammasi bo'lib, 730 ta taxtacha (taxtacha). Ularning aksariyati juda yaxshi saqlangan. Shu kungacha asosiy ko'pchiligi

⁷ Silindr – loy g'o'lak. Unga Kir II harbiy yurishi, bosib olingan yurt aholisiga nisbatan siyosati haqidagi ma'lumotlar mixxat bilan o'yib yozilgan.

nashr qilingan. Ular o‘nlab kotiblar tomonidan juda toza va mayin pishitilgan loyga yozilgan. Taxtachalar Nippur va atrofdagi viloyatlarda yozilgan. Ularda 200 dan ortiq aholi punktlari tilga olinadi. Aksariyat matnlar Artakserks I va Doro II davri bilan sanalashtirilgan.

Hujjatlarning ozgina qismi boshqa davlatlarga tegishli. Bu esa bobilliklarning savdo ishlari bilan boshqa davlatlarga borganligi va u yerda turli xil shartnomalar tuzganligidan dalolat beradi. Masalan, Egibi va Murashu xonadoni a’zolari Ekbatan va Suzaga borishgan va u yerda tuzilgan shartnomalar yetib kelgan. Bobildan tashqaridagi joylarda akkad tilida hujjatlarning tuzilishi ahmoniylar davrida o‘sha joylarda ko‘plab bobilliklar yashaganligidan dalolat beradi.

Persepoldagi taxtachalar orasida 502-yilda davlat solig‘i to‘laganlik qayd qilgan akkad tilida yozilgan bitta mufassal matn topilgan. Kamerunning fikricha, bu hujjat Persepolda tuzilmagan, balki birorta Bobil shahrida tuzilib, keyinchalik Eronga keltirilgan, bunday bo‘lmasligi ham mumkin, chunki matnda soliq to‘lovchilar bobilliklar emas, midiyaliklar bo‘lib chiqqan. Persepoldagi qal’a devorlari taxtachalari orasida yangi bobil lahjasidagi taxtacha topilgan, lekin bu hujjat hali o‘qilmagan. Neyrabda (Suriyadagi Halafdan 5 km masofada) akkad tilidagi hujjat topilgan bo‘lib, uning sanalari Nabonid davridan to Kambiz va Navuxodonosar IV davrigacha bo‘lgan yillar bilan taqqoslanadi.

Oramiy matnlari

Fors davlatida oramiy tilli hujjatchilik keng yoyilganligini Qizil dengizdagi Elefantin oro’lidan to Hindiston chegaralarigacha bo‘lgan ulkan hududda topilgan ko‘plab papirus, charm o‘ramlari, toshlardagi yozuvlar, tangalar, tarozi toshlari, muhrlar va loydan yasab quritilgan “taxtachalar”ga o‘yib bitilgan yozuvlar tasdiqlaydi.

Masalan, Naqshi Rustamdan mil.av. III asrga taalluqli yozuv topilgan. Unda Salavk ismi uchraydi. 1936-38-yillarda Persepolda siniq tosh idish topilgan. Shu kabi idishlarning 203 bo‘lagida qora siyoh bilan yozilgan oramiy yozuvli oramiy tilidagi matnlar bo‘lgan.

Erondan mil.av. VIII-V asrlarga taalluqli oramiy yozuvli ko‘plab vazalar? qadahlar (ayoqlar)⁸ topilgan.

⁸Idish-ayoq – juft so‘z. Uning ikkinchi juz’i baland ayoqqa o‘rnatilgan idish-vazani bildiradi. O‘rta asrlarda ayoq so‘zi qadah ma’nosida ham qo‘llangan (M.Is’hoqov)

Persepoldagi qal'a devoridan topilgan matnlar orasida bir necha sopol taxtachalar diqqatga loyiq. Bundan tashqari, elam tilidagi matnli 44 ta taxtacha topilgan. Ularga siyoh bilan oramiy yozuvi va oramiy tilida izoylar qo'shimcha ma'lumotlar sifatida ilova qilingan. Bu qo'shimcha yozuvlar Elam matni mazmunining qisqacha bayonlaridir.

Shu kabi oramiy tilidagi va oramiy yozuvidagi qo'shimchalar mil.av. VII asrlardagi babil mixxat yozuvlariga ham qo'shilgan. Bunday qo'shimcha izohlar V asr hujjatlarida ayniqsa ko'p uchraydi. Murashu va Nippur arxivlari buning yaqqol misolidir.

Mesopotamiyada yozuv uchun asosan charm va papirus ishlatilgan. Ahmoniylar davrida shaxsiy huquqiy va xo'jalik hujjatlari oramiy tilida charmga yozilgan.

Charm va papirusga yozilgan yozuvlar quruq iqlimli sharoitlarda saqlanib qolgan. 1962-64-yillarda qadimgi Ierixondan 14 km masofadagi Vadi Daliyaxda, ya'ni ahmoniylar davridagi sobiq Samariya viloyatida topilgan bitta qabrda 20 ga yaqin oramiycha papirus va yuzlab hujjat parchalari topilgan. Ular juda yomon ahvolda saqlangan. Papiruslarda 29 muhrning izi saqlangan va sinmagan. Papiruslardagi matnlar xususiy huquqiy va ma'muriy xarakterga ega (nikoh shartnomalari, qullarning huquqiy-ijtimoiy holati, mulklarning oldi-sotdisi va b.) bo'lib, mil.av. 375-335-yillarni o'z ichiga oladi

Misrda ahmoniylar davriga oid 200 oramiy papirusi topilgan, aksariyati yaxshi saqlangan. Ba'zi papiruslar XIX asrda ma'lum bo'lgan. Birinchi oramiy papirusi Yevropaga 1824-yilda keltirilgan. Ularni 1903-yildan nashr qilish boshlangan. 1907-1908-yillarda Elefantinda nemis arxeologlari 100 ga yaqin papiruslarni topishgan, bular yahudiy harbiy koloniyasiga taalluqli. Ba'zi hujjatlarda butun bullalar (loy muhr) topilgan. Ularning aksariyati, nikoh shartnomalari, oldi-sotdi hujjatlari, shu bilan birga ahmoniy podsholarining farmonlari va boshqa rasmiy hujjatlardir. Ushbu arxivda bulardan tashqari Qadimgi Eron podsholarining diplomatik maktublari hamda Falastindagi harbiy istehkomlar bilan yahudiy jamoalari o'rtasidagi munosabatlarga taalluqli yozishmalar ham bor. Ba'zi hujjatlar V asrning ikkinchi yarmi bilan sanalangan. Ularning orasida Bexistun yozuvlarining oramiy tilli tarjimalari ham bo'lgan. Bular Doro I devonidan Misrga jo'natilgan, kechroq ko'chirilgan Naqshi Rustam qoyasidagi matnning tarjimasi edi.

1954-yil G.R.Dreyver tomonidan Misrdagi fors satrapi Arshamaning 13 ta xatidan iborat muhim kolleksiyasi nashr qilindi. Matnlar charmga oramiy tilida yozilgan. Ular V asrda Misrda fors podsholarining hukmronligi to'g'risida guvohlik beradi. Ular ishchi kuchini olish bo'yicha ko'rsatmalar, itoatsiz qullarga munosabat, Arshama va boshqa fors amaldorlarining yerlarini boshqarish to'g'risidagi hujjatlardir. Xatlar Arshamadan va boshqa eron mansabdor amaldorlaridan mulk boshqaruvchilariga, ehtimol Bobil va Suzaga jo'natilgan maktublarning nusxalaridir. Shunday qilib, ular shaxsiy xatlar tarzida yozilgan bo'lsa ham, satrap sifatida Arshamaning xizmat faoliyatiga daxldor bo'lmasa ham, xat jo'natuvchilarning yuqori lavozimlarini hisobga olsak, bu xatlar rasmiy yoki (yarim rasmiy) xarakterga ega bo'lib, davlat ishlari to'g'risida muhim ma'lumotlar beradi. Xatlarga sana qo'yilmagan, lekin ularning mazmuniga qarab, Dreyver ularni 411-408-yillarga to'g'ri keladi, deb baholaydi. Shu bilan birga xatlarining 454-yilda yozilgan bo'lishi mumkinligini ham inkor qilmaydi. Xatlarda loy muhrlar saqlangan. Bir muhrda ikkita fors jangchisining dushmani qo'li bilan ushlab turganligi tasvirlangan. Jang tasvirida quyosh gardishi va oramiy yozuvi izlari bo'lib, uni "Shahzoda Arshamaning muhri" deb tarjima qilingan. Dreyver, bu xatlar Arshamaning amaldorlaridan birining arxividan bir qismi bo'lishi mumkin, deb hisoblaydi. Arshama amaldorlaridan Nextimorga jo'natilgan xat bo'lib, ular Nextimorning shaxsiy arxivi hujjatlaridan bo'lishi ehtimol.

1945-yilda Misr arxeologi Sami Gabra Tuna El-Djebel (Qadimgi G'arbiy Germopol) qabristonidan Misr xudosi Tatuning ramzi hisoblangan ibis qushi mumiyolarini topgan (laylakka o'xshagan qush). Qabrda 8 ta oramiy papirus solingan loy idish ham bo'lgan. Ular mamlakatda qo'zg'olon vaqtida qabristonga yashirilgan bo'lishi kerak. Bu papiruslar shaxsiy maktublar bo'lib, Memfisdan oramiy harbiy kolonistlari tomonidan Misrdagi semit kolonistlariga jo'natilgan (4 ta xat Sienga qolganlari Ofi, ya'ni Luksorga jo'natilgan). Ularda oilaviy xabarlar, yaxshi niyatlar, savdo ishlariga ko'rsatmalar berilgan. Matnga sana qo'yilmagan, lekin yozuv uslubi V asrga taalluqlidir. Idishga yaqin joyda muhra shaklida "Intarvii" so'zi bitilgan ashyo bo'lib, bu so'z Doro I ismining misrcha aytilishidir. Xat o'rami ochilmagan holda topilgan. Hujjat qandaydir sabablarga ko'ra, manzilga yetib bormagan, Germopol janubida yo'lda to'xtab qolgan. Hujjat katta ilmiy ahamiyatga ega. Ular tadbirkorlik aloqalari va Misrning turli joylarida semit harbiy koloniyala-

lari bilan yozishmalar bo‘lganligidan dalolat beradi. Elefantin papiruslaridan farqli o‘laroq, germopol xatlari oramiylar va boshqa semit qabilalarining (Nobu, Betelk, Malkat-Shamni xudolariga sig‘inuvchi) til xususiyatlari to‘g‘risida muhim xabarlar beradi.

Misrdagi oramiy manbalaridan quyidagilarni ko‘rsatish mumkin: 1931-yil N.Eme-Jiron 112 ta matnni nashr qildi, ulardagi papiruslar orasida sopol bo‘laklari va buyumlar sirtiga tirnab yozilgan matnlar ham bo‘lgan. Barcha matnlar 1926-yildagi Sakkara (Memfis) dagi qazish ishlari chog‘ida topilgan. Ushbu to‘plamdagi papiruslarning ko‘pchiligi, noshirning fikriga qaraganda, Memfisdagi harbiy kemalarni qurish va ta‘mirlash bo‘yicha davlat arsenali kundaliklarining qismi hisoblanadi. Matnlarda misr va eron sanalari uchraydi, lekin birorta podshoning nomi tilga olinmagan, shuning uchun hujjatlarning yozilgan yilini aniqlash mushkul. Ehtimol ular V asrga taalluqlidir. 1913 va 1917-yillardagi Sakkaradagi qazishlar chog‘ida papiruslardan bir nechasi Eme-Jiron tomonidan topilgan.

Doro I podsholigining 7-yilida (517 y.) yerni ijaraga berish to‘g‘risidagi shartnoma ahmoniy davriga taalluqli hujjatlarning eng qadimgisidir. Bir papirusda bir kishining finikiya shahri Sidondan misr xudosi Osirisni ziyorat qilish uchun borayotganligi haqida oramiy papirusi hikoya qiladi.

Ahmoniy davri oramiy yozuvi bo‘laklari, hanuzgacha yetarli darajada nashr qilinmagan. Ularning nashri bilan A. Dyupon – Sommer shug‘ullangan. Bo‘laklarining bir qismi finikiya tilida yozilgan. Fors podsholari davri oramiy matnlari orasida diniy ma‘nodagi oramiy yozuvlari muhim o‘rin tutadi.

Demotik matnlar

Ahmoniy hukmronlik qilgan davrdagi Misrda demotik hamda ravon yugurik iyeratik⁹ usulda yozilgan hujjatlar ko‘plab topilgan. Bu matnlar orasida avvalo sais podsholaridan Amasis va Psammetix III davridagi yirik amaldor bo‘lgan Udjagorresept yozuvini eslatish mumkin. Sais podsholari Amasis va Psammetix III keyinchalik Kambiz va Doro I ga yaqin bo‘lgan. Kambizning misr ibodatxonalarining mulkini cheklash to‘g‘risidagi dekreti – farmoni, mamlakatni eronliklar bosib olganigacha muomalada bo‘lgan misr qonunlarini kodlash

⁹ *Demotik* va *iyeratik* atamaları Misr iyerogliflarining tez yozuvga moslangan kursiv variantiga nisbatan ishlatiladi (M.Is‘hoqov).

to'g'risidagi Doro I ning farmoni katta ahamiyatga ega. Har ikkala matn asl hujjatdan nusxadir. Demotika xronikasi deb ataladigan nusxa asl matnning orqa tomoniga yozilgan. Matn mil.av. III asrda Janubiy Misrda yozilgan. Xronikaning boshi va oxiri yo'qolgan. Matnda Misrni bosqinchilarning zulmlaridan ozod qiladigan qadimgi misrlik buyuk Fir'avnning kelishi haqida mahdiylik bashorati yozilgan. Mazkur matn so'nggi ahmoniyalar davrida Misrdagi shart-sharoit to'g'risida yorqin ma'lumot beradi.

Voqealar tafsili mil.av. 404-yildan boshlanadi. XXVIII-XXX sulolalar hukmdorlarining nomlari aniq ketma-ketlikda berilgan.

Eronliklar davridagi ma'muriy va huquqiy tizim to'g'risidagi qimmatli axborotlar satrap Farndatga jo'natilgan demotik xatlarda berilgan va boshqa bir papirus *Rylandsga* kohinlar tomonidan Petesining mol-mulki olib qo'yilgani to'g'risidagi shikoyati bayon qilingan. Ahmoniy podsholarining misr ibodatxonalariga qimmatbaho hadyalar to'g'risida, ayrim shaxslarning va fors podsholariga qarshi mahalliy hokimlarning qo'zg'olon ko'targanlari haqidagi yozuv saqlanib qolgan.

J.Pozdner Kambiz, Doro I, Kserks va Artakserks I larning davri bilan sanalangan 117 ta misr yozuvini nashr qilgan. Matnlarning bir qismi nomlari zikr qilingan podsholar tomonidan, qolganlari fors amaldorlari tomonidan tuzilgan. 12 ta yozuv Vadi-xammamatdagi tosh yo'nuvchilar boshlig'i bo'lgan fors amaldorlari tomonidan tuzilgan. Shu bilan birga Fayyum, Memfis va boshqa joylardagi toshlarda Doro I ning yozuvlari topilgan. Ularning ko'pchiligi misr xudolariga yoki ilohiylashtirilgan ob'ektlarga murojaatlardan iborat.

Misr-oramiy yozuvlari ham ma'lum. Ba'zi matnlar mixxat yozuvlari bilan birga uchraydi. Bir qancha shaxsiy huquqiy hujjatlar ham saqlanib qolgan.

Savol va topshiriqlar:

1. Qadimgi Eronning ahmoniyalar davri yozma manbalari?
2. Ahmoniyalar davrida yozuvlar va ularning amaliyoti?
3. Ahmoniyalar hukmronligi davriga taalluqli arxiv hujjatlari to'g'risida nimalarni bilasiz?
4. Behistun yozuvi haqida ma'lumot bering?
5. Naqshi Rostam yozma yodgorligi haqida nimalarni bilasiz?
6. Avestaning eng qadimiy qo'lyozma nusxalari haqida ma'lumot bering?
7. Avesta materiallari bu hujjatmi?

8. Elam hujjatlari arxiv ish yuritilishining na'munasi sifatida.
9. Akkad matnlari sizga tanishmi?
10. Persepol arxivi to'g'risida ma'lumot bering?
11. Formulyar haqida nimalarni bilasiz?
12. Demotik matnlar haqida ma'lumot bering?

Mustaqil ta'lim uchun savol va topshiriqlar:

1. *Ahmoniy davrida hujjatchilik an'analarining paydo bo'lishi.*
2. *Oramiy matnlari tarixni o'rganishda muhim manba.*
3. *Oramiy yozuvlarining Markaziy Osiyoga kirib kelishi.*

4 - §. Yunon-Baqtriya, Parfiya va Kushonlar davrida davlat ish yuritish an'analari va arxivlar

Darsning maqsadi: *Baqtriya, Yunon-Baqtriya, Parfiya davlati, Kushonlar, Eski Nisodan parfiya arxiv hujjatlarining topilishi, arxiv hujjatlarida Parfiya davlatining ijtimoiy-iqtisodiy va siyosiy hayotining aks etishi masalalari, yunon-boxtar yozuvi, Baqtriya yozuvi yodgorliklari, monumental yozuv, kursiv yozuv to'g'risida tushuncha berish, Surx-ko'tal, Dilberjin va Ravatak arxivi hujjatlari hamda ularning Markaziy Osiyo tarixini o'rganishdagi o'rni haqida talabalarga bilim berish va ko'nikma hosil qilish.*

Tayanch iboralar: Baqtriya yozuvlari, Niso, Parfiya arxivi, Arshakiylar, Mixrdatkirt, M.V.Masson, YuTAKE, V.B.Xenning, monumental yozuv, kursiv yozuv, Surx-ko'tal, bronza qo'ng'iroqcha, Ayritom, Ravatak, Kanishka, shartnomalar, nikoh bitimi, Shodiya, Nokonzak.

Baqtriya, antik mualliflar ta'biri bilan aytganda, Baktriana Markaziy Osiyo janubidagi qadimgi madaniy viloyatlardan biri hisoblanadi. Baqtriya – Amudaryoning yuqori oqimi, Vaxsh, Kofirnigon va Surxondaryoning o'ng tomonida, shimolda Hisor tog'lari bilan o'ralgan, janubda esa Hinduqush tog'lari bilan tugagan (hozirgi Shimoliy Afg'oniston, Janubiy Tojikiston va Janubiy O'zbekiston) katta hudud hisoblanadi. Bu mamlakat Qadimgi Sharqda ikki o'rkachli tuyalari, otlari va feruza toshlari bilan mashhur bo'lgan.

Mil.av. I ming yillik o'rtalarida Baqtriya Ahmoniy davlati saltanati-ning eng oxirgi sharqiy satrapi hisoblangan. Mil av. 329-327-yillarda

Baqtriyani Aleksandr Makedonskiy bosib oladi. Uning saltanati parchalangandan so'ng bu yerlar Salavkiylar mulkiga aylanib qoladi.

Salavkaning Hindistondagi mag'lubiyati salavkiylarning O'rta Osiyodagi noiblari ahvoriga sezilarni darajada salbiy ta'sir ko'rsatdi. Bu holat bu yerda salavkiylarga qarshi kurash kuchayishiga sabab bo'ldi. O'rta Osiyo viloyatlari mulklaridan mahrum bo'lishidan qo'rqib ketgan Salavka I o'z vorisi Antiox I boshchiligidagi Sharqiy noiblik (satraplik)larni ta'sis etgan edi. Mil. avv. 293 yilda Salavka o'g'li Antioxni Sharqiy satrapliklarga, ya'ni O'rta Osiyo viloyatlariga o'zining noibi etib tayinlaydi. Antiox vayron etilgan qal'alarni tikladi, Quyi Murg'ob vohasini o'rab olgan yirik va qalin mudofaa devor (Marg'iyona devori) bunyod etdi, qo'zg'olonlarni bostirdi. U salavkiylar qudratini namoyish etish maqsadida atrof o'troq va ko'chmanchi aholi ustiga harbiy yurishlar uyushtirdi. Antiox tomonidan o'tkazilgan bir qancha harbiy-siyosiy va diplomatik tadbirlar tufayli O'rta Osiyodagi salavkiylarga qarshi harakatlar bostirildi.

Biroq Antiox G'arbga qilgan ko'pgina yurishlari bilan mashg'ul bo'lib, o'z davlatining sharqiga, jumladan O'rta Osiyo yerlariga kam e'tibor qaratdi. Natijada O'rta Osiyoning iqtisodiy hayotda o'zgarishlar yuz berib, qishloq xo'jaligi, hunarmandchilik va savdo-sotiq anchagina rivojlanadi. O'rta Osiyo harbiy-strategik va iqtisodiy ahamiyatga ega bo'lib, salavkiylar bu hudud bo'ylab o'tgan savdo yo'llari bo'yida shaharlar va tayanch harbiy istehkomlar qurdirgan.

Salavkiylar davrida O'rta Osiyodagi ahvol birmuncha murakkabroq vaziyatda bo'lib, bu hudud markazdan ancha uzoqda joylashgan hamda davlatning shimoliy-sharqiy chegaralaridagi ko'chmanchilarning doimiy xavfi mavjud edi. Ayniqsa, mil.avv. III asrdan boshlab ko'chmanchilarning ko'chishlari boshlanishi natijasida chegaralardagi bu xavf yanada ortdi.

Ko'plab viloyatlarni birlashtirgan Salavkiylar davlatining ichki siyosiy boshqaruv masalalari ancha murakkab edi. Davlatning nihoyatda katta hududlarni qamrab olganligi ayrim hollarda ma'muriy nazoratning susayib ketishiga olib kelgan.

Salavkiylar davlati ma'lum bir xalq yoki elatlardan iborat bo'lmay, ko'pdan ko'p etnik guruhlarini harbiy yo'l bilan birlashtirishdan tashkil topgan uyushma edi. Salavkiylar davlatida ish

yuritish an'analari yo'lga qo'yilgan bo'lib, davlat ishlarini olib boruvchi devonxona mavjud bo'lgan.

Mil.avv. III asrning 60–50–yillariga kelib Kichik Osiyo va Bolqon yarim orolida Salavkiy hukmdorlari o'rtasida hokimiyat uchun kurashlar avj oldi. Natijada salavkiylar davlatining sharqiy viloyatlarida siyosiy vaziyat o'zgarib markazdan qochuvchi kuchlarning harakatlari faollashadi. Mil.avv. 250 yilga kelib Parfiya va Yunon–Baqtriya davlatlari salavkiylar davlatidan ajralib chiqib o'zlarini mustaqil deb e'lon qiladilar.

Shunday qilib, miloddan avvalgi III asrning o'rtalaridan e'tiboran O'rta Osiyoda Yunon-Baqtriya davlati hukmronligi boshlanadi. Bu davrga taalluqli arxiv hujjatlari O'rta Osiyo hududlarida topilib o'rganilgan. Arxiv hujjatlari O'rta Osiyoda davlat ish yuritish ishining juda erta vujudga kelganligi va shakllanganligidan dalolat beradi. Mazkur davlat o'rnida miloddan avvalgi I va milodiy IV asrlar oralig'ida Kushonlar saltanati hukmronlik qilgan. Baqtriya mil.av. III asr o'rtasidan boshlab Yunon-Baqtriya davlatining markaziga aylanadi.

Hozirgi Turkmanistonning janubi g'arbida Parfiya davlati qad ko'targan. Parfiya davlatining poytaxti Niso shahri edi. Bu davr davlatlari va ularning xo'jaligi, ijtimoiy-iqtisodiy va siyosiy hayoti to'g'risida ma'lumotlar beruvchi arxivlar topilgan. Ular orasida qadimgi parfiyoniy tilli hujjatlar katta ahamiyat kasb etadi.

Parfiya arxivi

Parfiyoniy hujjatlar Eski Niso – Ashxabod yaqinidagi Bagir tepaligidan topib o'rganilgan. 1948-yilda M.E.Masson rahbarligidagi Janubiy Turkmaniston arxeologik ekspeditsiyasi vakillari Eski Nisodan bir necha oramiy yozuvli sopol bo'laklarini topishgan. Arxeologik tadqiqotlar natijasida Eski Nisodagi may omboridan yozuvlar bitilgan 3000 dan ortiq sopol parchalari topilgan. Fanga Eski Niso arxivi nomi bilan kirgan parfiya arxiv hujjatlari qadimgi tariximizni o'rganishda muhim manba bo'lib xizmat qiladi. Parfiya arxivi hujjatlari dastlab M.M.Dyakonov tomonidan o'qilgan. Keyinchalik I.M.Dyakonov, M.M.Dyakonov, V.A.Livshis, I.N.Vinnikov Eski Niso hujjatlarini o'qishgan va e'lon qilishgan. Parfiya davlatining poytaxti Mixrdat-kirtning qadimgi xarobalari yaqinida o'rta asr Niso shahri barpo bo'lgan. O'z navbatida, bu shahar mo'g'ul istilosi davrida vayron etilgan. Bu shahar xarobalari Niso nomi bilan ma'lum bo'lgani holda

qadimiy nomi unitilgan. Mihrdatkirt vayronalari fanda shartli ravishda Eski Niso deb atalgan.

Eski Niso - Parfiya hujjatlari may(vino) ombori hisob-kitoblari mazmunida bo'lib, sopol parchalariga qora siyoh bilan yozilgan. Ularda may omboriga uzumlarning olib kelinganligi haqidagi yozuvlari bor. Ombordan vino solinadigan katta xumlar topilgan. Xumlar ustiga sopol parchalariga qora siyoh bilan yozuv bitilgan. Yozuvlarda vino kimning qaysi uzumzoridan olib kelingan uzumdan tayyorlanganligi va kim tomonidan may tayyorlanganligi, mayning navi, saqlanish holati kabi ma'lumotlar bitilgan. Lekin bizgacha yetib kelgan ma'lumotlar unchalik to'liq emas. May solingan xumlarning ustiga "eski may", "sirka" deb yozilgan yozuvlar ham uchraydi. Ba'zi sopol parchalariga avvalgi yozuv o'chirilib, qayta yozilgan. Demak, ba'zi holatlarda sopol parchalaridan avvalgi ma'lumot ahamiyatini yo'qotganda, undagi yozuv yuvib tashlab, yangi ma'lumot uchun bir necha marta foydalanilgan. Yangi may deb yozilganlardan tashqari, uning miqdori, uzumning nomi, uzum keltirilgan qishloqning nomi, yetkazuvchi kishining ismi, mayni tayyorlash sanasi, uning navi, tayyorlash joyi va kimga yetkazish kerakligi ko'rsatilgan. Vaqt o'tib, bu hujjatlarda yangi yozuvlar paydo bo'lgan. Yangi mayning boshqa xumga bo'shatilganligi, mayning eskirganligi haqidagi ma'lumotlar ham bor. Eski Niso arxivi yozuvlarida xronologik ma'lumotlar ham ko'rsatilgan, ularda arshak erasi bo'yicha 160-yildan 230-yilgacha sanalar uchraydi. Ombordan shu yillarga tegishli 338 ta hujjat topilgan.

Bizgacha yetib kelgan hujjatlar asosida yil mobaynida qancha may tayyorlanganligini aniqlash qiyin, ya'ni ularning aniq miqdorini hisoblab bo'lmaydi. Barcha vino podsholik omboriga yetib kelgan. Hujjatlardan 160-230-yillarda eng ko'p may Friyapatikan qishlog'idan keltirilganligi aniqlandi.

Niso hujjatlariga qaraganda vinolarni har xil hajmdagi xumlarda saqlashgan. Niso arxivi hujjatlariga asosan vino tayyorlash jarayoni to'g'risida ma'lumotga ham ega bo'lish mumkin. Xususan, omborlarga uzum keltirilib, achitishga qo'yilgan. Uzum kerakli darajada achib yetilgach, siqib sharbati ajratilgan. Sharbat tindirilgan. So'ng qaytadan xumga solinib, ajratilgan uzum topposi bilan birga yana bir muddat saqlashga qo'yilgan. Shu kabi uch marta qayta ishlovdan o'tgan uzum sharbatida spirtlashuv o'z me'yoriga yetib may tayyor bo'lgan. Vinolar xumlarga quyilgan, ba'zi holatlarda xumlardagi vinolar achib u sirkaga aylangan. Vino solingan xumlarga qachon, qancha vino solinganligi, uning navi, qaysi bog'ning uzumidan

tayyorlanganligi, vinoning qanchalik sirkalanganligi haqidagi ma'lumotlar hujjatlarda to'liq saqlanib qolgan. Omborlarda vinolarga to'ldirilgan xumlarning sig'imi asosan 180-220 litr bo'lgan.

Eski Niso arxivi Parfiya davlatining ijtimoiy-xo'jalik hayoti, ma'muriy-soliq tizimini chuqur anglashga imkon beradi.

Hujjatlardan Parfiya davlatining shimoli-sharqiy qismidagi mahalliy boshqaruv mexanizmlari haqida qimmatli dalillarni topish mumkin. Boshlang'ich ma'muriy birlik diz – mustahkam qishloq (qal'a) bo'lib, uning boshlig'i dispat deb atalgan. Dizpatlar satrapga bo'ysingan. Soliqlar asosan natura bilan to'langan. Soliqlarni yig'ish va ularni saqlashda bir qator amaldorlar ishtirok etgan. Masalan;, vino omboriga uzumlarni keltirishda "vino keltiruvchi", "muhr bosuvchi", "mirzo", "hisobchi" kabi amaldorlar unvonlari tilga olinadi.

Demak, Eski Niso arxivi hujjatlari Parfiya davlatining ijtimoiy-xo'jalik tizimi, soliq tizimi, mahalliy boshqaruv tizimi, joy nomlari, uzumzorlar va ularning egalarining ismlari, amaldorlar unvonlari, yil hisoblari, o'lchov birliklari, Shimoli-Sharqiy Parfiyaning ma'naviy madaniyati haqida qimmatli ma'lumotlar beradi.

Hujjatlar oramiy yozuvining mahalliy parfiyoniy tiliga moslashgan variantida yozilgan. Hujjatlarni o'qib tahlil qilish bilan shug'ullangan olimlar, M.M.Dyakonov, I.M.Dyakonov va V.A.Livshitslar o'z tadqiqotlarining boshlaridayoq ko'plab muammolar va qiyinchiliklarga duch kelishdi. Chunki so'zlardan bir qismi oramiy tilida, bir qismi esa parfiya tilida yozilgan, hatto bitta tushunchaning o'zi bir joyda oramiy tilida ifodalangan bo'lsa, boshqa joyda parfiya tilidagi ekvivalent ishlatilgan. Ba'zida oramiy tilidagi o'z ma'nosida emas, parfiya tilidagi boshqa ma'noni anglatib kelgan. Bundan shunday xulosaga kelinganki, oramiycha so'zlar bu davrga kelib maxsus shifrlar vazifasini bajargan. Ular o'zining oramiy tilidagi ma'nosini yo'qotgan bo'lib, muayyan belgilar ketma-ketligini ko'rganda parfiyaliklar bu oramiycha so'zni o'z tillaridagi so'z bilan, almashtirib o'qishgan. Bunday murakkab geterografik yozuvni o'zlashtirish oson bo'lmagan. Xattotlarni ko'p vaqt mashq qildirishgan. Ko'plab sopol parchalarida xattotlik mashq yozuvlari topilishi shundan dalolat beradi.

Niso hujjatlari qadimgi Parfiyada din haqida ham qiziqarli ma'lumotlar berdi. Parfiyaliklar Mitra va davlat asoschisi Arshakka sig'inishdan tashqari, yunon xudolariga ham e'tiqod qilishgan. Zardushtiylikning yetakchi o'rinda ekani hujjatlardagi kishi ismlarining Avesta panteoniga

xosligida yaqqol ko‘rinadi. Niso hujjatlarida tilga olingan 200 ta ismning aksariyati zardushtiylik dini ismlari bo‘lib, hatto hujjatdagi xronologik qaydlar zardushtiylik taqvimiga asoslangan. Shuningdek, Fraata, Nanan va boshqa ko‘plab nomlar keltirilgan. Ibodatxonalarining qurilishi haqida yozib qoldirilgan. Niso arxiv hujjatlarida eng avval tilga olingan yil bu miloddan avvalgi 247-yilga to‘g‘ri keladigan bo‘lib, undagi sanalar zardushtiylik taqvimiga mos keladi. Hujjatlarda oy va kunlar terminlari ham uchraydi. Shuni aytish mumkinki, zardushtiylik taqvimining tarixiy ildizlari mustaqil va qadimiy asoslarga ega.

Demak, Eski Niso arxivi hujjatlari Parfiya davlatidagi moddiy va ma’naviy madaniyat to‘g‘risida to‘liq ma’lumot olishga ham xizmat qilishi mumkin.

Kushon podsholigining gullab-yashnagan davri Kanishka va uning vorislari bo‘lmish Xuvishka va Vasudeva davrlariga to‘g‘ri keladi. Kanishkaning tangalarida birinchi marta yunoncha yozuvlar o‘rnida baqtriyalik tilidagi yozuvlar paydo bo‘la boshlaydi.

V.B.Xenningning fikricha, eron tillari oilasiga mansub baqtriyalik tili – kushon shohlarining ona tili hisoblangan. Bu holatni nafaqat tangalardagi yozuvlar va epigrafikalar, hattoki podsholarning nomlari ham isbotlaydi¹⁰.

Undan so‘ng Baqtriyaga xioniyliklar va eftaliylar kirib kela boshlaydilar. Eftaliylar podsholarining tangalarida baqtriyalik tilidagi yozuvlar saqlanib qolgan. Biroq endi baqtriyalik yozuvi kursivlashib tez va ravon, harflar o‘zaro ulanadigan shaklga kirgan. Shu asosda eftaliylarning Toxariston viloyatlarida eftaliy yozuvli o‘rta bosqich eroniy lahjasiga xos til tarqala boshlagan. Bu taxmini VII asrning 30-yillarida Toxaristonga kelgan xitoy ziyoratchisi Syuan Szyanning ma’lumotlari ham tasdiqlaydi. Bu ma’lumotni baqtriyalik tili va yozuvi haqida yozgan barcha olimlar (V.V.Bartold, V.A.Livshis) ham ma’qullaydilar. Toxariston tili tarkibiga ko‘ra, boshqa podsholiklarning tillaridan biroz farq qiladi. Toxariston yozividagi harflar soni 25 ta bo‘lib, gorizontallikdan o‘ngga qarab yozilgan. Bu tilda adabiy asarlar sug‘d tiliga nisbatan ancha ko‘p yozilgan. Toxariston yozuvi alifbosi yunonlardan kelib chiqqan bo‘lishi mumkin hamda bu yozuv Toxaristondan tashqari Bomi-

¹⁰Hozir bu masalada muqobil fikr bor: kushonlar davrida davlat mahkama ishlari Baqtriyalik mahalliy tilida olib borilgan. Podsholar sulolasi etnik jihatdan prototurkiy qabilalardan bo‘lgan (M.Is‘hoqov.).

yon, Shug‘non, Chitro‘l va boshqa qo‘shni viloyatlarda ham qo‘llanilgan. Syuan Szyan xabarlari ham shuni ko‘rsatadi.

Baqtriya yozuvining va shu bilan birga Baqtriyadagi sharqiy eroniy lahjalarining fors-tojik, dariy va turkiy tillar ta‘sirida Baqtriya hududidan siqib chiqarilishi arablar bosqinidan so‘ng kuchayib ketgan. Oqibatda qadimgi baqtriya tiliga yaqin bo‘lgan sharqiy eroniy til faqat Baqtriyaning sharqiy viloyatlarida – uzoq va umumiy til vaziyatidan chetda qolgan tog‘li Munjan vodiysida, Hindiqush va Pomir tog‘laridagi kichik vodiylardagina saqlanib qoldi.

Baqtriya yozuvi yodgorliklari

Tangalardagi yozuvlarga asoslanib aytish mumkinki, Kanishka davrida yunon alifbosi baqtriya tiliga moslashtirilgan. Tangalarning yuzasiga yunon tilidagi yozuvlar o‘rniga baqtriya tilidagi yozuvlar yozdirilgan. Yunon alifbosi asosida baqtriya yozuvining shakllanishi Kanishka davridan avvalroq Vima Kadfiz davrida paydo bo‘lgan deyish hanuzgacha o‘z tasdig‘ini topgani yo‘q.

Baqtriya tilidagi so‘zlarni yozishda yunon alifbosining tanlanishi eramizning birinchi asrlarida Baqtriyada ellinistik an‘analarning, yunon madaniyati va tilining mustahkam o‘rin topganligidan dalolat beradi. Baqtriya nomlarini yunon harflari orqali aks ettirishga bo‘lgan urinish Kanishkagacha bo‘lgan davrdayoq boshlangan. Yunon harflaridan nafaqat nomlarni va mansablarni yozishda, balki yunon tilida bo‘lmagan so‘zlarni yozishda foydalanila boshlangan. Natijada yunon harflari orqali yunon tilida bo‘lmagan tovushlarni aks ettiradigan belgilar tizimi – baqtriya alifbosi yaratilgan.

X.Yunker, E.Xersfeld va R.Kyuriel asarlarida baqtriya yozuvi yunon kursiv yozuvlaridan kelib chiqqan deb e‘tirof qilingan edi. Baqtriya yozuvi paleografiyasiga R.Kyuriel, A.Marik, X.Xumbax, R.Gyobl, I.Gershevich va V.A.Livshislarning asarlarida maxsus bo‘limlar ajratilgan. Baqtriya yozuvining ikki turi – monumental va kursiv turlari ajratib ko‘rsatiladi. Monumental yozuvlarga belgilarning o‘zaro ulanmasligi, harflarning burchakli (qirrali) va dumaloq shaklda yozilishi xos bo‘lib, bu so‘zlarni o‘qishda yengillik tug‘diradi. Kursiv yozuv so‘zdagi harflar biri ikkinchisiga ulanib yozilish uslubidir. Bunda o‘qish ancha mushkullik tug‘diradi. Monumental yozuv kushonlar davri yodgorliklari uchun xosdir. Bu yozuv namunalarini Surx-ko‘tal va Dilberjindan topilgan matnlarda ko‘rish mumkin. Kursiv usulda

yozish tendensiyasi monumental yozuvlarga nisbatan kuchayib boradi. Va nihoyat, Eftaliylar davriga kelib, kursiv yozuv uslubi tamoman g'alaba qiladi. Ba'zi muhrlarda ham kursiv, ham qirrali yozuv shakli qo'llanilgan. Rivojlangan baqtriya kursiv yozuvi Eski Termez - Qoratepa budda monastir devorlarida, kushon-sosoniylar va eftaliylar tangalarida, Uruzgandagi devor yozuvlarida va Tochi vodiysidan topilgan bitiklarda uchraydi.

Buyuk Kushonlardan keyingi davr tangalardagi yozuvlarda kursiv usulga o'ta boshlagan. Bu yozuvlarni o'qish nihoyatda qiyin edi. Kushon-sosoniylar skifat¹¹ tangalaridagi, kidariylar va eftaliylar tangalaridagi, sosoniylar tangalaridagi eftalit va arab-eftalit tangalaridagi yunon alifbosiga borib taqaluvchi kursiv yozuvli yozuvlar turlicha talqin qilinadi. Tangalardagi unvonlar va shaxs nomlari o'rta eroniy til holatini aks ettiradi, boshqalari esa hind va turk tilidan kelib chiqqan. Mavjud yozuvlar orqali eftaliylar tili to'g'risida aniq fikr aytish qiyin, lekin shunga qaramasdan tadqiqotchilarning fikriga ko'ra, baqtriya tili eftaliylarga qarashli bo'lgan Toxariston viloyatida ham ma'muriy boshqaruv doirasida amal qilgan. Toxariston esa turkiy yobg'ular tomonidan boshqarilgan.

Kushon-sosoniylar tangalari Cunningham 1893, Herzfeld 1930, Lukonin 1967), A.Bivar (Bivar 1968) kabi olimlar tomonidan o'rganilgan. Keyingi paytda o'zbek olimlaridan G'aybullay Boboyorov bu sohada ish olib bormoqda.

Muhrlarda va gemmalarda¹² baqtriya yozuvlari saqlanib qolgan. Bularning na'munalari Angliya, Afg'oniston, Pokiston, Hindiston va boshqa mamlakatlarning muzeylarida va kolleksiyalarida saqlanmoqda. Mazkur matnlarni Bivar "Korpus ironayazichnix nadpisey" kitobining jildlaridan birida nashr qildirgan (Bivar 1968). Leningraddagi Ermitajda saqlanayotgan gemma-muhrda bitilgan baqtriya yozuvlarini B.Ya.Staviskiy 1961, 1962-yillarda nashr qildirgan edi. Aksariyat yozuvlar kursivda bitilgan, lapidar yozuvlari juda kam. Quyida baqtriya yozuvli gemma na'munalariidan bir nechtasida o'qilgan ismlarni va mansablarni keltiramiz:

¹¹Skifat so'zi tanga yuzasida maxsus yumaloq muhra yordamida hosil qilingan botiqlik ma'nosidagi atama.

¹²Qimmatbaho toshlardan zargarlik buyumlariga? Jumladan uzuklarga ko'zlar o'rnatilib, ularga o'yib tushirilgan yozuvlar va tasvirlar ishlangan. Muhr sifatida foydalanilgan bunday buyumlar *gemma* deyiladi.

Asbarobido - “kavaleriya boshlig‘i”, ahmoniylarning ma’muriy boshqaruv tilidagi asbar tarixan aspabara “otda yuruvchi”, “suvoriy” so‘zidan olingan.

Borsogoigo – “Burzgo o‘g‘li” atamasi V.A.Livshisning fikriga ko‘ra kushonshoh Varaxran davriga taalluqli.

Findofarris – “zabt etuvchi, g‘olib farr”. Farr tushunchasi farraxlik, baxtlilik demakdir. Zero, Farr samoviy, ilohiy baxt ma’nosidagi farishtaning nomidir.

Freixoadeo (freya-xvatavea – fdctn. Frey- azizam, yoqimtoyginam, dr.ir. xva-tavya- hukmdor).

Gemmalardagi ba’zi unvonlar g‘arbiy erondan olinganligi aniqlangan.

Baqtriya yozuvli muhr va gemmalarni A.Bivar bilan X.Xumbax to‘plagan. Unga qadimgi Panjikent xarobalaridan topilgan kursiv yozuvdagi oltita bulla parchalaridagi yozuvni ham qo‘shish mumkin.

Syuan Szyan va XII asr arab muallifi as-Sama’ning ma’lumotlariga ko‘ra, baqtriya tilida juda ko‘p adabiyotlar va yozma manbalar bo‘lgan. Bu qo‘lyozma boyliklardan faqat bir nechta bo‘laklarga, hammasi bo‘lib 50 qatorcha yozuv saqlanib qolgan, lekin u ham bo‘lsa to‘liq emas. Paleografik va arxeologik ma’lumotlarga ko‘ra, eng qadimgi yozuv bu IV asrga taalluqli “London parchasi” yoki “Lou-Landan topilgan fragment” deb nomlanib, u A.Steyn tomonidan Sharqiy Turkistondagi Lou-Lan xarobalaridan topilgan va F.Tomas nashr qildirgan. Bu bo‘lak o‘n qator yozuvdan iborat, uning na boshi va na oxiri bor.

1905-yilda A. Fon Le-Kok Sharqiy Turkistonning Turfan vodiysidagi Tuyok daryosi vohasidagi ibodatxona xarobalaridan qog‘oz, beresta va pal‘ma barglariga yozilgan manixey, xristian va budda qo‘lyozmalarini topgan¹³. Ular orasida yettita “oq xunlar” yoki eftaliylarning yozuvlari ham bo‘lgan¹⁴. O‘sha joyda topilgan VIII-IX asrlar qo‘lyozmalari va boshqa ashyoviy materiallar, baqtriya yozuvlari “Berlin (eftalit) fragmentlari” yoki Berlin muzeyi hind san’ati obidalari nomi ostida saqlanmoqda.

¹³ Ilk o‘rta asrlarda Sharqiy Turkistonda qog‘oz ishlab chiqarish keng yo‘lga qo‘yilgan; beresta – qayin yoki terak po‘stiga yozilgan matn; palma daraxti bargidan yozuv materiali sifatida foydalanish keng tarqalgan. Bunday yozuv materiallari potxi deb atalgan.

¹⁴ Oq xunlar yoki eftaliylar yozuvi tushunchasi yunon-boxtar yozuvining kursiv davriga nisbatan shartli ravishda ishlatiladi.

Baqtriya hududidan baqtar yozuvidagi birinchi topilma 50-yillarning boshiga to'g'ri keladi. Bu davr Amudaryoning o'ng sohilida (Tojikiston va O'zbekistonning janubida) olib borilgan arxeologik tadqiqotlar bilan bog'liq. Birinchilar qatoriga 1951-yilda Dushanbedan topilgan xurning og'ziga yozilgan bitik parchasini kiritish mumkin. Unda yagona so'z – harflari o'zaro ulanmagan holda (*lapidar usulda*) “zado” so'zi bitilgan. Buning ma'nosi “daraxt yelimi” demakdir.

1952-yilda Ko'lob viloyatining Dashtijum tumanidan bronza qo'ng'iroqcha topilgan. Unda yunon harfiga o'xshash bo'lgan 17 (yoki 18) belgidan iborat yozuv o'yilgan edi. Bu yozuv hanuzgacha o'qilmagan. Shuni ta'kidlamoq kerakki, Baqtriya hududidan shunga o'xshash bir qator yozuvlar topilgan bo'lib, hanuzgacha o'qilmaganlari mavjud. B.I.Marshak Varaxsha devoridagi rasimga e'tiborni jalb qilgan. Rasmda olim filga tashlanayotgan afsonaviy qush - grifonning qanotlari patlarida yunon harflariga o'xshash belgilarni ko'rgan, lekin hanuzgacha uni tushunib yetilmagan.

Arxeologik tadqiqotlar natijasida Markaziy Afg'onistondan baqtriya epigrafik yodgorliklari hamda Qandahorning shimoliy-g'arbidagi Uruzganda qoya yozuvlari ham topilgan. Bu yozuvlar 1954- yilda nashr qilingan. Noshirlar bir-biridan uzoq bo'lmagan toshga o'yilgan ikkita kursiv xatini topishgan. Matnlarning boshidagi birinchi belgilari bir xil bo'lgan, lekin oxiri bir-biridan farq qilgan. Ikkinchi yozuvni A.Bivar quyidagicha tarjima qilgan: “Ilohiyvor va shuhratli Zabul shohi Mixira (qul)” va hujjatning sanasini eramizning 500-yili bilan belgilagan. Sana-ga oid ba'zi so'zlar hali aniqlanmagan. Mauo “oy” so'zi aniqroq o'qilgan. Birinchi yozuvni quyidagicha miurod (o) mafuo zinigo – Quyosh va oy himoyasida deb o'qish tavsiya qilingan.

Baqtriya yozuvi bo'yicha dastlabki nashr Surx-Ko'tal tepaligidan qazib topilgan Kushon davriga oid ibodatxona majmui asosida yaratildi. Uni fransuz arxeologiya missiyasi boshlig'i Daniel Shlyumberje rahbarligida Raul Kyuriel e'lon qildi. “Palameda yozuvi”ning birinchi ikki qatori sharqiy Eron yoki shartli ravishda “toxar” tiliga mansub deb aytadi. Va nihoyat, 1957-yilda “Katta Surx-Ko'tal yozuvi” ochildi. Topilgan yozuv to'liq saqlangan. Matn 25 qatordan iborat bo'lib toshtaxtaga o'yib tushirilgan. 1958 -yildayoq A.Marik ushbu yodgorlik haqida maqola e'lon qildi. U yodgorlik yozuvini “Baqtriya tili”da ekanligini aniqladi, lekin uni “eteo-toxar” deb nomlashni taklif qildi. Toshtaxtadagi yozuv mazmunini V.B.Xenning to'g'ri va ravon tarjima qilib, tushuntirib berdi. Barcha gram-

matik paradigmalari, bog‘lovchilar, yordamchi so‘zlar, so‘z turkumlari, sintaksis qurilmalarini o‘rganib, V.B.Xenning Surx-Ko‘tal yozuvi “qurilish” xotiranomasi ekanligini angladi. Milodiy 31 yilda Surx-Ko‘tal ibodatxonasi hovlisida qurilgan va ta‘mirlangan suv inshooti quduq bilan bog‘liq ekan. Bu tarjimalarning to‘g‘riligini esa arxeologik topilmalar isbotlagan.

A.Marik va V.B.Xenningdan keyin X.Xumbax o‘z tarjimalarini kitob shaklida chop ettirgan. Lekin uning farazlari ilmiy jihatdan asosli emas edi. Ya‘ni X.Xumbaxning fikricha, yozuv – Qadimgi Eron tilida zardushtiylar ilohi Mitraga bag‘ishlangan madhiyalar emish.

1958-1959-yillarda Surx-Ko‘talda oldingi topilgan yodgorlikning ikki nusxasi topildi. Avvalgidan farqli ravishda nusxalarning xulosa qismi va so‘zlari alohida yozilgan. Dastlab bu nusxalar E.Benvenist tomonidan o‘rganilgan. Surxko‘tal yodgorligidan topilgan barcha toshtaxta yozuvlar paleografiyasi bo‘yicha R.Gyobl maxsus izlanishlar olib borgan. Izlanishlar natijasi unchalik ishonchli emas edi. R.Gyobl va X.Xumbaxning noto‘g‘ri tarjimasi bo‘yicha Gershevich tanqidiy maqola e‘lon qildi.

Katta Surxko‘tal yozuvining uchta nusxasidan tashqari, Surxko‘tal ibodatxonasidan “Tugatilmagan yozuv”, “Devoriy yozuv”, “Palameda yozuvi” bo‘laklari (unda faqat so‘nggi uch qator yozuvlar saqlanib qolgan) ham topilgan.

Baqtriya tilidagi yodgorliklarning yomon saqlanganligi, uni o‘qish va tarjima qilish bilan bog‘liq bir qancha muammolarni o‘rtaga qo‘ygan. “Katta Surxko‘tal yozuvlari” yaqin gacha yagona manba hisoblanar edi¹⁵. Quyida yozuvning lotin harflarga o‘girilgan transliteratsiyasini va olimlar guruhlar V.B.Xenning, I.Gershevich, V.A.Livshis, N.Sims-Villiams, Yan Xarmattalar tomonidan amalga oshirilgan tarjimani keltiramiz:

Matn (Versiya M)

1. eido ma lizo mo kaneško oanindo bagolaggo sido i bago sao kaneski namobargo kirdo.
2. tadioo kedo fordamsa ma lizo frogirdo tadeio mandaro abo nisto xoto asido ma liso ababgo stado.
3. odo kaldo aso Irono minano ieiro stado tado I bage aso i nosalmo froxortindo tado abo Irafo oastindo abo andezo oto ma lizo pidorigdo.

¹⁵ Hozir baqtriya yozuvi yodgorliklari favqulodda ko‘payib qoldi: Ayritom bitigi; Ravatak baqtriya arxivi kabilar tadqiqot maydonini kengaytirib yubordi.

4. ta kaldo nokonzoko i karalraggo i freixodeogo kido freistaro abo sao i bagopouro i loixobosaro i sizogfrgo i alosxalo kido faro oispoano mo oadobargano osogdomaggo pido i iogo odo uirso xsono neisano mao malo ogado f mo bogolaggo.
5. tadeio ma lizo porogato tadeio eiio sado kando oteio abo ozooasto oteio pido asagge ido oilirdo atano abo ma lizo faro karano abo ma gaoeio.
6. odo kaldano aso lrouro minano ieiro booeio tadano i bage aso i nosalmo ma froxoasondeio otano ma lizo ma pidorixseio.
7. oteio asasko mo sado exstrigo kirido albargo ostado ido ato pideino sado pideino axstrigo uarougo ma liso xouso porooato.
8. otoiio mo sado odo masto xirgomano kirido amo borzomiuro amo kozgaskipouro amoastiloganseigi amo nokonziki karalraggo marego pido i xoadeo fromano/
9. oto eiio mano nobixto amo miuramano amoborzomiuro pouro {tamg'a} amiura mano {tamg'a}

Tarjimasi

1. Bu ibodatxona – g'olib muqaddas Kanishkaning ibodatxonasi, janobi hukmdor Kanishkaga bag'ishlangan.
2. Bu ibodatxona dastlab qurilgan vaqtidan keyin ichki suvlar qochib, ibodatxona suvsiz qolgan.
3. Issiq kunlarning birida, u yerda yashayotgan xudolar^{16*} olib ketilgan va ibodatxona bo'shab qolgan.
4. Nokonzokning hokimi, Frixvadevaning o'g'li, podshoning sevimlisi, Xudoning o'g'li, barcha jonli narsalarning beg'araz yordamchisi, o'ttiz birinchi yilning nisan oyida bu muqaddas joyga kelgan.
5. Ibodatxona devor bilan o'rab olinganda quduq qazilib suv chiqazilgan, toshlar terilgan-ki, toki odamlar suvga tanqislik sezmasin.
6. Issiq kunlar boshlanib qurg'oqchilik boshlanganda xudolarni bu ibodatxonadan olib ketishmagan va u kimsasiz bo'lib qolmagan bo'lardi.
7. Quduqdan suv olish uchun suv ko'targich o'rnatilgan, hovuz qurilgan, shu quduq va suv ko'targich tufayli obod va farovon bo'lar edi.

¹⁶ xudolar – ma'budlarning haykallari, tasvirlari ma'nosida.

8. Bu quduq va narvonni Janob Kozgashkning o'g'li, hokim Nokonzokning quli Buramixra qurdirgan.
9. Bu...Buramixraning o'g'li Mixraman yozgan {tamg'a}, {yozilgan} Mixraman {tamg'a}.

XX asrning 80-yillarida Qadimgi Baqtriya hududlarida, hozirgi Afg'onistonning Ravatak qishlog'ida Kushonlar saltanati davriga oid qadimgi hujjatlar arxivi topildi. Unda yuzdan ortiq hujjatning barchasi yunon-boxtar alifbosida yozilgan. Ularning tili kushonlar davridagi boxtariy til bo'lib, keyinchalik pushtu tilining shakllanishida muhim rol o'ynagan.

Kushonlar davrida shakllangan yunon-boxtar yozuvi o'lkamiz madaniyati tarixida muhim rol o'ynaydi. Bu yozuv ijtimoiy va madaniy hayotning hamma sohalarida keng qo'llangan. Mazkur yozuv orqali bizgacha ko'plab noyob hujjatlar yetib kelgan. Shunisi diqqatga sazavorki, Kushonlar saltanati davriga qadar davlat mahkamachiligida yunon alifbosidan foydalanilgan bo'lsa, Kanishka davrida islohot ro'y berib, yunon alifbosi boxtar tiliga moslashtirilgan. Kanishka davri tangalaridagi yozuvlar boxtar tilida yozila boshlangan. Monumental yodgorliklarda ham yunon-boxtar yozuvi namunalari uchraydi, jumladan, Ayritomdan topilgan buddaviy haykallar guruhi tag kursisidagi hamda Surx Ko'tal ibodatxonasidagi toshga o'yilgan xotiro bitigi ham shu tilda yozilgan.

Ravatak arxividagi hujjatlar teri, mato va taxtachalarga yozilgan. Ingliz olimi Nikolas Sims Vilyams mazkur hujjatlarni 4 turkumga ajratgan: 1. huquqiy hujjatlar; 2. analogik, sanasi aniq bo'lmagan hujjatlar; 3. ro'yxatlar va hisobotlar; 4. yog'ochdagi yozuvlar.

Baqtriya arxiv hujjatlari Nikolas Sims Vilyams tomonidan Oksford universitetida nashr qilingan. Kitobda birinchi turkumga kiruvchi huquqiy hujjatlar xronologik tartibda "A" dan "Y" gacha alifbe harflari asosida shartli ravishda belgilangan. Bir yilda yozilgan ikkita hujjat "I" va "II" tartibida joylashtirilgan. Birinchi va ikkinchi turkumga taalluqli hujjatlar bir xil bichimli teriga yozilgan. "Ia" turkumdagi hujjatlar bir bo'lak matoga ikki nusxadan yozilgan.

Ravatak arxivi hujjatlari asosan oldi-sotdi dalolatnomalari, yer mulkini meros qoldirish, soliq to'lash, qul savdosi dalolatnomasi va tilxatlar, sarf-xarajat hisobotlari hamda yagona namuna sifatida saqlangan nikoh shartnomasidan iborat. Hujjatlarning aksariyatida Kanishka erasi asosida sanalari belgilangan, ya'ni hujjat tuzilgan yil,

oy va kuni ko'rsatilgan. Ba'zi hujjatlarda esa kuni ko'rsatilgan, ammo yili va oyi yozilmagan. Hujjatlarda 110 yidan to 549 yilgacha sanalar qo'yilgan. Arxiv hujjatlarining e'tiborli tomonlaridan biri shulki, dalolatnomani tuzish chog'ida ikki taraf vakillari bilan birga guvohlar ham qatnashgan. Albatta tuzilgan hujjatda ikki tomon vakillari, guvohlarning ismi, sharifi albatta ko'rsatilgan va ular dalolatnomada o'z roziligini bildirgan. Dalolatnomalar ip bilan bog'lanib, surguch surtilib, muhrlangan.

Ravatak arxivi hujjatlari orqali Kushonlar davrida mahkamachilik an'analari ancha taraqqiy qilganligini kuzatish mumkin. Yunon-boxtar yozuvida bitilgan Ravatak arxivi hujjatlari orasida ijtimoiy-xo'jalik munosabatlarini o'zida aks ettirgan turkum materiallar mavjud. Shulardan biri, 379 yilning Ab oyida Varnu shahrida tuzilgan shartnoma bo'lib, ingliz olimi Nikolas Sims-Vilyamsning kitobiga shartli "L" harfi bilan kiritilgan. Bu davrda Kushonlar mahkamachilik ishlarida ahmoniylar davridan yetib kelgan mahkamachilik an'analari keng foydalanilganligi ko'zga tashlanadi.

Savol va topshiriqlar:

1. Baqtriyada mavjud bo'lgan davlatlar haqida so'zlab bering.
2. Nisoda qanday arxiv hujjatlari to'plangan?
3. Parfiyoniy hujjatlar Eski Niso arxivining topilishi va o'rganilishi.
4. Baqtriya yozuvi yodgorliklari na'munalaridan misol keltiring?
5. Baqtriya yozuvi yodgorliklari tadqiqotchilari haqida ma'lumot bering?
6. Surx-Ko'tal yodgorligi haqida ma'lumot bering?
7. Bronza qo'ng'iroqcha nomi bilan mashhur hujjat to'g'risida so'zlab bering?
8. Ravatak arxivi Kushonlar davlatining ijtimoiy-iqtisodiy hayoti bo'yicha muhim manba.

Mustaqil ta'lim uchun savol va topshiriqlar:

1. *Parfiya davlatining markazida olib borilgan arxeologik tadqiqotlar.*
2. *Eski Niso arxivi hujjatlari ijtimoiy-iqtisodiy munosabatlar bo'yicha muhim manba.*
3. *Parfiya arxivi hujjatlari soliq yig'implari bo'yicha muhim manba.*
4. *Surxko'tal yozuvining topilishi Markaziy Osiyo tarixida muhim hodisa.*
5. *Ravatak arxivi Kushonlar davlatining madaniy hayoti bo'yicha muhim manba.*

II BO‘LIM. MARKAZIY OSIYONING ILK VA RIVOJLANGAN O‘RTA ASRLAR ARXIVLARI

5-§. Afrig‘iyalar davriga oid Tuproqqal`a arxiv hujjatlari

Darsning maqsadi: *Tuproqqal`a arxiv hujjatlarining topilishi, uning o‘rganilishi, poleografiyasi, hujjatlarni turkumlash, tahlil qilish, Mug‘ tog‘i sug‘d hujjatlarining topilishi, poleografiyasi, hujjatlarning o‘rganilish jarayoni, hujjatchilik an‘analarining davomiyligi, arxiv hujjatlarining ilmiy yangiligini ko‘rsatish, talabalarda bilim va ko‘nikma shakllantirish.*

Tayanch iboralar: Tuproqqal`a arxivi, S. P.Tolstov, teriga va yog‘ochga yozilgan hujjatlar, sug‘d yozuvi, Mug‘ tog‘i sug‘d hujjatlari, A.A.Freyman, V.A.Livshis, Sug‘d to‘plami, A hujjatlar, B hujjatlar, V hujjatlar.

1938-1950 yillarda arxeolog S.P.Tolstov rahbarligidagi ekspeditsiya tomonidan Amudaryoning quyi oqimida, hozirgi Qoraqalpog‘istonning Ellikqala tumanida joylashgan madaniyatimizning durdonasi sanalmish Tuproqqal`a shahar xarobasi o‘rganilgan. Bu erda olib borilgan arxeologik tadqiqot izlanishlari natijalari uning bir qancha ilmiy asarlarida o‘z ifodasini topgan. Tuproqqal`adagi qazish ishlari Germaniya fashizmi boshlagan urush tufayli bir muddat to‘xtab qolgan edi. S.P.Tolstov 1945-yil Xorazmga qaytib kelib, 1950 yilgacha Tuproqqal`ada tadqiqotlarni davom ettirgan. Uning vafotidan keyin E.Nerezkin rahbarligidagi ekspeditsiya 1965-yil shahar mavzellarida qazish ishlarini qayta boshlagan. 1984-yilda 1945-1950-hamda 1965-1972-yillarda Tuproqqal`adagi arxeologik tadqiqot ishlari natijalari sifatida “To‘prakkala dvorets” kitobi nashr qilindi.

Tuproqqal`aning shoh saroyi joylashgan Markaziy massivning janubiy-sharqiy tomonidagi pastki qavatning to‘rtta xonasida xorazm hujjatlari topilgan. Bu xonalar shartli ravishda 89 (232), 90 (231), 93 (239), 91 (YUR) raqamlari bilan belgilangan. Bu hujjatlar afrig‘iy Xorazmshohlar davriga oid bo‘lib, charm va yogochga – taxtacha va tayoqqa yozilgan. Ularning umumiy soni 140 ta bo‘lib, shundan 122 tasi charmga, qolganlari yog‘och taxtacha va cho‘plarga yozilgan. Yozuvlar tush (qora siyoh) bilan ilk xorazm kursiv usulida yozilgan. Ularning ko‘pchiligini Freyman o‘rgangan.

Topilmalar joyi ularni yuqori qavatdagi hujjatlar bilan aralashib ketgan degan xulosani beradi.

Bu yozuvlarning yozilish shakli Xorazm yozuvi kelib chiqqan oramiy yozuvi va eng qadimgi Xorazm yozuvlaridan ancha farq qiladi. Bu farqlar ayniqsa (aleph) m, s, p, t harflarida yaqqol seziladi.

Oramiy prototipidagi 22 harfdan faqat 20 tasi Tuproqqal`a hujjatlarida ishlatilgan, ulardan I (‘ayin) va q faqatgina oramiy ideogrammalarida keltirilgan. Qolgan 2 ta harf “ʻ” (tēth) va “š” (šādē) ham faqat geterogrammalarda (matnlarda jravbecha yozilib, xorazmiycha o‘qiladigan so‘zlar geterogramma deyiladi) qo‘llanilgan.

Xorazm yozuvida /č/ tovushini ifodalash uchun “š” harfi ishlatilgan. Milodiy III asrda Xorazm yozuvida jarangli “ž” tovushi “š” (yoki, xorazmcha /č/ qadimiy eroniy tillardagi t tovushini aks ettirsa, u holda t) bilan ifodalangan bo‘lishi mumkin.

Teriga yozilgan va loy(kesak) parchalariga singib qolgan hujjatlar¹⁷

Tuproqqal`adan teriga yozilgan hujjatlardan 8 ta parchasi saqlanib qolgan. Bu hujjatlar K-1 – K-8 raqamlari bilan belgilangan. K harfi “koja”, ya’ni “teri” ma’nosini bildiradi. Teriga yozilgan hujjatlarning ko‘plari chirib, teshilib ketgan bo‘lib, kuya egan joylaridagi harflar zarar ko‘rgan, harflarning xira izlari qolgan. Bu hujjatlarning parchalari 91-xonadagi xum ichidan chiqqan. Yozilgan terilar o‘ram holida xumga solib saqlangan. Saroy vayron bo‘lgan paytda xum tuproq bilan to‘lgan. Namlik tegib teri qatlamlari orasidagi tuproq loyga aylangan. Teridagi yozuvlar nam ta’sirida loy (qurugan kesak) yuzasida aks tasvir qoldirgan. Loyda hosil bo‘lgan izlar 90 va 93-xonalardan topilgan. Qazish paytida 90-xonadan 20 ta kesak parchalari topilgan. Loy bo‘laklari G-II, G-IIIa, G-IIIb, G-V, G-VIII, G-VIIIa, G-IX, G-X, G-XI, G-XII, G-XIII, G-XIV, G-XV, G-Xva, G-XVb, G-XVI, G-XVII, G-XVIII, G-XIX, G-XX (G-II, “G” belgisi “glina” so‘zining

¹⁷ Hujjatlar loyga yozilmagan. Yozuvli terilar o‘ram holida saqlash uchun xumga solingan. Tuproqqala vayron bo‘lgan paytda xum tuproq bilan to‘lgan. Namlik tegib teri qatlamlari orasidagi tuproq loyga aylanib, teridagi yozuvlar loy yuzasida aks tasvir bo‘lib singib qolgan. Xum ichidan teri o‘ramlari olinganda shu loy (kesak) bo‘laklari ham ehtiyot bilan ajratib olingan. Kesak parchalari birlashtirib yig‘ilgan. Ulardagi yozuvlarning teskari tasviri ko‘zgu orqali o‘qilgan. Loy bo‘laklari G-1, G-2... kabi belgilangan.

bosh harfidan olingan) kabi belgilangan. 93-xonadan 13 ta kesak parchasi topilgan bo‘lib, ular G-3, G-4, G-5, G-7, G-8, G-9, G-10, G-11, G-12, G-13, G-15, G-16, G-17 kabi belgilangan.

B.I.Vaynberg bu kesak bo‘laklarini joylashtirib, matn izlarini o‘qishga muvaffaq bo‘lgan. Kesak sinib, mayda-mayda bo‘laklarga bo‘linib ketgan. Kesak bo‘laklari alohida hujjat sifatida raqamlangan. Ammo kesak parchalarini har doim ham o‘qishning iloji bo‘lmagan. Chunki yozuvning izlari ba’zan xira, yoki umuman uning aksi bo‘lishi mumkin. Kesak bo‘laklarini bir-biriga ulab o‘qish mushkul bo‘lgan. 90 va 93-xonadan topilgan matn izlari qolgan kesak parchalari va teri parchalari soni mingta atrofida, ammo teriga yozilgan matnlarning qanchasi kesak izlarida saqlanib qolganini aniqlash qiyin.

Teriga yozilgan hujjatlar naycha qilib o‘ralgan va muxrlangan. Xo‘jalik hujjatlarining bir qismida ularning yozilgan sanalari saqlangan, ya’ni yili Xorazmda amal qilgan qadimiy yil hisobi-era asosida ko‘rsatilgan. Sana hujjatlarning boshida, o‘rtasida va ayrim hollarda oxirida ham qo‘yilgan. “Yil” so‘zi 3 ta terida (K-1, K-2, K-6 hujjatlarida) va 11 ta loy parchasida uchragan. Ammo yil faqat 6 ta holdagina aniq saqlanib qolgan: 188 (G-XVIII/1-4), 204 (G-12/4-1), 207 (yoki 208,209 – G-G-15/2), 223 (G-XVIII/2), 231 (K-2, stk.1), 252 (GK-1,stk.18).

Bu yil sanalari Xorazm erasiga tegishlidir. V.I. Vaynberg bergan ma’lumotlarga qaraganda, Xorazm erasi eramizning 40- yoki 50-yillardan boshlangan. Tuproqqal’a hujjatlari eramizning III-asrlariga to‘g‘ri keladi. Sanasi ko‘rsatilmagan hujjatlarning yoshini aniqlash qiyin. Bunda matnning yozuv xususiyatlariga e’tibor berish kerak. Chunki hujjatlarni 10 dan ortiq kishi turli vaqtda yozgan.

S.P.Tolstov teriga yozilgan K-1, K-2 raqamli ikki hujjatning foto suratini va uning o‘qilishini nashr qilgan. Ularda oramiy ideogrammasi va sonli belgilarning mavjudligi bu hujjatni ma’muriy xo‘jalik ro‘yxati yoki qandaydir narsalarni yetkazib berish uchun tuzilgan ro‘yxat ekanini aniqlash imkonini berdi. Bu taxmin uni yanada chuqurroq o‘rganishda o‘z asosini topdi. Hujjatlar omborga mahsulotlarni “olib kelinish”, “yetkazib berish” haqidagi ro‘yxatlardan iborat. Shu bilan birga ro‘yxatda musallas-vinoning o‘lchov birligi ham berilgan. K-1, K-3, K-6 va K-8 hujjatlarida un so‘zi eslatiladi. K-5, K-6 hujjatlarida keltirilgan va uni berilganligi ro‘yxatdan otkazilgan.

1948-yilda 89-xonadan uzunligi 16,5 sm eni 3-6 sm keladigan hujjat topilgan. Unda 20 qator yozuvning bir qismi saqlanib qolgan.

Hujjatlar tahlil qilinganda shaxs ismlari aniqlangan. Bu o‘z navbatida, o‘sha vaqtda Xorazm onomastikasi tarixini o‘rganishda yordam beradi. Hujjatlar saroyga alohida shaxslardan keltirilgan un, may (vino) ro‘yxatidan iborat. Ro‘yxatda un va vinolarning o‘lchov birliklari berilgan bo‘lib, olimlar bu o‘lchov birliklari Old Osiyo, Eron va Xorazmdagi o‘lchov birliklari bilan solishtirish imkonini beradi.

Tuproqqal`a hujjatlarida kam bolsa-da sanalar saqlanib qolgan. Hujjatlardagi eng so‘nggi sana Xorazm erasi bo‘yicha 252 y belgilangan. Hujjatlar orasida Tuproqqal`a saroyi xo‘jalik hujjatlari arxivida faqat olib kelingan yoki berilgan narsalarning ro‘yxatlaridan tashqari Podsho xazinasida saqlanayotgan mol-mulklar ro‘yxati ham saqlanib qolgan.

Charm matnlarining qatqaloq loy-kesak parchalaridagi izlarida amaldorlarning unvonlari va kasblar nomi juda kam saqlanib qolgan. Masalan: “bosh iqtisodchi”, “boshqaruvchi” yoki “nazoratchi”, “nazorat qiluvchi”, “etikdo‘z” kabi so‘zlar. Umuman olganda, hujjatlarning kesaklardagi izlarida 40 ga yaqin ismlar saqlangan. Masalan;, Abdak, Andak, Atrosarak va boshqalar.

Bizgacha etib kelgan charm parchalari va loy izlarida oy va kunlar qanchalik saqlanib qolganligini aniqlash mushkul. Faqat olib kelingan va berilgan 2 ta ro‘yxatda oy va kunlar sanasi saqlanib qolgan.

Yuqorida eslatib o‘tilganidek, Tuproqqal`a hujjatlari charm, yog‘och va tayoqlarga yozilgan. Yog‘ochga yozilgan hujjatlarni uch guruhga bo‘lish mumkin. Birinchi guruhga katta oilalar tarkibiga kirgan ozod va qul erkaklar ro‘yxati kiradi Bu hujjatlar “uyalar ro‘yxati” nomi bilan yuritiladi. Bunday to‘liq ro‘yxatlar 5 ta (I-V hujjatlar) va bular Tuproqqal`a hujjatlari orasida butun holatda saqlanib qolgan yagona hujjatdir. Bundan tashqari uy ro‘yxatlarining 10 ta bo‘lagi (VI-XV hujjatlar) ham topilgan.

Ikkinchi guruhga yog‘ochga yozilgan xo‘jalik hujjatlari kiradi. Bu g‘ildirak, chorva va boshqa narsalarning kirim va chiqim ro‘yxatlaridan iborat. Bu guruh 4 dona (XVI-XIX hujjatlar) kichik taxtachadan iborat.

Uchinchi guruhdan 7 ta tayoqchadagi hujjatlar o‘rin oladi. Ular P-1-P-7. “P” belgisi ruscha “palochka” so‘zining bosh harfidan olingan.

“Uyalar ro‘yxati” hujjatlarini birinchilardan bo‘lib, S.P.Tolstov o‘qigan hamda I va II hujjatlarni e‘lon qilgan. Keyinchalik B.V.Xenning bir nechta ismlarni aniqlashtirgan.

Beshta to'liq saqlanib qolgan "uyalar ro'yxati"dan to'rttasida katta oilalar, ularning tarkibiga kirgan erkaklar hamda uy qullari sanab o'tilgan. X raqamli uy hujjatining birinchi qatorida oila boshlig'I, y'ani uy egasining ismi yozilgan. I, II va IV hujjatlarda uy egasining uylanmagan, yoki oiladan ajralib chiqmagan o'g'illarining ismlari keltiriladi. Shuni ta'kidlab o'tish lozimki, aholini ro'yxatga olish davrida oiladan ajralib chiqqan va ro'yxatga olish yoshiga etmagan o'g'illarning ismlari "uyalar ro'yxati"ga kiritilmagan. Shuning uchun bolsa kerak, III hujjatda uy egasining ismidan so'ng kuyovning ismi yozilgan. I hujjatda esa o'g'illarning ismlaridan keyin kuyovning ismi yozilgan. Faqat bitta kuyovning ismi yozilishi udumga ko'ra turmushga chiqqan qiz kuyovning uyiga o'tib yashashi kerakligidan dalolat beradi.

Hujjatlarda ismlardan so'ng abzas, belgi turibdi. Undan so'ng BDN sarlavhasi qullar ro'yxatini boshlab beradi. I, II va IV hujjatlarda uy egasi xotini qullari va nevaralarining qullari ham ko'rsatilgan.

I hujjatda jami 21 ta erkakning ismi yozilgan; bular: uy egasi, ikki o'g'li, kuyovi va 17 ta qul, shu jumladan, uy egasi, uning o'g'illari va kuyovining 12 ta quli, uy egasi xotini quli, nevaralarining 2 ta mashuqasi, o'g'lining 1 ta quli bo'lgan. II hujjatda 15 ta erkakning ismi yozilgan bo'lib, bular uy egasi, ikki o'g'li va 12 ta qulning ismidan iborat. Ulardan 10 ta qul uy egasi va uning o'g'illariga, 2 ta qul xotiniga tegishli bo'lgan. III hujjatda 17 ta erkakning ismi bitilgan bo'lib, bular; uy egasi, kuyovi va 15 ta qul ismidir, shu jumladan, uy egasi va kuyoviga tegishli 12 ta qul va K'SBKUN ga tegishli 3 ta qul ismidan iborat. IV hujjatda 15 ta erkakning ismi keltirilgan. Bular uy egasi, ikki o'g'li va 12 ta qulning ismi bo'lib, qullarning 8 tasi uy egasi va uning o'g'illariga va 4 tasi esa xotinlariga tegishli qullardir. Shuni ta'kidlash joizki, hujjatlarda qullar sonining ko'pligi, o'sha vaqtda Xorazmda o'ziga to'q oilalarning ko'pligidan dalolat beradi. Tuproqqal'a arxivida uy egasi ismlari yonida unvonlarning eslatilmaganligi, bu oilalarning qaysi aslzodalar toifasiga mansubligini aniqlashga imkon bermaydi. Kitob muallifining ta'kidlashicha, "uy ro'yxati"da eslatilgan oilalar shahar aholisimi yoki qishloq aholisimi bilib bo'lmaydi.

V hujjat o'ziga xos bo'lib, unda 4 ta kishining ismi yozilgan: uy egasi va uning 3 ta quli. Ulardan 1 tasi uy egasining, ikkinchisi xotini va uchinchisi onasining quli bo'lgan. Bu ro'yxat kichik oilaning katta erkaklari ro'yxatidir.

Uyalar ro'yxatidagi qullar ismlari etimologiyasi ko'proq xorazmcha bo'lib, uylarning ozod a'zolari ismlaridan farq qilmaydi. Hujjat-

larning birortasida xorazmlik bo‘lmagan qullarning ismi uchramaydi. Demak, qullar xorazmlik bo‘lib, ular patriarxal oilalarga qaram bo‘lib, uy egasiga itoat qilgan. Qullar ozod kishilardan farqlangan. Bu esa 3-asrda Xorazmda qulchilik patriarxal xarakterda bo‘lganligidan dalolat beradi. Uy ro‘yxatlari armiya va ko‘ngilli qo‘shinlarini kuchi bilan ta‘minlash maqsadida katta yoshli erkaklarni ro‘yxatga olish asosida tuzilgan bo‘lishi kerak. Bu kichkina tayoqlarni bir yoki har ikkala tomonida nozik o‘yma naqshlar ishlangan. Bu narsa ular yorliq bo‘lishi mumkinligi haqida taxminni beradi. Tayoqchalardagi yozuvlar rangi ancha o‘chib ketgan va tayoqdagi yozuv bir so‘zdan iborat bo‘lib, bu haqiqiy ismlar bo‘lishi kerak. Tayoqlarda uchragan ismlar S.P.Tolstov, keyinchalik V.B.Xanning tomonidan o‘rganilgan. Bu olim bir necha ismlarni va tez-tez uchrab turadigan so‘zlarni o‘qishga muyassar bo‘lgan. Beshta to‘liq saqlangan uylar ro‘yxatidan to‘rttasida katta oilali uylar tarkibiga kiruvchi o‘zida uch avlodni ajdodlarini birlashtiruvchi erkaklar va uy qullari ro‘yxati berilgan. Bosh oilani uy egasi ismi bilan berilgan. Uy egasi hujjatning birinchi qatorida ro‘yxatning boshida yozilgan. So‘ng 1, 2 va 4 hujjatlarning har birida ikkitadan ism uchraydi. Bular uy egasining o‘g‘illari bo‘lishi mumkin. Ular uylanmagan, yoki otasining oilasidan ajralib chiqmagan bo‘lishi mumkin.

Demak, Tuproqqala arxivi Afrig‘iylar davrida Xorazmda ish yuritish an‘anasining yo‘lga qo‘yilganligi, hujjarlarda mamlakarning ijtimoiy-iqtisodiy hayoti bo‘yicha muhim ma‘lumotlar saqlanib qolganligi bilan o‘z qimmatini yo‘qotgan emas, degan xulosaga kelish ucnun asos bo‘lib xizmat qiladi.

Savol va topshiriqlar:

1. Tuproqqal`aning o‘rganish tarixini bilasizmi?
2. Tuproqqal`a hujjatlarining topilishi va o‘rganilishi.
3. Teriga yozilgan hujjatlar haqida nimalarni bilasiz?
4. Yog‘ochga yozilgan hujjatlar haqida ma‘lumot bering.
5. Tuproqqal`a hujjatlariga qo‘yilgan “K”, “G”, “P” shartli belgilarining ma‘nosi.
6. Tuproqqal`a hujjatlari shaxs ismlari bo‘yicha muhim manba.
7. “Uylar ro‘yxati” nomi bilan yuritilgan hujjatlar haqida ma‘lumot bering.
8. Tuproqqal`a arxivi hujjatlarida ijtimoiy-iqtisodiy hayot masalalari.

Mustaqil ta'lim uchun savol va topshiriqlar:

1. *Tuproqqal`a arxivi Xorazmshohlar davlatining ijtimoiy-iqtisodiy hayoti bo'yicha muhim manba.*
2. *Tuproqqal`a arxivi hujjatlarida xo'jalik hayotning aks etishi.*

6-§. Mug' tog'i sug'd hujjatlari

Darsning maqsadi: *Mug' tog'i sug'd hujjatlarining topilishi, poleografiyasi, hujjatlarning o'rganilish jarayoni, hujjatchilik an'alarining davomiyligi, arxiv hujjatlarining ilmiy yangiligini ko'rsatish, talabalarda bilim va ko'nikma shakllantirish.*

Tayanch iboralar: Sug'd yozuvi, Mug' tog'i sug'd hujjatlari, A.A.Freyman, V.A.Livshis, Sug'd to'plami, A hujjatlar, B hujjatlar, V hujjatlar.

Sug'diy¹⁸ yozuv miloddan avvalgi III-II asrlarda shakllangan do'lib, o'lkamiz madaniyati tarixida muhim rol o'ynadi. Bu yozuv ijtimoiy va madaniy hayotning hamma sohalarida keng qo'llangan.

Muhimi shundaki, sug'diy yozuv orqali bizgacha eramiz boshlaridan to X-XI asrlarga qadar yozilgan ko'plab noyob yodgorliklar etib kelgan. Ular orasida turli davr va hududlarga oid ko'plab numizmatik materiallar (tanga yozuvlari), metall, sopol, yog'och, charm, qog'oz va boshqa buyumlarga bitilgan matnlar, shaxsiy maktublar, diiny, axloqiy-falsafiy matnlarning parchalari, xo'jalik, huquqiy va diplomatik hujjatlar bor.

Sug'd yozuvlari namunalari Markaziy Osiyo mintaqasidan, jumladan, Afrosiyob, Panjikent, Mug' tog'i, Yerqo'rg'on, Sharqiy Turkiston, Turkmaniston, Pokiston, Mo'g'uliston, Janubiy Qozog'iston va boshqa joylardan topilgan. Bu esa, sug'd yozuvining mintaqalar bo'ylab keng tarqalganligining isbotidir.

¹⁸ O'zbek tilli adabiyotlarda ko'p hollarda "sug'd" yoki "so'g'd" atamasi ham etnik nom, ham muayyan geografik hudud yoki hukmdorlik nomi uchun qo'llanilayotgani ko'zga tashlanadi. Bu holat ba'zi o'rinlarda aynan xalq yoki tarixiy o'lka haqida borayotganligi masalasida chalkashliklar kelib chiqishiga sabab bo'lishi mumkin. Shu bois, muayyan etnos nomi sifatida "sug'diy", tarixiy-geografik o'lka nomi sifatida esa "Sug'd" atamasini ishlatishni ma'qul topdik.

Mutaxassislarning fikriga ko'ra, sug'd yozuvi dastlab mil.avv. III-II asrlarda paydo bo'lgan. Sug'd yozuvlari dastlab Zarafshon vohasidan topilgan kumush tangalarda uchragan. Bu tangalar mil.av. II-I asrlarga taalluqli edi. Tangalarda sug'd yozuvlari keng tarqalgan davr mil.av. I asrdan to milodiy IV asrlargacha to'g'ri keladi, deyish mumkin. II-VIII asrlarga taalluqli bullalar ham topilgan bo'lib, ularda ham sug'd yozuvlari bitilgan. Bullalarning biri Kalkutta muzeyida, ikkinchisi Britaniya muzeyida saqlanmoqda. Sug'd yozuvlari namunalari ro'zg'or buyumlarida ham uchragan. Masalan, Uraldagi Kopchik qishlog'idan sug'd yozuvli kumush tavoq, Perm viloyatidan esa kumush ko'zacha topilgan. Ular hozirda Sankt-Peterburgdagi Ermitajda saqlanmoqda.

1906-yilda A.Steyn boshchiligidagi ingliz ekspeditsiyasi Sharqiy Turkistonning Dunxuan yaqinidan sug'd yozuvida yozilgan "Eski xatlar" matnlarini topgan. "Eski xatlar" to'plamida 9 ta xat joy olgan bo'lib, ular Sharqiy Turkistondagi savdo faktoriyalarida yashagan sug'dliklarning Samarqand, Dunxuan va boshqa joylardagi o'z yaqinlariga va qarindoshlariga yozgan maktublaridir. Matnlar tarixiy-filologik nuqtai nazardan tahlil qilinib, IV asrda yozilgan degan xulosaga kelingan.

1956-yilda mongol arxeologi S.Dorjsuren Mongoliyaning Bug'ut qishlog'idagi IV-VIII asrlarga taalluqli qabrlarni kovlayotganda to'rtburchak toshga sug'd yozuvi bitilgan yodgorlikni topgan. Tosh yodgorligining balandligi 1,98 sm, eni 70 sm, qalinligi 20 sm bo'lgan. Topilmaning uch tomonida sug'd tilidagi sug'd yozuvi, orqa tomonida esa braxma yozuvi yozilgan edi. Bu topilma tarixda Bugut yozuvi nomi bilan ma'lum. Bugut yozuvi epitafiya - qabr toshiga yozilgan matn bo'lib, uni Muxan xoqon (553-572 yy.) akasi Maxan tekin vafoti munosabati bilan yozdirgan. Mazkur bitik Birinchi Turk xoqonligi davriga tegishli yagona yozma yodgorlik sanaladi.

Sug'd yozuvi va sug'd tili Farg'ona vodiysida ham keng qo'llanilgan. Bu haqida Quvadan topilgan xumdagi birgina so'z xabar beradi.

Sug'd yozuvi va sug'd tili hududiy jihatdan Sug'diyonada keng amal qilgan. 1961-yilda M.N.Fedorov Afrosiyobning sharqiy tomonini kovlayotgan mahalda chuqurlikdan sug'd yozuvi bitilgan sopol bo'lagini topadi. Topilma V-VI asrlarga oid bo'lib, kulol ustaxona egasiga tegishli xo'jalik hujjati ekanligi aniqlangan. Sopol parchasining bo'rtib turgan tomonida 5, ichiga kirgan tomonida 6 yoki 7 qator yozuv bo'lgan. Yozuvning saqlanib qolgan qismidan hujjat

kiyim-kechak, yog‘ va uy-ro‘zg‘or buyumlarining kirim-chiqimlari ro‘yxati bo‘lishi mumkin, degan xulosaga kelingan.

1975-yilda G.V.Shishkina rahbarligidagi arxeologlar tomonidan Afrosiyobdan yog‘och matn topilgan. Tayoqning uzunligi 16 sm, eni 2,5 sm. Tayoqning bo‘rtgan tomonida 5 qator yozuv yozilgan. Tayoqning o‘ng tomoni singan bo‘lib, o‘sha joy harflari shikastlangan. Shuning uchun tayoqning singan joyidagi to‘rt qator yozuvlarning boshlang‘ich harflari yo‘q. Tayoqning singan joyi yonida teshik bo‘lib, u maxsus arqon o‘tkazish uchun mo‘ljallangan. Arqon orqali yog‘och belga bog‘langan. V.A.Livshits hujjatni o‘rganib, VI asrga oid deb hisoblaydi. Olim matnni o‘qib, u sher sotib olish to‘g‘risidagi hujjat ekanligini aniqlagan.

Afrosiyobdan sug‘d yozuvidagi talaygina hujjatlar topilgan. Masalan: shahar xarobasidan haykalcha bo‘lagidagi yozuv, keramika idish sinig‘idagi yozuv, silindr shaklidagi sopol idishdagi yozuvlar.

1965-yilda arxeologlar Afrosiyobning shimoliy qismida sug‘d podsholarining saroy xarobalarini ochdilar. Saroy mehmonxonasining devorlari turli mazmundagi rasmlar bilan bezatilgan bo‘lib, ular orasida oq kiyim kiygan Chag‘oniyon elchisining surati ham bor. Uning etagiga su‘gd tilida o‘n olti satrdan iborat elchilik ishonch yorlig‘i yozib qo‘yilgan edi. Bu yozuvlar VII asr o‘rtalaridagi xalqaro munosabatlar tarixini o‘rganishda muhim ahamiyat kasb etadi.

1947-yilda qadimgi Panjikent xarobalaridan moddiy madaniyat yodgorliklari qatorida 25 ta sug‘d yozuvining namunalari topilgan. Yozuvlar sopol bo‘laklarida, qovurg‘a suyaklarida uchragan. 1952-yilda bu yerdan sug‘d yozuvi bitilgan torozi toshi topilgan.

Sug‘d yozuvlari mashqlari Turkmanistonda Gaur-Qaladan topilgan.

1974-yilda Qarshi yaqinida Yerqo‘rg‘ondan sug‘d yozuvli bulla topilgan. Bulla loydan konussimon muhr ko‘rinishida yasalgan. Unda “o‘lmas” so‘zi o‘qiladi.

1979-yilda Pokistonda Hind daryosi yuqori qismida Shatial degan joyda qoya yozuvlarini topishgan. Yozuvlarning katta qismini sug‘d yozuvlari tashkil qilgan. Yozuvlar xronologiyasi V-VII asrlar bilan belgilangan.

1906-1907-yillarda A.Steyn rahbarligidagi ekspeditsiya Sharqiy Turkistonda “Buddaning ming g‘ori”dan xitoy, hind yozuvlari qatorida sug‘d tilidagi sug‘d yozuvlarini aniqlagan. Keyinchalik bu yerda P.Pelo rahbarligida fransuz ekspeditsiyasi, S.F.Oldenbourg boshchi-

ligida Rossiya ekspeditsiyasi ish olib bordi. Tadqiqotlar natijasida sug‘d matnlari kolleksiyasi paydo bo‘ldi va u hozirda Londondagi Britaniya kutubxonasida, Rossiya FA Sharqshunoslik instituti Leningrad bo‘limida, Turfon vohasidan topilgan sug‘d yozuvlari yodgorliklari esa Berlinda saqlanmoqda.

Sug‘d yozma yodgorliklari orasida 1932-1933-yillarda Panjikentdan sharqda 60 km uzoqlikda Qal‘ai Mug‘dan topilgan Mug‘ tog‘i hujjatlari katta ahamiyat kasb etadi. Mug‘ tog‘i sug‘d arxivi xatlar, xarajatlar yozilgan hujjatlar va hisobotlar, tilxatlar, farmoyishlar, Panj hokimlarining diplomatik yozishmalaridan tashkil topgan.

Mug‘ tog‘i sug‘diy arxivi deb yuritiluvchi bu majmua VII asr oxiri – VIII asr boshlariga oid 80 ga yaqin noyob hujjatni o‘z ichiga oladi. Ular Sug‘d konfederatsiyasiga¹⁹ tobe Panch hukmdorligi (Panjikent) saroyi hamda turli viloyat hokimlari va amaldor a‘yonlarga tegishli hujjatlar yig‘indisidan iborat. Arab istilosi kunlarida, xususan, 722 yilda Panch hukmdori, bir muddat Sug‘d hukmdori taxtiga da‘vogar sifatida ish ko‘rgan Devashtich boshliq guruh Mug‘ tog‘ida joylashgan tik qoyalar bilan o‘ralgan mudofaa qasriga chekingan. Shunda saroy hujjatlari ham qasrga keltirilgan. 722 yili arablar qasrni hujum bilan olgach, uni vayron qilganlar,

¹⁹ Sug‘d konfederatsiyasiga – “Sug‘d ittifoqi” mazmunidagi ushbu nisbiy atama ostida ilk o‘rta asrlarda Zarafshon daryosi havzasidagi Samarqand, Panjikent, Maymurg‘, Ishtixon, Kabudon, Kushoniya hukmdorliklarini hamda Qashqadaryo daryosi havzasidagi Kesh va Naxshab hukmdorliklarini o‘z ichiga olgan muayyan siyosiy uyushma tushunilib, uning tarkibidagi mazkur hukmdorliklar o‘z ichki boshqaruvida mustaqil bo‘lishgan. Ularning har biri o‘z boshqaruv markazi – poytaxti, hukmdor sulolasi, hokimiyat ramzlari (tanga, tang‘a va h.k.), qo‘shini kabi hokimiyat xususiyatlariga ega bo‘lishgan. O‘z navbatida, ularning bitta siyosiy ittifoq – konfederatsiyaga birikishlari asosida mazkur hukmdorliklarning o‘zaro yetakchi hukmdorlik (yoki sulola)ga bo‘ysunishlari, hukmdor sulolalar kelib chiqishi jihatidan yagona xonadonga borib taqalishlari yoki ayrim ijtimoiy-siyosiy va madaniy- mafkuraviy majburiyatlarni bajarishlari kabi omillar yotgan. Jumladan, Samarqandda Chjaovu (Jamuk) xonadoni hukm surib, qolgan hukmdorliklardan aksariyatini ushbu xonadonga mansub sulolalar boshqarishgan va ular orasida Samarqanddagi sulola yetakchilik qilgan. Tashqi dushmanlarga birgalikda kurashish majburiyatida bo‘lgan hukmdorliklar vakillari yilning muayyan vaqtlarida bitta joyga yig‘ilgan holda diniy amallarni, xususan, zardushtiylar udumlarini hamkorlikda bajarishgan.

Devashtichni esa xalifalikning Xurosondagi noibi hukmiga jo'natganlar. Devashtich Xuroson noibi tomonidan qo'yilgan shartlarni qabul qilgach, Sug'dga qaytarib yuborilgan. Lekin xufya buyruq asosida u Rabinjon (hozirgi Kattaqo'rg'on shahri yaqinida joylashgan ilk o'rta asr shahri xarobasi) qabristonida qatl qilingan.

1932-yil bahorida Tojikiston SSR Zahmatobod tumani Xayrabod qishlog'i aholisi Mug' qal'asi qo'rg'onining xarobalaridan to'qima savat va hujjatlarni topishgan. Hujjatlar tushunarsiz yozuvda ipak qog'oziga yozilgan bo'lgan. Bir necha oylar mobaynida hujjatlar yuqori Zarafshon qishloqlarida qo'ldan-qo'lga o'tib yurgan. Hujjatlar respublika poytaxti Dushanbega olib kelingan. Bu yerda hujjatlar sug'd tilida yozilganligi aniqlangan. Hujjatlardan fotonusxa olinib, Leningradga professor A.A.Freymaniga jo'natilgan. 1933-yil dekabrda 91 ta Mug' tog'i hujjatlari Leningradga olib kelingan. A.A.Freyman hujjatlar ro'yxatini "Sug'd to'plami"da e'lon qilgan. Chuqur tahlildan so'ng, 76 ta hujjat aniqlangan, jumladan, 72 ta sug'd tilida, bitta arab, uchta xitoy va bitta turk tilidagi hujjatlar topilgan. Hujjatlar to'planib A, B, V belgilari bilan shifrlashtirilgan, ya'ni, A.I.Vasil'yev topganlari A-hujjatlar, A.A.Freyman topganlari B-hujjatlar, A.Pulotiy topganlari V-hujjatlarga ajratilgan. Bularga asl nusxasi yo'qolgan I-1 hujjatning fotonusxasi, A.Pulotiyda qolgan A-19 va pergamentga yozilgan hujjat kirmagan. Mug' tog'i hujjatlari turli materiallarga – charmga, taxtaga va qog'ozga yozilgan. Sug'd hujjatlarining 36 tasi charmga, 23 tasi yog'ochga, atigi 15 tasi qog'ozga yozilgan. Vaholanki, bu davrda Sharqiy Turkistondan topilgan sug'd hujjatlarining aksariyati qog'ozlarga yozilgan bo'lgan. Mug' hujjatlari uchun xitoy qog'ozini ishlatilgan. Ba'zi hollarda xitoy matnlarining orqa tomoni yozuv materiali sifatida ishlatilgan (B-27). Charm va pergamentdagi ba'zi hujjatlar avval ishlatilgan materiallarga yozilganligi ko'rinib turibdi. Buning uchun avvalgi keraksiz matn o'chirilgan va yangi matn yozilgan. Yangi yozuv ko'p hollarda materialning orqa tomoniga yozilar edi. Ba'zan materiallar ikkinchi marta ishlatilganda, avvalgi matn izi ko'rinib qolar edi; A-9 V (2 qator), B-9 V (8 qator).

1934-yilda A.A.Freyman topilgan hujjatlarning batafsil paleografik tasnifini yozgan. Ma'lumotlar Mug' tog'i topilmalariga bag'ishlangan maxsus "Mug' togi sug'd hujjatlari" to'plamida e'lon qilingan²⁰.

²⁰ Фрейман А.А. Описание рукописных документов, извлеченных из развалин здания на горе Муг в Захматабадском районе Таджикской ССР около

Shu to‘plamda hujjatlarning topilishi bilan bog‘liq jarayonlar²¹, Mug‘ tog‘i bo‘yicha arxeologik tadqiqotlarning hisoboti ham nashr qilingan²². Akad. I.Yu.Krachkovskiy arab xatidagi hujjatni o‘qib, uning sanasini va shu hujjat orqali Mug‘ tog‘i qo‘rg‘onining buzib tashlanishi haqidagi tarixiy jarayonni aniqlash imkoniyatiga ega bo‘ldi²³. Tadqiqotlar natijasida topilgan barcha hujjatlar VII asr oxiri - VIII asrning I choragi (722 yilgacha)ga xosligi aniqlandi.

A.A.Freyman su‘g‘d hujjatlarini mazmuniga ko‘ra ikki guruhga – xatlar va xo‘jalik hujjatlariga ajratadi. Keyinchalik V.A.Livshis yana bir guruh hujjatlarini aniqlagan bo‘lib, bular yuridik hujjatlar edi. Hujjatlarining aksariyati Panjikent hokimi Divashtich nomi bilan bog‘liq bo‘lgan.

1934-yilda A.A.Freyman xo‘jalik hujjatlarining ayrimlarini tarjima qilib, nashrini e‘lon qilgan. U jami Mug‘ hujjatlarining 13 tasini chop qilgan bo‘lib, ular “Sug‘d to‘plami”ning birinchi kitobiga kiritilgan.

1957-yil oxirlarida V.A.Livshits Dushanbeda A.A.Semenov va B.A.Litvinskiylar sharofati bilan charm va qog‘ozga yozilgan hujjatlarning nusxasi bilan tanishgan. U 1958-yilning kuzida Osiyo xalqlari instituti Leningrad bo‘limida saqlanayotgan sug‘d hujjatlarining asl nusxasi bilan tanishishga muvassar bo‘lgan. Hujjatlar bilan ishlash jarayonida u birinchi marta yuridik matnlarni topib ajratadi, bu hujjatlar shartnomalar edi. Yuridik hujjatlar haqida hali “Sug‘d to‘plami”da hech qanday xabar berilmagan edi. Mug‘ xatlari 711 va 722-yillarda Sug‘ddagi va qo‘shni viloyatlardagi siyosiy va harbiy holat to‘g‘risidagi ma‘lumotlarni o‘zida aks ettirgan edi. Hujjatlar sug‘d va shu atrofda ijtimoiy hayot va iqtisodiy taraqqiyot to‘g‘risida ma‘lumot olishga ham xizmat qilgan. Tadqiqotlarning dastlabki natijalari V.A.Livshits tomonidan 1959-1960-yillarda (jami 15 ta hujjat) nashriyotda e‘lon qilingan.

селения Хайрабад и собранных Таджикистанской базой Академии наук СССР. //Согдийский сборник. –Л.: Изд. АН СССР, 1934. –С.33-51.

²¹ Фрейман А.А. Находка согдийских рукописей и памятников материальной культуры в Таджикистане. (Предварительное сообщение). //Согдийский сборник. –С.7-17.

²² Васильев А.И. Согдийский замок на горе Муг. (Предварительный отчет). //Согдийский сборник. –С.18-32.

²³ Крачковский В.А. и акад. Крачковский И.Ю. Древнейший арабский документ из Средней Азии. //Согдийский сборник. –С.52-90.

1962-yil Moskvada V.A.Livshits yuridik matnlar (shartnomalar va tilxatlar), xatlar, moliyaviy mazmundagi jami 45 ta hujjatni “Mug‘ tog‘i sug‘d hujjatlari” to‘plamining “Yuridik hujjatlar va xatlar” deb nomlangan ikkinchi kitobida e‘lon qilgan²⁴.

Mug‘ tog‘i sug‘d hujjatlarining foto nusxalari Rossiya FA Sharqshunoslik Instituti Leningrad bo‘limida saqlanmoqda. Rasmlar alohida albom holatida, “Eroniy tillar yozuvlari korpusi” (“Corpus inscriptorum iranicarum”) seriyasida nashr qilingan. Mug‘ tog‘i sug‘d hujjatlari taxminan 20 xil husnixatda yozilganligi aniqlangan. Matnlarning aniqmasligi, yomon saqlanganligi, noma‘lum lahjalarda bitilganligi, o‘ziga xos uslubistik xususiyatlari, shaxs ismlarining ko‘pligi, unvonlar va toponimik nomlarning ko‘pligi sababli hujjatlarni o‘qish, tarjima va tahlil qilish qiyin kechgan.

Mug‘ tog‘i Sug‘d hujjatlari M.N.Bogolyubov, V.A.Livshits, O.I.Smirnova, M.Is‘hoqovlar tomonidan o‘rganilgan. Bir turkum sug‘d hujjatlarining o‘zbek tiliga tarjimasi va izohlari professor M.M.Is‘hoqov tomonidan “Unutilgan podsholikdan xatlar” nomli risolada e‘lon qilingan²⁵.

Hujjatlar Sug‘d dehqoni, katta yer egasi, podshohi Divashtich (708-722) va yirik mansabdorlar – framandarning, shuningdek, Xoxsar hamda Kshtut dehqonlarining shaxsiy arxiviga tegishli bo‘lib, Sug‘dning VIII asrning birinchi choragidagi iqtisodiy, siyosiy, madaniy hayotini o‘rganishda muhim manba ro‘lini o‘ynaydi.

Mug‘ tog‘i sug‘diy hujjatlarning tarixiy jihatdan ahamiyati beqiyos. Chunonchi, ularda Choch, Farg‘ona, Ustrushona, Xo‘jand, Panch (Panjikent), Samarqand kabi voha hukmdorliklariga aloqador voqeliklar, mintaqada arab istilosi va unga qarshi mazkur hukmdorliklarning ittifoqchilikdagi harbiy harakatlarni tashkil etishga undovchi yozishmalar, xususan, ushbu harakatlarning tashabbuskori bo‘lgan turk xoqonlariga Panch hukmdori Devashtichning murojaati va hokazolar o‘rin olgan. Ma‘lumki bu davrda Amudaryo-Sirdaryo oralig‘i va unga tutash hududlarda Choch, Farg‘ona, Ustrushona, Sug‘d (Samarqand, Panch, Maymurg‘, Ishtixon, Kushoniya

²⁴ Юридические документы и письма. Чтение, перевод и комментарии Лившица В.А. //Согдийские документы с горы Муг. Чтение, перевод, комментарий. Выпуск II. Москва. «Издательство Восточной литературы». 1962.

²⁵ Исҳоқов М.М. Унитилган подшоликдан хатлар. –Т.: Фан, 1992.

/Kattaqo'rg'on, Kesh, Naxshab va h.k.), Buxoro, To'xoriston va Xorazm kabi o'nlab kichik voqa hukmdorliklari mavjud bo'lib, o'z ichki boshqaruvlarida deyarli mustaqil bo'lgan mazkur siyosiy uyushmalar mintaqadagi yirik saltanat – G'arbiy Turk hoqonligi (568-740) tarkibida edi.

Darvoqe, Mug' tog'i hujjatlaridan bir nechasida xoqonlikka aloqali ravishda bir necha bor "*xun(=turk) hukmdori*", "*xoqondan kelgan mansab /yorliq*" kabi iboralar bilan birgalikda, *xoqon, tudun, eltabar, tarxon* kabi unvonlar va *Chakin Cho'r Bilga, O't-tegin* singari xoqonlikka xos ism va epitelar o'rin olgan. Ushbu tildagi manbalarning xoqonlik tarixini yoritishdagi ahamiyati shuki, sug'diy mualliflar xoqonlik ichki hayotidan yaxshi xabardor bo'lishgan. Shu sababli, ularda o'rin olgan xoqonlikka xos boshqaruv tizimi va davlatchilik an'analari o'z ma'lumotlarini original dalillar sifatida baholash mumkin. Darvoqe, sug'diy Turk xoqonligi aholisining sezilarli qismini tashkil etgan va turkiylar bilan yonma-yon, aralash yashagan etnos sifatida xoqonlik boshqaruvida ham faol ishtirok etganini e'tiborga olish zarur. Shuningdek, Sug'd vohasidagi bir qator hukmdorliklarda sug'diy-turkiy an'analari o'zaro sintezlashgan bo'lib, bu ularning ish yuritish tizimida ham o'z ifodasini topgan.

Bu holat ayniqsa Panch hukmdorligi hayotida yaqqol ko'zga tashlanib, boshqaruvda sug'diy va turkiy etnos vakillari baravar ishtirok etishganida o'z ifodasiga ega. Xususan, taxminan VII asrning ikkinchi yarmida Panchda turkiy-sug'diy aralash sulola tashkil topib, uni dastlab Bichut, keyinchalik uning o'g'li Chakin Cho'r Bilga (693-708), keyinchalik uning qizlari vositasida kuyovi, sug'diy amaldor Devashtich (709-722) boshqarganlar.

Bu paytda butun Sug'd konfederatsiyasida bo'lganidek, Panchning ma'muriy-siyosiy boshqaruvida ham nisbiy bo'lsa-da, konfederatsiya shaklidagi o'ziga xos ichki tuzilishga ega boshqaruv mavjud edi. Ilk o'rta asrlarga taalluqli yozma manbalardan ma'lum bo'lishicha, Yuqori Zarafshon vohasidagi hozirgi tuman (rayon) yoki kattaroq qishloqlarga to'g'ri keluvchi qator ma'muriy birliklar – rustoqlar Panch hukmdorligi tarkibiga kirgan. Mug' tog'i sug'diy hujjatlarida Panchga tegishli bo'lgan quyidagi mulk (mayda hokimlik)larning nomlari keltiriladi: Maxiyon, Parg'ar, Kshtut, Martushkat, Madm, Kum, Zarovat, Iskadar, Xshikand, Varz, Krut,

Fatmiv, Paxut, Eftmaut, Shavkat, Yag'nob vodiysi, Anzab, Buttaman va hokazolar²⁶.

Shu o'rinda ta'kidlab o'tish joizki, aslida hududiy jihatdan muayyan bir qishloq darajasida bo'lgan mazkur ma'muriy birliklar ham o'z avtonom boshqaruviga ega bo'lganligi bois, ularni ma'lum ma'noda "mayda hokimliklar" deb atash ham mumkin. Panch hukmdorligiga qarashli mazkur kichik mulklar o'sha davrdagi arab-fors tarixiy asarlarida k o'proq "rustoq"²⁷ lar shaklida qayd etilgan. Ulardan ayon bo'lishicha, har bir rustoq o'z boshqaruvchisiga ega bo'lib o'z navbatida ular Panchning bosh hukmdoriga bo'ysunishgan. Umuman olganda, arab-fors manbalarida qayd etilishicha, Movarounnahrda Buxoro, Samarqand, Ustrushona kabi nisbatan yirik hukmdorliklarda ham Panchdagiga o'xshab rustoqlar bo'lgan.

Ahamiyatlisi shuki, tuman yoki kattaroq qishloq shaklidagi mazkur mayda hokimlik (mulk)lardan aksariyatining nomi sug'diy hujjatlarda qay shaklda uchrasa, hozirda ham qariyb o'sha ko'rinishda saqlanib qolgan.

Quyida bazi mug' hujjatlarining o'zbek tiliga izohli tarjimasini berishga harakat qilindi²⁸.

A-9 (QO'SHNI HOKIMLIK LARDAGI AHVOL TO'G'RISIDA DEVASHTICHGA UNING AYG'OQCHISI YOZGAN MAKTUB) HAQIDA

A-9 raqamli hujjat. 19,5-11 sm yuzali charmning o'ngi va teskarisiga o'ziga xos individual xat uslubi bilan bitilgan sug'diycha matndir. O'ng beti charmning eni bo'ylab, orqa beti esa bo'yiga to'ldirilgan. Hammasi bo'lib o'ng betida 15, orqa betida esa 26 qator

²⁶ Смировна О.И. Вопросы исторической топографии и топонимики верхнего Зарафшана // МИА. М., 1953. №15. С. 317-318.

²⁷ Rustoq- forsha "qishloq" ma'nosiga to'g'ri kelib, O'rta Osiyo, Eron va qisman arab mamlakatlarida qo'llanilgan tarixiy-geografik tushuncha. Ushbu so'z qishloq, shahar, ovul, bozor, o'zlashtirilgan o'lka, o'troq aholi yashaydigan joy, ekin maydoni, obodonlashtirilgan shahar kabi ma'nolarga ega. O'rta Osiyo va Eron mo'g'ullar tomonidan istilo etilgach, rustoq o'rniga "tuman" atamasi qo'llanila boshlagan. (Qarang: Ўзбекистон миллий энциклопедияси. –Т.: ЎзМЭ, 2004. Б. 395).

²⁸ Tarjimalarni professorlar M.M.Is'hoqov va G'.Boboyorovlar amalga oshirishgan.

yozuv bor. 25-26-qatorlar orqa betdagi matn yo'nalishiga teskari holda yozilgan. "Va yozildi Aspanak Devg'un tomonidan Aspaning buyrug'iga binoan" deb ta'kidlanadi unda. Shunday qilib, A-9 hujjatini yozgan sug'diy xattot yoki mirzaning ismi Aspanak Devg'un ekan deb o'ylash mumkin. Lekin asosiy matn kotibining xat uslubida so'z boshidagi *p* harfi, so'z o'rtasidagi *k* va *y* belgilari o'ziga hosligi bilan ajralib turadi. Teskari yo'nalishdagi ikki satr xati esa boshqacha. Xat o'ralgach, bu satrlar boshqa kishi tomonidan yozib qo'yilgan bo'lsa kerak. Xususan, bu xatning belgilari o'ziga xos. Umuman, oxirgi 2 satr xati A-12, B-2, B-3 kabi qator hujjatlar xatiga o'xshaydi. Hujjat noshiri V.A.Livshitsning fikricha, A-9 hujjati uchun avval yozuv bitilgan charmni yuvib tozalashgan. Shunda eski matn qisman o'chmay, qolib ketgan. Demak, Aspanak Devg'un o'g'li yuvib tashlagan matnning kotibi bo'lgan, deyish ham mumkin. Bu hujjat VII-VIII asrlarda Romtish Vg'ashfarn, Venonok kabi kotiblar bilan bir qatorda Aspanak Devg'un o'g'li ismli sug'diy kotib ham bo'lganligi haqida ma'lumot beradi.

A-9 raqamli hujjat xat janriga mansubdir. Lekin unda sug'diy maktublarga xos kirish va yakunlovchi formulalar yo'q. Shuning uchun maktubning kimga yozilgani noma'lum. Lekin undagi xabar va ma'lumotlarning Sug'd hukmdorligi (konfederatsiyasi) siyosiy-harbiy ahvoliga bevosita aloqadorligi hisobga olinsa, xat adresati hukmdor Devashtich bo'lgan deb hisoblash mumkin. Bundan tashqari, maktub matnida "maray" unvoni uchraydiki, bu "afshin(hukmdor)" ma'nosida bo'lib bir necha hujjatlarda Devashtichga nisbatan qo'llangan.

A-9 hujjatning adresati juda bo'lmaganda muhim amaldor ekanligi xat mazmunidan yaqqol ko'rinib turadi. Masalan, muallif Ustrushana, Parg'ar, Xo'jand kabi qator shahar va viloyatlardagi ahvolni bayon etadi. Aftidan, u arablar bilan tuzilishi mumkin bo'lgan bitim haqida gapiradi. Parg'ar erlarini tashlab ketmaslik lozimligini ta'kidlaydi. Chunki bu erlarda yaqin kelajakda muayyan xavf-xatar yo'q. A-9 hujjatining 1-2-satrlarida qiziq bir ma'lumot berilgan.

Hujjat 722 yil avgust oyining haftasida yozilgan deb taxmin qilinadi²⁹.

²⁹ Grenet, Vaissiere, 2002: 179.

A-9 (QO'SHNI HOKIMLIKLARDAGI AHVOL TO'G'RISIDA DEVASHTICHGA UNING AYG'OQCHISI YOZGAN MAKTUB MATNI)

- (1) Va shunday xabar bor: “Xo'janddagi (voqealar) tugadi, va barcha xalq
- (2) amirning diniga (yoki “himoyasiga”) o'tdi – zodagonlar (“ozodlar”) ham, savdogarlar va
- (3) xizmatkorlar ham (jami) 14 ming (bo'lib) chekindilar³⁰. Va biz chopar yo'lladik.
- (4) Lekin eshitdikki, u Xuttalga³¹ qaytib kelibdi.
- (5) Axshevarro'ch kunida esa lashkarboshi Shavkatda³² to'xtadi. Bor bo'lgan barcha piyoda askarlarni
- (6) Buttaman³³ orqali u sari jo'natdim. Parg'ardagi³⁴ erlarni esa, ya'ni eng keng (yaxshi)

³⁰ Hujjatning dastlabki nashrlarida 1-2-satrlar quyidagicha o'girilgan edi: “(1) Va shunday ovozlari bor: “Kuchaliklar (?) va barcha xalq (2) braxman diniga o'tishdi (“chiqishdi”). Bular zodagonlar (“ozodlar”), savdogarlar va oddiy (3) xalq hamda 14 000 ruhoniy ustozlar. Va biz chopar yo'lladik” (СДГМ, II:95). Bu esa hujjatdagi ma'lumotlar talqinida yanglish xulosalar bildirilishiga olib kelgan, kuchaliklar, ya'ni Sharqiy Turkistondagi voha hukmdorliklardan biri – Kucha aholisi va ular e'tiqod qiluvchi braxman dini haqida gap boradi, mazmunida fikrlarga yo'l ochgan edi. Aslida esa bu yerda hujjat yaratilgan muhit – Panchga nisbatan yaqin joylashgan viloyat bo'lmish Xo'janddagi ahvol bayon qilinadi. Yuqoridagi tuzatishlar O.I. Smirnova hamda F. Grene va E. De la Vessierlar taklifi asosidadir (Смирнова О.И. Очерки из истории Согда. – М., 1970. С. 16, 254;) Grenet, Vaissiere, 2002: 172-173).

³¹ *Xuttal* - adabiyotlarda Xuttalon, Xatlon shakllarida ham uchraydigan Chag'oniyon (hoz. Denov/ Surxxondaryo viloyati)ning sharqida joylashgan tarixiy viloyat. Uning hududi Tojikistondagi hozirgi Ko'lob viloyatiga to'g'ri keladi.

³² *Shavkat* – lug'aviy jihatdan sug'diycha shav “qora” va kat “qishloq/shahar” (“Qoraqishloq/shahar”) ma'nolarini anglatgan ushbu aholi manzilini ayrim tadqiqotchilar Zarafshon daryosining o'ng havzasida, hozirgi Ayniy tumani markazining biroz shimoli-sharqida joylashgan Shavkati poyon qishlog'i bilan tenglashtiradilar. Ayrim tadqiqotchilar esa uni arab geograflari tomonidan Shimoliy Ustrushonada Samarqanddan Xo'jandga eltuvchi yo'l bo'yidagi muhim rustoq (tuman) sifatida tilga olingan joy bilan bitta deb qarashadi. Shuningdek, mazkur geograflar Iloq (Choch) viloyatidagi shaharlardan birining nomini ham Shavkat shaklida qayd etishgan.

(7) bo'lganlarini, unga tashlab ketmagin, (chunki) ushbu lashkarboshi

(8) sengacha etib bormaydi. Hokim janoblari, (sizdan) shunday buyruq bo'lgan edi: "Dishttach bilan birga

(9) otlarni tayyorla! Murtatro'ch kuni ishonchli kishilar

(10) Ramanga³⁵ kelishadi" – lekin bu haqda menda hali xabar yo'q. Agar

(11) sen sulh tuzsang, na sen va na sening xalqing adolatli (tinchlik, amniyatga) erisholmaysan.

(12) Men yana bir choparni yubordim. Qanday yangi xabarlar bo'lsa, senga etkazurman.

(13) Va men ishonchli choparni ham jo'nataman. Ustrushanlik odamlardan ham

(14) biroz kelishadi. (Hozircha) tashvish yuzlanmadi,

(15) shuning uchun g'am chekmagin".

Izoh:

A-9 hujjati mazmuniga ko'ra podsho Devashtichning Parg'ar, Ustrushona, Xo'jand viloyatlarida yashirin ish ko'rgan kuzatuvchisi (ayg'oqchisi) tomonidan yozilgan maxfiy ma'lumotnomadir. Hujjatda adresat va maktub yo'llovchi kishi nomlari ko'rsatilgan emas. Unda odatdagidek matbuot janriga xos kirish va xotima formulalari ham yo'q. Xat muallifi to'g'ridan-to'g'ri o'zi kutgan voqealarga kirishadi.

³³ *Buttaman* - arab manbalarida Buttam shaklida qayd etilgan. Zarafshon daryosining yuqori havzasida, Panjikentning shimoli-sharqida, Zomin tog'lari yaqinida, undan janubi-sharqda joylashgan tog'lik tarixiy viloyat. U ba'zan alohida hukmdorlik, ba'zan Ustrushona tarkibidagi viloyat sifatida bo'lgan.

³⁴ *Parg'ar* – sug'diy tilda "Tog' usti / Tog'lik joy", "Tog'ning yuqorisi" ma'nosini anglatgan bo'lib, Yuqori Zarafshonda, Zarafshon daryosining chap havzasidagi tog'lar va tarixiy viloyatning nomi. Hozirgi kunda Zarafshonga quyiluvchi Kshtut va Fondaryo irmoqlari oralig'idagi hudud Falg'ar shaklida saqlanib qolgan. Panch xo'jalik hayotida Parg'arning alohida o'rni bo'lgan ko'rinadi. Parg'ar xo'jalik va ma'muriy jihatdan Panchga bo'ysunib, ko'pgina masalalarni u markaz Samarqand bilan emas, balki bevosita Panch hukmdorligi doirasida hal qilgan (CДГМ, III:8).

³⁵ *Raman* – Ram ilohi nomidan shakllangan toponim (Grenet, Vaissiere, 2002: 174-175). Ustrushona va Parg'ar oralig'ida joylashgan aholi manzili deb taxmin qilinadigan mazkur toponim hujjatning ilk nashrlarida Ramush (Romush) shaklida o'qilgan bo'lib, bu borada bir qator munozarali talqinlar bildirilgan edi (CДГМ, II:94-95).

Bunday extiyotkorlik arablar istilosi jarayonida ehtimol zarur bo'lgandir. Bu haqda A-9 noshiri V.A. Livshits uch xil taxmin bildirgan: 1) maktubning etib kelgan qismining bir bo'lagi, bosh qismi yo'qolgan; 2) A-9 matni xatning asosiy mazmunining qora nusxada tayyorlangan ko'rinishi. Shu matn asosida tegishli kirish va xotima formulalari bilan oqqa ko'chirilgan matn etib kelmagan; 3) kirish va xotima formulalarida ismlar ta'kidlanishi lozim edi. Lekin harbiy-siyosiy vaziyat taqozosi bilan ataylab tushib qoldirilgan. Bu o'rinda uchinchi taxminni ko'proq asosga ega deb hisoblash mumkin. Aftidan, Devashtich o'z kishilarini qo'shni erlarga yuborar ekan, ularning maqsad va vazifalari hamda sharoit maktub va ma'lumotlardagi rasmiy an'anaviy uslub formulalaridan ataylab foydalanmasligi tabiiy edi. Maktub Devashtichga shaxsan yo'llanganligi haqida faqat taxmin qilish mumkin. Buni asoslash uchun hujjatning 8-qatorida muallif tomonidan adresatga murojaat qilib *rti maray* "va hokim (janoblari)" deb yozilganini ko'rsatish kifoya. Ko'proq sug'diycha *afshin* unvonini ifodalash uchun qo'llanilgan *maray* oramiycha ideogramma bo'lib, Mug' tog'i sug'diy matnlarida faqat adres formulalarida uchrar va Devashtichga nisbatan qo'llanar edi. Boshqa viloyat hokimlariga nisbatan doimo sug'diycha xuvu – "hokim", "hukmdor" so'zidan foydalanishgan. Ko'rinib turibdiki, bu o'rinda Devashtichning o'ziga xat konteksti ichida murojaat qilish uchun *maray* so'zi qo'llangan. V.A. Livshitsning fikricha, xat muallifi hozirgi O'ratepa, Mastcho, Xo'jand erlarida ish ko'rgan. U bergan ma'lumotlar geografiyasi shundan dalolat beradi. Buttaman – Panjikentdan yuqoridagi tog'li o'lka; Parg'ar – Sug'd bilan chegaradosh shimoliy erlar; Ustrushan – Mastcho, O'ratepa atrofidagi erlar va hokazo.

A-14 (SUG'D ELCHISI FATUFARNING CHOCHDAN JO'NATGAN MAKTUBI)

- (1) Janobi hukmdorga, buyuk tayanchimiz, Sug'd podshosi, Samarqand hukmdori
- (2) Devashtichga uning eng e'tiborsiz ("millioninchi" darajali)
- (3) quli Fatufarndan murojaatnoma.
- (4) Janobi hukmdor, (senga) buyuk shon-sharaf (egasiga) ko'pdan-ko'p ta'zim yo'llayman ("murojaat qilaman")

- (5) Va janob, men bu erga, Choch hukmdori³⁶ huzuriga keldim. Janob,
- (6) xatlarni ham topshirdim, og'zaki ("til bilan") (aytilishi) lozim bo'lgan
- (7) murojaatnomani ham to'liq, oqizmay-tomizmay ("qoldiqsiz") bayon ettim.
- (8) Tudunga³⁷ ham, uning yordamchisiga³⁸ ham. Va janob,

³⁶*Choch hukmdori* – tadqiqodchilar orasida ushbu hukmdorning kimligi masalasi ilmiy bahslarga sabab bo'lgan. V. A. Livshis, bu yerda ikkita shaxs haqida gap borishini olg'a surib, hujjatda "Choch hukmdori" va "Choch tuduni" tilga olinganini ta'kidlaydi. Unga ko'ra, elchi Fatufarn Chochning har ikkala boshqaruvchisi huzurida bo'lgan (СДГМ, II:82-88). S.G.Klyashtorniy fikricha esa xatning mazmuni bunday xulosa chiqarishga imkon bermaydi va aksincha gap bitta shaxs haqida borayotganidan darak beradi, ya'ni; Choch hukmdorini Fatufarn dastlab maqomiga ko'ra – "Choch hukmdori", so'ngra esa unvoniga ko'ra – "tudun" deb nomlaydi. Tadqiqodchi o'z fikrining tasdig'i sifatida Tabariy ayni shu hukmdorni "Shosh podshohi" va "tudun" deb atashini misol qilib keltiradi (Кляшторный С.Г. Древнетюркские рунические памятники как источник по истории Средней Азии. –М., 1964. С. 160). Biroq yozma manbalar (xitoy) va numizmatik materiallar har ikkala olimning ham fikrlari munozarali ekanligi ko'rsatadi. Aynan ushbu hujjat yozilgan paytda vohada 2 ta turkiy sulola yetakchilik qilib, *Choch teginlari* (605-750) – bosh, *Choch tudunlari* (640-750)- ikkinchi darajali sulola edi. Faqat hokimiyat *Tudunlar* qo'lida bo'lib, *Teginlar* esa ko'p yillardan beri qonunan Chochning boshqaruvchilari sifatida bosh sulola hisoblanar, hokimiyatga da'vogarlik esa nomiga edi (Бобоёров Ф. Чоч тарихидан лавҳалар (Илк ўрта асрлар). –Т., 2008. Б.50).

³⁷ *Tudun* – asosiy vazifasi tobe hukmdorliklardan soliq yig'ini tashkil etish va mahalliy hukmdorlarni nazorat qilish bo'lgan G'arbiy Turk xoqonligi – noib. Hujjat mazmunidan ko'rinadiki, Tudun – Choch hukmdorlaridan biri sifatida voha siyosiy hayotida yetakchi rol o'ynagan. Xitoy yilnomalarida 640 yildan to 750- yilgacha bo'lgan davr oralig'ida 4 nafar Choch hukmdorining ismi *tutun* unvoni bilan tilga olinishi, Tabariy ("*Tudun malik ash-Shosh*") va Beruniy Shoshning qadim hukmdorlari unvoni tariqasida ko'rsatishi vohada *Tudunlar* sulolasi mavjud bo'lganidan darak beradi (Бичурин Н.Я. Собрание сведений о народах, обитавших в Средней Азии в древние времена. –М.-Л., 1950. Т. II. С. 313-314; История ат-Табари. Избранные отрывки (Пер. с арабского В.И.Беляева. Доп. к пер. О.Г.Болшакова и А.Б. Халидова). –Т., 1987. С. 268; Абу Райхан Бируни. Памятники минувших поколений / Перевод с арабского и примечания М.А. Сале // Бируни. Избранные произведения. –

(9) Хоqonga³⁹ (mo'ljallangan) xatni ham, Farg'ona podshosiga⁴⁰ mo'ljallangan xatni

Т., 1957. Т. I.C. 111). VII-VIII asrlarga taalluqli tangalarda *tbwn c'cynk ywB* – “Choch hukmdori Tudun” iborasining uchrashining o'ziyoq, bu fikrni tasdiqlaydi (Бабаяров Г. Древнетюркские монеты Чачского оазиса (VI-VIII вв. н.е.). –Т., 2007. С. 47, 55-60). Yilnomalardan ma'lum bo'lishicha, 713-740-yillarda Chochni *Moxedu tutun* (Bahodir tudun) boshqargan. Hujjatdagi mazkur shaxs Bahodir tudun bilan tenglashtiriladi (Лившиц, 2008: 91).

³⁸ *Naztg'riv* – lug'aviy ma'nosi “yordamchi” (hukmdor yordamchisi) bo'lgan ushbu atamani dastlabki nashrlarida V.A. Livshis aynan shu ma'noda bergan bo'lib (СДГМ, II:79, 83), keyinchalik uni Azatg'riv shaklida shaxs ismi o'laroq talqin qilgan (Лившиц, 2008:87). Biroq ham ushbu atamaning paleografik shakli, ham hujjat mazmuni Livshisning dastlabki talqini to'g'ri ekanligini ko'rsatadi.

³⁹ *Хоqon* - Mug' hujjatlaridagi xoqonning aynan kim ekanligi masalasi bahsli. Ayrim tadqiqodchilar uni Sharqiy turk hukmdori Inal xoqon (716 y.) bilan (СДГМ, II:84), ayrimlar esa arablarga qarshi mahalliy hukmdorlarga bosh bo'lgan Turgash xoqoni Sulu (717-738) bilan tenglashtiradilar (Grenet, Vaissiere, 2002:156). Ehtimol, u G'arbiy Turk xoqonlari Ashina Xyan yoki Ashina Sinlardan biri bo'lishi ham mumkin. Quyida ko'rib o'tiladiganidek, V-18 hujjatda arablarga qarshi Sug'dga o'z ittifoqchi qo'shinlarini yuborgan “xun(turk) va chin “chitoy”lar haqida gap boradi. Bu paytda Sharqiy turk hoqonlari ham, turgash hoqonlari ham Xitoydagi Tan sulolasi bilan asosan o'zaro dushman kayfiyatda bo'lib G'arbiy Turk hoqonlarining aksariyati esa Xitoy tomonidan tayinlanuvchi yoki qo'llab-quvvatlannuvchi hukmdorlar edi.

⁴⁰ *Farg'ona podshosi* - bu davrda Farg'onaning bosh hukmdorlari sug'diycha *ixshid* unvoniga ega bo'lishgan. Xitoy yilnomalaridagi ma'lumotlar va numizmatik materiallar VII-VIII asrlarda Farg'onada bosh sulola sifatida Turk hoqonligining asoschi sulolasi – Ashina xonodonining bir tarmog'i hukm surganini ko'rsatadi. “Tan shu”ga ko'ra, Chjen-guan' davrida(627-649) G'arbiy turklardan *Gan Moxedu* (*То'n Bahodur) tomonidan *Boxanna* (Farg'ona) hukmdori *Kibi* o'ldirilgani va hokimiyat *Ashena* (Ashina) *Shuni* ismli shaxs qo'liga o'tgan (Бичурин, II: 319). Xitoy sayyohi Хой Чао (726) Farg'onada 2 ta hokimiyat mavjudligi, biri Sirdaryoning shimolida (markazi Koson?) *Tukyue* (turk)lar, janubida esa *Dashi* (arab)larning boshqaruvi borligini yozadi (Бернштам А.Н. Тюрки и Средняя Азия в описание Хой Чао (726) //ВДИ, I. М., 1952. С.193). Tabariy 712-723 yillar voqealari bayonida Farg'ona hukmdorlarining nomini ham keltirib o'tgan: Farg'ona podshosi at-To'r(СДГМ. II: 84). VII-VIII asrlarga taalluqli Farg'ona tangalarida “hoqon” unvoni bilan birga, Turk xoqonligi tamg'asiga o'xshash arxar shaklli tamg'a joy olganki, har holda bu vodiya Ashina xonodonining bir tarmog'i hukm surgani bilan aloqadordir.

- (10) ham Farg'ona tutug'i⁴¹ qo'li bilan (orqali) Farg'ona
 (11) podshosi tomon jo'natdim. Janob, men shu tufayli "Yuqori"ga⁴²
 (12) tomon (yana yo'l) yura olmadimki. Xabarlarga ko'ra, Hoqon
 (13) (hech) ko'rinmas emish. Janob, Tudundan va uning
 (14) yordamchisidan xat va og'zaki javoblarni oldim va janob,
 (yo'lga chiqib)
 (15) Appartakanga⁴³ (etib) kelganimda, janob, Chadrchik⁴⁴
 (16) haqida yaxshi xabarlar eshitmadim. Ustrushan
 (17) viloyati hammasi (dushmanga) topshirilgan. Janob, men yoppa
 yolg'iz,
 (18) behamroh holda (yo'limda davom etib) yurishga jur'at
 qilolmayapman. Janob,
 (19) ikkinchi bora Choch tomon qaytib keldim. Buning uchun (sen)
 hukmdorimdan
 (20) juda yomon (qattiq) qo'rqayapman. Janob, Tudun
 (21) tozıklar (arablar) bilan bitimga binoan chekindi. Bitimga ko'ra
 (22) Jamravaz va Bars (?) chabish (chovush)⁴⁵ quyi tomonga ketdilar.

⁴¹ *Farg'ona tutug'i* – Turk xoqonligi tomonidan Farg'onaga tayinlangan harbiy noib. Hujjat mazmunidan u xoqonning ishonchli vakili bo'lgani anglashiladi. VII-VIII asrlarga taalluqli Farg'ona tangalarida "Alp xoqon tutug'i" iboralari uchraydi. *Tutuq* – qadimgi turkcha unvon, lavozim nomi sifatida "lashkarboshi, bo'ysundirilgan biror o'lkaning harbiy voliyi" ma'nosini bildirgan. Xitoycha *du-du* – "harbiy voliy" so'zidan o'zlashgan deb hisoblanadi. Ayrim tadqiqotchilar uni qadimgi turkcha "tutmoq" (tutib turmoq, ushlab turmoq) fe'lidan shakllangan deb talqin qiladilar.

⁴² "Yuqori" - G'arbiy turk xoqonligining markaziy hududi – Ertisuv bo'lca kerak. Sug'diy elchi Chochga tashrif buuyurganda xoqon "Yuqori"ga – Ertisuvga ketgan bo'lishi mumkin.

⁴³ *Apertakan* – hujjat noshirlari dastlab mazkur atamani joy nomi hisoblagan bo'lsalar-da, aynan qaysi hududda joylashganligi masalsini ochiq qoldirishgan. E.V.Rtveladze uni Ohangaron vodiysidagi hozirgi Apartak qishlog'i bilan tenglashtirgan bo'lib, tadqiqotchilarning aksariyati bu fikrga qo'shilishgan va uni hozirgi Angren (o'rta asrlardagi Ohangaron) shahrining qadimgi nomi bo'lsa kerak deb taxmin qilishgan (Grenet, Vaissiere, 2002:169; Лившиц, 2008:94).

⁴⁴ *Chadrchik* – ushbu atamani tadqiqotchilar "Quyi viloyatlar" shaklida o'girib, Choch vohasidagi joy nazarda tutilgan deb talqin qilishadi. V.A.Livshis uni so'roq ishorati ostida "Chirchiq" (daryosi viloyati) bo'lishi mumkin deb yozadi (Лившиц, 2006:87).

- (23) xabarlar borki tovon undirib olish va
 (24) kuchlarni arablardan nariga olib ketish (ularning maqsadidir).
 Janob, xabarlarga binoan xun (turk)lar⁴⁶ hech
 (25) ko'rinmaydi. Chunki ular yuqoriga qarab ketishdi va haligacha
 hech kim
 (26) qaytib kelgani yo'q. Janob, Tudun Tarband⁴⁷ bilan
 (27) bitim tuzgan edi. U erdagi hamma joylarni oldi. Janob,
 (28) Chadirchikda (tuzilgan) sulh munosabati bilan, eshitishimcha
 yordamchi juda g'amgin,
 (29) anduhnok bo'lmoqda va yana yoningga borolmagani uchun
 sendan ("hukmdordan") qo'rqmoqda.
 (30) Janob, so'ngra sen tomondan ("hukmdordan") xabarlar kelmay
 qoldi.
 (31) Janob, mana bu xatlarni men Marvon (ismli kishi) qo'li orqali
 Kand⁴⁸ tomondagi (aylana) yo'l bilan jo'natdim.

⁴⁵ *Chabish* – o'rta asrlarda turkiy sulolalar boshqaruvidagi harbiy unvon "chovush"ga to'g'ri keladi. Mazkur hujjatda Chochdagi siyosiy voqealarga aloqador ravishda uchraydigan

⁴⁶ Xwn – matndagi to'la shakli xwn'nk. Turk xoqonligi va uning asosiy aholisini tashkil qiluvchi etnos – qadimgi turklar mug' tog'i sug'diy hujjatlarida doimo ushbu etnonim ostida qayd etiladi. Sug'diy yodgorliklarda ushbu etnonim ilk bor Dunxuan (Shimoliy-G'arbiy Xitoy)dan topilgan milodiy III-IV asrlarga oid "Eski xatlarda" Xun (Syun-nu) imperiyasi va unga asos solgan etnos vakillariga nisbatan ishlatilgan (Лившиц, 2008 (2):173). Mug' hujjatlarining bir nechasida ko'rlik qo'shimchasi bilan xwnt, tegishlilik, xoslik bildirish ma'nosida qo'shimchalar bilan xwn'nk shaklida joy olgan etnonimni hujjatlarning ilk noshirlari yw'nk shaklida berganlar. Jumladan, xwn shaklini ayrim hollarda (mas. V-17 da) "Sharqiy turklar" (sharqiy turk hoqonligi)ma'nosida bergan bo'lsalar (СДГМ, II:117, 120), ayrim hollarda esa Samarqand hukmdori G'urak (710-738) uchun Devashtich tomonidan yw'nk-gunohkor shaklida tahqirlash ma'nosida (A-14 va) qo'llanilgan epitet (laqab) deb talqin qilganlar (СДГМ. II:79, 89, 121) berganlar.

⁴⁷ *Tarband* – ilk o'rta asrlarda Forob, keyinroq esa O'tror shaklida qayd etilgan Sirdaryoning o'rta havzasi (janubiy Qozog'istondagi Turkiston shahri atroflari)dagi tarixiy viloyat. Arab manbalarida (Balazuriy, Tabariy) Tarband Shosh hukmdorining qarorgohi sifatida qayd etilgan. Qadimgi turk bitiktoshlarida Kangu-Tarban Chu va Talas daryolaridan g'arbdagi o'lka sifatida tilga olinib, tadqiqotchilar fikricha, u Tarbandga to'g'ri keladi (Лившиц, 2008:90).

(32) Janobi hukmdor buyuk tayanchimiz Sug'd podshosi, Samarqand hukmdori

(33) Devashtichga uning eng e'tiborsiz ("millioninchi" darajali) quli Fatufarndan maktub.

So'nggi yillardagi arxeologik izlanishlar natijasida Tojikiston Respublikasining Sug'd viloyati O'ratepa tumanidagi Shahrison qishlog'idan 2,5 km uzoqlikda ilk o'rta asr Chilxujra qo'rg'onida ikki qavatli saroy va binolar ochilgan. Qo'rg'on paxsa devordan qurilgan. Bu yerda topilmalar orasida uchta sug'd hujjati ham aniqlangan. Hujjatlar kursiv usulida siyoh bilan archa daraxti yog'ochi yuzasiga bitilgan. Yog'ochlarning ikki uchi chiqarilgan. 1 raqamli hujjat to'liq saqlangan, yuzasiga uch qator, orqa tomoniga ikki qator so'z yozilgan. Bu hujjat 1963-yil saroyning ikkinchi qavati yo'lagidan topilgan. 1964-yilda mehmonxona yo'lagi tozalanayotgan mahalda ko'mirga aylanib qolgan taxtacha topilgan. Bu hujjatlar shartli 2 va 3 raqami bilan belgilangan⁴⁹.

Xulosa o'mida aytish mumkinki, sug'd yozuvi hududi juda kengayib ketgan. Buning sababi sug'diylarning xalqaro savdoda faol ishtirok qilganlari, ularning boshqa yurtlarga borib o'zlarining savdo ishlarini yo'lga qo'yganlaridan darak beradi. Qolaversa, sug'd yozuvi yodgorliklari ijtimoiy-iqtisodiy, siyosiy munosabatlar tarixini, madaniy aloqalar, ma'naviy hayot tarzini o'rganishda muhim manba bo'lib xizmat qiladi. Shu ma'noda Mug' tog'i sug'd hujjatlari alohida o'rin tutadi. Xatlar, xo'jalik va yuridik hujjatlar turkumiga ajratilgan arxiv Sug'ddagi ijtimoiy hayot, iqtisodiy taraqqiyot, viloyat hokimlari o'rtasidagi diplomatik munosabatlarni, Mug' tog'i qo'rg'onining buzib tashlanishi bilan bog'liq tarixiy jarayonni aniqlashga imkon beradi.

Savol va topshiriqlar:

1. Sug'd yozuvlari namunalarining Markaziy Osiyo mintaqasidan topilishi.
2. Mug' tog'i sug'd hujjatlarining topilishi va o'rganilishi.
3. Mug' tog'i sug'd hujjatlarini tahlil qilib bering.
4. Xo'jalik hujjatlari deganda nimalarni tushunasiz?
5. Yuridik hujjatlarning aniqlanishi?
6. "A" hujjatlar bo'yicha ma'lumot bering?

⁴⁸ *Kand* – tadqiqotchilar ushbu joyni o'rta asr arab geograflari Kand-i-Bodom shaklida qayd etgan Tojikistondagi hozirgi Konibodomga to'g'ri keladi (Лившиц, 2008:97).

⁴⁹ Лившиц В.А. Согдийские документы из замка Чилхуджра. <http://www.orientalstudies.ru/> 77-88. Yana qarang: Лившиц В.А. Согдийская эпиграфика Средней Азии и Семиречья. СПб., – 2008.

7. “B” hujjatlar bo‘yicha ma’lumot bering?
8. “V” hujjatlar bo‘yicha ma’lumot bering?
9. Chilxujra qo‘rg‘onidan sug‘d hujjatining topilishi.

Mustaqil ta’lim uchun savol va topshiriqlar:

1. *Mug‘ tog‘i sug‘d hujjatlari arablar bosqini arafasida O‘rta Osiyoning siyosiy hayoti bo‘yicha muhim manba.*
2. *Mug‘ tog‘i sug‘d hujjatlarida xo‘jalik masalalari.*

7-§. Markaziy Osiyoda o‘rta asrlar (IX-XVI asr boshi) davlat ish yuritishining taraqqiysi

Darsning maqsadi: *Somoniylar va qoraxoniylar davrida davlatda ish yuritishning yo‘lga qo‘yilishi bilan bog‘liq manbalar, manbalarda vaqfga doir ma’lumotlarni topish, samoniylar davri vaqf hujjatlari, XIII-XIV asr vaqf hujjatlarini tahlil qilish, Sayfiddin Boxarziy vaqfi, Temur va temuriylar davri “Maktuboti Temuriya”, “Maktuboti Allomiy”, “Muraqqayi Mir Alisher” to‘plamlaridagi yozishmalar, farmonlar to‘g‘risida talabalarga bilim berish, ro‘nikma va malarasini shakllantirish.*

Tayanch iboralar: somoniylar vaqf hujjatlari, Buxoro, vaqf yorliqlari, vaqfi avlod, O.D.Chexovich, Sayfiddin Boxarziy, “shayx ul - olam”, “Maktuboti Temuriya”, “Maktuboti Allomiy”, “Muraqqayi Mir Alisher”..

IX-XIV asr boshlarida arxiv ishi

Hujjatchilik an‘anasi o‘rta asrlarda yanada takomillashib borgan. Mahkamalarda ish yuritish bilan bog‘liq ishlar qonuniy tus ola boshlagan. Hujjatlarni saqlashga alohida e‘tibor berila boshlangan. Ayniqsa, vaqf mulklari bilan bog‘liq vaqfnomalarni yozish va uni saqlash an‘anasi rivojlanib borgan. Afsuski, somoniylar, o‘rta asrlar davlat mahkamachiligi bilan bog‘liq arxiv hujjatlari bugungi kungacha hali aniqlangani yo‘q. Ammo mulklarni vaqfga o‘tkazish bilan bog‘liq hujjatlarning talayginasi bizgacha yetib kelgan. Ota-bobolarimizning asrlar davomida to‘plagan hayotiy tajribalari, diniy, axloqiy, ilmiy qarashlarini o‘zida mujassam etgan nodir qo‘lyozmalarni jiddiy o‘rganish davri keldi. Chunki o‘zingizga ma’lum, sho‘ro‘lar zamonida tarixiy haqiqatni bilishga intilish rag‘batlantirilmas edi, hukmron mafkura

manfaatlariga xizmat qilmaydigan manbalar xalq ko'zidan iloji boricha yiroq saqlanardi.⁵⁰

Vaqf deb hukmdor yoki boshqa shaxslar tomonidan ko'char va ko'chmas mulklar (ekin yerlari, tegirmonlar, ariqlar va boshqa sug'orish inshootlari, karvonsaroy, ustaxonalar)ning diniy muassasalari, masjidlar, madrasalar, shifoxonalar va boshqa shu kabi joylar uchun xayriya qilinishi tushunilgan.

Vaqf mulklari rasmiylashtirilgan hujjat vaqfnoma deb atalgan hamda qozining muhrlari bilan bu hujjat qonuniylashtirilgan.

Ma'lumki, Somoniylar sulolasi vakili Ismoil Somoniy markazlashgan davlatga asos solgan, o'ziga xos boshqaruv tizimini vujudga keltirgan. Uning davrida mahkamachilik an'analari ham rivojlangan va mulklarni vaqf qilish an'anasi boshlangan. Vaqf hujjatlarida mulklarni biror tashkilotga xayriya qilishgina emas, balki tarixiy jarayonlar, ijtimoiy-iqtisodiy hayot, somoniylarning kelib chiqishi, somoniylar tarixi kabi masalalar ham o'z ifodasini topgan. Ismoil Somoniy vaqfnomasi Markaziy Osiyoda o'rta asrlarda huquqiy hujjat yuritish ishlari qay tartibda amalga oshirilganligini bilish uchun ham asos bo'ladi.

Vaqfnoma asosan Ollohga hamd va payg'ambar Muhammad (s.a.v) salovat so'zlari bilan boshlanadi. Shundan so'ng vaqf ta'sis etilishi sabablari bayon etiladi; vaqfdan keladigan daromad kimlarga va qanchadan taqsimlanishi bildiriladi. Vaqfnomada vaqf yeri kim uchun yoki qaysi muassasa foydasiga joriy etilayotgani aytiladi. Vaqf yeri chegaralari, uning qaysi yerlar bilan chegaradosh ekanligi ham hujjatda qayd etiladi.

Vaqf yerlarining boshqaruvchisi mutavalli deb yuritilgan. Mutavalli vakolatiga vaqf yerlarining ishlarini yuritish, ularni tartibga solish kirgan. Mutavalli vaqf mulki boshqaruvchisi bo'lgani bois vaqf yerini xohlagan odamiga xohlagan shartlar asosida ijaraga berishi mumkin bo'lgan.

Ismoil Somoniy vaqfnomasi orqali Ismoil Somoniyning nima sababdan o'z avlodlari foydasiga Buxoro viloyati atrofidagi bir qator qishloqlar va boshqa yerlarni vaqf sifatida ta'sis etganligini, joy nomlarini, ayniqsa qishloqlarning toponimikasini, somoniylar sulolasi shajarasini, somoniylarning kelib chiqishini, Markaziy Osiyo va Xuroson o'lkalarida joylashgan davlat, viloyat va shaharlar toponim-

⁵⁰ Karimov I.A. Tarixiy xotirasiz kelajak yo'q. //Karimov I.A. Asarlar, 7-jild. – Toshkent: O'zbekiston, 1999. –B. 133.

larini, o'sha davr qozilarining ish yuritish uslublarini, umuman o'rta asr sud-huquq ishlari faoliyatini, Buxoroda qozilik ishlari qanday yo'lga qo'yilganligini, Somoniylar sulolasi inqirozining sabablarini, Buxoroning iqtisodiy – siyosiy, madaniy va ijtimoiy hayotini, somoniylar sulolasining Markaziy Osiyo xalqlari hayotida tutgan o'rnini va uning ahamiyatini aniqlash mumkin.

Vaqf hujjatlarini dastlab 1950- yilda taniqli sharqshunos olimi O.D. Chexovich ilmiy muomalaga olib kirgan. 1951-yilda u O'zRFA Abu Rayhon Beruniy nomli Sharqshunoslik institutida saqlanayotgan 527 "a" raqamli hujjat bo'yicha maqola e'lon qiladi. "XIII asr Buxoro vaqfi" kitobida ham Ismoil Somoniy vaqfnomasi haqida to'xtalib o'tilib, bu vaqfnomada uchragan joy nomlari boshqa vaqfnomalardagi toponimlar bilan qiyoslanib, ular haqida birmuncha ma'lumotlar keltirib o'tiladi.

1995-yilda M.Usanova o'zining "Ismoil Somoniy vaqfnomasi" nomli maqolasida O'zRFA Sharqshunoslik instituti va O'zbekiston Respublikasi Markaziy Davlat Arxividagi Ismoil Somoniy vaqfnomalari haqida ma'lumot berib o'tadi: hujjatlarning hajmi, qog'ozi, ulardagi satrlar, siyohlarining rangi haqida ma'lumot keltiradi hamda bu ikkala hujjatni o'zaro taqqoslaydi, 527 "a" raqamli hujjatdagi somoniylar tarixi yoritilgan lavhalarni boshqa manbalar orqali qiyosiy tahlil qiladi.

O'zRFA Sharqshunoslik institutida saqlanayotgan hujjat bir-biriga yopishtirilgan 8 ta qog'oz bo'laklarining o'ramidan iborat, uning uzunligi 6 m 60 sm, eni 19-20 sm, bu hujjatda Ismoil Somoniy o'z avlodlariga vaqf qilib qoldirgan Buxoro viloyati atrofidagi qishloqlar hamda somoniylar sulolasining shajaraviy tarixi haqida so'z yuritiladi. Hujjatda Ismoil Somoniy vaqf yerlari birma-bir sanab keltirish bilan kifoyalangan.

O'zbekiston Respublikasi Markaziy Davlat Arxivining Buxoro vaqfnomalari ro'yxati olingan 323-asosiy fondida 758/6 va 758/7 raqamlari bilan Ismoil Somoniy avlodlari foydasiga vaqf qilingan hujjatning bir nusxasi saqlanadi. Vaqfnomaning bu nusxasi katta bir butun qog'oz o'ramidan iborat bo'lib, "Podshoh Ismoil Somoniy avlodlari vaqfnomasi" deb ataladi. Bu hujjat ham bir-biriga yopishtirilgan 7 ta qog'oz bo'laklarining o'ramidan iborat. Hujjatning haqiqiylikini tasdiqlash uchun qog'oz bo'laklarining bir-birlariga yopishtirilgan joylarining har ikki tomoniga muhr bosilgan, muhrlarning hammasi 13 ta.

Madaniy Meros ob'yektlarini muhofaza qilish va ulardan foydalanish boshqarmasida 3499-3510 raqamlari ostida saqlanayotgan

hujjat fotonusxa ko‘rinishida bo‘lib, bu hujjatning asl nusxasi bizning kunimizgacha saqlanib qolmagan. Bu hujjat 758/6 va 758/7 raqamli hujjat bilan bir xil mazmunga ega.

Fotosuratga ko‘ra, hujjat bir-biriga yopishtirilgan 8 ta qog‘oz bo‘laklarining o‘ramidan iborat, uning umumiy uzunligi 3-4 m, eni esa taxminan 25-30 sm. Bu hujjat o‘ram shaklida saqlangan.

Shuni ta’kidlash mumkinki, ushbu hujjat nafaqat Ismoil Somoniy vaqf yerlarini o‘rganishda, balki shuningdek somoniylar tarixini ham o‘rganishda manba bo‘lib xizmat qiladi, chunki uning asosiy qismi somoniylar sulolasi tarixidan iborat.

Shuningdek, vaqfnoma atamalarga boy bo‘lib, ular o‘sha davrdagi ijtimoiy-iqtisodiy, ma’muriy boshqaruv tizimi, soliq tizimi, hunarmandchilik, somoniylar saroyidagi urf-odat, madaniyat va boshqa masalalarni yoritishda katta ahamiyatga ega. Hujjat Buxoro va uning atrofidagi katta va kichik qishloqlarning tarixiy toponimikasini o‘rganishda ham qo‘shimcha ma’lumotlar beradi.

O‘rta asrlarda sulolaviy yoki oilaviy vaqf yerlari ham mavjud bo‘lib, bu vaqfi avlod deyilgan. Faqat sayyidlar va xo‘jalargina o‘z vaqflarini vaqfi avlod sifatida rasmiylashtirish huquqiga ega bo‘lganlar. Vasiyatning bu turi yer egasi mulkining bo‘linmasligini nazarda tutgan. Shuning uchun hukmdorlar, din peshvolari, sayyidlar, xo‘jalar va katta mulk egalari masjid, madrasa va xonaqolar qurib, bu yerlarni abadiy vaqf sifatida ta’sis etganlar. Xayriyaning bunday turida vaqf ta’sischisining o‘zi umrbod mutavalli bo‘lar, uning vafotidan keyin esa bu lavozim uning farzandlariga o‘tar edi. Shu tariqa vaqf mulklari boshqaruvchisi lavozimi nasldan-naslga o‘tgan. Xo‘ja Axror va Jo‘ybor shayxlarining vasiyatlari ham vaqfi avlodga misol bo‘la oladi.

Vaqfi avlodning ikki turi mavjud bo‘lgan: sayyidlarning avlodlari foydalanadigan vaqfi avlod va ikkinchisi oilaviy. Uning birinchisidan farqi shuki, bu vaqf ma’lum oila vakillarining mulki hisoblangan. Ismoil Somoniyning vaqf yerlari vaqfi avlodning birinchi turiga misol bo‘la oladi.

O‘zRFA Abu Rayhon Beruniy nomli Sharqshunoslik institutining qo‘lyozmalar fondidagi 527“A” raqamli Ismoil Somoniy vaqfnomasining 24-50-satrlarida Ismoil Somoniy vaqf yerlari va uning vaqfnomasi haqida to‘xtalib o‘tilgan. Hujjatda Ismoil Somoniy faqat o‘zining avlodlari foydasiga vaqf qilib qoldirgan yerlari sifatida Naxri Navkand, Parkat, Xo‘ja O‘bon, Mazrai Alishoh, Arbobi Kata, Talli Garnoba qishloqlari, Hazorbog‘, Sobuq va Bosondiq yerlari keltirilgan bo‘lsa, Jo‘yi Mo‘liyon va

Buxoro Registoni o'z avlodlari bilan birga mavlolar va kambag'al musulmonlar uchun ham vaqf sifatida qoldirilgan. Fuqaro'lar, ulamolar va musofirlar uchun esa Varaxsha yeri vaqf sifatida ta'sis etilganligi qayd etilgan.

Hujjatning 51-satridan oxirgi 460-satrigacha bo'lgan asosiy qismi somoniylar sulolasi tarixi yoritilgan, jumladan, vaqfnomaning 51-54-satrlarida somoniylar sulolasi shajarasi, ya'ni Ismoil Somoniyning ajdodlari sulolasi Erondagi Sosoniylar davlatiga lashkarboshi bo'lgan Bahrom Chubinga borib taqalishi, 55-62-satrlarida Bahrom Chubin va Eron shohi Husrav Parviz (590-627) o'rtasida bo'lib o'tgan voqealar bayoni, 85-179-satrlarida Ismoil Somoniy hukmronligi davri, uning mustaqil ravishda Movarounnahr davlatini boshqarishda adolat va insof tamoyillariga amal qilishi, 180-229-satrlarida Amir Ahmad ibn Ismoil Somoniy hukmronligi davri, 300-321-satrlarida Amir Nuh ibn Nasr ibn Ahmad Somoniy hukmronligi davrida ro'y bergan voqealar, 329-359-satrlarida Mansur ibn Nuh ibn Nasr hukmronligi davri, 358-412-satrlarida Amir Nuh ibn Mansur hukmronligi davrida ro'y bergan voqealar bayon qilingan.

Yuqorida eslatib o'tilganidek, O'zbekiston Respublikasi Markaziy Davlat Arxivining 323-asosiy fondida 758/6 va 758/7 raqamlari bilan Ismoil Somoniy avlodlari foydasiga vaqf qilingan hujjatning bir nusxasi saqlanadi. Vaqfnomada Somjan kanali atrofidagi yerlarni Ismoil Somoniy o'z avlodlari foydasiga vasiyat qilganligi haqida so'z boradi. 1920-yillarga qadar Buxoroda bir mahalla bo'lib, unda Ismoil Somoniy avlodlari vaqfdan kelgan daromadga yashaganlar. Shuningdek, hujjat qadimdan saqlanib qolgan nusxadan qayta tiklanib, ko'chirib yozilgan yoki ba'zi tarixiy manbalar asosida tuzilgan bo'lishi ham mumkin. 758/6 va 758/7 raqamli hujjatda Ismoil Somoniy tomonidan vaqf qilingan qishloq va joylar keltirilib, ular bilan chegaradosh joylarning nomlari aniq ko'rsatib o'tilgan.

Yuqorida ta'kidlaganimizdek, Madaniy Meros ob'yektlarini muhofaza qilish va ulardan foydalanish boshqarmasida 3499-3510 raqamlari ostida saqlanayotgan hujjat fotonusxa ko'rinishida bo'lib, hujjat 131 satrdan iborat bo'lgan matn 7 xil mazmundagi hujjatni aks ettiruvchi 7 qismga ajralgan. Butun matn yagona husnixat bilan, ehtimol bir vaqtning o'zida yozilgan. Xat turi O'rta Osiyo nasta'liq xati bo'lib, hujjat paleografik belgilariga ko'ra, XVII asrdan oldinroq yozilmagan, chunki bu xat turi XIX asrgacha keng tarqalgan bo'lgan. Bu fikrlar muhrlar orqali ham o'z tasdig'ini topmoqda: 17 ta joyga bosilgan dumaloq

shakldagi muhrda 1800-1825-yillarda Buxoroda hukmronlik qilgan “Sulton Amir Haydar” soʻzlarini oʻqish mumkin. 6 marta bosilgan yana bir aylana shaklidagi muhrdagi oliy qozi Mirza Muhammad Fozil ibn Mirza Muhammad Amin ismini oʻqishimiz mumkin. Bu qozi boshqa hujjatlar, masalan; 1796-yilga oid Buxoro muzeyida saqlanayotgan 464 raqamli hujjat va Oʻz FA Sharqshunoslik institutida saqlanayotgan 1809-1810- yilga oid 30-24 raqamli hujjatlar orqali ham maʼlum.

Shunday qilib, vaqfnomadagi xat va muhrlar hujjatni XIX asrda yozilgan deyishga asos boʻladi. Oʻzbekiston Respublikasi Markaziy Davlat Arxivida 758/6 va 758/7 raqamlari ostida saqlanayotgan “Podshoh Ismoil Somoniy avlodlari vaqfnomasi” va Madaniy Meros obʼyektlarini muhofaza qilish va ulardan foydalanish boshqarmasida 3499-3510 raqamlari ostida saqlanayotgan Ismoil Somoniy vaqfnomasi fotonusxalari, yuqorida aytilganidek, bir xil mazmunga ega boʻlib, bir-birlarini toʻldirish xususiyatiga ega. Fotonusxa koʻrinishidagi hujjatning bosh qismida asl hujjatning yaroqsiz holga kelgani bois, vaqfnomani qayta tiklash toʻgʻrisidagi bayonnoma joy olgan. Bu bayonnoma hech bir sarlavhalarsiz boshlangan. 10ta qatordan iborat boʻlgan bu bayonnoma 758/6 va 758/7 raqamli hujjatda uchramaydi. Bayonnomada aytilishicha, Mir Saqnaxiy nomi bilan tanilgan Sayyid Muhammad ibn Amir Sulton Husayn Buxoro shahridagi Qozilik mahkamasiga tashrif buyuradi va Ismoil Somoniyning vaqf mulklari borasidagi vaqfnoma roʻyxatini koʻrsatadi; uning qogʻozi vaqt oʻtishi bilan yaroqsiz holga kelgani tufayli vaqfnomani qayta tiklashni iltimos qiladi. Amir Sayyid Muhammad ibn Amir Sulton Husayn Ismoil Somoniy vaqf mulklari mutavallisi boʻlgan. Uning iltimosi qondirilib, vaqfnoma qayta tiklab beriladi. Bayonnomadan koʻrinib turibdiki, vaqfnomani qayta tiklash uchun Amir Sayyid Muhammad ibn Amir Sulton Husayn qoziga Ismoil Somoniy avlodlaridan biri ekanligini tasdiqlovchi qozining muhri bosilgan guvohnoma koʻrsatgan.

Bayonnoma bitilgan ushbu qogʻoz boʻlagi ostidan yana bir qogʻoz yopishtirilgan va uning dastlabki qatorlari Ollohni ulugʻlovchi soʻzlar, Qurʼoni Karimdan keltirilgan baʼzi oyatlar, paygʻambarlarga va Muhammad paygʻambar sollalohu alayhi vasallamga salovatlardan iborat. Shundan soʻng, Ismoil Somoniyning oʻz avlodlari foydasiga vaqf mulklari taʼsis etishi sabablari bayon qilingan. Keyin esa vaqf qishloqlari, ularning chegaralari, joylashgan oʻrni birma-bir sanab oʻtiladi. Hujjatning ikki yon chetida Amir Haydar muhrlari bosilgan. 758/6 va

758/7 raqamli hujjat esa Ismoil Somoniyning o‘z avlodlari uchun vaqf mulklarini ta’ sis etish sabablarini bayon qilish bilan boshlangan. Hujjat qog‘oz bo‘laklarining bir-biriga yopishtirilgan joylarining har ikki tomoniga Amir Shohmurod muhrlari bosilgan. Vaqfnomada vaqf mulklarining qonuniy vaqf yer ekanligi ta’kidlanadi.

Har ikkala hujjatda Ismoil Somoniy vaqf mulklari sifatida Parkat, Garmoba, Xo‘ja O‘bon, Nahri Navkanda, Mazrai Alishoh, Arbobi Kata va Asbobi Ayniddin qishloqlari sanab o‘tilgan, so‘nggida somoniylar maqbarasi joylashgan yer tasvirlangan. Hujjatda Parkat, Garmoba va Hoja O‘bon qishloqlari Buxoro viloyatining Somjan tumanida joylashgani aytilsada, Mazrai Alishoh, Arbobi Kata va Asbobi Ayniddin qishloqlari Buxoro viloyatining Xutfar tumanida joylashgani aytiladi; Nahri Navkanda qishlog‘i Poyi Rud tumanida joylashgani ma’lum bo‘ladi. Vaqfnomada Buxoro viloyatining Poyi Rud tumanida joylashgan yana bir katta yerning bayoni ham keltirilgan, ammo bu yerning nomi keltirilmagan. Barcha qishloqlarning sharqdan, g‘arbdan, shimoldan va janubdan qaysi yerlarga borib tutashishlari va chegaralari bayon etiladi. Har bir qishloqning chegaralari haqida atroflicha to‘xtalib bo‘linganidan so‘ng “Barcha chegaraviy belgilari va oraliqlari aniqdir” deb qo‘shib qo‘yilgan.

758/6 va 758/7 raqamli hujjatda uchragan Parkat, Garmoba, Hoja O‘bon, Nahri Navkanda, Mazrai Alishoh va Arbobi Kata qishloqlari nomlari O‘z FA Abu Rayhon nomli Sharqshunoslik institutida saqlanayotgan 527 “A” raqamli hujjatda ham uchraydi. Faqatgina Asbobi Ayniddin qishlog‘i nomi, 527 “A” raqamli hujjatda uchramaydi. O‘z navbatida 527 “A” raqamli hujjatdagi Jo‘yi Mo‘liyon, Buxoro Registon, Sobuq, Bosondiq, Hazor Bog‘, Kata Chorvog‘ va Varaxsha singari vaqf yerlari nomlari 758/6 va 758/7 va fotosurat ko‘rinishidagi vaqfnomalarda uchramaydi. Buning sabablaridan biri XIX asrga kelib bu joy nomlarining o‘zgarib ketganligi ham bo‘lishi mumkin.

O‘zbekiston Fanlar Akademiyasi Abu Rayhon Beruniy nomli Sharqshunoslik institutida saqlanayotgan 527 “a” raqamli hujjatning asosiy qismi somoniylar tarixidan iborat bo‘lsada, 24-qatordan 50-qatorgacha bo‘lgan qismida Ismoil Somoniy vaqf yerlari va uning vaqfnomasi haqida to‘xtalib o‘tilgan:

Onhazratlarining (24) vaqf mulklari ko‘p bo‘lib, shulardan ba’zilari onhazratning (25) abadiy tarzda avlod tarqatadigan va ko‘payadigan avlodlari va avlodlarining avlodlari va avlodlarining avlodlarining avlodlari va oxir-oqibat kambag‘al musulmonlar uchun vaqf mulki hisoblanar va boshqalarning (26) u vaqf mulklaridan biror narsa olishlari qonun bilan ta’qiqlangan edi. Agar biror kimsa zo‘ravonlik

va bosqinchilik bilan (27) (onhazratning) o‘z avlodlari va o‘z avlodlarining avlodlari va o‘z avlodlarining avlodlarining avlodlarining(28) avlodlari uchun vaqf mulkiga aylantirgan yerlardan biror narsa olsa, noqonuniy va mutloq harom hisoblangan. (29) Vaqf ta’sisчисining shartisiz vaqf mulklaridan olinadigan har bir narsa haromdir. (30) Vaqfi avlod hisoblanadigan yerlardan boshqa odamlarning biror narsa olishi qonunan jinoyat hisoblanadi.

Dastlabki qishloq Nahri Navkand bo‘lib, (31) ulug‘ Buxoroga tutash joylashgan, yuqorida zikr qilingan shaharning g‘arbiy tarafida bo‘lib, To‘rt gumbazlar (ko‘chasi) (32) ana shu 700 tanobga ega qishloqdir. Yana bir qishloq Parkat bo‘lib, (33) mashhur va ma‘lumdir. Yana bir qishloq Xo‘ja O‘bon va Mazrai Alishoh qishlog‘i, (34) yana bir boshqa qishloq Arbobi Kata va yana bir qishloq Talli Garmobadir. Ammo yerlar avlodlar o‘rtasida umumiy (mushtarak) edi. (35) Shuningdek, Hazarbog‘, Sobuq va Bosondiq yerlari, Jo‘yi Mo‘liyon va Buxoro Registonini (36) hazrat podshoh Ismoil Somoniy Hasan ibn Muhammad ibn Tolutdan (37) uch ming tilla evaziga sotib olib, ularni ham o‘z avlodlari, mavlolari va kambag‘allar (38) uchun umumiy (mushtarak) vaqfga aylantirdi.

Fuqaho va ulamolar uchun maxsus atalgan yerlar bu - Varaxsha yeri bo‘lib, (39) qadimda o‘n ikki sug‘orma ariqlar bilan sug‘oriladigan yerlarga ega bo‘lgan, bulardan uchtasi ulamo va fuqaholar foydasiga vaqf qilingan yerlarni tashkil qilgan. (40) Boshqa uchtasi ham vaqf bo‘lib, bu vaqf yerlari hosilidan keladigan foyda “keluvchilar” va “ketuvchilar” uchun bo‘lgan. (41) Shu vaqf yerlarining har biri uchun tasarruf etish yuzasidan alohida vaqfnoma mavjud.

(48) Onhazrat yana buyurdiki, har bir hokim (49) vaqflarni to‘g‘ri tasarruf qilsin yoki unga tegmasin va ularning vaqfnomasini qonunga muvofiq (Ismoil Somoniy) avlodlariga topshirsin. (50) Ularni rozi qilganning joyi jannatda oboddir.

Shuni ta’kidlash mumkinki, ushbu hujjat nafaqat Ismoil Somoniy vaqf yerlarini o‘rganishda, shuningdek, somoniylar tarixini ham o‘rganishda manba bo‘lib xizmat qiladi, chunki uning asosiy qismi somoniylar sulolasi tarixidan iborat.

Yuqorida vaqfnomalarda bayon etilgan vaqf yerlarini tahlil qilib, shuni aytish mumkinki, Ismoil Somoniy asosan Buxoro viloyatida joylashgan qishloqlarni o‘z avlodlariga vaqf sifatida ta’sis etgan. Ismoil Samoniy yuqorida sanab o‘tilgan yerlarni nafaqat o‘z avlod-

lariga, balki shu jumladan, mavlolari, kambag'al musulmonlar, ulamo va fuqaro'lar uchun ham vaqfga aylantirgan⁵¹.

Avlodlari uchun vaqf qilingan yerlar faqat o'sha sulola vakillari tasarrufi ostida bo'lgan va bu yerlardan boshqa maqsadlar uchun soliq olish mutloq ta'qiqlanganini ko'rish mumkin. Vaqfnomada qishloqlarning chegaralari aniq ko'rsatib o'tilgan. Vaqf mulklari Buxoro shahri yaqinida, Somjan, Xutfar va Poyi Rud tumanlarda joylashgan.

Shuningdek, vaqfnomalar atamalarga boy bo'lib, ular o'sha davrdagi ijtimoiy-iqtisodiy, soliq usuli, hunarmandchilik, somoniylar davridagi urf-odat, madaniyat, ularning ma'muriy tuzumi va boshqa masalalarini yoritishda katta ahamiyatga ega. Hujjatlar Buxoro va uning atrofidagi katta va kichik qishloqlarning tarixiy toponimikasini o'rganishda ham qo'shimcha ma'lumotlar beradi.

Mulklarni vaqf mulklariga aylantirish an'anasi O'rta Osiyoda keyingi davrlarda ham kuzatiladi. Hatto boshqa dinga e'tiqod qiluvchi mo'g'ullar davrida ham tuzilgan vaqf hujjatlari buning yaqqol dalilidir. Biz muhokama qilmoqchi bo'lgan Buxoro hujjatlari Markaziy Osiyo tarixidagi og'ir davrga, ya'ni mo'g'ul bosqinchiligining og'ir oqibatlari davriga to'g'ri keladi. Mo'g'ul bosqinidan so'ng 100 yildan ortiq vaqt o'tsa ham o'zaro urushlar so'nmagan edi. Mo'g'ullar katta shaharlar, qishloqlar, bog'lar, ekinzorlar, chorva va tub yerli aholini qirib vayron qilib kelardi. Ayniqsa, Buxoro shahri va uning atrofi ko'p marotaba talon-taroj qilindi. Masalan;: 1273-1276 yy. Buxoro talon-taroj qilingan⁵².

XIII asr boshlarida O'rta Osiyoda iqtisodiy ko'tarilish kuzatiladi. Bu davr insoniyatga buyuk olimlarni – Ibn Sino, Beruniy, Xorazmiy, Farobiy kabi daholarni yetkazib berdi.

Mo'g'ullarning madaniy hayoti, hattoki turklarnikidan ham past edi. V.V.Bartold ta'biri bilan aytganda, mo'g'ullar hattoki german varvarlaridan ham qoloq edi. O'rta Osiyoda mo'g'ul bosqinchiligi oqibatlari V.V.Bartold, M.E.Masson va I.P.Petrushevskiy tomonidan o'rganilgan. Shulardan I.P.Petrushevskiy mo'g'ullar bosqini oqibatlari O'rta Osiyoda Eronga nisbatan anchagina og'ir kechganligini e'tirof qiladi.

⁵¹ Ushbu mavzuni yozishda qisman B.Musametovning magistrlik dissertatsiyasidan foydalanildi.

⁵² Петрушевский И.П. Из истории Бухары в XIII в. //Ученые записки ЛГУ. Серия восточных наук. Вып. I. 1949. –С.103-108.

Mo'g'ul bosqini bilan bog'liq bir qancha manbalar bo'lib, ular qatoriga Muhammad Nisoviyning "Sulton Jaloliddin Manguberdi tarixi", Juvayniyning "Tarixi jahonkushoy" ("Jahongir (Chingizxon) tarixi"), Rashiduddin "Jome ut-tavorix" ("Tarixlar majmuasi") kabi asarlarni kiritish mumkin. Mazkur manbalarda Buxoroning ijtimoiy-iqtisodiy hayoti haqida qimmatli ma'lumotlar uchraydi. Bu kabi ko'plab ma'lumotlar XIII-XIV asrlarga taalluqli rasmiy hujjatlar - vaqfnomalarni o'rganish jarayonida qo'lga kiritilgan. Shuning uchun XIII-XIV asrlarda yozilgan vaqfnomalar O'rta Osiyodagi ijtimoiy-iqtisodiy munosabatlar masalasini o'rganishda muhim manba bo'lib xizmat qiladi. Quyida O'zbekiston Respublikasi Markaziy davlat arxivi fondlarida saqlanayotgan ayrim vaqf hujjatlari haqida ma'lumot beramiz.

O'zbekiston Respublikasi Markaziy davlat arxivi Buxoro hujjatlari fondini tartibga keltirayotgan paytida shu arxivning katta xodimi K.Ubaydullaev ro'yxatlarda tilga olinmagan 638/1298-yilga oid bo'lgan vaqf yorlig'ini qo'lga kiritadi. Bu hujjat O'rta Osiyoda hozirgacha ma'lum bo'lgan eng muhim vaqfnomalardan biridir.

Mazkur vaqf yorlig'i o'ram holida bo'lib, matni ancha qorayib, ko'p joylarini o'qish qiyin holda. O'lchamlari 19 x 297 sm. Hozirda bu hujjat O'zbekiston Markaziy davlat arxivining I-323 fondida saqlanadi⁵³.

Vaqf yorlig'ining sanasi bayon qismida yozilgan (100 qator). Hujjatda 33 ta kishining ismi qayd etilgan bo'lib, ularning guvohligi muhr va imzolar bilan tasdiqlangan.

XIII asrda biror mulk vaqfga berilayotgan vaqtida bu haqdagi hujjat bir necha nusxada yozilgan va nusxalari turli shaharlarda saqlangan. Bundan maqsad vaqf berilganligini tasdiqlovchi hujjatning saqlanishini ta'minlashdan iborat edi. Toshkentdan topilgan 1298-yilga taalluqli Buxoro hujjati nusxasi aynan uning saqlanishini ta'minlash maqsadida ko'chirilgan bo'lishi mumkin.

Hujjatning ilmiy qimmati shundaki, u hujjat Buxoro vohasidagi ijtimoiy va iqtisodiy hayot manzarasini ochib berishga yordam beradi.

Topilgan hujjatda birinchi marta Buxoro tumanida to'qimachilik, qishloq xo'jaligi, irrigatsiya, yer egaligi va yerdan foydalanish bilan bog'liq masalalar o'z aksini topgan. Vaholanki, bu hujjat topilgan davrgacha, faqat siyosiy masalalarni, ya'ni Chingizxon bosqini, mo'-

⁵³ O'zbekiston MDA, f. I-323, Ro'yxat 1, № 1429.

g'ullarning talonchiliklari, shaharlarning talon-taroj qilinishi, aholining qirg'in qilinishi kabi ma'lumotlargagina ega edik.

Mazkur vaqf yorlig'i arab tilida bo'lib, mazkur fondan uning fors-tojik tiliga tarjimai ham topilgan. Bu tarjima arab tilidagi nusxasiga nisbatan ancha yaxshi saqlangan bo'lib, matni 189 qator nas-taliq xatida 37 x 635 sm hajmda o'ram hoida bo'lgan. Arab tilidagi va tarjima nusxalarining har ikkovida hujjatlarning boshi saqlanmagan. Lekin tarjimasida asl nusxasiga nisbatan kamroq qismi yo'qolgan. Har ikkala hujjat aslida o'chib ketgan satrlarni to'ldirishga yordam beradi.

1298-yilgi vaqfning ta'sischisi sadr, amir va imom, shayx Abdulloh al-Isfidjobiyning o'g'li Abdurahim Muhammad bo'lib, u Jaloliddin al Bamruniy (yoki Bakiruniy?) taxallusi bilan atalgan.⁵⁴ Ko'rinib turibdiki, u Isfijobdan – Turkistonning Aris daryosi vodiysi Zaryom (Sayram)lik bo'lgan.

Hujjatda ko'rsatilishicha, vaqfning ta'sischisi Samdjon deb atalgan Buxoro tumanidagi Dex-i Xamane nomli qishloqni sotib olgan. Sotib olingan qishloqqa Samjan bosh kanalidan maxsus qazilgan ariq orqali suv chiqarilgan. Undan tashqari bu kanalga Nufaj, Parkat, Nuxuddize, Margasun, Mansha, Fag'ona va Fag'aniya qishloqlariga suv yetkazib beradigan kanallardan ham suv kelib quyilgan. Ko'rinib turibdiki, sotib olingan qishloq sug'orish tizimlariga boyligi sababli uning narxi ham baland bo'lgan bo'lishi mumkin.

Hujjatda ma'muriy-hududiy nom sifatida tuman atamasi uchraydi. Bu esa, Movarounnaxrning Kebekxongacha tumanlarga bo'lingan ekanligini tasdiqlaydi. Holbuki tuman ma'muriy birligini Kebekxon joriy etgan deb hisoblashar edi.

1298-yilda vaqfga o'tkazilgan qishloq Buxorodan 30 km shimolda joylashgan. Vaqf hujjatida tilga olingan XIII asr qishloqlari – Samjan, Parkad, Mugkan, Margasun kabilar IX-XIII asr arab sayyohlarining asarlarida ham eslatilgan. Demak, hujjat Buxoro toponimikasini o'rganishda ham qimmatli manba bo'lib xizmat qilishi mumkin. Bundan tashqari vaqf yorlig'ida mol-mulk kabi terminlar uchraydi. Vaqf ta'sischisi Abdurahmon Muhammad yangi qishloqda uy, ikkita yozgi va qishki masjid, xizmatchilar uchun turar joy, mol-xona, pichanxona, un tegirmoni va bir nechta to'quv korxonasini qur-

⁵⁴ Bu shaxsga ta'rif berilganda "Qilich va qalamning eng oliynasab vakili", "Shoh va Sultonlarning tayanchi" kabi maqtovlar ishlatilgan.

dirib, ularni vaqf qilib bergan. Demak, chigʻatoy shahzodalari Buxoroda XIII asrda kichik toʻquv korxonalari tashkil qilishgan.

Vaqf qilingan mulklar huquqiy jihatdan sotilishi, sovgʻa qilinishi, meros qoldirilishi man qilingan. Butun qishloq vaqf qilingan, shu bilan birga aholi yashayotgan uy-joylar ham vaqfga berilgan, ularning egalari vaqf mulki xizmatidagi odamlarga aylangan. Oddiy aholi uchun bu hol qulay boʻlib, ularning xoʻjaligi ham vaqf tarkibida soliqlardan ozod boʻlgan.

Hamma vaqf mulklari Abdurahim Muhammad oʻlimigacha uning tasarrufida qolgan. Bu mulklar uning oʻlimidan soʻng oʻgʻli Qutbiddin Yusufga oʻtishi hujjatda taʻkidlangan.

Mashhur Oʻrta Osiyo vaqf hujjatlaridan farqli, bu hujjatda imom va muazzinga maosh tariqasida, masjid va mozorlar taʻminoti uchun vaqf mulkidan tushadigan daromaddan toʻlanmagan, balki ular uchun alohida yer boʻltagi ajratilgan: imomga 10 tanob yer, muazzinga 4 tanob, Xoji Xaman qabristonini taʻminlash uchun 10 tanob, yangi qishloqdagi masjidni taʻmirlash uchun 2 tanob, ikki masjid maorifi uchun 2 tanob, ziyoratchilar uchun 10 tanob yer ajratilgan. Hujjatda bu mulkning chegaralari koʻrsatilgan. Hujjatda ogʻirlik va hajm oʻlchov birliklari nomlari uchraydi (masalan: man, misqol).

Vaqf taʻsischisi barcha yer-mulklari va qoʻrgʻonlari bilan birga sotib olgan Xaman qishlogʻi hududida joylashgan baʻzi bogʻlarni va yerlarni vaqfdan xoli ekanligini vaqf yorligʻida koʻrsatgan. O.D.Che-xovichning fikricha, aftidan vaqfdan xoli deb koʻrsatilgan mulklar feodallar sinfiga, ruhoniylarga (shayxlarga), hunarmand-savdogarlarga tegishli boʻlgan. Xaman hududida joylashgan dehqon aholisi vaqfdan holi deb atalgan turkum kishilariga kirmagan. Hujjatdan koʻrinib turibdiki, vaqf taʻsischisi juda boy kishi boʻlib, u oʻz qishlogʻidagi na faqat dehqon aholini, hattoki hunarmandlarning ham mehnatini tashkil etishga rahnamo boʻlgan.

Vaqf yorligʻi arab matnining oxirida rasmiy shaxslar – qozi (notarius vazifasini oʻtagan) va boshqa guvohlar imzo chekishgan.

Xulosa shulkim, mazkur XIII asr vaqf yorligʻi oʻrta asrlarda mol-mulklarni vaqf qilish tartibi, vaqf qilingan mulklardan foyda olmaslik, uni sotish va sovgʻa qilish mumkin emasligi, Buxoro vohasidagi ijtimoiy-iqtisodiy hayot, dehqonchilik, korxonalar, aholi tabaqalari, ogʻirlik va hajm oʻlchov birliklari, xullaski, tariximizni boyita oladigan koʻplab maʼlumotlar beradi.

Vaqf hujjatlari bilimdoni O.D.Chexovich XIV asrga taalluqli vaqf hujjatlarini ham o'rgangan. 1326-1333-yillarda Buxoroda yozilgan Buxoroning ijtimoiy-iqtisodiy hayoti to'g'risidagi vaqf hujjatlari O.D.Chexovich tomonidan e'lon qilingan⁵⁵. O.D.Chexovich "XIV asr Buxoro hujjatlari" asarida Buxoroda yozilgan XIV asrga taalluqli vaqfnomalarni o'rganib, ularni tahlil qilib bergan.

Hujjatlar asosan yer, joy, mulk va vaqf yerlari haqida bo'lib, ushbu ma'lumotlar o'sha davrda yashagan Sayfiddin Boxarziy nomi bilan bog'liqdir. Shu ma'noda Sayfiddin Boxarziy haqida to'xtalib o'tish joiz.

"Shayx ul-olam" degan yuksak e'tiborga loyiq bo'lgan ushbu Buxoro shayxi Sayfiddin Boxarziy XII asrning ikkinchi yarmida Xurosonning Boxarz viloyatida tavallud topganligi haqida Hamdulloh Kazviniy xabar beradi. Hirot va Nishopur shaharlarida dastlabki diniy-huquqiy bilim oladi va sufiy bo'ladi. Keyinchalik o'zining ilmga chanqoqligi va ma'rifatparvarligi tufayli ilm istab Xorazmga keladi va shu davrda o'zining diniy ilmi va tasavvufdagi tariqati javonmardiya tufayli butun sharq mamlakatlarida tanilgan va mashhur bo'lgan Najmiddin Kubroga murid tushadi. Boxarziy undan diniy-falsafiy bilimlarni chuqur o'rganib shayx bo'lib yetishadi. Keyinchalik Abdurahmon Jomiyning ma'lumotiga ko'ra, Sayfiddin Boxarziy ustozini Najmiddin Kubroning tavsiyasi bilan Buxoroga jo'naydi. U Buxoroda 40 yilga yaqin yashagan.

Chingizxon va uning avlodlari bosib olingan hudud aholisini ruhoniylar yordamida o'zlariga itoat qildirishga harakat qilgan. Ulardan ba'zilari ruhoniylar bilan yaqin aloqalar o'rnatib olganlar. Ular orqali xalq ichiga kirib borganlar. Masalan; Botuning ukasi Berkaxon Buxoroga Sayfiddin Boxarziy oldiga kelgan. Boxarziy mo'g'ul hukmdorlari tomonidan izzat-hurmat qilingan. Undan foydalangan Sayfiddin Boxarziy Chig'atoyxonning amiri Xabash Amidga yozgan maktubida, ruhoniylar ishiga aralashayotgan amaldorni va nodon yoshlarni rahbarlik lavozimlariga tayin etayotganini tanqid qilgan. Mo'g'ul xonlari u bilan kelishishga intilganlar. Sayfiddin Boxarziy Buxoroda

⁵⁵ Чехович О.Д. Новый источник по истории Бухары начала XIV в. // Проблемы востоковедения. –М., 1959. № 5, -С. 148-161; О'sha muallif. К истории крестьян Бухары XIV в. //Известия АН УзССР. Сер. Общественных наук, 1959, № 1. -С. 71-76; О'sha muallif. Бухарские документы XIV в. –Т., 1965.

shayxlarning mavqeini oshirmoqchi bo'lgan va bunga erishgan ham. Berkaxon hukmronligi davrida Sayfiddin Boxarziy shayx sifatida ulug'lanib "shayxul-olam", ya'ni "olamlar shayxi" unvoniga erishgan. Yana uni "din va dunyo yordamchisi" deb ham ataganlar.

Mo'g'ul xonlari undan foydalanib qolmoqchi bo'lishgan. Shu maqsadda Mangu, Xulagu va Xubilaylarning onasi Suyurkukteni-beka Buxoro viloyatida madrasa va xonaqoh qurilishi uchun 1000 bolish kumush beradi va Sayfiddin Boxarziyni vaqf mulklari mutasaddiysi qilib tayinlaydi.

Bizga o'sha vaqtda vaqfning maxsus hujjat bilan tasdiqlanganligi noma'lum. Ammo Sayfiddin Boxarziyning vafotidan 65 yil o'tgach, ya'ni 1326-1335-yillar bilan vaqf qilingan mulklarning hujjatlari yetib kelgan. Bu hujjatlar O.D.Chexovich tomonidan "XIV asr Buxoro hujjatlari" asarida e'lon qilingan.

Sayfiddin Boxarziyning maqbara va xonaqosi hisobiga o'tkazilgan vaqfning asoschilaridan biri uning nevarasi Abdulmufohir Yaxyo ekanligi vaqf hujjatlarida ko'rsatilgan. U Said al-Boxarziyning o'g'li Ahmadning o'g'lidir. XVI asr yozuvchisi Ahmad shayx (Abulmufohir) Kermondan Buxoroga 1312-1313-yillarda kelgan va 1335-1336-yillarda vafot etganligini e'tirof qiladi. Ahmad ibn Muhammadning fikriga ko'ra, u vaqfni Fathobodda "bechora miskinlarga kiyim-bosh va boshpana uchun xudo yo'lida tashkil etgan".

Shayx Yaxyoning zamondoshi arab sayyohi Ibn Batuta, Buxoroda bo'lib, Sayfiddin Boxarziy xonaqosida to'xtagan va u haqida quyidagicha yozadi: "Biz Buxoro shahri tevaragidagi so'lim go'shalardan birida to'xtadik. Bu yerni Fatxabod deb atar ekanlar. U yerda shayx darvesh Sayfiddin al-Boxarziyning qabri bor edi. Sayfiddin Boxarziy bosh avliyolardan bo'lgan. Vaqf egasiga juda katta mulk qarashli bo'lib, undan keladigan foydadan ziyoratchilar boqilgan. Uning shayxi Boxarziyning nabirasi Yaxyo al-Boxarziy (Ibn Batutuni-R.A.) kutib oldi. U bizlarni o'z qadrtonidek qarshi oldi. Tunni kunga ulab suhbat qurdik. U shaharning obro'li kishilarini chaqirib, u yerda kitobxonlik qilindi, kitobni chiroyli ovoz (qiroat) bilan o'qidilar. Ular turkcha va forscha o'qidilar. Biz u yerda tunni mo'jiza bilan o'tkazdik. Men u yerda "shariat sadri unvoni bilan ataluvchi olim-huquqshunosni ko'rdim".

O.D.Chexovich nashr qilgan vaqf hujjatlarida 10 ta qishloq va Buxoroning janubi-sharqida joylashgan 1 ta qasaba (katta qishloq),

haydaladigan yerlar, bog'lar, sug'orish inshootlari va boshqa qurilishlar 1326-1334-yillarda Sayfiddin Boxarziy maqbarasi va xonaqosi vaqfiga berilgani eslatilgan. Nazarimizda, uning tarkibiga Siyurkuktenibeka farmoni bilan sotib olingan va madrasaga vaqf qilib berilgan yerlar ham kirgan bo'lishi mumkin. Bu madrasa Xoniya nomi bilan mashhur bo'lgan 1273-1276yillarda Chingizxon avlodlari o'rtasida bo'lib o'tgan navbatdagi to'qnashuv chog'ida buzib tashlangan. Fatxobod qasabasi haqidagi yozuvda "Maqbaraning eski vaqfi eslatiladi. Uning yozishicha, Fatxobod Shayx Sayfiddin Boxarziy tomonidan qurilgan va uning vaqfi tarkibiga Fatxobod yaqinidagi "Shahri Zudi nomi bilan mashhur bo'lgan yerlar" ham kirgan. Ammo Siyurkukteni xanshi farmoni bilan sotib olingan qishloq "Sag'ananing eski vaqfiga kirganmi, yo'qmi noma'lum."

O.D.Chexovichning mazkur kitobiga Sayfiddin Boxarziy madrasasi va xonaqosi foydasiga o'tkazilgan mulklarning vaqf hujjatlari kiritilgan. Quyida shu hujjatlar to'g'risida to'xtalib o'tamiz.

Kitobga kiritilgan 1-raqam bilan belgilangan asosiy hujjat 726/1326-yilda tuzilgan bo'lib, matnning 0,9 qismini tashkil etadi. Unga ikkita tasdiqlovchi, ya'ni 1326-yil (№ 2 va 3) va 734/1333-yilda yozilgan (№ 4) qo'shimcha vaqf yorliqlari tirkab qo'yilgan. O.D.Chexovich asarga 1744-yilda tuzilgan (№ 5) vaqfnomani va restavratorlarning 1879 yildagi (№ 6) qo'shimcha yozuvlarini ham kiritgan.

1-hujjat boshqalariga nisbatan eng kattasi bo'lib, uni quyidagi qismlarga bo'lish mumkin.

1) Kirish qismida Ollohga, payg'ambarga, vaqf ta'sischisi nomiga hamdu sanolar o'qilgan, tuzilayotgan vaqfnomaning ma'nosi va uning huquqiy jihatlari tushuntiriladi.

2) Vaqf ob'yektlari va ularning chegaralari ko'rsatilgan. Vaqf yerlari (ko'chmas mulk) hamda ularga qo'shni bo'lgan boshqa vaqflarning yerlari yoki davlat va shaxslarga tegishli bo'lgan vaqflar ham sanab o'tilgan.

3) Vaqfga berilgan harakatdagi narsalar, maqbara va xonaqolarning asbob-uskunalari, vaqf yerlariga biriktirib qo'yilgan sotib olingan va ozod qilingan qullar, ular vaqf yerlarida, maqbara va xonaqolarda, yerga ishlov va boshqa xizmatlar uchun qoldirilgan.

4) Vaqf daromadlarini taqsimlash shartlari va vaqf xo'jaligini boshqarish uchun mas'ul shaxslarni tayinlash va ularning maoshlarini pul yoki natura bilan to'lash haqidagi shartlar. Bayram kunlari dastur-

xon sarf-xarajatlari uchun farmoyishlar, kambag'al-ziyoratchilarni boqish uchun farmoyishlar, vaqf yerlarini ishlash shartlari, hosilning 1/3 qismini dehqonlarga berish va yerlarga tajovuzlarning oldini olish bo'yicha choralar to'g'risidagi farmoyishlar.

Hujjatning asosiy maqsad va mazmuni shundaki, unda mulklar vaqfga berilgach ulardan foydalanish tartib-qoidalari belgilab berilgan, ya'ni vaqf qilingan mulklar sotilmasligi, meros qoldirilmasligi, biror kimsaning mulkiga aylantirilmasligi hamda vaqfda ko'rsatilgan maqsadlardan tashqari sarflar qilinmasligi ko'rsatilgan.

Sayfiddin Boxarziy maqbarasida undan tashqari, uning ikki o'g'li – Jaloliddin Muhammad va Mazxariddin Mutahhar va nabirasi Abu Mufoxir Yaxyo va evaralari – Xovand Burxoniddin va Ruxiddin shayx Dovud, Sayfiddin Boxarziy o'g'illarining qabri Sayfiddin Boxarziy qabridan g'arbda, nevara va evaralari sharqda joylashgan.

Nashr qilinayotgan hujjatlarda Buxoro tumani topografiyasi bo'yicha muhim ma'lumotlar mavjud.

Hujjatda vaqfga o'tkazilgan quyidagi qishloqlar - Forakan, Ushmiyun, Ibodi, Bidjugi, Margzorcha, Zaxanjiza, Xavzi Arusoni, Fatxobod kasabasi, Farishun, Razina, Kovokdiza, Kosara, Kushki Osiyoi Vobkand nomlari tilga olingan.

Hujjatda sanab o'tilgan mulklardan tashqari Sayfiddin Boxarziy vaqf yerlariga qo'shni bo'lgan, u bilan chegaradosh o'nlab qishloqlar va kanallar eslatilgan. XIV asrda keltirilgan geografik nomlar orasida bizning davrimizgacha saqlanib qolganlari ko'p. 1893 va 1896- yillardagi xaritalarda va N.F.Sitnyakovskiyning "Zarafshon vohasidagi Buxoro ariqlari va aholi joylari ro'yxati" nomli asarida ko'plab qishloq va sug'orish kanallarining nomlarini uchratamiz. Bulardan Boxarzi vaqfi mulk va yerlari to'g'risida to'liq ma'lumot olish mumkin.

Buxoroga yaqin joylarda, Qarshi darvozasidan janubi-sharqda 1,5 km masofada Fatxobod joylashgan bo'lib, bu qishloqqa XIII asrda Sayfiddin Boxarziy asos solgan.

1326-1333-yillarda bu vaqflarga Buxorodan shimolda 20 km masofada joylashgan, Vobkentdaryodan suv oladigan Komi Akka arig'i bo'ylaridagi Kushki Osiyo (Qasri Osiyo) va Kosari yerlari qo'shib berilgan.

Hujjatlarda 1326-yilda Buxoro atroflarida juda ko'p xarobalar, buzilgan qal'alar, masjidlar, turar joylar, payxon qilingan bog'lar, uzumzorlar bo'lganligi eslatiladi. Har bir qishloqning ta'rifi uning o'rtasida baland tepalik borligini yozishdan boshlanadi. Unda mo'g'ullarning talonchiligi va mo'g'ul xonlari o'rtasidagi urushlar oqi-

batida buzilgan binolar, bo'sh maydon, uning o'rnida avval katta saroylar va kadivarlar hamda muzoriylar yashashi uchun mo'ljallangan honaqolar bo'lganligi eslatilgan. Ma'lumki, Buxoro oxirgi marta 1316-yil mo'g'ullar tomonidan vayron qilingan bo'lib, bu voqea hujjat yozilishidan 10 yil avval sodir bo'lgan edi.

Hujjatlarda vayronagarchiliklar bilan bir qatorda yangi bog'lar yaratilganligi, yangi irrigatsiya shaxobchalari - kanallar qazilganligi ko'zga tashlanadi. Masalan;, bir hujjatda Ushmiyun qishlog'iga Forakandan yangi ariq qazilganligi, yangi uylar qad ko'tarilganligi, yangi bog' yaratilganligi eslatiladi. Vaqf yerlarida bu yaratuvchanlik yangidan jonlanish sari harakat boshlanganidan dalolatdir.

Vaqfdan chiqarilgan, lekin vaqf yerida joylashgan hududda 24 bog', yer maydonlari, 1 ta tegirmon shayx Yaxyo Boxarziyning xususiy mulki bo'lgan.

O.D.Chexovich asarida tilga olingan 2-hujjatga keladigan bo'lsak, u Buxoro qozikaloni Abu-l-Hamd Muhammad, ibn Abul Fazl Muhammad, ibn Muhammad Umar, ibn Mahmud al-Buxoriy tomonidan Sayfiddin Boxarziy maqbarasi va xonaqohi foydasiga berilayotgan vaqfning to'g'riligi va haqqoniyligini tasdiqlovchi hujjat bo'lib, 1326-yil 3 avgust kuni yozilgan. Matn shakl va mazmun jihatidan qisqacha bitilgan.

Muallifning asaridagi 3-hujjat Abu-l-Hamd Muhammad, ibn Abul Fazl Muhammad, ibn Muhammad Umar, ibn Mahmud al-Buxoriy tomonidan asl hujjatning to'g'ri tuzilganligini tasdiqlab 1326-yili 3 avgustda yozilgan.

4-hujjat Sayfiddin Boxarziyning nabirasi shayx Yaxyo tomonidan Qasri Osiyoi Vobkan qishlog'ining yarmini vaqf qilganligi va mulkning mutavalliga topshirganligi haqida bo'lib, 1333-yil 6 oktyabrda tuzilgan.

5-hujjat xo'ja Majnun ibn mulla Abdullaning Sayfiddin Boxarziy maqbarasi uchun Buxoroning Poirud tumani joylashgan ikkita yer mulkini vaqfga berganligi haqidagi vaqfnoma bo'lib, 1745-yil 23 yanvar – 21 mart kunlari yozilgan.

Demak, ko'rib chiqilgan vaqf hujjatlari XIV asr Buxoroning iqtisodiy, ijtimoiy, madaniy-ma'naviy hayoti haqida qimmatli ma'lumot beradigan muhim manbalardir. Hujjatlarda joy va qishloqlarning nomlari, kanallar nomi tilga olinib u tariximizni o'rganishda qo'l keladi.

XIV-XVI asr boshlarida arxiv ishi

Rivojlangan oʻrta asrlarda Oʻrta Osiyoda arxiv ishining qay tarzda yoʻlga qoʻyilganligi toʻgʻrisida aniq maʼlumotlar saqlanib qolmagan. Biroq mavjud qoʻlyozma asarlardagi daliliy materiallar asosida arxiv ishining tashkil qilinishi xususida bazi tasavvurlarga kelish mumkin. Maʼlumki, Temur va temuriylar davri davlatchiligi oʻzbek davlatchiligi taraqqiyotida alohida oʻrin egallaydi. Davlat boshqaruvi tizimi va ish yuritish jarayoniga katta eʼtibor qaratilgan. Bu davrda ilm-fan yuksak darajada rivojlangan. Arxiv hujjatlarining bizning davrimizgacha saqlanib qolmaganligi bois u toʻgʻrida toʻliq maʼlumotga ega boʻlish qiyin. Ammo Oʻzbekiston Respublikasi Fanlar akademiyasi Sharqshunoslik instituti fondlarida hujjatlar toʻplami saqlanayotgan boʻlib, ularni arxiv ishi yuritilishining bir koʻrinishi deyish mumkin. Masalan, Amir Temur va temuriy hukmdorlarning qoʻshni davlat hukmdorlari bilan yozishmalari jamlanib toʻplam holiga keltirilgan va u “Maktuboti Temuriya” deb nomlanadi.

“Maktuboti Temuriya” hozirgi kunda mazkur institut qoʻlyozmalar fondida 2278 raqam ostida saqlanayotgan maktublar majmuasining nomidir. Majmua 191 varaqdan iborat boʻlib, XVI asrda kitobat qilingan.

Eronlik olim Abulhusayn Navoiy mazkur majmuaga Eron, Turkiya, Ozarbayjon va Fors hukmdorlarining xatlarini ham qoʻshib, 1991-yili “Isnod va maktuboti tarixi Eron (az Temur to shoh Ismoil)” nomi bilan nashr etgan. Toʻplamga Temur va temuriylar (Shohrux, Sulton Husayn Boyqaro va boshqalar)ning Fors, Ozarbayjon, Iroq va Turkiya hukmdorlari bilan yozishmalari jamlangan.

Toʻplamga kiritilgan maktublar Amir Temur va temuriylarning mazkur mamlakatlar bilan boʻlgan siyosiy munosabatlari tarixini oʻrganishga, jumladan, Amir Temurning 1381-1404- yillari Eron, Iroq, Ozarbayjon, Suriya va Turkiya ustiga qilgan harbiy yurishlarining saboqlarini toʻgʻri anglashga yordam beradi.

“Maktuboti Temuriya” xurosonlik mashhur shayx, Amir Temurning pirlaridan biri Zayniddin Abubakr Tayobodiy (1395 yili vafot etgan)ning oʻz muridi Amir Temurga yoʻllagan bir tarixiy maktubi bilan boshlanadi. Amir Temur bu maktubni “Temur tuzuklari”ning “Tadbirlar va kengashlar”deb atalgan birinchi maqolasida keltirgan. “Tuzuklar”da keltirilgan mazkur maktub haqida, xususan, mana bularni oʻqiymiz: “Pirim Zayniddin Abubakr Tayobodiy menga yozmish-

larkim, “Abulmansur Temur saltanat yumushlarida to‘rt ishni qo‘l-lasin, ya’ni 1) kengash; 2) mashvaratu maslahat; 3) hushyorligu mulo-hazakorlik; 4) ehtiyotkorlik. Chunki, kengash va mashvaratsiz salta-natning barcha qilgan ishlari va (podshohning) aytgan gaplari xato bo‘lgan. Unday podshohni johil odamga qiyoslash mumkin. Uning so‘zlari va qilmishlari boshga pushaymonlik va nadomat keltirgan. Shunday ekan, saltanatni boshqarishda mashvaratu maslahat va tadbir bilan ish yuritgin, toki oqibatda nadomat chekib, pushaymon bo‘lma-gaysan. Yana shuni ham bilginkim, saltanat ishlarining bir qismi esa bilib bilmaslikka, ko‘rib-ko‘rmaslikka solish bilan bitur. (Xullas) tad-birlardan ogoh qilingandan keyin shuni ham aytish joizdirkim, qat’iy-lik, sabr-toqat, chidamlilik, hushyorlik, ehtiyotkorlik va shijoat bilan barcha ishlar amalga oshirilgay. Vassalom”. Amir Temur pirining bu o‘gitlariga umr bo‘yi, butun faoliyati davomida amal qildi. “Bu mak-tub, - deb yozadi hazrat sohibqiron, - menga yo‘l boshlovchi yang‘lig‘ rahnomalik qildi. U menga saltanat ishlarining to‘qqiz ulushini mashvarat, tadbir va kengash bilan, qolgan bir ulushini esa qilich bilan bajo keltirilishni anglatadi”.

“Maktuboti Temuriya”da Amir Temurning Eron, Ozarbayjon va Turkiya davlatlariga nisbatan 1381-1404- yillarda olib borgan siyosa-tini va yuqorida nomlari zikr etilgan mamlakat hukmdorlarining Amir Temurga qarshi harbiy ittifoq tuzish xususida olib borgan siyosatini tushunishda yordam beradi. Quyida to‘plamga kiritilgan maktublardan bir nechtasini misol keltiramiz:

Iroq hukmdori Sulton Ahmad Jaloir (1382-1410)ning Fors hukm-dori Muzaffariy Shoh Shujo‘ (1359-1384)ga yozgan maktubi;

Ozarbayjon hukmdori Qora Yusuf (1389-1420)ning Yildirim Boyazid I (1389-1402)ga yo‘llagan maktubi;

Yildirim Boyazid I ning Qora Yusufga javob maktubi;

Amir Temur ko‘ragonning Gilon hokimi Mir Said Aliga maktubi;

Sultoni A‘zam Amir Temur ko‘ragonning Sayyid Ali Qiyo bu-zurgga (Gilon) yuborgan xati.

Amir Temur ko‘ragonning Bog‘dod podshosi Sulton Ahmad Jaloirga yo‘llagan maktubi;

Bag‘dod podshosi Sulton Ahmad Jaloirning hazrat Amir Temurga javob maktubi;

Qora Yusuf Qoraqo‘yunluning Yildirim Boyazid I ga yo‘llagan nomasi; Amir Temurning Yildirim Boyazid I ga yo‘llagan birinchi maktubi;

Sulton Boyazid I ning Amir Temurga do‘stona javob xati; Amir Temurning Rum qaysariga yozgan ikkinchi maktubi; Rum podshosi Yildirim Boyazid I ning Amir Temurga yozgan javob xati

Amir Temurning Rum qaysari Yildirim Boyazid I ga yo‘llagan uchinchi maktubi;

Yildirim Boyazid I ning Amir Temurga javob maktubi;

Amir Temurning Sulton Boyazidga yo‘llagan to‘rtinchi maktubi;

Sulton Yildirim Boyazid I ning hazrat Amir Temurga yo‘llagan javob maktubi;

Amir Temurning Yildirim Boyazid I ga sulh taklif qilib Marog‘adan jo‘natgan maktubi;

Sulton Boyazidning Amir Temurga yuborgan javob xati;

“Maktuboti Allomiy” – “Maktuboti Abulfazl”, “Inshoyi Abulfazl” (“Abulfazl (Allomiy) tarafidan bitilgan va (ko‘chirilgan) maktublari”) deb ham ataladi. Maktublarning asosiy qismi Boburiylar saltanati (1526-1858)ning atoqli podshohlaridan Jaloliddin Akbar (1556-1605) nomidan, bir qismi vazir va yirik tarixchi olim Abulfazl ibn Muborak Allomiyning shaxsiy mazmundagi maktublaridan iborat. To‘plam uch qismga bo‘lingan. Undan bizga uchdan ikki qismi, ya’ni ikkita daftar yetib kelgan, xolos. U Allomiyning qarindoshi Abdusamad ibn Afzal Muhammad tomonidan tuzilgan.

“Maktuboti Allomiy”da 1586-1596-yillarda Buxoro va Balx xonliklari bilan Boburiylar davlati (Hindiston) o‘rtasidagi siyosiy munosabatlar haqida o‘ta qimmatli ma’lumotlarni uchratamiz. Ma’lumki, o‘sha yillari Hindistonning nafaqat Buxoro va Balx xonliklari, balki Eron bilan ham munosabatlari jiddiy tus olgan edi. Agar Boburiylar bilan Shayboniylar davlatlari o‘rtasidagi siyosiy munosabatlar Badaxshon tufayli, to‘g‘risi Badaxshonni o‘z hukmronligiga kiritib olish xususida bir qadar buzilgan bo‘lsa, Safaviylar Eroni bilan Hindiston o‘rtasidagi munosabatlar katta siyosiy-strategik ahamiyatga ega bo‘lgan Qandahor xususida birmuncha buzilib qolgan edi.

To‘plamdagi maktublarda mana shu chigal masalalarning mohiyatini tushuntirib bera oladigan daliliy ma’lumotlar ko‘p. Bu jihatdan Akbarning Abdullaxonga yo‘llagan uchta maktubi va Abdullaxonning mavlono Mir Quraysh, Ahmad otaliq boshchiligida Hindistonga yubor-

gan elchiligi va Buxoro elchisi olib borgan maktub va Akbarning Balx bilan Buxoroga xo‘ja Afzal, Hakim Humom va Mir Sadrijahon boshchiligida yo‘llagan elchiliklari xususida qimmatli ma’lumotlar keltirilgan.

Maktublarning birida kelgusida tutiladigan siyosat xususida ikki davlat – Boburiylar davlati va Buxoro xonligi hukumdorlarining maxsus uchrashuvini uyushtirish masalasi ko‘tariladi.

“Maktuboti Allomiy” majmuasining yaxshi bir qo‘lyozma nusxasi O‘zbekiston Respublikasi Fanlar akademiyasi Sharqshunoslik institutining qo‘lyozmalar fondida № 290 raqam bilan saqlanmoqda. Majmua 154 varaqdan iborat.

Yana shunday to‘plamlardan biri “Muraqqayi Mir Alisher” yoki “Majmua’yi murosilot (“Maktublar to‘plami”)" bo‘lib, u o‘z davrining nufuzli ruhoniylari – Abdurahmon Jomiy (1414-1492), xo‘ja Ubaydulla Axror (1404-1492), xo‘ja Axrorning o‘g‘li xo‘ja Muhammad Yaxyo (1500 yili o‘ldirilgan), xo‘ja Axrorning safdoshi va kuyovi Mir Abdulavval Nishopuriy (1495-yili vafot etgan) va boshqalarning Sulton Abu Said Mirzo (1451-1469), Sulton Husayn Mirzo va Alisher Navoiyga yo‘llagan maktublarini o‘z ichiga oladi.

Mazkur to‘plam Alisher Navoiy tomonidan tuzilgani uchun “Muraqqayi Mir Alisher” yoki “Navoiy albomi” nomi bilan ham ataladi. To‘plam XIX asrning yirik ziyolilaridan biri Buxoro qozi kaloni Sharifjon Mahdum sadri Ziyo kutubxonasida saqlangan va undan Alisher Navoiy nomidagi Xalq kutubxonasining Sharq qo‘lyozmalari bo‘limiga va undan keyin 1943-yili O‘zbekiston Respublikasi Fanlar akademiyasi Sharqshunoslik instituti qo‘lyozmalar fondiga o‘tkazilgan. U 2178 tartib raqami bilan saqlanmoqda.

To‘plamga Abdurahmon Jomiyning 334 ta xatlari kiritilgan bo‘lib, ular shaxsiy mazmunda bitilgan xatlar hisoblanadi. Ularning ko‘pchiligi har xil iltimosnomalardan iborat. Ularda soliq va jarimalarning og‘irligi va soliq yig‘uvchilarning zulmu bedodligi, Temuriyzodalarning o‘zaro nizosi tufayli mamlakat va xalq ahvolidan og‘irlashgani, shuningdek madrasa talabalariga yordam berish to‘g‘risidagi Alisher Navoiy, Sulton Husaynga iltimosnomalardan iborat.

Xo‘ja Axrorning maktublariga kelsak, ular 128 ta bo‘lib, mazmunan Abdurahmon Jomiy xatlariga o‘xshashdir. Ularda Movarounnahr va Xurosonning XV asrning II yarmidagi ijtimoiy-siyosiy ahvoli, Samarqand hokimi Sulton Abu Said Mirzo va Xuroson podshosi Sulton Husayn Mirzo (1469-1506) o‘rtasidagi og‘ir munosabatlar, soliq va

jarimalar, xususan tamg'a solig'ining og'irligi va uni imkoni bo'lsa, bekor qilish masalalari ko'tariladi. Tinimsiz harbiy yurishlar va o'zaro urushlarning pirovardida fojeaga olib kelishini Temuriylarga uqtirishga harakat qilinadi. Masalan;, Xo'ja Axror Sulton Abu Said yo'llagan bir maktubida uni Ozarbayjon ustiga, uning hukmdori Qora Yusuf ustiga qilmoqchi bo'lgan yurishiga qarshi chiqadi. Maktubda, "Hargiz az Marv maguzarid" ("Hargiz Marvdan nariga o'tmasinlar") deb ochiq ogohlantirgani yozilgan. Ma'lumki, o'sha yurish natijasi Sulton Abu Said uchun fojea bilan tugadi. 1469 yilgi jangda u halok bo'ldi.

Xulosa qilib aytadigan bo'lsak, Temur va temuriylar davrida davlat mahkama ishini yuritishi yuqori darajada tashkil qilingan. Afsuski, bu davr arxivi bizning kunimizgacha yetib kelmagan⁵⁶.

Savol va topshiriqlar:

1. IX-XIII asrlarda O'rta Osiyo davlatlarida arxiv ishining yo'lga qo'yilishi,
2. IX-XIII asrlarga oid hujjatlar haqida ma'lumot bering.
3. XIII-XIV asrlarga oid arxiv hujjatlari. Sayfiddin Boxarziy.
4. О.Д.Чеховичнинг "Бухарский вакф XIII века" va «Бухарские документы XIV века» asarlarida vaqf hujjatlari tahlili.
5. XIV-XVI asr boshlarida arxiv ishi.
6. "Maktuboti Temuriya" haqida ma'lumot bering.?
7. "Maktuboti Allomiy" haqida ma'lumot bering?
8. "Muraqqiyi Mir Alisher" to'plami haqida ma'lumot bering?

Mustaqil ta'lim uchun savol va topshiriqlar:

1. *Somoniylar va Qoraxoniylar davri vaqf hujjatlari.*
2. *XIV asr Buxoro vaqf hujjatlari tariximizni o'rganishning muhim manbasi.*
3. *Hujjatlarning kitobat tarixi to'g'risida nimalarni bilasiz?*
4. *Temur va Temuriylar davri siyosiy tarixini o'rganishda "Maktuboti Temuriya" muhim manba.*
5. *"Maktuboti Allomiy" to'plami O'rta Osiyo va Hindiston o'rtasidagi munosabatlar bo'yicha muhim manba sifatida.*

⁵⁶ Ushbu mavzu B.Ahmedov asari asosida yozilgan.

8-§. So‘nggi o‘rta asrlarda davlat devonxonalarida ish yuritish: Jo‘ybor xo‘jalari arxivi, Buxoro amirligi Qushbegi arxivi, Xiva va Qo‘qon xonliklari arxivlari

Darsning maqsadi: *So‘nggi o‘rta asrlarda O‘rta Osiyo xonliklarida davlat ish yuritilishi, jo‘ybor xo‘jalari va ularning siyosiy-iqtisodiy hayotda tutgan o‘rni, masalan;ing manbashunosligi, arxiv hujjatlari to‘g‘risida to‘liq tasavvur hosil qilish, hujjatlar bilan ishlash, ulardagi ma‘lumotlarni tahlil qilish.*

Tayanch iboralar: Jo‘ybor xo‘jalari, amirlik, xonlik, vasiqa, Buxoro, Qushbegi, Xiva, qozilik, P.P.Ivanov, Qo‘qon xonligi arxivi.

Mustaqillik davriga kelib, tarixni yangicha talqin, yangicha mu-shohada qilishga zarurat aniq va ravshan ko‘zga tashlanib qoldi. Prezident I.A.Karimovning bir guruh yetakchi tarixchilar va ijodkorlar bilan uchrashuvida bu narsa yanada ochiq bayon qilinib, mamlakati-mizda tarix fanini rivojlantirishning asosiy yo‘nalishlari belgilab berildi. Natijada, O‘rta Osiyo xalqlarining feodal davri tarixini, mada-niyatini, ijtimoiy-siyosiy hayotini yangicha nuqtai nazardan, haqqo-niy, tarixiylik, ilmiylik, xolislik tamoyillari asosida o‘rganish dolzarb masalaga aylandi. Bu holat avval bor qo‘lyozma manbalar, arxiv huj-jatlarini talqin qilish va ulardan ijtimoiy-iqtisodiy va madaniy hayotni o‘rganishda unumli foydalanish lozimligini belgiladi. O‘rta asrlar tarixini, ayniqsa, XVI-XVII asrlar ijtimoiy-iqtisodiy, ma‘naviy-siyosiy hayotini qo‘lyozma manbalarsiz o‘rganishni tasavvur etish mushkul. Shuni alohida ta’kidlamoq zarurki, Buxoro xonligining ijtimoiy-iqtisodiy, ma‘naviy-siyosiy hayotida jo‘ybor xo‘jalar alohida o‘rin tutgan. Movarounnahrda hukmronlik qilgan ikki sulola – shayboniylar va ashtarxoniylar davrida bu xonadon vakillari mamlakat ijtimoiy-siyosiy hayotiga katta ta’sir ko‘rsatdilar. Movarounnahrning ijtimoiy-siyosiy va ma‘naviy hayotida din namoyandalarining o‘rni beqiyos bo‘lgan, ular markaziy hokimiyatga o‘z ta’sirini o‘tkazib turgan.

Jo‘ybor xo‘jalari to‘g‘risidagi ma‘lumotlar bir qancha manbalarda uchraydi. Bular Hofiz Tanish Buxoriyning “Sharafnoma-yi shohiy” (“Abdullanoma” XVI asr), Badriddin Kashmiriyning “Ravzat ar-rizvon” (XVI asr), Abu Abbos Muhammad Tolibning “Matlab at-tolibin” (XVII asr), Muhammad Yusuf Munshiyning “Tarixi Muqimxoniy” (XVII asr), Mir Muhammad Amin Buxoriyning “Ubaydullanoma” (XVIII asr),

Abdurahmon Davlat Tolening “Tarixi Abulfayzxon” (XVIII asr), Muhammad Yoqubning “Gulshan ul-muluk” (XIX asr), Mulla Abdullatif Xo‘janing “Majmua” (XIX asr), Sayyid Muhammad Nasriddinning “Tuhfat az-zoirin” (XX asr boshlari) va boshqa asarlardir.

Shayboniylardan Abdullaxon (1557-1598)ga Movarounnahrni Buxoro atrofiga markazlashtirish va mamlakat yaxlitligini saqlab qolishda Jo‘ybor xo‘jalari yaqindan ko‘mak bergan. Mashhur sharqshunos tarixchilar jo‘ybor xo‘jalarining ijtimoiy-siyosiy hayotda tutgan o‘rni masalasiga bag‘ishlangan bir qancha tadqiqot ishlarini amalga oshirganlar. Masalan: Ye.E.Bertels (“Из архива шейхов джуйбари”, –М., –Л., 1938), P.P.Ivanov (“Хозяйство джуйберских шейхов”. –М., –Л., 1954), M.Y.Yo‘ldoshev (“Новые данные о хозяйстве джуйберских шейхов” //Jurnal ONU, 1963, № 5, 36-42 -b.), M.A.Abduraimov (“О малоизвестном источнике по истории аграрных отношений в Средней Азии XVI в. //Журнал “Народы Азии и Африки”-1968, № 3, -СС. 302-306”), L.Rahmonova (“Из истории хозяйство шейхов джуйбари. Автореф. дисс. канд.ист.наук” –Т.: Институт Востоковедения АН УзССР, 1969.), V.A.Ahmedov (“Роль джуйберских ходжей в общественно–политической жизни Средней Азии XVI-XVII веков.// Духовенство и политическая жизнь. Сборник статей. –М., 1985. 16-31 b.”), I.Saidahmedovlar («Письма шейбанидов – важный исторический источник. Автореф. на соис. канд.ист.наук. –Т.: 1994»).

Ye.E.Bertelsning asarida asosiy e‘tibor jo‘ybor xo‘jalarining xo‘jalik faoliyatiga qaratilgan. Asarda arxiv hujjatlarida o‘z aksini topgan xonadon vakillari tomonidan sotib olingan mulklar, do‘konlar, qishloqlar va hokazolar qayd etilgan. P.P.Ivanov o‘z asarida jo‘ybor xo‘jalari xonadonining ijtimoiy-iqtisodiy faoliyatini batafsil yoritadi. U Jo‘ybor xo‘jalarining uch vakili – Xo‘ja Islom (1493-1563), Xo‘ja Sa‘d (1531-1589) va Xo‘ja Tojiddinning (1574-1646) iqtisodiy-xo‘jalik faoliyati to‘g‘risida ma‘lumot beradi. P.P.Ivanov Xo‘ja Islomning Buxoro xoni Abdullaxonga bo‘lgan ta‘sirining moddiy va ma‘naviy sabablarini ochib berish jarayonida xonadonga tegishli yerlarning miqdori to‘g‘risida ma‘lumot beradi. Asarda Xo‘ja Sa‘d qaramog‘idagi yerlar va ularning hajmi, joylashgan o‘rni, yirik mulklarni boshqarish maqsadida Xo‘ja Sa‘d tomonidan joriy etilgan tizim to‘g‘risida xabar beriladi. P.P.Ivanov Xo‘ja Tojiddinning harbiy-feodal doiralarning Jo‘ybor xo‘jalari mulklariga daxl qilishga intilishiga qarshi chiqqanligini e‘tirof qiladi. Muallif

ashtarxoniy Ubaydullaxon (1702-1711) zamonida Jo'ybor xo'jalari davlat boshqaruvi ishlarida faol qatnashganligini alohida ta'kidlaydi. Jumladan, Jo'ybor xo'jalaridan Muhammad Boqi, Hoshim Xo'jalar shayxulislom lavozimini, Abulfayzxon (1711-1747) davrida Yaxyo Xo'ja shayx ul-islom lavozimini egallaganlar. Bundan tashqari Muhammad Rahimxon (1753-1758) hamda Amir Muzaffar (1860-1885) davrlarida Jo'ybor xo'jalari o'z ijtimoiy mavqelarini saqlab qolganligi P.P.Ivanov tomonidan eslatib o'tilgan edi⁵⁷.

Tarixchilar jo'ybor xo'jalari vaqf hujjatlari asosida ularning ijtimoiy-iqtisodiy hayotga ta'sirini o'rganishga alohida ahamiyat qaratdilar. Tadqiqotlarda vaqf hujjatlari chuqur tahlil qilinib jo'ybor xo'jalariga tegishli mulklarning umumiy tavsifi berildi. B.A.Ahmedov o'z tadqiqotlarida Jo'ybor xo'jalari xo'jaligi iqtisodiy poydevorining barpo etilishi, xo'jalarning shayboniy va ashtarxoniy xonlari, Hindiston, Qashg'ar, Eron hukmdorlari bilan munosabatlari, xonadon mulki yaxlitligini saqlab qolish maqsadida o'zaro quda-andachilik iplarini bog'lash kabi masalalarni batafsil yoritdi. B.Ahmedov "Ravzat ar-rizvon" asaridagi jo'ybor xo'jalariga yozilgan turli mavzudagi maktublarni, Abdullaxon farmonlarini birinchi bo'lib ilmiy muomalaga tortgan, jo'ybor xo'jalarining ijtimoiy-siyosiy hayotda tutgan o'rnini batafsil yoritgan. Badriddin Kashmiriyning "Ravzat ar-rizvon" asari orqali jo'ybor xo'jalarining ijtimoiy-siyosiy hayotdagi o'rnini ochib berish I.Saidahmedov tadqiqotining markazida turgan. U shayboniy-larning jo'ybor xo'jalariga yozgan ko'plab maktub va yorliqlarini tahlil qiladi va ularning ilmiy-ma'rifiy va tarixiy ahamiyatini ochib beradi.

So'nggi yillarda hukumatimiz tomonidan me'moriy yodgorliklarni o'rganishga katta ahamiyat berib kelinmoqda. Prezident I.A.Karimov 2003-yil 31-iyulda Buxoroda bo'lganida olimlar zimmasiga Chorbakr me'moriy yodgorligi va u bilan bevosita bog'liq ulug' zotlar tarixini ilmiy o'rganish, shu asosda alohida ilmiy to'plam tuzish, ilmiy ishlar yozish vazifasini yukladi⁵⁸.

Yuqorida ta'kidlab o'tganimizdek, Jo'ybor xo'jalari tarixini aks ettiruvchi qator asarlar mavjud. Shu asarlar qatorida Badriddin Kashmiriyning "Ravzat ar-rizvon" asaridir. Mazkur asar Jo'ybor xo'jalari ijtimoiy-siyosiy, ma'naviy, xo'jalik faoliyatini qamrab olgan daliliy

⁵⁷ Иванов П.П. Хозяйство джуйберских шейхов. –М., –Л., 1954, -С.82-83.

⁵⁸ "Xalq so'zi" gazetasi, 2003-yil 1-avgust.

materiallarga boy asardir. Muallif kashmirlik shoir va tarixchi Badridin Kashmiriy taxminan 1553- yilda Buxoroga kelib, shu davrda ma'naviy-siyosiy obro'yi ortib borayotgan Xo'ja Islomga murid tushadi. U dastlab Xo'ja Islomga, uning vafotidan so'ng Xo'ja Sa'dga xizmat qiladi, jo'ybor xo'jalarining shaxsiy kotibiga aylanadi. U xonadonga qilgan xizmatlari evqaziga Xo'ja Islom tarafidan 500 tanga, Xo'ja Sa'd tomonidan 500 tanga bilan mukofotlangan.

“Ravzat ar-rizvon” asarida Jo'ybor xo'jalari vakillaridan Xo'ja Islom va Xo'ja Sa'dlarning ijtimoiy-siyosiy va ma'naviy-ruhiy faoliyati to'g'risida qimmatli ma'lumotlar beriladi. Asar tarixiy voqealarga boyligi bilan ham ajralib turadi. Tarixiy voqealar muallifning o'zi guvohi bo'lgan, o'zi ko'rgan, eshitgan ma'lumotlari asosida yozilgan. Asarda Ubaydulloxon (1533-1539) vafotidan so'ng yuz bergan siyosiy vaziyat, Buxoroning Turkiston va Samarqand sultonlari tomonidan qamal etilishi va muzokara yo'li bilan sulhga erishish kabi masalalar bayon etilgan. “Ravzat ar-rizvon”da shayboniy sultonlar o'rtasidagi o'zaro munosabat, XVI asr o'rtalarida Buxoro taxtini egallash masalasidagi o'zaro tortishuvlar, shayboniy sultonlar o'rtasidagi ixtiloflarga Xo'ja Islomning aralashuvi va bu aralashuvlarning aksariyat hollarda ijobiy natija bilan yakun topishi to'g'risida qimmatli ma'lumotlar uchraydi.

Ma'lumki, tarix darsliklarida Abdullaxonning Buxoro taxtini egallashida Jo'ybor xo'jalarining alohida o'rni borligi ta'kidlangan. “Ravzat ar-rizvon”da Buxoro taxtining Abdullaxon tomonidan egallanishi, Xo'ja Islom tomonidan Abdullaxonning qo'llab-quvvatlanishi haqida muhim ma'lumotlar beriladi. Asarda keltirilishicha, Xo'ja Islom Marvda bo'lgan paytida Mirzo Valijon degan shaxs Abdullaxon bilan Xo'ja Islom o'rtasida vositachilik qilgan. Abdullaxonning Buxoroni birinchi bor egallagani to'g'risidagi xabarni ham Mirzo Valijon Xo'ja Islomga yetkazadi va uni Buxoroga kelishga da'vat etadi.

Xusayn as-Saraxsiyning “Manoqibi sa'diya” asarida XVI asr ijtimoiy-ma'naviy, ayniqsa, jo'ybor xo'jalarining yirik vakili Xo'ja Islomning ijtimoiy-ma'naviy hayotdagi faoliyati to'g'risida ko'plab ma'lumotlar mavjud. Asarning qo'lyozma nusxasi O'zRFA Sharqshunoslik institutida 1439 raqam ostida saqlanadi. B.A.Ahmedov Balx xonligi tarixini o'rganishda asardan unumli foydalangan. Asar muqaddima va olti bobdan iborat. Asar Xo'jagon tariqati, Xo'ja Islomning ajdodlari, uning shajarasi, Xo'ja Islomning tavallud topishi, bolalik yillari, Xo'ja Islomning qozoqlar yurtiga safari, Xo'ja Islom hayoti-

ning intihosi va uning farzandlari to'g'risida yozilgan. Asarni o'rganish orqali Xo'ja Islomning ijtimoiy-siyosiy va ma'naviy hayotda tutgan o'rni, mavqei, shayboniy sultonlari bilan munosabati, Naqshbandiya tariqati shayxi sifatidagi ma'naviy-ruhiy faoliyati, ahloqiy kamolot pog'onalarini zabt etishdagi sa'y-harakatlari, XVI asrning ikkinchi yarmida Movarounnahrda siyosiy vaziyat to'g'risida ma'lumotga ega bo'lish mumkin.

“Jo'ybor xo'jalarining arxivi” XVI asrga doir, Buxoro xonligining ijtimoiy-iqtisodiy va siyosiy hayotini o'rganishda katta ahamiyatga ega bo'lgan hujjatlar to'plamidir⁵⁹. Aniqrog'i, yirik yer-suv va mol-mulk egasi bo'lgan Xo'ja Muhammad Islom va Xo'ja Sa'd (ko'pincha Xo'ja Kalon nomi bilan mashhur)laning katta yerlari va xo'jaligi va uning jamiyatda egallagan o'rni va ro'lini ko'rsatib beruvchi hujjatlar to'plami hisoblanadi. To'plamga kirgan hujjatlarning forsha matni, rus tarjimasi bilan qo'shib, O'zbekiston tarixining katta bilimdonlaridan P.P.Ivanov (1893-1942)ning tadqiqotlari bilan 1938-1954-yillarda ikki jild qilib Sankt-Peterburgda nashr qilingan.

To'plam Jo'yboriy xo'jalardan Xo'ja Sa'd (1531/32-1589)ning mol-mulkiga oid 288 hujjatni (yer-suv, do'kon, hammom, karvonsaroy, tegirmon, oshxona va boshqa daromad keltiruvchi mulkning oldisottisiga oid vasiqalar) o'z ichiga oladi.

Ma'lumki, Jo'ybor xo'jalari o'z davrida katta mol-mulkka ega bo'lgan boy-badavlat kishilardan edilar. Masalan;, Xo'ja Muhammad Sa'dning 2 ming juft gov (100 ming tanob) yeri, 25 ming qo'yi, 1000 bosh tuyasi, 1,5 ming oti, yirik shaharlarda ko'pdan-ko'p do'konlari, timlari, tegirmon, hammom, moyjuvoz va boshqa turdagi ishlab chiqarish va savdo korxonalari bo'lgan. Shunga yarasha daromadi ham katta bo'lgan.

“Matlab ut-tolibin”da aytishicha, hazrat eshonning yillik daromadi 1 million 600 ming tangaga barobar bo'lgan. Xo'ja Kalonning mol-mulki, otasidan qolgan mol-mulk xonlar va boy-badavlat odamlarning xayriehsonlari, shuningdek, olingan (zarxarid) mulkdan tashkil topgan.

Quyida nomi qayd etilgan “Joybor xo'jalarining arxivi”dan ba'zi hujjatlarni tarjima qilib keltiramiz.

⁵⁹ Ahmedov B. O'zbekiston tarixi manbalari. (Qadimgi zamon va o'rta asrlar). –T.: O'qituvchi, 2001. Keyingi o'rinlarda ushbu asarda tarjima qilib keltirilgan vaqfnomalardan namunalar beriladi.

VASIQA

Hijriy 973-yil rajab oyining 22-kuni (1566-yil 14-fevral)da amirzoda Mirza Muhammad Sharif marhum Muhammad Latif Mirak o'g'li o'z mulkini qonun bo'yicha idora etishga haq-huquqli bo'lgani uchun qonun-qoida bo'yicha mana bu arzni bayon qildi: "Eski qal'a tashqarisida, Puli sarrafon yonida, mulla Ashraf masjidi ko'chasida joylashgan...do'konimni, do'koncha va yonidagi oshxonasi bilan qo'shib, shuningdek u bilan tutash bo'lgan yerimni undagi binolar va narsalar bilan qo'shib, uzil-kesil va qonun-qoida bilan xo'ja Kalonxo'ja xo'ja Muhammad Islom o'g'illariga sof kumushdan zarb qilingan 160 tanga badaliga sotdim.

Ushbu mulk g'arb tomondan marhum xo'ja Yusuf Ali sabboh (bo'yoqchi) ustod Sadridin Sabboh o'g'liga tegishli do'konga shimol tarafdin shahar nahriga, janubda bozor yonidan o'tadigan katta jamoat yo'liga tutashgandir.

(Mazkur) vasiqa quyidagi guvohlar ishtirokida tuzildi:

Mavlono Sodiq;

Ustod Turdi me'mor;

Xofiz Paxsa;

Mir Qalandar;

Mavlono Abdulvohid;

Mavlono Husaynning birodari sayyid Muhammad;

Muhammad Latif Hofiz Paxsa o'g'li;

Shayx Xasan Qorako'liy⁶⁰

VASIQA

Hijriy 960-yil shavvol oyining 19-kuni (1553-yil 29-sentabr).

Xo'ja Mir Hoshim Malik Buxoriy o'g'li, o'ziga qarashli mulkni qonuniy ravishda tasarruf etishga haq-huquqli bo'lgani uchun, o'z ixtiyori bilan va qonuniy ravishda quyidagi arzni bayon qildi: "O'zimga tegishli bo'lgan va Buxoroning eski qal'asi tashqarisida, marhum Abdulazizxon masjidi yonida joylashgan, otxonasi va somonxonasi, tosh va yog'och asboblari bo'lgan tegirmonimni xo'ja Muhammad Islom xo'ja Ahmad o'g'illariga sof kumushdan zarb qilingan vazni bir misqollik 170 kumush tangaga sotdim.

⁶⁰ Аҳмедов Б. Ўзбекистон тарихи манбалари. –Б.79-80.

{Ushbu} mulk g‘arb tarafdan {nomi yuqorida zikr etilgan} xaridorning uyi bilan sharq tarafdan naxr bo‘yi va janub tarafdan Mir Toyiyxo‘ja Malik o‘g‘lining hovlisi bilan tutashdir.

Guvohlar: Xo‘ja Sayid Hasan, Mir Muhtasib, Mavlono Ali imom, Mir Tayyib⁶¹.

VASIQA

Hijriy 966-yil zulqa‘da oyining 21-kuni (1559-yil 25-sentabr)da xo‘ja Zinda Ali Arbob xo‘ja Yusuf o‘g‘li...o‘ziga tegishli mol-mulk xususida qonuniy tarzda va quyidagi mazmunda arz qildi: “Buxoroning Eski qal‘asi tashqarisida, mahsidzlar bozorida, qalqon yasovchilar timida joylashgan to‘rt nafar do‘konimni, uzil-kesil va qat‘iy savdo bilan xo‘ja Muhammad Islom xo‘ja Ahmad o‘g‘liga sof kumushdan zarb etilgan 120 tangaga uzil-kesil savdo bilan sotdim.

Uning bir tarafi mamlakayi podshohiyga⁶², ikkinchi tarafi shahar xandaqiga⁶³, uchinchi tarafi nomi zikr etilgan olg‘uvchiga tegishli tegirmonning ayvoniga tutashdir. Do‘konga kirish yo‘li ham o‘sha tarafdan.

{Ushbu vasiqa} quyidagi odamlar ishtirokida tuzildi:

Jo‘ra Muhammad xo‘ja Kalon shayx o‘g‘li;

Abdulmuhammad;

Muhammad Amin Abdi Kalonxo‘ja o‘g‘li;

Mir Fazlulla;

Mavlono Mahmud xatib Kalotiy⁶⁴.

VASIQA

Hijriy 966-yil shavval oyining 20-kuni (1559-yil 27-iyul)da mol-mulkini tasarruf qilishga haq-huquqli bo‘lgan Nasaf xotin shayx Muhammad qizi, o‘z ixtiyori bilan, {quyidagi} qonuniy va rad qilib bo‘lmaydigan arzini bayon qildi: “Buxoroning Eski qal‘asi tashqarisida, Gavkashon ko‘prigi yonida joylashgan o‘zimga tegishli hovli-joyimni, dahlizi va 32 gazli sahni va ichidagi barcha narsalari bilan qo‘shib, xo‘ja

⁶¹ O‘sha asar. –Б.78-79.

⁶² Mamlaki podshohiy – podshoh (xon) devoniga tegishli yer-suv.

⁶³ Xandak – qal‘a devori tashqarisiga qazib suv to‘latib qo‘yilgan zavur; maxsus mudofaa inshooti.

⁶⁴ Аҳмедов Б. Ўзбекистон тарихи манбалари. –Б.79-80.

Muhammad Qomixo'ja xo'ja Muhammad Islom o'g'liga, uzil-kesil savdo bilan qonuniy narxda har biri bir misqol vazndagi 160 tangaga sotdim.

Mazkur uy shimol tarafdin marhum Mavlono Umar Buxoriydan qolgan uy bilan, sharq tarafi naxr bo'yi va janub tarafdin Mir Tayyibxo'ja uyi bilan tutash...

Guvohlik berdilar: Mavlono Yor Aziz, Mavlono Sulton Aziz qog'ozfurush, Do'st me'mor⁶⁵.

VASIQA

Hijriy 967-yil rajab oyining 4-kuni (1560-yil 2-aprel kuni)da Mirza Muqimning o'g'li Mirza aka o'z nomi va otasi nomidan o'ziga tegishli mulkni tasarruf qilishga haq-huquqli bo'lgani uchun, qonun asosida, quyidagilarni arz qildi: "O'z ixtiyorim va (menga) berilagn ishonchnoma asosida, uzil-kesil va buzish mumkin bo'lmagan savdo bilan Buxoroning Rudi shahar tumanida, Qishloqi arus degan joyda joylashgan bir bo'lak o'zimga tegishli va (bir bo'lak) otamga tegishli ekin eksa bo'ladigan yerni xo'ja Sa'd xo'ja Muhammad Islom o'g'liga sof kumushdan zarb qilingan 500 kumush tangaga sotdim.

Savdo-sotiq ishonchli kishilar ishtirokida amalga oshirildi."⁶⁶

VASIQA

Hijriy 968- yil zulqa'da oyining 12-kuni (1561- yil 26- iyul kuni) Mirza Muhammadyor xo'ja al-haramayn Xudoyor o'g'li, qonun bo'yi-cha, o'z mulkini tasarruf qilishga haq-huquqli bo'lgani holda o'z ixtiyori bilan quyidagi yo'sinda arz qildi: "Buxoroning Ko'hna qal'asi tashqarsida, G'aznon mahallasida joylashgan merosiy yerimni uchta uyi, dahlizi, ikkita boloxonasi bilan qo'shib, xo'ja Sa'd xo'ja Muhammad Islom o'g'liga uzil-kesil, qonuniy, buzib bo'lmas savdo bilan, sof kumushdan zarb qilingan bir misqollik 160 tangaga sotdim.

Ushbu mulk g'arb tarafdin (nomi yuqorida tilga olingan) xaridorning uyiga shimol va sharq tarafdin katta jamoa yo'liga va yana bir tarafi Og'ajon kavshdo'z sabboning, qisman Jon Muhammad dehqonning uylari bilan tutash.

Guvohlar: Mavlono Boboquli, Mavlono Sayfiddin, Mavlono Muso, Mavlono Ali"⁶⁷.

⁶⁵ O'sha asar. –B. 80.

⁶⁶ Аҳмедов Б. Ўзбекистон тарихи манбалари. –Б.80-81.

Turli fondlardan yig'ib olingan hujjatlar. O'zbekiston Respublikasi Fanlar Akademiyasi Sharqshunoslik instituti qo'lyozmalar fondida, O'zbekiston Respublikasi Markaziy tarix arxivida, Buxoro o'lkashunoslik muzeyi va Abu Ali Ibn Sino nomidagi Buxoro kutubxonasida saqlanayotgan hujjatlar: farmonlar, hukmnomalar, inoyatnomalar, vasiqalar, oldi-sotdi haqidagi hujjatlar va ajrimlardan iborat hujjatlarni yuqorida nomi tilga olingan O.D.Chexovich tarafidan 51 nafarini tanlab olingan va rus tiliga tarjima qilib, matni bilan qo'shib, 1954-yili "Документы к истории аграрных отношений в Бухарском ханстве XVII-XIX вв." nomi bilan alohida kitob qilib chop etilgan.

Kitobda keltirilgan hujjatlar ashtarxoniy hukmdorlardan Imomqulixon (1611-1642) bilan Ubaydullaxon II (1702-1711), mang'it amirlaridan Haydar, Amir Muzaffar va Nasrullaxonlarning farmonlari (hukmnomalari) XVII asrda o'tgan yirik yer va mulk egalari bo'lmish Yalangto'shibiy, Olloyor devonbegi, Odina Muhmmadjonlarga tegishlidir.

Hujjatlar yer-suvni soliqlar va jarimalardan ozod qilish, yerni sotish, garovga qo'yish (vasiqai joiz), yerni sotib olish va uni imtiyozli mulkka aylantirish (vasiqai mubodila), yerni in'om qilish (vasiqai baxshish), tanhoh, mulkni ijaraga berish (vasiqai ijara), ma'lumot yetkazish (ariza) va boshqa masalalar haqidadir. Ularning alohida xiroj olinadigan va davlat yerlarini mulki hurri-xolisga aylantirish ya'ni soliqlardan xolis etish hollari ham uchraydi.

XVII-XIX asrlarda "Buxoro xonligidagi agrar munosabatlar tarixiga doir hujjatlar" deb atalgan ushbu to'plam o'sha davrdagi ijtimoiy-iqtisodiy tarixini o'rganishda muhim manba vazifasini o'taydi.

Quyida mazkur to'plamdan misollar keltiramiz.

U (XUDO) G'ANIYDIR!

ABULG'OZI IMOMQULI BAHODIRXON SO'ZIMIZ!

Baxtiyor birodorlar, saodatli farzandlar, zuliqtidor⁶⁸ amirlar, kifoyat asar vazirlar, Samarqand viloyatining ayonlari, arboblari va kalontorlari⁶⁹ bilsinlarki, shu kunlarda baxtiyor hoqonning arziga yetdikim, amirlar suyanchig'i, Yalanto'shibiyning zikr etilgan viloyatning (Samarqandning – B.A.) tumanlarida sotib olingan yerlari bor. Shariat

⁶⁷ O'sha asar. –B. 81.

⁶⁸ Zuliqtidor – iqtidor (kuch qudrat) egasi.

⁶⁹ Kalontor – qishloq, daha oqsoqoli.

qoidalariga ko‘ra uning bir qismini davlat hisobiga o‘tkazganlar, ikki qismini esa mulki xurri xolisga⁷⁰ aylantirgan va bu haqda uning qonuniy hujjati (cheki) bor. Binobarin, biz mazkur amlokni⁷¹, yuqorida tilga olingan hujjatlarga asosan, unga inoyat qildik.

Mazkur amlokni uning mulki xurri xolis deb hisoblasinlar va hech kim unga daxl qilmasin, undan biron narsa talab qilmasin. Moli jihat, ixrojt⁷² va boshqa oliq-soliq talab qilmasin⁷³.

U (XUDO), YaGONADIR!

Hukmi oliy sodir bo‘ldiki, Tobon degan yerdagi lahyak yer Muhammad Zamon xo‘janing mulki va o‘g‘li Changakning meros mulki bo‘lganligi, shu kunlarda Chakchak vafot etganligini e‘tiborga olib, yuqorida zikr etilgan yerni yuqorida ismi sharifi tilga olingan shaxsga (Muhammad Zamon xo‘jaga – B.A.) in‘om qildik.

Devon xizmatchilari ushbu yerni daftarga, Muhammad Zamon xo‘ja nomiga yozib qo‘ysinlar va mazkur inoyatnomaga hurmatsizlik qilmasinlar.

Imomquli Bahodirxon
Hijriy 1036 yil⁷⁴

(HUKMNOMA)

Hu, Olloh al-musta‘in!

Abulmuzaffar va-l-Mansur Ubaydulla Baxodirxon so‘zimiz!

Buxoroning Poyariq (tumani) hokimlari, omillari⁷⁵, kadxudolari⁷⁶, ellikboshilari, o‘nboshilari shuningdek Shohmuhammad qishlog‘ining kadxudolariga ma‘lum bo‘lsinki, Rabotag qishlog‘idagi 46 tanob yer mulla Mir Shofe‘ga taalluqli ekanligi haqida berilgan sha‘riy chekka asosan uch qismga bo‘lingan edi. Shu kunlarda u vafot etgan. (Shuning uchun) mazkur yerlar meros sifatida uning o‘g‘li O‘zbekxo‘jaga

⁷⁰ Mulki xurri xolis – soliq va boshqa to‘lovlardan ozod etilgan yer-suv.

⁷¹ Amlok – mulkning ko‘pligi, nufuzli va boy-badavlat shaxs qo‘lida to‘plangan katta yer-suv. Bir qismi alohida xizmatlari uchun hukumat tarafidan in‘om qilingan bo‘lishi ham mumkin.

⁷² Ixrojt – saroyning kundalik xarajatlari uchun raiyatdan to‘planadigan maxsus yig‘im.

⁷³ Axmedov B. Ўзбекистон тарихи манбалари.

⁷⁴ Axmedov B. Ўзбекистон тарихи манбалари. –Б.87-88.

⁷⁵ Omil – qishloq oqsoqoli.

⁷⁶ Kadxudo – oila boshlig‘i.

taalluqli deb topilgan va uning tarafidan tasarruf qilinmoqda va hamma soliqlardan ozod etilgan. Shuning uchun biron vajah bilan dirham, yoki dinor to'lamagan.

Shu sababdan buyuramiz. Ushbu yerlarni qadimdan mulki xurri xolis hisoblab, undan tanobana, avarizot va boshqa oliq-soliq talab qilinmasin. Aytilganlardan tashqariga chiqilmasinlar va undan yangi hujjat talab qilmasinlar⁷⁷.

U, OLLOH!

(Hijriy) 1131- yil safar oyining (1718- yil dekabr oyining...) oliyjanob va shuhrat topgan Yormuhammad qorovulbegi marhum Tilovbiy o'g'li mana bu e'tiborli (hujjat)ni taqdim etdi:

“Unda bunday deyilgan: Kesh viloyatiga qarashli Ulug' o'g'il degan joydagi davlatga qarashli yobisalarni⁷⁸ o'z ichiga olgan yerlarni, bu yerlar g'arb tomondan qisman qora batqoq bilan va qisman Tug'i degan yer bilan, shimol tarafdan Qashqadaryo bilan, sharq tarafdan qisman Xosiyor va qisman Balxiyon bilan, janub tarafdan Xo'jakent bilan tutash, (oralaridagi) masofa har tarafdan aniqlangan yobisa yerlarni yobisa sifatida oliyjanob, g'oziylik rutbasi bilan sharaflagan va Olloh tarafidan mag'firatlangan G'ozii Chuxra oqosi⁷⁹ Sher chuxro oqosi o'g'liga, u yerdagi barcha chorpolar⁸⁰ va uch g'aram qilingan bichan bilan, uning mulki deb hisoblanadi.

Bundan buyon ushbu yobisaga bizning dahlimiz yo'qdir. O'sha kuni va o'shal soatda buni yuqorida tilga olingan G'ozii chuxra oqosi ham ishonchli guvohlar huzurida tasdiqladi.

Ushbu kelishuvda ishtirok etgan guvohlar:

Oliyjanob oxund mulla Muhammad o'g'li;

Qodirberdi udaychi⁸¹;

Tursunxo'ja sadr⁸²;

Mirza Abdulla chuhra boshi;

Niyoz arbob va b.q. Hammasi 16 kishi⁸³.

⁷⁷ Аҳмедов Б. О'sha asar. –Б. 88.

⁷⁸ Yobisa – qo'riq yer.

⁷⁹ Chuhra oqosi – xon qo'riqchilari boshlig'i.

⁸⁰ Chorpo – to'rt oyoqli jonvorlar

⁸¹ Udaychi – urush paytida navkar va qo'shinning to'g'ri taqsimlanishi bilan shug'ullangan

⁸² Sadr – Buxoroi sharifning ichkari qismida joylashgan vaqflarning hisob-kitobi bilavn shug'ullanuvchi mansabdor.

HU, OLLOH AL-MUSTA'ON!
Abulmuzaffar va-l-Mansur sayyid Ubaydulla Bahodirxon
so'zimiz!

Buxoroga qarashli Poyirud (tumani)ning hokimlari, a'mollari, arboblari, kadxudolari, elliboshilari va o'nboshilari hamda Shohmammad qishlog'ining kadxudolari bilsinlarki, Rabotak qishlog'idagi qonuniy hujjat asosida qadimdan mulki hurri xolisga aylantirilgan 46 tanob yer eshonimiz mulla Mir Shofe'ga tegishli bo'lgan. U hozir vafot etgan. Bu yer meros tariqasida uning o'g'li O'zbekxo'jaga o'tgan. U hozirda shu yerga egalik qiladi va soliqlardan ozod qilingan, biron dirham yoki dinor to'lamaydi.

Shu vajdan buyuraman. Bu yerlar bundan keyin ham mulki xurri-xolis va soliqlardan ozod etilgan deb hisoblansin; tanobona, avarizod, taklifot va qora xat hamda mardikor berish majburiyatlari xususida undan biron dirham yoki dinor talab qilmasinlar. Bundan buyon bu yerlarda karvon to'xtamasin. Farmonni buzmasinlar va har yili yangi hujjat talab qilmasinlar⁸⁴.

AMIR NASRULLO⁸⁵ HUKMNOMASI

Hukmi oliy sodir bo'ldiki, Qorako'l viloyatidagi Ziyorat arig'i bo'ylarida joylashgan va Abdurahim mirobga tegishli taxminan 100 tanobdan iborat daxyak yer yuqorida ismi-sharifi zikr etilgan Abduraxim murobga tegishli deb bilsinlar va oliy hukmga binoan uning mulki del bilsinlar. Soliq yig'uvchilar va dorug'alar⁸⁶ unga daxl qilmasinlar va oliq-soliq xususida aralashmasinlar; mazkur oliy hukm asosida ish yuritsinlar.

*Hijriy 1212 yil xzuhlajja oyida
(1798- yilning may oyida yozildi.)⁸⁷*

(IJARA AKTI)

Ushbu hodisa hijriy zulqa'da oyida (1856- yil iyul oyida) sodir bo'ldi. Buxoroning Somjin tumanida Hokim mullo Mirza degan joy-

⁸³ Аҳмедов Б. Ўзбекистон тарихи манбалари. –Б.89-90.

⁸⁴ Аҳмедов Б. Ўзбекистон тарихи манбалари. –Б. 90.

⁸⁵ Amir Nasrullo – mang'hitlar sulolasidan chiqqan hukmdor (1826-1860).

⁸⁶ Dorug'a – shaharning harbiy boshlig'i

⁸⁷ Аҳмедов Б. О'sha asar. –Б. 91.

dagi va mulla Mir xanoqosiga vaqf qilingan Muhammad Yusuf hoji mahramga yozilgan taxminan 5 tanob dahyaki yerning oʻndan bir qismiga beriladigan daromaddan ajratib mulla Abdurahim mullo Abdurahmon oʻgʻliga (bir yil muddatga) ijaraga berildi.

Mazkur hujjat quyidagi guvohlar ishtirokida tuzildi: Mulla Avaz, Boqiyxoʻja, Arbob Abduzohir, Arbob Yoʻldosh, Oллоhberdiboy, Hojiboy, Hakimboy va boshqalar⁸⁸.

Buxoro amirligi Qushbegi arxivi

Oʻtmish ajdodlardan qolgan tarixiy yozma manbalar qatoridan haqli ravishda oʻrin olgan hujjatlardan biri Buxoro amiri Qushbegi arxiv hujjatlaridir. Ushbu arxiv hujjatlari XIX asr uchinchi choragi – XX asr boshlarida Buxoro amirligi tarixini oʻrganish uchun qimmatli manba boʻlib xizmat qiladi.

Oʻtgan asrning 30-yillarigacha Buxoro amiri Qushbegi arxivi mavjudligi fanga nomaʼlum edi. 1931-yilda Buxoro arkining yertoʻlasidan tartibsiz yotgan arab grafikasida tojik tilida yozilgan hujjatlar topilgan. Arxivning bir qismi, Buxoro-Rossiya diplomatik va savdo munosabatlariga doir qismi oʻsha vaqtda Moskvadagi “Qadimgi hujjatlar Markaziy Davlat arxivi”ga, yana bir qismi “Oʻzbekiston markaziy Davlat tarix arxivi”ga topshirilgan. Moskvada saqlanayotgan hujjatlar Buxoro, Xiva va Balx xonliklarining Rossiya, Hindiston va boshqa mamlakatlar bilan boʻlgan siyosiy va iqtisodiy aloqalari tarixini oʻrganishda muhim ahamiyat kasb etadi.

Mazkur qushbegi arxivi hozirda Oʻzbekiston Respublikasi Markaziy Davlat arxivining tarixiy fondida (№ I-126) saqlanadi. Fondning 2 ta roʻyxati boʻlib, 1- roʻyxatda 2008 ta, 2- roʻyxatda 7437 ta saqlov birligidagi hujjatlar mavjud. Ushbu arxiv xonlikning ijtimoiy-siyosiy tarixi, iqtisodiyoti va boshqa masalalarni oʻrganishda muhim manba roʻlini oʻynaydi. Lekin bu fond hali yaxshi oʻrganilmagan. Fondning ayrim hujjatlaridan P.P.Ivanov, A.A.Semyonov, M.A.Abduraimov, K.M.Mirzoyev va Halim Toʻraev foydalanganlar. Hozirda Qushbegi arxivining A.Muhammadjonov tayyorlagan nashri Buxoro amirligining maʼmuriy hududiy tuzilishi haqida muhim maʼlumotlarni oʻzida jamlagan. Shu nashr asosida M.Abduvahobova maxsus risola chop ettirdi. Unda amirlik tarixiy toponimikasi boʻyicha qiziqarli maʼlumotlar tahlil etilgan.

⁸⁸ Аҳмедов Б. Оʻsha asar. –Б. 91.

Mazkur Qushbegi arxiv hujjatlarining 1931 yilda topilishi “O‘rta Osiyoda hech qanday arxiv bo‘lmagan” deyilgan da’volarga o‘rin qoldirmadi. Ayniqsa, 1930-yildan keyin Xiva va Qo‘qon xonligi arxivlarining ochilishi O‘rta Osiyo xonliklarida XIX-XX asr boshlaridagi davlatchilik tarixida muhim voqea bo‘ldi. Ushbu arxiv hujjatlari xonliklar tarixidagi ayrim voqealarga aniqlik kiritish, ma’lumotlarni to‘ldirish imkoniyatini tug‘dirdi.

Arxiv hujjatlarining tarkibi har xil hujjatlardan iborat bo‘lib, ular orasida turli mulkiy munosabatlar, huquqiy masalalar, ijtimoiy, ma’naviy sohalarga oid minglab hujjatlar bor. Bularning hammasi birgalikda ijtimoiy-iqtisodiy, madaniy-maishiy tarix, ichki ma’muriy boshqaruv tizimi kabi qator tarixiy muammolarni yaxlit hal qilishga xizmat qiladi. Qushbegi arxivida Buxoro amirligining ijtimoiy, iqtisodiy va madaniy hayoti va tarixiy geografiyasi to‘g‘risida boy daliliy materiallar mavjud. Qushbegi arxivi sohalar bo‘yicha turli tarixiy muammolarni – aholi demografiyasi, soliq tizimi, etnik joylashuvi, etnik tarkibi, ma’muriy tizim tarixi va shu kabi boshqa masalalarni hal qilish uchun qimmatli ma’lumotlar beradi. Mamlakatimiz tarixini to‘laqonli o‘rganishda manbaviy asos bo‘lib xizmat qiladigan Qushbegi arxiv hujjatlarining ro‘li nihoyatda muhimdir. Tariximizning hujjatli yodgorliklarining ahamiyati shu qadar muhimki, O‘zbekiston Respublikasi Oliy Majlisining 1999 yildagi XIV sessiyasida “Arxivlar to‘g‘risida”gi Qonunda bu o‘z aksini topdi. Bu qonunda arxivlarning ahamiyati alohida e’tirof etildi. Qonun ijtimoiy fanlarni rivojlantirishda arxiv hujjatlaridan foydalanishni yanada jadallashtirdi.

1999 yildagi Oliy Majlisning XIV sessiyasida O‘zbekiston Birinchi Prezidenti I.A.Karimov chet el fondlarida saqlanayotgan minglab arxiv hujjatlarini O‘zbekistonga qaytarish zarurati to‘g‘risida gapirdi.

“Buxoro amirligi Qushbegi” fondi daliliy materiallarga boy hujjatlar to‘plamidan iborat. Bu fond materiallari hali to‘liq o‘rganilgan emas. Uning ayrim hujjatlaridan A.R.Muhammadjonov o‘zining Buxoro amirligidagi aholi punktlari kitobini yozishda foydalangan. Muallif kitobda o‘nlab viloyatlar, tumanlar, amloklar, mavzelar, bekliklar, qishloqlar haqida ma’lumotlar beradi. Ro‘yxatlarda ko‘p hollarda nafaqat joylarning geografik nomlari, hatto aholi tarkibi, unga qarashli bo‘lgan chorva mollari to‘g‘risida, hududda istiqomat qiluvchi qabilalar to‘g‘risida ma’lumotlar berilgan. Mazkur fondagi hujjatlarda

Buxoro amirligiga qarashli mulklardagi ijtimoiy, iqtisodiy, madaniy hayot, etnografik ma'lumotlar berilgan. Shuning uchun Buxoro amiri Qushbegi arxivi nafaqat O'zbekiston tarixi, balki Tojikiston va Turkmaniston aholisi tarixi to'g'risida ham qimmatli ma'lumotlarga boy fond hisoblanadi. Chunki Buxoro amirligi hududi hozirgi O'zbekiston, Tojikiston va qisman Turkmaniston hududlarini qamrab olgan edi. Buxoro amirligi tarixini o'rganishda arxiv hujjatlarida uchragan joy nomlarining ba'zilar hozirgi kunlarda ham ba'zan to'liq, yoki qisman o'zgargan formada saqlanib qolganligini kuzatishimiz mumkin. Hujjatlar uzoq yillar davomida til sohasidagi sodir bo'lgan o'zgarishlarni ham kuzatishlari mumkin. Hujjatlar Buxoro amirligi aholisining etnik tarkibini o'rganishda ham qo'l keladi. Ammo, turli xil tillarning bir hududda amal qilinishi natijasida ularning aralashib ketishi oqibatida aholining etnik tarkibini o'rganishda ba'zi qiyinchiliklarni tug'dirishini ham ta'kidlab o'tmoq zarur. Shuning uchun jug'rofik nomlarni tilshunoslik va tarixiylik nuqtai nazaridan ham ilmiy tahlil qilish lozimdir.

Ma'lumki, 1868-yilda Buxoro amirligining Ziyoddingacha bo'lgan qismi Rossiya imperiyasi tomonidan bosib olingan. 1873-yilda tuzilgan shartnomaga binoan Buxoro amirligi Rossiyaning vassaliga aylangan. Rossiya albatta Buxoroda o'zining boshqaruv tizimini – viloyat, tuman, qishloq, guzar va boshqa ma'muriy pog'onalami joriy qildi. Rossiya imperiyasi Buxoro amirligini yanada ko'proq va har tomonlama tobe' qilish yo'llarini izladi. Shulardan biri XX asr boshlarida Rossiya tomonidan Buxoro amirligining aholi resurslarini, xo'jalik iqtisodiy salohiyatini imkon qadar chuqurroq o'rganishga qaratilgan sa'y-harakati edi.

Buxorodagi Rossiya siyosiy agentligi amirlikdagi mamlakat aholisi ijtimoiy-iqtisodiy salohiyatini va ma'muriy tizimini o'rganishga yo'naltirilgan ma'lumotlarni to'plashga kirishdi. Unga binoan 1914-1915-yillarda Buxoro amirligining Qushbegi mahkamasi tomonidan barcha viloyatlar, tumanlar, qishloqlar, guzarlar, rabotlar, mavzelar, daha va boshqalar batafsil ro'yxatga olinib, agentlikka taqdim qilingan. Shunday qilib, Buxoro amirligidagi Rossiya siyosiy agentligida boshqaruv jarayoni uchun zarur bo'lgan muhim statistik axborot tizimi yaratilgan. Qushbegi mahkamasi tomonidan taqdim qilingan ushbu ro'yxat bugungi kunda o'ta noyob tarixiy manba sifatida baholanadi. Ushbu Qushbegi arxiv hujjatlarining topilishiga kelsa, 1931-yilda Buxoro muzeyi xodimlari tomonidan Ark yerto'lasidan "Qushbegi arxivi xazinasini" topilgan. Xazina 1933-yilda Toshkentga, Respublika Markaziy arxiviga olib

kelingan. 1964 va 1968-yillarda shu hujjatlarning qisqa ilmiy tavsif kitoblari qo‘lyozma shaklida tuzilgan.

“Qushbegi arxivi”ning oxirgi tavsif kitobiga ko‘ra, fondagi yuz mingdan ortiq hujjatlar 2656 ta papkaga joylashtirilib, mazmuniga ko‘ra o‘n bir guruhga ajratilgan. Ular:

- ma‘muriy
- siyosiy
- tashqi aloqalar
- iqtisodiy
- sud
- harbiy
- madaniyat va urf-odat
- sog‘liqni saqlash
- oqartuv va din
- turli masalalar hamda
- daftar va jurnallar bo‘limlari tartib raqamlar bilan keltirilgan.

Birinchi guruhdagi hujjatlar 9 mingga yaqin va ular 238 ta papkaga joylashtirilgan. Ular Buxoro davlat tizimi, ma‘muriy bo‘linishi, XIX va XX asr boshlarida faoliyat ko‘rsatgan idora va mansablar ko‘rsatkichlari, nazorat-boshqaruv usullarini qamrab olgan ma‘lumotlardan iborat.

Ikkinchi bo‘limdagi manbalar 504 ta papkada jamlangan bo‘lib, o‘n uch yarim mingga yaqin hujjatlar majmuidan iborat. Bu guruhdagi ma‘lumotlar mamlakat tashqi va ichki siyosiy ahvoliga doir masalalarni va shu soha atrofidagi hayotiy jabhalarni qamrab, ularning tarixiy yechimiga xizmat qiluvchi asosiy materiallardan iborat.

Uchinchi bo‘lim tashqi diplomatik munosabatlarni aks ettiruvchi o‘n ikki mingdan ortiq hujjatlarni tashkil etib, ular 307 ta papkada joylashtirilgan. Ularda Buxoro-Rossiya munosabatlari, davlatlararo shartnomalar, mansabdorlar, amaldorlar, chet ellik muhojirlar, ishbilarmonlarning faoliyatlari, tashqi savdo munosabatlari, temir yo‘l, telegraf, rus harbiy qo‘shinlarining amirlikda joylashtirilishi bilan bog‘liq masalalarni aks ettiruvchi ma‘lumotlardan iborat.

To‘rtinchi bo‘limdagi hujjatlar asosan Buxoro amirligining XIX-XX asr boshlaridagi iqtisodiy-moliyaviy hayotini qamrab oladi. Ularda zavod, fabrikalar, bojxonalar, yer-suv egaligi, qishloq xo‘jaligi, chorvachilik, hunarmandchilik masalalarini aks ettiruvchi 27 mingdan ortiq hujjatlar 854 ta **papkaga** joylashtirilgan

Beshinchi bo‘limdagi sud mahkamasi ishlariga doir qozixonalarda bitilgan vasiqalar, xatlar, vaqfnomalar, shajaralar, cheklar, rivoyatlar, ya’ni jami 8,5 mingga yaqin yozma manbalar, XIX-XX asr boshlaridagi Buxoro davlat boshqaruvidagi adliya va yurisprudentsiya ahvoli haqida aniq ma’lumotlarni, boshqaruv tizimi tarixini o‘rganish uchun asosiy dalillardir.

Oltinchi bo‘limda sog‘liqni saqlash bilan bog‘liq 256 ta hujjat 25 ta papkaga joylashgan. Bu hujjatlarda 1809-1918 yillarda Buxoro amirligida vaqti-vaqti bilan tarqalgan vabo va o‘latlar, tabiiy ofatlar va ularni bartaraf qilish maqsadida davlat tomonidan ko‘rilgan chora-tadbirlar bilan bog‘liq masalalar o‘z ifodasini topgan.

Yettinchi bo‘limda Navro‘z, Ramazon va Qurbon hayitlari bilan bog‘liq, “Guli surx” nomi bilan o‘tkazilgan xalq sayillari, 1915 yilda amirlikning Abu Lays mavzesidan topilgan arxeologik topilmalar, tanga va ziynat bezaklari, Buxoro amirlari tomonidan rus harbiylariga, joylardan markazga jo‘natilgan turli xil arizalardan tashkil topgan 6 mingga yaqin hujjatlar 135 papkadan tashkil topgan “Ma’daniyat bo‘limi” guruhini tashkil qiladi.

“Maorif va din” guruhiga mansub bo‘limdagi 5 mingga yaqin hujjatlar 87 ta papkadan joy olgan. Ularda amirlikdagi maktab, madrasa, maqbara, masjid, xonaqohlar ishi bilan bog‘liq barcha masalalar o‘rin olgan.

“Turli hujjatlar” bo‘limidagi materiallar keyingi 30-50 yil davomida yangi to‘plangan va fondga kiritilgan 745 hujjatdan iborat 72 papkani tashkil etadi. Bunday manbalar o‘zidan oldingi 9 ta guruhga mansub masalalarni o‘zida ifodalaydi. Davr jihatidan ular 1881-1918-yillarga oiddir.

Demak, Qushbegi arxivi XIX-XX asr boshlaridagi Buxoro amirligidagi hayotning turli qirralarini qamrab olgan muhim hujjatlar to‘plamidan iboratdir. Endi bevosita materiallar tahliliga kelsak.

Qushbegi arxivida 1915- yilda Buxoro amirligidagi 27 viloyat va 11 tuman nomi ta’kidlangan. Bu tumanlarning hammasi Buxoro shahri atroflarida joylashgan. Lekin bulardan ikkitasigina 1915-yildan tuman deb yuritila boshlangan. Hujjatlarda tumanlardan yig‘ib olinadigan soliqlar to‘g‘risida ma’lumotlar ham uchraydi. Hujjatlarda tumanlardan kimlar soliq yig‘ib olganliklari haqida ma’lumotlar bor. Tumanlardagi hokimiyat qozilarga tegishli bo‘lib, ular Qozikalonga bo‘ysunganligi aks etgan. Ba’zi tumanlar ikkita nomga ega bo‘lgan, bular asosan tuman markazidagi qishloqlar nomi bilan atalgan.

Buxoro amiri Qushbegi hujjatlari tojik va fors tillarida bitilgan. Shuning uchun uni o'rganishda jiddiy qiyinchiliklar tug'iladi.

1914-yil 28-yanvar va 2-fevral kunlarida Qushbegi devoni viloyat hokimlariga, tuman hokimlariga va amlokdorlarga hudud to'g'risida ro'yxat tuzish topshirilgan. A.Muhammadjonovning yozishicha bu ro'yxatlar Buxoro amirining Qushbegi devonxonasiga kelib tushganmi, yoki yo'qmi aniqlash qiyin. Buxoro amirining Qushbegi devonxona fondida oldin saqlanib kelayotgan ro'yxatlar ichida 7 ta viloyatning ro'yxati yo'q. Bular: Dixnau, Ziyaddin, Kabodiyon, Qorategin, Kelif, Qo'rg'on tepa,, Shahrisabz va Buxoroning chekka tumanlaridagi Shimoliy Rud va Janubiy Rud. Bu ro'yxatlarda har bir viloyat, tuman va qishloqlarda qancha aholi yashashi va qancha uy borligi yozilgan.

1916-yilning 21-yanvarida tuzilgan ro'yxatlarda shunday deb yozilgan: "Oqsoqol va aminlardan so'rab surishtirilsin, qancha amlok to'langan va berilgan va har bir qishloqning nomi va amloklari bor yoki yo'qligi haqida bizga yozib yuborilsin".

Ko'pgina viloyatlardagi qishloqlarning ro'yxatlari devonxonalarda saqlangan. Masalan,: Qorategin viloyatining ro'yxati 1913-yildan boshlab yuritiladi va bu ro'yxatda har bir qishloqning uylari soni yozilgan.

Demak, Buxoro amiri Qushbegi arxivi amirlikdagi viloyatlar, amlokdorlar, qishloqlar va ularda yashaydigan aholi soni va etnik tarkibi hamda u yerdan yig'ib olinadigan soliqlar miqdorini aniqlashda muhim manba bo'lib xizmat qiladi.

Buxora amiri Qushbegi arxivi hujjatlari orasida Xo'ja Axrorga tegishli vasiqalar va vaqfnomalar ham mavjud⁸⁹. Bu turdagi hujjatlar ko'p va ularni arxiv va muzeylarning fondlaridan, shuningdek qo'lyozmalar saqlanayotgan kutubxonalardan topish mumkin. Mashhur sharqshunos olim O.D.Chexovich (1912-1982 yy.) O'zbekiston Respublikasi Fanlar Akademiyasining Sharqshunoslik instituti va O'zbekiston Respublikasi Davlat tarix arxivi fondlarida saqlanayotgan vasiqalar va vaqfnomalar fondini ko'p yillar davomida qunt bilan o'rgandi va ular ichidan Xo'ja Ubaydulla Axrorga tegishlilarini ajratib olib, matni va ruscha tarjimasi maxsus tadqiqot bilan birga qo'shib 1974-yili "Самаркандские документы XV-XVI вв." nomi bilan nashr etdi.

⁸⁹ Quyidagi B.Ahmedov tadqiqotidan foydalanilgan matn beriladi. Ахмедов Б. Ўзбекистон тарихи манбалари. –Т.: О'qituvchi, 2001.-Б. 72-75.

Ma'lumki, Xo'ja Axror o'z davrining badavlat, boobro' kishisi bo'lib, mamlakatning ijtimoiy-siyosiy hayotida katta nufuzga ega bo'lgan. Uni shu darajaga yetkazgan narsa, birinchi navbatda uning qo'lida to'plangan katta yer-suv va mol-mulk bo'ldi. Tarixiy manbalarning guvohlik berishicha, uning 300 jufti gov⁹⁰ yeri, shaharlarda timlari (usti yopiq bozorlari), do'konlari, hammomlari, karvonsaroylari, tegirmonlari, moyjuvozlari bo'lgan. Lekin u ma'rifatli va raiyatparvar kishi edi. Daromadning bir qismini xayrli ishlarga sarflagan, xalq manfaatini himoya qilgan. Masalan;, 1463-yili temuriyzoda Umarshayx mirzo Toshkent xalqidan katta miqdorda xiroj talab qilganda, Xo'ja Axror uni o'z hisobidan to'lab yuborgan; hunarmandlar va bozor ahlidan olinadigan tamg'a solig'iga qarshi chiqqan. Hazrat Eshon barcha soliqlardan ozod qilinganiga qaramay, ayrim yillari hamma qatori xiroj, ushr va boshqa soliqlarni (ma'unoti devoniya va navoibi sultoniya) to'lab turgan. Xo'ja Axror har yili Sulton Ahmad mirzo (1458-1494- yillari Movarounnahr hukmdori)ning devoniga 80 ming man⁹¹ g'allani xiroj o'rnida yuborib turgan; yiliga unga xirojning bir qismini – 10 ming kumush tanga berib turgan.

O.D.Chexovichning yuqorida nomi zikr qilingan asaridagi hujjatlardan birini misol keltiramiz.

VASIQA

Oллоh jumlayi jahon egasidir, uning shon-shavkati yuqori bo'lsin!
(Hijriy) 859-yil jumodi ul-oxir oyining 12-kuni.

Bayramxo'ja o'g'li Hasan, mulkiga mutasaddiy bo'lishga haququqi bo'lgani holda, dedi: "Samarqandning So'zangaron ko'chasida joylashgan ikki xonalik uyimni, tahoratxona va ayvoni bilan Ubaydulaxo'ja Jaloliddin Mahmud o'g'liga sotdim.

Mazkur hovli-joyimning g'arb tarafga olijanob, hurmat-ehtiroimga loyiq bo'lgan olg'uvchining do'koni bilan tutash, shimoliy tarafi podshohlik yerlari⁹² va qisman amir Shermuhammad xo'janing uyi bilan, sharqi-janub tarafdin esa xalqa ko'chalar bilan tutashdir.

⁹⁰ Jufti gov – bir juft ho'kiz yordamida haydab ekiladigan yer.

⁹¹ Man – og'irlik o'lchovi; vazni 4,32 gr.ga teng bo'lgan o'lchov birligi.

⁹² Podshohlik yerlari – hukumatga qarashli yer-suv, mulki podshohiy, mulki sultoniy va mamlaka deb ham ataladi.

Ushbu mulkni, barcha haq-huquqlari bilan, hozirda muomalada bo‘lgan 1500 dinori adliyaga⁹³ sotdim.

Mazkur savdo-sotiqning kafilligi o‘zinning zimmamda.

Savdo quyidagi shaxslarning guvohligida bo‘ldi:

Abu Mansur Muhammad;

Sa’dulla Muhammad al-Ispijobiy;

Ahmad Ali al-Xorazmiy;

Xo‘ja Sulton Jahongir o‘g‘li;

Bayramshoh Junayd Ramazon o‘g‘li.

Hammasi bo‘lib 26 guvoh”⁹⁴.

BUXORO AMIRI HAYDARNING FARMONI

U (Olloh) abadiy tirik!

Kattabek eshik og‘aga⁹⁵ ma’lum va ravshan bo‘lsin va (u) bilsinki, mulozimingiz Rahimqulibekbiy olijanob, qutblar qutbi janob xo‘ja Axrorning, qabri nurga to‘lsin, Kamongarondagi vaqf yerlariga qasd qilgan. Bu gapni (podshoh hazratlarining) oliy uzangisini o‘pish paytida sayyodat maob eshon Olamgirxo‘ja shayxulislom aytgan.

Shunga asoslanib, Siz janobga buyuramiz:

Agar (haqiqatan) shunday qilingan bo‘lsa, Ollohning la’natiga qolmaslik uchun bu ishni darhol to‘xtatsinlar, mazkur vaqf yerni, mazkur farmoni oliyga asoslanib, egasiga qaytarilsin, (Farmonga) aslo mone’lik qilmasinlar⁹⁶.

Xiva xonligi qozilik arxivi

Arxiv hujjatlaridan foydalanish – bu tarixchi izlanishining poydevoridir. Mustaqil O‘zbekistonda tarix fanining rivojlanishida arxiv hujjatlari katta ahamiyatga ega. Shu jumladan Xiva xonligi arxiv hujjatlari ham o‘zining qimmatliligi bilan nafaqat Xiva tarixida, balki butun O‘rta Osiyo tarixida ham munosib o‘rin tutadi.

O‘rta Osiyoda vujudga kelgan yirik davlatlarning biri bo‘lgan Xiva-ning chinakam tarixi so‘nggi vaqtlargacha juda kam o‘rganildi. Mamla-

⁹³ Dinori adliya – Mirzo Ulug‘bek davrida zarb etilgan oltin tanga pul; vazni 4,4 gr.ga teng.

⁹⁴ Аҳмедов Б. Ўзбекистон тарихи манбалари. –Б. 74-75.

⁹⁵ Eshik Og‘a (eshik og‘asi) – saroybon; podshoh (xon) saroyiga arz bilan keluvchilarni, shuningdek elchilarni kutib oluvchi mansabdor.

⁹⁶ Аҳмедов Б. Ўзбекистон тарихи манбалари. –Б. 76-77.

katning ichki hayotini tasvirlovchi arxiv hujjatlarning yoʻqligi Oʻrta Osiyoning oʻtmishini oʻrganayotgan tarixchilar uchun shu vaqtgacha jiddiy qiyinchilik tugʻdirib keldi. Oʻz-oʻzidan maʼlumki, soʻnggi vaqtlargacha tadqiqotchilarning qoʻlida Oʻrta Sharqdagi ayrim mamlakatlarning ichki hayotini tasvirlovchi asl hujjatlarning boʻlmaganligi tarix fanining taraqqiy qilishiga maʼlum darajada toʻsiq boʻlib keldi. Oʻrta Osiyo xalqlarining tarixini, oʻtmishini va hozirgi davrini oʻrganayotgan olimlar oldiga qoʻyilgan vazifalarni muvaffaqiyatli hal etishda arxiv materiallari birinchi darajali manba sifatida katta ahamiyatga egadir.

Oʻzbekiston tarixini yozadigan olim uchun arxiv materiallari va hujjatlarining naqadar katta ahamiyati borligini Xiva xonlarining arxivida koʻramiz. Xiva xonining arxivi borligi fan olamiga maʼlum emas edi. Rus sharqshunos olimi V.V.Bartold bu arxivni bevosita Oʻrta Osiyoda, shuningdek Moskva va Leningrad arxivlaridan koʻp marta qidirib koʻrdi, biroq hech narsa topa olmadi⁹⁷. Bartoldning oʻzi koʻrsatib oʻtganidek, bunday hujjatlar va materiallarning yoʻqligi Oʻrta Oʻsiyo tarixini ishlashga katta toʻsqin edi. Bu olim “Musulmon Sharqi davlatlarida hujjatlarning saqlanishi” degan oʻzining juda qimmatli va diqqatga sazovor boʻlgan maqolasida Sharqda, zotan hamma joyda ham arxiv ishining rivojlanishi davlatning rivojlanishi bilan bogʻliq boʻladi, deb juda toʻgʻri fikr aytib oʻtgan edi. Shunday qilib Bartold Oʻrta Osiyo xonliklarida XIX asrda yozma ish yuritish boʻlganligini va hujjatlarni saqlashda boshlangʻich tartib joriy qilinganligini muqarrar deb hisoblaydi. Ammo XIX asrdagi Xiva xonlarining arxivini koʻrish yoki oʻrganish unga nasib etmadi.

Xiva arxiv hujjatlari topilmasdan oldin Xivaning bu davrdagi tarixi oʻsha davr elchilarning, sayyohlarning qimmatli xotiralari, yozib qoldirgan daftarlari, aytib bergan soʻzlari asosiy manba hisoblanib mana shular orqali oʻrganilgan.

Xiva xonlarining XIX asrga oid arxividagi baʼzi hujjatlar mazmunining sovet sharqshunos olimi P.P. Ivanov tomonidan birinchi marta eʼlon qilinishi sovet sharqshunoslari uchun Xivaning tarixini toʻlaroq ochib berishga imkon berdi. Maʼlumki, Oʻrta Osiyo hududida eng qudratli davlatlardan biri boʻlgan Xivaning haqiqiy tarixi juda kam oʻrganilgan. Xiva va Oʻrta Osiyodagi boshqa feodal davlatlarning tarixi bizga maʼlum tarixiy hujjatlar asosida yozilgan emas.

⁹⁷ Йўлдошев М.Й. XIX аср Хива давлат хужжатлари. –Т.: Фан, 1960. –8.

Ikkinchi jahon urushi boshlanmasdan oldinroq Leningraddan Xiva xonlarining XIX asrga doir arxivlari topilgan. Turkmanistonda ko‘p miqdorda yozma yodgorliklar borligi aniqlandi. Biroq, yuqorida aytib o‘tilgan arxiv hujjatlarining birontasi hali shu vaqtgacha ilmiy xodimlar foydalanadigan holga keltirilgani yo‘q edi.

Xiva haqida yozilgan va turli mamlakatlarda bosilib chiqqan juda ko‘p asarlarda Xivaning o‘zida mavjud bo‘lgan tarixiy hujjatlardan mutlaqo foydalanilmagan. Rus olimi professor N.I.Veselovskiyning 1877-yilda bosilib chiqqan Xiva xonligining tarixiga oid mashhur asari ham asosan sayohatchilarning ta‘rifiga asoslanib yozilgan⁹⁸.

1873-yilda rus qo‘shinlari Xivaga yurish qilib, uni ishg‘ol qiladi. 1973 yil 12-avgustda Gandamiyonda Kaufman bilan Xiva xoni Muhammad Rahimxon II (Ferus) o‘rtasida tuzilgan sulh shartlariga ko‘ra Xiva Rossiyaning vassaliga aylanadi. Shundan keyin Xiva xonligi hujjatlari Peterburgga olib ketilgan, biroq keyinchalik unutilib yuborilgan edi. Ushbu hujjatlar olimlarning ko‘plab sa‘y-harakatlari tufayli O‘zbekistonga qaytarib olib kelingan bo‘lib, hozirgi kunda O‘zbekiston Respublikasi Markaziy davlat arxivining I-125 fondida saqlanmoqda. Xiva xoni arxiv hujjatlarining topilishi va jamoatchilikka e‘lon qilinishida sharqshunos P.P.Ivanovning xizmatlari nihoyatta katta. P.P.Ivanov Leningraddagi M.E.Saltikov-Shedrin nomli xalq kutubxonasidan Xiva xoni arxiv hujjatlarini topib, Xiva tarixiga oid tadqiqotlarning doirasini kengaytirishga muvaffaq bo‘lgan olim hisoblanadi. P.P.Ivanov 1936-yildayoq kutubxonadagi qo‘lyozma bo‘limining ro‘yxatga olinmagan fondlaridan “XIX asrdagi Xiva xonlarining arxivi”ni topgan edi. U birinchi bo‘lib ilm ahllarining e‘tiborini arxivga jalb qildi va topilgan materiallarni tizimga soldi⁹⁹. M.E.Saltikov-Shedrin nomli xalq kutubxonasida bu noyob arxivning faqat bir qismigina saqlanib qolgan. Ko‘pgina hujjatlar esa sobiq Osiyo muzeyi, hozirgi O‘zR FA Sharqshunoslik institutining fondlaridan topilgan. P.P.Ivanov o‘z asarida daftarlarning mazmunini qisqacha bayon qilib bera olgan va sovet sharqshunosligiga g‘oyat katta xizmat ko‘rsatgan. Lekin P.P.Ivanovning bevaqt vafoti natijasida bu ish to‘xtab qolgan va uni hech kim davom ettirmagan. Undan keyin Xiva xonlari arxivi bilan

⁹⁸ Йўлдошев М.Й. XIX аср Хива давлат ҳужжатлари. –Т.: Фан, 1960. –Б. 9.

⁹⁹ Алимов И. Архившунослик. –Т.: Шарқ, 1997. –Б. 14.

M.Y.Yoʻldashev ishlagan va mehnatlari samarasi natijasida “XIX asr Xiva davlat hujjatlari” nomli asarini yaratgan¹⁰⁰.

1948-yilda Xiva arxivining hech kimga maʼlum boʻlmagan yana bir qancha noyob daftarlari topildi. Bular xalq kutubxonasida P.P.Ivanov tomonidan topilgan kolleksiyani ancha toʻldiradi va uni yanada qimmatliroq qiladi.

Shunday qilib, biz umumiy hajmi 333 daftar, 11.000 varaqdan ortiq boʻlgan qimmatli arxivga ega boʻldik.

Birinchi marta toʻla-toʻkis oʻrganilayotgan Xiva xonlarining arxivi Xivaning oʻtmishi haqida koʻp yangi va muhim maʼlumotlar beradi. Bu arxiv xonlikning iqtisodini, ijtimoiy va davlat tuzilishini, harbiy kuchini, urf-odatlarini, madaniyatini va hokazolarni mukammal yoritib beradi. Arxivda uzoq vaqt davomida Xiva xonlari hokimiyati ostida boʻlgan Turkmaniston, Qoraqalpogʻiston va Qozogʻistonning bir qismining tarixiga oid juda koʻp materiallar bor. Arxiv hujjatlari Oʻrta Osiyoning Rossiya bilangina emas, balki Eron, Hindiston va boshqa qoʻshni mamlakatlar bilan ham qilgan aloqalarining muhim tomonlarini oʻz ichiga olgan. Arxiv materiallardan maʼlum boʻlishicha, Xivada XIX asrning oʻrtalarida zamindor er mulkchiligi tuzumi hukmron boʻlib, asosiy ishlab chiqarish vositasi boʻlgan yerning 9/10 qismidan koʻprogʻi yirik yer egalari boʻlgan¹⁰¹. Yirik er egalari eng yaxshi hosildor yerlarga, yaylovlarga, suv manbalariga egalik qilganlar, sugʻorish shaxobchalari ham ularga qarashli boʻlgan. Mazkur davrda Xivada yirik er egalardan tashqari, aholining koʻpchilik qismini mehnatkashlar ommasi tashkil qilar edi.

Arxiv daftarlari orasida saroy xarajatlarini koʻrsatuvchi juda koʻp hujjatlar bor. Bu hujjatlar xon byudjeti qanday sarflanganligini aniq qilib koʻrsatadi, chunki daftarga arzimagan mayda xarajatlar ham yozib borilgan; xuddi shu hol bu hujjatlarning ilmiy qimmatini oshirish bilan birga, ularni muhim tarixiy manbaga aylantiradi. Saroy xarajatlariga doir materiallarini sinchiklab oʻrganish orqali biz saroy turmushini, xon boshliq hukmron zamindorlarning axloqi va maishatini koʻrish mumkin. Xarajat daftarlari yozilgan maʼlumotlar tovar-pul munosabatlarining rivojlanishi natijasida saroy va butun

¹⁰⁰ Ёўлдошев М.Ў. XIX аср Хива давлат ҳужжатлар. –Т.: Фан, 1960. –Б. 10.

¹⁰¹ Ёўлдошев М.Ў. XIX аср Хива давлат ҳужжатлари. –Т.: Фан, 1960. –Б. 10.

jamiyat hayotida yuz bergan o'zgarishlarni bilib olishga imkon beradi. Xonlik tarixida bo'lib o'tgan biror voqeaning yuz bergan vaqtini aniq aytib berish arxiv materiallarining asl nusxalari topilganiga qadar mumkin bo'lmagan edi, albatta. Mazkur arxiv hujjatlarining o'sha davrda tartib bilan yozib borilishi, to'planishi va saqlanishi ham O'rta Osiyo xalqlarining madaniyati, jumladan, o'zbek xalqining boy va yuksak madaniyati va taraqqiyotidan dalolat beruvchi asosiy va ishonchli omillardan biri hisoblanadi.

Xon va uning ayonlarining kayf-u safo bilan kechirgan hayoti va byurokratik davlat apparatini ta'min qilish uchun juda katta mablag'lar sarf qilinar edi. Arxiv hujjatlari bu mablag'lar ana shu maqsadlar uchun sarflanganini aniq ko'rsatib beruvchi oynadir¹⁰².

Daftarlardan biz yuqoridagi xarajatlardan tashqari, boshqa maqsadlar uchun qilingan, o'ziga xos xarajatlar to'g'risida ham ma'lumotlar olamiz. Masalan;, Xivada o'sha vaqtda hukumat orden va medallari yo'q edi. O'zini ko'rsatgan harbiy va grajdan amaldorlarga mukofot tariqasida pul, yer-suv, chorva yoki qimmatbaho buyumlar berilar edi, ayrim hollarda mukofot tariqasida pichoqlar ham berilar edi. Ayrim ko'zga ko'ringan amaldorlarga faxriy yorliq tariqasida oltin va qimmatbaho toshlar bilan bezatilgan kamarlar ham taqdim qilinar edi¹⁰³.

Arxiv hujjatlaridan ma'lum bo'lishicha, Xivada o'ldirilgan har bir dushman uchun pul mukofoti berish odat bo'lib qolgan edi. Lekin dalil sifatida o'ldirilgan kishining boshini, shilib olingan terisini olib kelib ko'rsatish shart edi. O'ldirilgan kishining shilib olingan terisi uchun eng ko'p mukofot berilgan. Harbiy yurish vaqtida askarlarga davlat tomonidan harbiy yordam ko'rsatilmay edi. Yaralangan jangchilar o'z hisoblaridan davolanishlari kerak edi.

Eron, Buxoro singari chet davlatlarga qilingan harbiy yurishlar vaqtida xon navkarlarga maosh to'lamagan, har bir navkar yurish vaqtida o'zini-o'zi ta'minlashi va yurishda qo'lga kiritgan o'ljasining 1/5 qismini g'on sifatida xonga berishi lozim edi.

Arxiv hujjatlardan ko'rish mumkinki, xonning davlat apparati tomonidan mehnatkash xalq ommasini talash orqali yig'ib olingan pul-

¹⁰² Йўлдошев М.Й. XIX аср Хива давлат ҳужжатлари. –Т.: Фан, 1960. –Б. 11.

¹⁰³ Йўлдошев М.Й. XIX аср Хива давлат ҳужжатлари. –Т.: Фан, 1960. –Б. 12-13.

lar, xon va uning yaqin kishilari tomonidan faqat kayf-safo va ayshishrat qilish uchun sarflangan. Juda zarur jamiyat ehtiyojlariga nihoyatda kam pul sarflangan. Shunisi xarakterliki, xarajat daftarlarida bunday maqsadlar uchun qilingan xarajatlar deyarli uchramaydi¹⁰⁴.

Xiva xonlarining 1910-yilda qilgan arxiv hujjatlaridan olingan xarajatlarini keltiramiz.

- 1) Saroy xarajatlari - 36.557. tillo.
- 2) Xon hazrati oliylari 945 tillo oldilar.
- 3) Xonning bank orqali qilgan xarajatlari – 4729 tillo.
- 4) Xonning idora (konselyareya)si orqali qilingan xarajatalari – 5000 tillo.
- 5) Ko‘hna Urganchda qilingan xarajatlar – 506 tillo.
- 6) Xonning qo‘shimcha shaxsiy xarajatlari – 208 tillo.
- 7) Xon posbonlariga shaxsan berilgan pullar – 415 tillo.
- 8) Xon uchun Peterburgdan kolyaska olib kelgan ruslarni kutib olish uchun qilingan xarajatlar – 889 tillo.
- 9) Amaldorlarga berilgan pullar – 16 900 tillo.
- 10) Ayrim amaldorlarga berilgan pullar – 90 tillo.
- 11) Mehtar va qushbegining idora xarajatlari – 280 tillo.
- 12) Suv toshqini munosabati bilan qilingan xarajatlar – 1284 tillo.
- 13) Ko‘hna Urganchdagi kanalni qazuvchilarga to‘langan pullar – 1000 tillo¹⁰⁵.

Ba’zi bir xarajat daftarlaridan keltirilgan ayrim varaqalar shuni ko‘rsatadiki, bu daftarlar muhim moliyaviy ahamiyatiga ega bo‘lgan hujjatlardan iborat ekan va ularga bitilgan yozuvlar o‘sha davrdagi Xiva xonligi amaldorlarining qo‘lidan keladigan o‘ziga xos xafsalalik bilan olib borilar edi. Ba’zi yozuvlar, amaldorlarga qilingan xarajatlarning ba’zan miqdori juda katta bo‘lganini, ularni daftarga tirkash mirzalarga man qilganini ko‘rsatadi (fond 33,8-papkaning 9-varag‘idan)¹⁰⁶. Arxiv hujjatlarda saroy hayoti va xonlikning ichki turmushi haqidagi ma’lumotlar, yuqori ma’muriy mansabdor shaxslarni almash-tirish, yig‘ilishlar va oqsoqollar kengashi to‘g‘risidagi ma’lumotlardan

¹⁰⁴ Йўлдошев М.Й. XIX аср Хива давлат ҳужжатлари. –Т.: Фан, 1960. –Б. 13.

¹⁰⁵ Йўлдошев М.Й. XIX аср Хива давлат ҳужжатлари. –Т.: Фан, 1960. –Б. 14-15.

¹⁰⁶ Алимов И. Архившунослик. –Т.: Шарқ, 1997. –Б. 59.

tashqari xonlikning tashqi siyosiy munosabatlari to'g'risida ham, urush harakatlari va boshqalar to'g'risida ham ko'pgina ma'lumotlar bor. 33-fond, 2-papkada xonning oilasiga aloqador kishilarning xarajatlari yozilgan bir necha varaqa bor. 33-fond, 3-papkada esa olingan zakot to'g'risidagi ma'lumotlar muqovasiz holda bog'lam qilib qo'yilgan¹⁰⁷. Boshqa papkada o'zbek tilida to'ldirilgan bir necha yuz parcha-parcha qog'ozlar bor. Bu qog'ozlardagi ma'lumotlar juda qiziq: machitlarning nomlari, soliq to'lovchilarning miqdori (har bir machit bo'yicha to'langan umumiy soliq miqdori) ko'rsatiladi. Navkarlar va imomlarning miqdori, ariq qazuvchilarning va boshqa davlat ishlarini bajaruvchilarning soni ko'rsatilgan. Yana daftarlardan ko'rish mumkinki, mamlakatda yer solig'i sifatida xazinaga 40 993 tilla to'lagan 23 011 xonadon haqida hamda ariq tozalash va qazishga 21 079 kishi berilganligi haqida ham uchratish mumkin. Bu daftardan biz mehtar va qushbegi qancha soliq to'laganini ko'ramiz. Bu daftar yana Xiva xonligining ma'muriy tuzilishi to'g'risida ham mukammal tushuncha beradi. Butun mamlakat hududida soliq to'plovchilar to'g'risidagi ma'lumotlarni o'z ichiga olgan bu daftar muqovasiz, 20 varaqdan iborat, sanasi qo'yilmagan.

Shunday qilib, Xiva arxiv hujjatlari saroyda yuz bergan voqealar to'g'risida, xalq ommasining hayoti to'g'risida va xonlikda amaldor tabaqalar haqida aniq bir tushuncha beradi. Bular orasida Xiva xonligida davlat va ma'muriy tuzilish to'g'risida, yer egaligi va yer solig'i to'g'risida, zakot va harbiy tuzilish to'g'risida, boshqa yurtlarga urush safari qilish to'g'risida, hunarmandchilik va savdo-sotiq, qullarning ahvoli haqida, Xiva xonligining Rossiya bilan Buxoro va Qo'qon xonligi bilan bo'lgan munosabatlari to'g'risida ham materiallar bor. Bu materiallar orasidan biz xonlikda etnografiya, meditsina va boshqa fanlarning naqadar rivojlanganligi to'g'risida ma'lumotlarni ham uchratamiz.

Bu hujjatlar Xiva xonligining iqtisodi, ijtimoiy va davlat tuzilishi, harbiy qudrati, madaniyati, maishiy turmushi, axloqi va shu kabilarni aks ettiradi. Arxiv O'rta Osiyoning Rossiya bilan, shuningdek Eron, Hindiston va boshqa qo'shni mamlakatlar bilan munosabatlariga doir muhim ma'lumotlarni o'z ichiga oladi¹⁰⁸.

¹⁰⁷ Алимов И. Архившунослик. –Т.: Шарқ, 1997. –Б. 60.

¹⁰⁸ Алимов И. Архившунослик. –Т.: Шарқ, 1997. –Б. 67.

Bizning fikrimizcha, Xiva xonlari arxivi quyidagi asosiy boʻlimlarga boʻlinadi.

- 1) Xiva xonligining davlat va maʼmuriy tuzilishi;
- 2) Yer soligʻi va yer egaligi;
- 3) Harbiy tuzilish va harbiy safarlar;
- 4) Zakot toʻplash, hunarmandchilik va savdo-sotiq;
- 5) Dehqonchilik va sugʻorish ishlari;
- 6) Vaqflar va ruhoniylar;
- 7) Xiva xonligidagi qullar;
- 8) Turkmaniston va turkmanlar;
- 9) Qoraqalpoqlar;
- 10) Qozoqlar;
- 11) Xivaning Rossiya bilan munosabatlari;
- 12) Xivaning Buxoro va Qoʻqon xonligi bilan munosabatlari toʻgʻrisida;
- 13) Xivaning Eron bilan munosabatlari;
- 14) Xivaning Afgʻoniston va Hindiston bilan munosabatlari¹⁰⁹.

Arxivda filologiya, geografiya, etnografiya, meditsina, gidroʻlogiya, agronomiya va boshqa bir qancha fanlarga doir qiziqarli maʼlumotlar bor.

Arxiv daftarlaridagi yozuvlarda asosan yerdan olinadigan soliqlar toʻgʻrisidagi maʼlumotlar bor. Olinadigan soliqlarning miqdori yozilgan daftarlar arxiv materiallarining anchagina qismini tashkil qiladi.

XIX asrning boshlarida Xiva xonligida hujjatlarni saqlash ancha yaxshi yoʻlga qoʻyilgan edi.

1830-1832-yillarda Toshhovli saroyini qurgan Olloqulixon davlat arxivi daftarlarini saqlashga alohida eʼtibor berdi. Toshhovlida hujjatlar saqlanadigan maxsus joylar qurilgan edi¹¹⁰.

Tarixchilarning bergan maʼlumotlariga qaraganda, saroydagi arxiv hujjatlari xazina bilan bir qatorda alohida binoda juda ehtiyotkorlik bilan maxfiy holda saqlangan. Arxiv hujjatlarini nazorat qilib turish uchun alohida kishilar ham ajratilgan.

Xarajat daftarlarining ayrim guruhleri oʻz muqovasining hajmi, rangi, formati jihatidan boshqa guruhdagi daftarlardan ajralib turgan.

¹⁰⁹ Алимов И. Архившунослик. –Т.: Шарқ, 1997. –Б. 67.

¹¹⁰ Ёўлдошев М.Г. XIX аср Хива давлат хужжатлари. –Т.: Фан, 1960. –Б. 18.

Masalan, soliq daftarlari charm muqovali bo‘lib, ularning hajmi oddiy yozuv qog‘ozining 1/8 qismiga to‘g‘ri keladi. Saroy xarajatlari yozilgan barcha daftarlari karton muqovali bo‘lib, formati yozuv qog‘oziga barobardir. Bir joydan ikkinchi joyga olib yuriladigan daftarlarga pishiq muqova qilingan. Xonlikning maxfiy xarajatlari yozilgan, faqat saroyning o‘zida saqlanadigan daftarlarning muqovalari oddiy kartondan qilingan. Shunday qilib, arxiv daftarlarning tashqi ko‘rinishi muayyan maqsadga, xon saroyi ma‘muriyatining amaliy talabiga muvofiq ravishda ishlangan¹¹¹.

Xulosa qilib aytganda, Xiva xonligi qozilik arxivining topilib, o‘rganilishi nafaqat Xiva tarixini, balki O‘rta Osiyo tarixini yoritishda ham katta ahamiyatga ega. Ushbu arxiv hujjatlar o‘sha davr Xiva tarixi, xo‘jaligi, davlat boshqaruv shakli, podshohlari, madaniyati haqida ma‘lumot bera oladigan muhim manba bo‘lib xizmat qiladi.

Qo‘qon xonligi arxivi

1939-yilda Sankt Peterburgdagi Saltikov-Shedrin nomidagi Davlat xalq kutubxonasi yerto‘lasidan Qo‘qon xonlari arxivi hujjatlari topilgan. Bu hujjatlar Qo‘qon xonlarining XIX asr tarixiga taalluqli bo‘lgan. Mazkur hujjatlar Qo‘qon xonligi Rossiya tomonidan egallanganidan so‘ng 1876-yilda imperatorning Markaziy kutubxonasiga ko‘chirilgan edi.

O‘sha paytda Turkiston general-gubernatori K.P.Fon Kaufman buyrug‘i bilan arxiv A.L.Kunga topshirilgan edi. A.L.Kun Qo‘qon xonlarining arxivi bilan shug‘ullanmagan, ehtimol u yetkazib beruvchi bo‘lgan. Arxiv hujjarlari Sankt Peterburgga yuborilishidan oldin Qo‘qon va Toshkentda o‘sha vaqtda O‘rta Osiyoda bo‘lgan N.N.Pantusov tanishib chiqqan edi. U Qoqon arxiv hijjatlari to‘g‘risidagi qisqacha xabarni “Qo‘qon xonlarining arxivi” nomli maqolasida “Туркестанские ведомости” gazetasining 1876 yildagi 12-sonida e‘lon qiladi.

N.N.Pantusovning yozishicha, arxivda muhim hisoblangan statistik ma‘lumotlar, ya‘ni masjid va madrasalarning vaqf yer egaligi, soliqqa tortish va soliq solish, soliqdan ozod qilingan shaxslar, harbiy ishlar (quro‘l turlarining ro‘yxati, quro‘l quyish xarajatlarining ro‘yxati, harbiy xizmatdan qochganlarning ro‘yxati), harbiylarning va boshliqlarning

¹¹¹ Йўлдошев М.Г. XIX аср Хива давлат ҳужжатлари. –Т.: Фан, 1960. –Б. 19.

xarajatlari va daromadlarining ro'yxati, xon qabul qilgan sovg'alarning ro'yxati va boshqalar mingga yaqin "daftarlar"da saqlanib qolgan. N.N.Pantusov yana shuni ta'kidlaydiki, 1875-yil Qo'qon xonligida bo'lib o'tgan g'alayon tufayli arxivning ko'pgina qismi Qo'qonning sobiq amaldorlari tomonidan o'g'irlangan, hujjatlar aralashib, ayrim qismlari shikastlangan, buzilgan, ko'p o'ramlarning boshi va oxiri yo'qolgan. Markaziy davlat kutubxonasida bor yo'g'i 151 o'ram bo'lgan. Ehtimol o'ramlarning to'liq qismi Sankt Peterburgga yetib kelmagan, ularning ko'p qismi muhim material sifatida Toshkentda qoldirilgan bo'lishi mumkin.

Qo'qon xonlarining arxivi uzoq vaqtgacha tadqiqotchilarga ma'lum bo'lmagan. Nihoyat, 1939-yil Qo'qon xonlarining arxivini saralash paytida P.P.Ivanov hujjatlarning muhim miqdori tojik tilidaligi, kelib chiqishi Qo'qon arxividan bo'lganligini eslatib o'tadi. 1951-yilda esa M.Yu.Yuldashev ta'kidlaydiki: "Arxiv hujjatlarini saralash paytida Markaziy kutubxonada shuni aniqladikki, Xiva xonlarining arxivi qatorida Qo'qon xonlarining mashhur arxivi ham bor edi..."¹¹².

Qo'qon xonlari arxivi 1962 yilda O'zSSR arxiv boshqarmasiga jo'natiladi, arxiv hujjatlarining mikrofilmlari Leningradda M.E.Saltikov-Shedrin nomli davlat kutubxonasida va SSSR FA Osiyo xalqlari instituti qo'lyozmalar fondida saqlanmoqda. A.L.Troitskaya tomonidan Qo'qon xonlari arxivi katalogi tiziladi va 1968 yilda nashr qilingan¹¹³. Katalogda 5 ming atrofidagi hujjatlar jamlangan. Hujjatlar asosan XIX asrning 40-70-yillariga taalluqli bo'lib, ularda xonlikning bu davrdagi xo'jalik hayiti aks etgan. Katalog sistemali tartibda bo'limlarga bo'lingan, ismlar va geografik nomlar ko'rsatkichlari hamda atamalar izohlari bilan ta'minlangan.

Arxivni saralash va qayta ishlash 1952-yilda boshlangan. Arxiv nihoyatda achinarli ahvolda edi. Faqat ayrim muhrlangan to'plamlardan tashqari barcha hujjatlar aralashib ketgan, ehtimol hujjatlar shunday holda xon xazinasida saqlangan. Ayrim hujjatlar g'ijim bo'lgan,

¹¹² М.Ю.Юлдашев, Новый архивный источник по истории Средней Азии. – Краткая сообщения института востоковедения АН СССР. № 1, 1951, –С. 37.

¹¹³ Троицкая А.Л. Каталог архива кокандских ханов XIX века. М., Наука. 1968.

ayrimlari yirtilgan, ayrimlari esa zich taxlanib ipdan o'tkazilgan, (hujjat saqlashning bir turi) ayrimlari kir bo'lib ketgan.

Hujjatlarni qayta tiklab, uni tozalash Markaziy kutubxonaning qayta tiklash bo'limi xodimi Ye.X.Trey va uning yordamchisiga topshirilgan. Bu ish ikki yil davom etgan (5026 varaq va 151 am). So'ng ularni saralab, tartibga solish va tavsiflash kerak edi.

Arxiv hujjatlarini saralab tartibga solish paytida uning qisqa xronologik chegarasi aniqlangan. Hujjatlarning aksariyat qismi Xudoyorxon hukmronligining uchinchi davriga to'g'ri keladi, ya'ni 1866-1875-yillar. (Xudoyorxon taxtni 1845-1858, 1862-1863, 1866-1875-yillarda uch marotaba qayta idora qilgan). Xuddi shu xronologik sanalarni N.N.Pantusov yuqorida ta'kidlab o'tgan.

Arxiv hujjatlarini sinchiklab tekshirilgan paytda yana shu ma'lum bo'ldiki, hujjatlarda Sheralixonning (1842-1845) hukmronlik yillari, Xudoyorxonning otasi, Mallaxonning (1858-1862) hukmronlik yillari va Xudoyorxonning tutingan akasi haqida ma'lumotlar topilgan. Hujjatlarning asosiy qismi 60-yillar boshi va 70-yillarni o'z ichiga oladi. Hujjatlarning chorak qismi sanalashtirilmagan.

Qo'qon xonligining ichki va tashqi siyosatini tilga olmagan holda (chunki kam o'rganilgan) shuni aytish mumkinki, 1845-1875-yillar eng qiyin siyosiy davr bo'lgan. Bu davrda Buxoro amirligi bilan urush olib borilgan, xonlik mustaqilligiga tahdid solgan Qo'qon xonligi muhim strategik ahamiyatga ega bo'lgan O'ratepani bo'ysundirish uchun ko'p urinishlar qilgan. Bu davr ichida xonlik rus armiyasi egallagan va 1867-yil Turkiston general-gubernatorligi tashkil topgan ko'pgina viloyatlardan mahrum bo'ldi. Xonlikda feodallar va amaldorlar o'rtasida kuchli nizolar bo'lgan, har kim xonlik taxtiga o'z da'vogarligini qo'yish istagida bo'lgan, bu esa ikki marta Xudoyorxonning hukmronligiga xalaqit qilgan. Aholi feodallar tomonidan kuchli ekspluatatsiyaga duchor bo'lgan.

XIX asrning ikkinchi yarmi O'rta Osiyo xonliklarida tovar-pul munosabatlari kuchaygan, mustaqillikni saqlash uchun Xudoyorxon imperiyaning hamma shartlariga ko'ngan, rus savdogarlariga Qo'qon xonligiga katta yo'l ochib bergan, bu esa tovar-pul munosabatlarining rivojlanishiga olib kelgan. Yerga xususiy egalik avj olishi va xon o'z yerlarini kattalashtirishga urinishi kuzatilgan. Xon yerlarni "qo'riqxona" deb e'lon qilgan va aholiga yerni ijaraga bergan edi. Xonlikning yoqilg'i manbai hisoblangan cho'ldagi yantoqlar ham xonning mulki

hisoblangan va qo‘riqchilar tomonidan nazorat qilingan. Qishki yaylovlar ko‘chmanchi aholiga ijaraga berilgan. Xudoyorxon har xil yo‘llar bilan o‘z mulkini ko‘paytirishga uringan, xonlikning qulashi paytida uning mulki 7 mln. rublni tashkil qilgan.

Xudoyorxon hukmronligining uchinchi davrida soliq tizimi chuqur ishlab chiqilgan. Xon yangi soliqlar joriy qilgan, masalan, o‘rmon solig‘i, nikohdan tushadigan pul va h.k.

Qo‘qon xonlarining arxivi o‘zining mundarijasiga ko‘ra, xo‘jalik hujjatlari hisoblanadi. Unda Xudoyorxonning yer egaligi va yerlardan foydalanish, ayniqsa udel qismlarida, xoss yerlari yoki mirri xususiy yerlar – mulkiyat, ayniqsa qozilarning xonga yoki bekka yer mulklarini hal qilish murojaatlari, ko‘chmas mulk egaligi va merosni bo‘lish haqida ko‘plab ma‘lumotlar bor.

Yer hadyalari to‘g‘risida ham ma‘lumotlar kam emas: xiroj solig‘i, uy atrofidagi yerlarga-tanobona solig‘i va b. Arxiv materiallariga qarab shuni aniqlash mumkinki, xiroj solig‘ini to‘lashda soliqlardan ozod qilinish shartlari to‘g‘risida ma‘lumotlar bor. Undan tashqari soliqlarni kim sarf qilganligi yozilgan (xon, beklar va Arg‘ilon beki Sulton Murod). Qolgan soliqlar va hukumat soliqlari faqatgina ayrim tasodifiy hujjatlarda saqlanib qolgan. Masalan; zakot solig‘i shunday tasodifiy hujjatlarda saqlangan. Bozor soliqlari, merosni taqsimlashdan kelgan pullarni yig‘ish – tarokona yoki tarikana, nikoh shartnomasini tuzish haqida – nikoxona kabi hujjatlar kam saqlangan. Pantusovning aytishicha, bu kabi hujjatlar Qo‘qon xoni qozilik arxivda bo‘lgan, lekin ular muhim statistik material sifatida Toshkentda qoldirilgan.

Arxivda yana harbiy ishlar to‘g‘risida (qo‘shin yig‘ish, harbiylarni taqdirlash, quro‘l ishlab chiqarish) ko‘pgina hujjatlar mavjud.

Hujjatlar orasida Xudoyorxonning xususiy xo‘jaligi va xon o‘rdasi to‘g‘risida, qo‘rg‘oshin buloqlar, neft ishlab chiqarish va undan kerosin tayyorlash, xonning g‘isht zavodlari va gugurt ishlab chiqarish to‘g‘risida materiallar bor.

Marg‘ilon beki Sulton Murod to‘g‘risida ham ko‘pgina hujjatlar saqlangan. Masalan, uning xo‘jaligi, uning qasri va qasrni qurish usuli, xizmat qiluvchi odamlari, O‘rda aholisi va bekning shaxsiy hayoti. Hujjatlarda uning shaxsiy xo‘jaligi to‘g‘risida ma‘lumot yo‘q. Ehtimol bu nazorat qilinmagan.

Arxiv hujjatlarida Xudoyorxonning (udel yerlari) Qo‘qon yaqinidagi Yer-masjid yoki Marg‘ilon bekligiga yaqin deb ataluvchi udel yerlari to‘g‘risida ma‘lumot bor.

Arxiv hujjatlarida yana moddiy madaniyat, ya‘ni kiyim, mato haqida ma‘lumotlar uchraydi. Bu esa etnograflar uchun qiziqarli ma‘lumot hisoblanadi. Va nihoyat arxivda deyarli hech kim o‘rganmagan va manbalarda berilmagan O‘rta Osiyoning diplomatik masalalari to‘g‘risida qimmatli ma‘lumotlar bor. Bu savol kam o‘rganilganligini hisobga olib, katalog tuzuvchilarning birinchi ishi arxivda bor bo‘lgan alohida hujjatlarga qisqacha xarakteristika berishdan iborat bo‘ladi. Bu masalan; i o‘rganishning qiyinligi shundaki, arxiv hujjatlarida ularning nomlari belgilanmagan va hujjat matnida kamdan kam tilga olingan terminlarni aniqlashga to‘g‘ri keladi. Ko‘pgina hujjatlar analogiya bo‘yicha aniqlangan.

Savol va topshiriqlar:

1. Jo‘ybor xo‘jalari haqidagi manbalar xususida ma‘lumot bering?
2. Jo‘ybor xo‘jalari arxivi kimlar tomonidan o‘rganilgan?
3. Qushbegi arxiv hujjatlarining tarixi va o‘rganilishi.
4. Qushbegi arxiv hujjatlarida Buxoro amirligining XIX asr oxiri va XX asr boshlaridagi ma‘muriy, siyosiy-ijtimoiy ahvolidagi aks etishi.
5. Xiva xonligi qozilik arxivi nechanchi asrga taalluqli?
6. Xiva xonligi qozilik arxivining Xiva hamda butun O‘rta Osiyo tarixini o‘rganishdagi ahamiyati.
7. Qo‘qon xonligi hujjatlari qanday hujjatlar edi.
8. Qo‘qon xonligi hujjatlarida etnografik ma‘lumotlar.

Mustaqil ta‘lim uchun savol va topshiriqlar:

1. *Jo‘ybor xo‘jalari arxivi O‘rta Osiyo tarixi bo‘yicha muhim manba.*
2. *Qushbegi arxivi hujjatlari Buxoro amirligining ijtimoiy-siyosiy tarixi bo‘yicha muhim manba.*
3. *Xiva qozilik arxivi hujjatlarida xo‘jalik hayot masalalari.*
4. *Qo‘qon xonligi arxivi hujjatlari Qo‘qon tarixi bo‘yicha muhim manba.*

III BO‘LIM. XIX ASR SO‘NGGI CHORAGI VA XXI ASR BOSHLARIDA O‘ZBEKISTONDA ARXIV ISHI

9-§. Turkiston o‘lkasi mustamlaka davri arxivi (XIX asr oxiri – XX asr boshlari)

Darsning maqsadi: *Turkiston o‘lkasi mustamlaka davri arxivlari holati, ish yuritish sohasidagi o‘zgarishlar, Turkiston general-gubernatorligi devonxonasi va uning tasarrufidagi tashkilotlarning arxiv hujjatlarini saqlanish va butlash sohasida amalga oshirilgan ishlar to‘g‘risida talabalarga bilim berish, ularda arxiv hujjatlaridan foydalanish bo‘yicha ko‘nikma hosil qilish va malaka shakllantirish.*

Tayanch iboralar: K.K.Palen, A.L.Kun, P.I.Ivanov, “Buxoro Amirining Qushbegi arxivi”, Saltikov-Shedrin nomidagi Davlat jamoat kutubxonasi, Xiva va Qo‘qon xonliklari arxivi, arxiv komissiyasi, markaziy arxiv, fond I-1,

XX asrning 30-yillariga qadar Rossiya tomonidan O‘rta Osiyo hududi bosib olinmasdan avval xonliklarda davlat va shaxsiy arxivlar umuman bo‘lmagan, degan sayoz fikrlar mavjud edi. Hattoki bunday fikrlarni Rossiyaning yetuk tarixchilari V.V.Bartold, A.A.Semenov, V.A.Vyatkinlar ham targ‘ib qilishgan edilar.

Sovet hukumati O‘rta Osiyo xonliklarida shaxsiy va davlat arxivlari mavjud bo‘lganmi yoki yo‘qligi bilan qiziqqan. Shu kabi masalalarni aniqlash maqsadida o‘lkaga maktublar jo‘natgan. A.A.Semenov 1922-yilda RSFSR Markaziy Arxivi vakili, Turkiston Respublikasi Arxivlar boshqarmasi boshlig‘ining so‘roviga ko‘ra quyidagicha javob yozgan: “Sizning O‘rta Osiyoda eski arxivlar bor, yo‘qligi to‘g‘risidagi so‘rovingizga shuni ma’lum qilamanki, bu yerda bunday arxivlar bo‘lmagan. Umuman musulmon Sharqi va shu qatorda Turkiston bizning tushunchamiz bo‘yicha arxivlarni hech qachon bilmagan, chunki bu yerda devonxona qoidalari umuman o‘zgacha”. V.Vyatkin ham o‘sha so‘rovga quyidagilarni ma’lum qilgan: “Siz mendan xat orqali Turkistonni ruslar bosib olishi paytida bu yerda shaxsiy va boshqa arxivlar bor, yo‘qligini so‘rasangiz, men bu masala bilan ilgari ham shug‘ullanganman va ma’lumotlar to‘plaganman. Shu ma’lum bo‘ldiki, o‘lkada hech qanday shaxsiy arxivlar bo‘lmagan, bundan tashqari davlatga qarashli arxivlar va qog‘ozlar ombori ham bo‘lmagan. “Туркестанские ведомости” gazetasining 1873-yildagi 50-sonidagi musulmon xonliklarida

“Davlat arxivlari yoki boshqa bu kabi omborlar yo‘qligi”ni ta’kidlaydi. Bu kabi fikrlar bilan kelishib bo‘lmaydi.

Ma’lumki, O‘rta Osiyo xonliklari Eron, Hindiston hukmdorlari bilan diplomatik aloqalar o‘rnatgan, ular o‘rtasida yozishmalar amalga oshirilgan. Hattoki xonlar, amirlar, beklar, amaldorlar o‘rtasida ham ko‘p masalalar bo‘yicha ma’muriy xat almashuvlar olib borilgan. Har bir rasmiy hujjat mansabdor shaxsning mirzosi tomonidan tuzilib, muhr qo‘yilgan. Jo‘natilayotgan hujjatlarga chiqish raqami qo‘yilgan, ular hech qaerda ro‘yxatdan o‘tkazilmagan va nusxa olinmagan. Xat oluvchi xatni olib o‘sha vaqtdayoq farmoyish bergan. Yoki xatda unga javob qaytargan. Olingan hujjat uni unitishmaguncha saqlangan. Demak, o‘sha davr ish yuritishiga ko‘ra, devonxona hujjatlarni topshirish va qabul qilish bilan shug‘ullangan.

Ma’muriy-huquqiy hujjatlar ham yuritilgan. Bunday hujjatlardan faqatgina vaqf yorliqlari, xon va amir farmonlari, yer solig‘ini hisobga olish uchun kadastr yozuvlari saqlanib qolingan.

Sud ishlari og‘zaki hal qilingan, faqatgina ko‘chmas mulkni oldi-sotdi shartnomalari yozma holatda tuzilgan, lekin ulardan ham nusxa olinmagan, raqamlanmagan va sudlar (qozilarda) da saqlanib qolinmagan. Bundan tashqari, O‘rta Osiyo xonliklari o‘rtasida sodir bo‘lib turadigan o‘zaro urushlar natijasida ko‘p hujjatlar yo‘qolib ketgan bo‘lishi mumkin. Shuning uchun bunday hujjatlarni saqlash uchun hujjat omborxonalariga ehtiyoj sezilmagan ko‘rinadi. Xonlar saroylari devonxonalarida saqlanayotgan hujjatlar rus amaldorlari tomonidan tashib ketilgan, keyinchalik bu qimmatbaho, nodir hujjatlar kolleksiya sifatida, sovg‘a sifatida muzey va kutubxonalarga topshirilgan, hatto chet ellarga sotib yuborilgan.

Avvalgi mavzuda ko‘rib o‘tganimizdek, Rossiya tomonidan O‘rta Osiyo xonliklari bosib olinishidan avval, Buxoro amirligi, Xiva va Qo‘qon xonliklarida davlat ish yuritish an‘analari va hujjatchilik qadimiy asosga ega ekanligidan xabardor bo‘lgan edik.

Ma’lumki, 1931-yilda Buxoro arkining yerto‘lasidan tartibsiz yotgan 77764 dona o‘ram topilgan, bu o‘ramlar arab grafikasida tojik tilida yozilgan hujjatlar edi. Bu materiallar keyinchalik O‘zbekiston Markaziy davlat tarixi arxiviga topshirilgan. Buxoro Amirining Qushbegi arxivi hujjatlari XIX-XX asrning boshlariga tegishli bo‘lib, Rossiya siyosiy agentligi bilan ichki va tashqi siyosiy masalalar bo‘yicha xat almashuvlari, amirlik mansabdor shaxslar ustidan

shikoyatlar, yer solig‘i hujjatlari, jinoyatlarni tergov qilish hujjatlari va boshqalardan iborat edi.

Chor Rossiyasi Xivani bosib olib xon saroyidagi moddiy va ma‘naviy boyliklarni musodara qilingan. Xon saroyini musodora qilishda ishtirok etgan sharqshunos A.L.Kunga uch yuzga yaqin qo‘lyozma kitoblar berilgan, har xil hujjatlarni Osiyo muzeyiga ajratilgan, qolgan materiallarni general Kaufman Peterburgdagi imperator jamoat kutubxonasiga sovg‘a qilgan. Ushbu kutubxona va arxivning keyingi taqdiri noma‘lum bo‘lib ketgan edi, lekin 1936-yilda sharqshunos P.I.Ivanov Leningraddagi Saltikov-Shedrin nomidagi Davlat jamoat kutubxonasi-ning qo‘lyozmalar bo‘limida qo‘lyozmalar bilan ishlayotganida ro‘yxatga olinmagan hujjatlar ichida o‘zbek tilidagi hujjatlarni ko‘rib qoladi, hujjatlar Xiva xonligi arxivi ekanligi aniqlangan. Keyinchalik hujjatlarning ma‘lum bir qismi Qo‘qon xoni arxiviga tegishli ekanligi aniqlandi. P.P.Ivanov tomonidan jami bo‘lib 120 dona daftar topilgan, bu hujjatlar 1822-1872-yillarga taalluqli ekanligi aniqlangan.

Qo‘qon xoni arxivi hujjatlari ozroq edi. Sababi, Xudoyorxon saroyi talon-taroj qilingan vaqtida hujjatlarning aksariyati o‘g‘irlangan, qolganlari Peterburg va Toshkent jamoat kutubxonasi o‘rtasida bo‘lingan.

Chor Rossiyasi bosib olgan hududlari hisobidan Turkiston general-gubernatorligi tashkil qilgan edi. Keyinchalik bu viloyatga beshta Sirdaryo, Farg‘ona, Samarqand, Yettisuv, Kaspiyorti viloyatlari kirgan. Turkiston general-gubernatorligi devonxonasida ko‘pgina hujjatlar to‘planib qolgan. Hozirda general-gubernatorlik hujjatlari O‘zbekiston Markaziy davlat arxivida I-1 fondida saqlanmoqda. O‘sha paytda Turkistonda davlat yoki tarix arxivlari bo‘lmaganligi sababli ushbu hujjatlar muassasalarning o‘zida saqlangan. Biroq ko‘pchilik tashkilotlarda hujjat saqlash uchun xonalar, maxsus ajratilgan binolar bo‘lmagan. Graf K.K.Palen Turkiston o‘lkasida 1908-1909-yillarda taftish o‘tkazib, devonxonalar uchun qurilgan binolarda arxivlarga ajratilgan xonalar kichik ekanligini ta‘kidlab o‘tadi, shuningdek ko‘p hujjatlar muassasa rahbarlarining buyrug‘iga asosan yo‘q qilinganligi ko‘rsatiladi.

Rossiya o‘lkalarida arxiv hujjatlariga bee‘tibor bo‘lishgan. Oqibatda hujjatlarning kerakligi muddati o‘tgandan so‘ng yo‘q qilingan. Rossiya guberniyalarida arxiv hujjatlarini ommaviy ravishda yo‘q qilinishiga qarshi kurash maqsadida N.V.Kalachev loyihasi asosida 1884-yil guberniya rahbarligida arxiv komissiyasi tuziladi. Bu komissiyalarning asosiy vazifalari arxiv hujjatlarini to‘plash va saqlanish

muddatini aniqlash, ularni shafqatsiz yo‘q qilishdan saqlash va muassasalarda to‘plangan hujjatlarni ko‘rib chiqib, ularning ilmiy qiymatini aniqlashdan iborat edi. Lekin komissiya o‘z oldiga qo‘yilgan vazifalarni bajara olmadi, chunki komissiyaga arxivlarga kirish uchun ruxsat berilmagan, ularga faqat yo‘q qilish uchun ajratilgan hujjatlarni ko‘rib chiqish uchun ruxsat etilgan. Mana bunday komissiyalar Turkistonda ham tuzilgan edi.

1899-yil 1-aprelda Moskvadagi imperator arxeologlar jamiyati professor D.N.Samokvasovni ma‘ruzasiga mulohaza bildirishlari va bir necha savollarga javob berishlarini so‘rab barcha arxivlar, arxeograf va olimlar arxiv komissiyalariga murojaat qiladi. Turkistonda arxiv komissiyalari bo‘lmaganligi uchun xat arxeologiya xavaskorlari to‘garagiga yuborilar edi. Bu hujjatlarga to‘garak raisi o‘rinbosari N.Ostromov: - “Javob uchun ajratilgan vaqt qisqa bo‘lganligi sababli javobsiz qoldiradi”, - deb yozadi. Demak, qissadan hissa shulki, Turkistonda arxiv ishiga talab darajasida ahamiyat berilmagan, va hattoki, arxivni so‘rab qilingan murojaatlar ham javobsiz qoldirilgan.

Turkistonda arxiv ishini tashkil qilish va tartibga keltirish uchun faqatgina bir marotaba K.P.Kaufman uringan, u Turkiston general-gubernatorligi devonxonasi boshlig‘iga Toshkentda Markaziy arxiv uchun bino qurish haqida 1873-yil oktyabrda farmoyish bergan. Ma‘lumki, Turkiston general-gubernatorligining siyosiy markazi hisoblangan Toshkentda barcha asosiy ma‘muriy va harbiy idoralar joylashgan edi.

Bu markaziy arxivga barcha muassasa va idoralarning tugatilgan ishlari kelib tushishi kerak edi. Kaufman arxivga Toshkent jamoat kutubxonasini ham qo‘shishini istar edi. Markaziy arxivni 4 bo‘limga bo‘lish ko‘zda tutilgan:

1. Turkiston general-gubernatorligi bo‘limi hujjatlari;
2. Viloyat boshqaruvi, sud va Toshkent yarmarka komitetining hujjatlari;
3. Turk harbiy okrugining shtabi, Okrug harbiy soveti, topografiya bo‘limi va barcha harbiy bo‘limlar hujjatlari;
4. Sirdaryo viloyat shtati, komendant boshqaruvi, gospital ishlari kelib tushishi kerak edi. Lekin joydagi rahbarlarning bu ishga sovuqqonligi natijasida Kaufmanning bu harakatlari 18-avgust 1876-yilda to‘xtatilgan.

Ma'muriy va harbiy hujjatlarga sovuqqonlik bilan munosabatda bo'linishi, hujjatlarning saqlanish muddati, sharoiti inobatga olinmaganligi oqibatida ko'pgina hujjatlar izsiz yo'qolgan.

Shunday qilib aytish mumkinki, Turkiston general-gubernatorligida arxiv hujjatlarini saqlash, butlash va qimmatligini ekspertiza qilish hukumat rahbarlarining e'tiboridan chetda qolgan. Shuning uchun muassasalarning ko'p hujjatlari izsiz yo'q bo'lib ketgan. Etib kelganlarini saqlash maqsadida qirilishi boshlangan bino ayrim rahbarlarning mas'uliyatsizligi tufayli to'xtatilgan.

Savol va topshiriqlar:

1. O'rta Osiyoda Rossiya bosqini davrigacha arxiv ishi holati qanday edi.
2. O'rta Osiyoda Rossiya bosqini arafasida shaxsiy, davlatga qarashli arxivlar bormidi degan savolga mutaxassislarining javoblari.
3. Turkiston general-gubernatorligida arxiv ishining tashkil qilinishi.
4. O'rta Osiyoning Turkiston general-gubernatorligi davridagi arxivlari faoliyati to'g'risida so'zlab bering.
5. Turkiston general-gubernatorligida arxiv hujjatlarining asossiz muassasa rahbarlari buyrug'iga asosan yo'q qilinganligi to'g'risida so'zlab bering.
6. Rossiyada N.V.Kalachev loyihasi asosida 1884-yil guberniya rahbarligidagi arxiv komissiyasi nima maqsadda tuzilgan.
7. Markaziy arxiv uchun bino qurish haqida 1873-yil oktyabrdagi farmoyishda nima uchun Toshkent tanlandi.
8. Turkiston general-gubernatorligining Toshkentda qurilishi mo'ljallangan Markaziy arxivni qanday bo'limlarga bo'lishni nazarda tutgan.

Mustaqil ta'lim uchun savol va topshiriqlar:

1. *Rossiya bosqinidan so'ng Turkiston o'lkasida arxivlashtirish masalalari.*
2. *Turkiston general-gubernatorligi arxivi Turkiston o'lkasi tarixi bo'yicha muhim manba.*

10-§. O‘zbekistonda arxiv ishi (1917-1991)

Darsning maqsadi: *Sho‘ro‘lar hokimiyatining o‘rnatilishi bilan arxivshunoslik sohasida amalga oshirilgan yangiliklar, tashkilotlar hujjatlariga munosabatning shakllanishi, hujjatlarning ilmiy qimmatligi darajasini aniqlash, hujjatlarga ishlov berish sohasida erishilgan yutuqlar to‘g‘risida talabalarga bilim berish, ro‘nikma va malakasini shakllantirish.*

Tayanch iboralar: YaDAF, Bosharxiv, kino-foto-fono-hujjatlar, ekspert tekshiruv komissiya (ETK), “O‘zarxiv”, ilmiy-ma’lumot apparati (IMA).

Turkistonda arxiv ishi

1917-yil oktyabr voqealariga qadar hujjatlar har bir idorada va tashkilotning o‘zida saqlangan. Arxivlar tarqoq holda bo‘lib, hujjatlar bir joyda yig‘ilmagan, markazlashmagan edi. Hujjatlarni yig‘ish va saqlash ishiga e‘tiborsiz bo‘lingan. Oktyabr to‘ntarishidan keyin Turkiston RSFSR tarkibida avtonom respublika sifatida faoliyat ko‘rsata boshladi. Rossiya hukumati chiqargan barcha qonunlar va qarorlar Turkiston uchun ham joriy qilingan edi¹¹⁴.

1918-yil 1-iyunda RSFSR hukumati “Arxiv ishini qayta qurish va markazlashtirish to‘g‘risida” dekret qabul qildi. Dekretning qabul qilinishi barcha tarqoq arxivlarning markazlashishiga zamin yaratdi. Bir yildan so‘ng Turkiston Respublikasi Markaziy Ijroiya Komiteti (MIK) 1919-yil 5-noyabrda “Arxiv ishini qayta qurish va markazlashtirish to‘g‘risida” qaror qabul qildi. Bu qarorga asosan 1917-yilga qadar bo‘lgan barcha idoraviy arxivlar tugatildi, arxiv hujjatlari Turkiston Respublikasining Yagona davlat arxiv fondi (YaDAF)ni tashkil qiladi, deb e‘lon qilindi. YaDAFni boshqarish uchun Turkiston Respublikasi Arxiv ishi bosh boshqarmasi tashkil qilindi. YaDAFga 1917-yil 25-oktyabrgacha bo‘lgan barcha hujjatlar topshirilishi kerak edi.

“Arxiv ishini qayta qurish va markazlashtirish to‘g‘risida”gi qarorda arxiv hujjatlarini yo‘q qilish tartibi o‘rnatildi. Davlat idoralari Arxiv ishi bosh boshqarmasi ruxsatisiz o‘z hujjatlarini yo‘q qilish huquqiga ega emas, deb ko‘rsatilgan.

Sovet idoralarida tashkil bo‘lgan hujjatlar YaDAFning tarkibiy qismi deb qayd qilingan. Bu hujjatlarni Arxiv ishi bosh boshqarmasiga

¹¹⁴ Ushbu mavzu I.A.Alimov asari asosida yozilgan.

nazorat qilib turish topshirilgan. Bu boshqarma Maorif xalq komissarligi huzurida tashkil qilingan.

1919-yil 15-noyabrda Turkiston Respublikasi Maorif xalq komissarligi qaroriga binoan Arxiv ishi markaziy boshqarmasi tuzildi va V.N.Kucherbaev boshqarma boshlig'i etib tayinlandi.

Tez orada RSFSR Arxiv ishi bosh boshqarmasi (Bosharxiv)dan Toshkentga vakil qilib D.I.Nechkin yuborildi. Turkkomissiya uni Turkiston Respublikasi Arxiv ishi markaziy boshqarmasi boshlig'i qilib tayinladi. D.I.Nechkin MIKning arxiv to'g'risidagi qaroriga o'zgarishlar kiritdi. Muhim o'zgarish shu bo'ldiki, Turkiston Respublikasi arxiv ishi markaziy boshqarmasi boshlig'i RSFSR Bosharxivi roziligi bilan Turkiston Respublikasi Maorif xalq komissarligi qaroriga asosan tayinlanadi deb ko'rsatildi. Bu bilan Turkiston Respublikasi huquqi, shubhasiz, cheklandi.

Arxiv ishi markaziy boshqarmasi quyidagi bo'limlardan iborat edi: boshqarma boshlig'i huzuridagi kengash, ish boshqarmasi, ilmiy statistika bo'limi, inspeksiya, tahririyat kengashi, davlat arxivlari bo'limi.

Kengash maslahat organi bo'lib, bo'limlar rejalari, hisobotlarini eshitgan, ularning faoliyatini yo'naltirib turgan, ilmiy, metodik ishlarni tasdiqlagan va arxiv to'g'risidagi qonuniy hujjatlar loyihalarini ko'rib chiqish bilan shug'ullangan.

Inspeksiya davlat tashkilotlari ish yuritishini va arxivlari ishini nazorat qilgan.

Ilmiy statistika bo'limi arxivlar haqidagi ma'lumotlar yig'ish va metodik qo'llanmalar tayyorlash bilan mashg'ul bo'lgan.

YaDAF 8 ta sektsiya va 4 bo'limdan iborat bo'lgan. Bo'limlar quyidagilardan iborat bo'lgan:

1-bo'lim – ma'muriy-diplomatik, yuridik sektsiyalarni birlashtirgan;

2-bo'lim – harbiy sektsiya;

3-bo'lim – maorif va iqtisodiyot sektsiyalari;

4-bo'lim – tarixiy-inqilobiy, sharq va matbuot sektsiyalaridan iborat bo'lgan.

Davlat arxivi fondiga faqat 1917- yildan oldingi tashkilotlar arxiv hujjatlarigina emas, balki sovet tashkilotlari arxiv hujjatlari ham qabul qilingan. Tashkilotlarda hujjatlar 5 yil saqlanishi va keyin davlat arxiviga topshirilishi belgilangan. Bu qoida 1921- yil 30- sentyabrdan kuchga kirgan.

Joylarda viloyat arxiv bo'limlari tashkil qilindi. Masalan, 1920-yil martida – Farg'onada, 1920-yil iyunda – Samarqandda, o'sha yil noyabrda – Yettisuvda, 1921-yil martda – Kaspiy orti viloyatida ana shunday arxiv bo'limlari tashkil qilindi.

Mahalliy arxiv tashkilotlari Turkiston Respublikasi Xalq Komissarlari Soveti (XKS)ning 1921-yil 25-yanvardagi “Viloyat arxiv fondlari to'g'risida”gi qaroriga asosan qonuniy jihatdan rasmiylashdi. Bu qarorga ko'ra, viloyat hududidagi barcha idoralarning ish yuritish hujjatlari viloyat davlat arxivi fondining tarkibiy qismi hisoblanadi, deb ko'rsatilgan.

Markaziy va mahalliy arxiv tashkilotlarining muhim vazifasi arxiv hujjatlarini qidirib topish va yig'ish edi. 1920-1921-yillari 500 dan ortiq fondlar hisobga olindi. 1921-yil oxirigacha davlat arxiv fondlariga 157 ta harbiy va fuqaro tashkilotlari 305 mingdan ortiq yig'ma jildlarni topshirdilar. 1922-yili 83 ta tashkilot tomonidan 200 mingga yaqin yig'ma jild topshirildi.

Turkiston Respublikasi XKSning 1921-yil 25-yanvardagi qaroriga binoan arxivlarda qo'lyozma hujjatlarga emas, balki nashr qilingan materiallar va foto hujjatlar ham yig'ila boshlandi (varaqlar, xitobnomalar, tarixiy kitoblar va risolalar). Arxiv hujjatlarini saqlash choralari ko'rildi. Hukumatning 1921-yil 23-iyundagi buyrug'i bilan hujjatlarni yo'q qilish man qilindi.

Arxiv tashkilotlari hujjatlarni qabul qilish bilan birga ularni tartibga keltirish ishlari hamda arxiv hujjatlaridan foydalanishni tashkil qilish, ularni bayon qilish bilan shug'ullandilar. Arxiv hujjatlari ro'yxatini tuzishdan oldin bu hujjatlar kerak va keraksizlarga ajratilib, ilmiy, amaliy ahamiyati borlarini doimiy saqlash, bunday qimmatga ega bo'lmaganlarini yo'q qilish belgilandi, ya'ni arxiv materiallarining o'ziga xos ekspertizasi o'tkazildi. Bu masala bo'yicha Turkiston respublikasi XKSning 1923-yil 25-yanvardagi “Arxiv hujjatlarini saqlash va yo'q qilish to'g'risida”gi qarorida yo'l-yo'riqlar, ko'rsatmalar berildi.

Ushbu qororda arxiv hujjatlarining yo'q qilishni quyidagi tartibi o'rnatilgan edi: arxiv hujjatlari tarkibidan yo'q qilinadigan hujjatlarni ajratish uchun Ajratish komissiyalari tuzilib, ularga Arxiv boshqarmasi va arxivi tekshirilayotgan idora vakillari kiritilishi belgilangan. Bu komissiya qarorini Arxiv ishi Markaziy boshqarmasi huzuridagi Tekshirish komissiyasi ko'rib chiqib, o'z xulosasini Boshqarma boshlig'i tasdig'iga havola qilardi. Shunday qilib, tashkilotlar hujjatlarini

yo‘q qilish huquqi arxiv idorasiga – Arxiv ishi Bosh boshqarmasiga topshirildi. Davlat tashkilotlari uning ruxsatisiz arxiv hujjatlarini yo‘q qilish huquqiga ega emas edi. Arxiv xodimlari hujjatlarni yo‘q qilishga juda ehtiyotkorlik bilan yondashishardi.

YaDAF tarkibidagi arxiv hujjatlari ekspertiza qilinib, doimiy saqlash uchun ajratilgan hujjatlar tartibga solindi va ro‘yxatlashtirildi. 1920-1922-yillarda YaDAFda 150 mingga yaqin hujjatlar ro‘yxatga olingan. 1924-yilga kelib butun saqlanayotgan arxiv materiallarining uchdan bir qismi tartibga solingan edi.

Arxiv hujjatlarini tartibga solish ulardan ilmiy va amaliy maqsad-da foydalanish imkonini berdi. Arxivning ilmiy xodimlari bir necha ilmiy ishlar tayyorlashdi. Masalan;, A.A.Galperin “1918-yil martda Kolesovning Buxoroga yurishi” asarini yozgan edi.

O‘zbekistonda arxiv ishining tashkil qilinishi (1925-1990 y.y.)

1924-yilda O‘rta Osiyoda milliy-hududiy chegaralanishi o‘tkazilishi natijasida sovet respublikalari tashkil qilindi. Arxiv hujjatlari yangi tuzilgan respublikalar o‘rtasida quyidagi tartibda bo‘lindi. O‘rta Osiyo va ittifoq ahamiyatiga ega bo‘lgan arxiv fondlari O‘rta Osiyo Markaziy davlat arxivida – Toshkentda saqlanadigan bo‘ldi. Har bir respublikaga oid arxiv fondlari shu respublikaga beriladigan bo‘ldi. Turkiston Respublikasining Yagona davlat arxivi fondi shu tarzda bo‘linib ketdi.

1924-yil 28-dekabrda maxsus qaror bilan O‘zSSR MITK huzurida O‘zSSR Arxiv ishi markaziy boshqarmasi tashkil qilindi. O‘zbekiston hududida tashkil topgan barcha viloyat arxiv fondlari O‘zSSR Arxiv ishi markaziy boshqarmasiga topshirildi. Shuningdek, O‘rta Osiyo ahamiyatiga ega bo‘lgan arxiv fondlari ham O‘rta Osiyo markaziy davlat arxivi tuzilmaganligi uchun O‘zbekiston arxiv boshqarmasiga topshirildi, chunki ushbu O‘rta Osiyo arxiv fondlari Toshkentda vujudga kelgan edi. Shunday qilib, O‘zSSR arxivida faqat respublika tarixiga oid hujjatlarga emas, balki butun O‘rta Osiyo tarixiga doir materiallar saqlana boshladi. O‘zSSR MİK va XKSning 1925-yil 22-iyul qarori bilan “O‘zSSR Arxiv ishi markaziy boshqarmasi to‘g‘risida”gi nizom tasdiqlandi. Bu nizomga ko‘ra, respublikada Yagona davlat arxiv fondi (YaDAF) tashkil qilindi. Bu fondga hukumat, savdo, sanoat, kooperativ, kasaba uyushmalari tashkilotlari arxivlari, shuningdek diniy va shaxsiy arxivlar kiritildi, deb ko‘rsa-

tildi. Viloyatlarda viloyat arxiv byuro'lari (1925-yilda -Farg'ona, Samarqand, Toshkent, Zarafshon, 1926-yilda – Xorazm, Qashqadaryo, Surxondaryo) tashkil qilindi.

O'rta Osiyoda milliy hududiy chegaralanish o'tkazilishi natijasida va Turkiston, Buxoro va Xorazm respublikalarining tugatilishi munosabati bilan bu respublikalar davlat idoralari arxiv materiallarini qabul qilish, ularni respublika poytaxti Samarqandga olib borib topshirdilar. 1925-yil yanvar oyining o'zida Arxiv ishi markaziy boshqarmasiga 50 mingga yaqin saqlov birligidagi arxiv materiallari topshirildi. Davlat arxivlarini arxiv materiallari bilan butlash ishlari olib borilishi barobarida 1925-1929-yillarda 134 ta arxiv fondi qabul qilindi. 1929-yili Arxiv ishi markaziy boshqarmasi 863 ta arxiv fondi va 764 ming yig'ma jild qabul qilgan. Viloyatlar arxivlarida 924 ta arxiv fondi va 994 ming yig'ma jild saqlangan.

1930-yil 9-apreldagi O'zSSR MIK Prezidiumi qarori bilan O'zSSR Arxiv ishi markaziy boshqarmasi O'zSSR Markaziy arxiv boshqarmasi deb o'zgartirildi.

Sovet davri arxivlarining ko'payib borishi bilan SSSR MIK va XKS qarori asosida 1929-yil aprelda Davlat arxiv fondi kelib chiqishi bo'yicha inqilobgacha va sovet davri arxiv fondlariga hamda ahamiyati bo'yicha markaziy va mahalliy arxiv fondlariga bo'lindi.

1931-yil 20-mayda O'zSSR MIK O'zSSR Markaziy arxiv boshqarmasi va uning mahalliy idoralari to'g'risida nizom haqida qaror qabul qildi.

O'zSSR Markaziy arxiv boshqarmasi huzurida O'zSSR Oktyabr inqilobi markaziy davlat arxivi va Markaziy davlat tarix arxivi tashkil qilindi.

1934-yil iyulida SSSR MIK qarori bilan O'zbekiston Markaziy arxiv boshqarmasi tarkibida O'zbekiston harbiy arxivi tashkil qilindi. 1945-yilda bu arxiv tugatildi va barcha arxiv fondlari Moskvadagi SSSR Qizil Armiya markaziy davlat arxiviga topshirildi.

1939-yili respublika arxiv tashkilotlari O'zSSR MIK huzuridan O'zSSR ichki ishlar xalq komissariati (IIXK - NKVD) qaramog'iga o'tkazildi. Shu munosabat bilan O'zSSR Markaziy arxiv boshqarmasi o'rniga O'zSSR Ichki ishlar xalq komissariati Arxiv bo'limi tashkil qilindi.

Arxiv ishlarini takomillashtirish sari qo'yilgan qadamlar natijasida 1936-yilga kelib respublika arxivlarida 1534 ta arxiv fondlari va 1 mln 001 ming 680 saqlov birligidagi hujjatlar saqlanardi. 1941-yilga kelib fondlar soni 4116 taga yetdi, hujjatlar esa, 1 mln 580 ming 450 saqlov birligidan oshib ketdi.

Urush yillarining og‘ir damlariga qaramay respublika hukumati arxiv ishini yaxshilash sohasida ancha ishlarni amalga oshirdi. O‘zSSR XKSning 1943-yil 18-fevral qarori bilan O‘zSSR kino-foto-fono-hujjatlar markaziy davlat arxivi tashkil qilindi.

Arxivlarni hujjatlar bilan butlash ishlari davom ettirildi. 1941-1942-yillarda respublika davlat arxivlariga 0,5 (yarim) million saqlov birligida hujjatlar qabul qilindi. 1944-1945-yillarda esa 48 ming saqlov birligida hujjatlar qabul qilindi. Lekin hujjatlarni tartibga solish ishlari ancha sust edi. Urushdan keyingi yillarda mavjud arxiv fondlarini tartibga solish sohasida anchagina ishlar qilindi. 1945-1951- yillarda 280 mingga yaqin saqlov birligi tartibga keltirildi. O‘zSSR Markaziy davlat tarix arxivining ko‘rsatkichi tayyorlandi va O‘zSSR Oktyabr inqilobi markaziy davlat arxivi ko‘rsatkichi ustida ish boshlandi. Bundan tashqari, 10 dan ortiq arxiv fondlarining sharhi-axborotnomasi tuzildi, tematik sharhlar yozildi.

1963-yil 14-oktyabrda O‘zSSR Ministrlar Soveti “O‘zSSRda arxiv ishini yaxshilash tadbirlari to‘g‘risida” qaror qabul qildi. Bu qaror idoraviy arxivlar, ya’ni tashkilotlar arxivlari ishini yaxshilashda muhim ro‘l o‘ynadi. Unga ko‘ra, idora arxivlarini 2-3 yil ichida tartibga solishni tugatish, doimiy saqlanadigan hujjatlarni davlat arxivlariga topshirish, arxivlarning o‘zini esa, hujjatlarini beshikast saqlashga yaraydigan binolarga joylashtirish va ularni malakali kadrlar bilan ta’minlash keng yo‘lga qo‘yildi. 1964- yili MDAGA yangi bino qurilib foydalanishga topshirildi. 1970- yili O‘zSSR kino-foto-fono-hujjatlar MDAGA maxsus bino qurib berildi.

Davlat arxivlariga hujjatlarni qabul qilish sohasida ham anchagina ishlar qilindi. 1946-1955-yillarda 600 mingdan ortiq saqlov birligidagi hujjatlar vazirliklar, idoralar arxivlaridan qabul qilindi.

Ministrlar Sovetining 1961-yil 9-maydagi qarori bilan O‘zbekiston Ichki ishlar ministrligining arxiv boshqarmasi O‘zbekiston Ministrlar Soveti huzuridagi Arxiv boshqarmasi deb qayta tashkil qilindi. Shu qaror asosida mahalliy arxiv tashkilotlari Qaraqolpog‘iston ASSR Ministrlar Soveti va viloyatlar ijroiya qo‘mitalari Arxiv bo‘limlari qilib qayta tashkil qilindi. Arxiv tashkilotlarini Ministrlar Soveti va viloyatlar ijroiya qo‘mitalari ixtiyoriga o‘tkazilishi ularni davlat apparati tuzimidagi ro‘lini orttirdi va arxiv ishi taraqqiyotida yangi bosqichni boshlab berdi.

Arxiv tashkilotlari hujjatlar qimmatdorligini ekspertiza qilishga va ular bilan davlat arxivlarini butlashga katta e'tibor qaratdi. Respublika davlat arxivlari hujjatlari qabul qilinadigan va qabul qilinmaydigan tashkilotlar, muassasalar, korxonalarining ro'yxatlarini tuzib chiqdilar, endilikda shu ro'yxat asosida davlat arxivlariga hujjatlarni qabul qiladigan bo'ldilar. Davlat arxivlarining ekspert tekshiruv komissiya (ETK) lari vazifalari tubdan o'zgardi.

1986-1990-yillarda davlat arxivlarini butlash sohasida ancha ish amalga oshirildi. 1990-yilda arxivlarni butlash manbalari soni respublika bo'yicha 9576 taga yetdi. 1986-1990-yillarda respublika davlat arxivlari saqloviga 635 ming doimiy saqlanadigan yig'majildlar qabul qilindi.

1962-yilda Toshkentda O'zbekiston meditsina hujjatlari markaziy davlat arxivi tashkil qilindi. 1990-yilda respublika arxiv tashkilotlari shaxobchalari O'zSSR Ministrlar Soveti huzuridagi Bosh arxiv boshqarmasi, Qoraqalpog'iston Respublikasi Ministrlar Soveti huzuridagi Arxiv boshqarmasi, 11 viloyatlar ijroiya qo'mitalari **arxiv** bo'limlari, 3 ta markaziy davlat arxivlari, Qoraqalpog'iston Respublikasi Markaziy davlat arxivi, 11 viloyatlar arxivlari, 40 dan ortiq viloyatlar davlat arxivlari filiallaridan iborat edi.

Savol va topshiriqlar:

1. Turkiston Respublikasi Yagona davlat arxiv fondi (YaDAF)ning tashkil etilishi.
2. Arxiv ishi markaziy boshqarmasining tuzilishi.
3. Arxiv ishi markaziy boshqarmasi bo'limlari to'g'risida **so'zlab** bering.
4. 1924-yilda O'rta Osiyoda milliy-hududiy chegaralanishning o'tkazilishi va arxiv ishi.
5. O'zbekistonda arxiv ishining tashkil qilinishi (1925-1930 y.y.).
6. Markaziy va mahalliy arxiv fondlarining tashkil qilinishi.
7. O'zSSR Oktyabr inqilobi markaziy davlat arxivi va Markaziy davlat tarix arxivining tashkil qilinishi.
8. O'zbekistonda arxiv ishining tashkil qilinishi (1940-1990 y.y.).

Mustaqil ta'lim uchun savol va topshiriqlar:

1. *O'zbekistonda arxiv ishi sohasida amalga oshirilgan tadbirlar (1917-1940 y.y.).*
2. *O'zbekistonda arxiv ishi sohasida amalga oshirilgan tadbirlar (1940-1990 y.y.).*

11-§. Mustaqillik davrida O‘zbekistonda arxiv ishining takomili

Darsning maqsadi: *Mustaqillik yillarida mulkchilik turlarining ko‘payishi va hujjatlarni arxivlashtirish sohasidagi o‘zgarishlar, Respublikada arxiv sohasida amalga oshirilayotgan islohotlar, arxivlarning moddiy-texnik bazasini mustahkamlash bilan bog‘liq masalalar to‘g‘risida talabalarga bilim berish, ro‘nikma va malakasini shakllantirish.*

Tayanch iboralar: Milliy arxiv fondi, “Arxivlar to‘g‘risida” Qonun, “O‘zarxiv”, “Arxiv ishi to‘g‘risida”gi O‘zbekiston Respublikasi Qonuni, ilmiy-ma’lumot apparati (IMA).

O‘zbekiston mustaqillikka erishgach jamiyatimizning barcha sohalarida, jumladan arxiv ishini rivojlantirish sohasida ham tub o‘zgarishlar sodir bo‘ldi. Bozor iqtisodiyoti munosabatlariga asoslangan jamiyatni barpo etish borasida, davlat mulkini xususiylashtirish, ko‘p ukladli iqtisodiyotni vujudga keltirish, ishlab chiqarish korxonalari va xususiy biznesni rivojlantirish natijasida nodavlat arxiv fondlari tashkil qilindi. Nodavlat sanoat, qurilish korxonalari, fermer xo‘jaliklari, kasaba uyushmalari, xayriya va boshqa jamg‘armalari, siyosiy partiyalar va harakatlar, diniy tashkilotlar arxiv fondlari nodavlat arxiv fondini tashkil qildi. Davlat va nodavlat arxiv fondlari O‘zbekiston Respublikasi Milliy arxiv fondi (O‘zMAF)ga aylantirildi. O‘zR Milliy arxiv fondi hujjatlarini davlat ro‘yxatidan o‘tkazish va hujjatlar egasiga, tashkilotga maxsus guvohnoma berish joriy etildi.

Bozor iqtisodiyoti sharoitida korxonalar va tashkilotlarning shaxsiy tarkib bo‘yicha hujjatlari saqlanishini ta‘minlash maqsadida respublika shaharlari va tumanlari hokimliklari tomonidan shaxsiy tarkib bo‘yicha idoralararo arxivlar soni ortdi.

O‘zbekiston Respublikasi hukumati arxiv ishi bo‘yicha Qonun va me‘yoriy hujjatlar ishlab chiqdi. 1999-yil 15-aprelda O‘zbekiston Respublikasi Oliy Majlisi “Arxivlar to‘g‘risida” Qonun va O‘zbekiston Respublikasi Vazirlar Mahkamasi 1999-yil 30-oktyabrda “Arxiv ishi bo‘yicha me‘yoriy hujjatlarni tasdiqlash to‘g‘risida”gi 482-sonli Qaror qabul qildi. Vazirlar Mahkamasining qarori bilan “O‘zbekiston Respublikasi Milliy arxiv fondi to‘g‘risida Nizom”, “O‘zbekiston Respublikasi Milliy arxiv fondi hujjatlarining davlat ro‘yxatidan o‘tkazish tartibi”, “O‘zbekiston Respublikasi Vazirlar Mahkamasi huzuridagi

Bosh arxiv boshqarmasi (“O‘zbosharxiv”) to‘g‘risida Nizom”, “O‘zbekiston Respublikasi Davlat hokimiyati va boshqaruvi organlari, korxonalar, muassasalar va tashkilotlardagi idoraviy arxiv to‘g‘risida Namunaviy nizom” tasdiqlandi. Bu hujjatlar respublika arxiv idoralari mustaqilligini, erkinligini qonuniy yo‘l bilan rasmiylashtirdi.

Respublikada arxiv sohasida amalga oshirilayotgan islohotlar arxivlar to‘g‘risidagi Qonunni qayta ko‘rib chiqish va takomillashtirish ehtiyojini yuzaga keltirdi. Natijada 2010-yil 15-iyunda “Arxiv ishi to‘g‘risida”gi O‘zbekiston Respublikasi Qonuni qabul qilindi. Qonunda arxiv muassasasi, idoraviy arxiv, arxiv hujjati kabi o‘ziga xos institutlar mohiyati amaliyotga mos ravishda ajratilib, har birining haqqoniy tushunchasi yoritib berilgan. Bundan tashqari, unda MAF va davlat arxivlari qatori nodavlat arxivlar, idoraviy arxivlar, shaxsiy arxiv hujjatlari tarkibida ham butlanishi, hisobga olinishi, saqlanishi va ulardan foydalanishi mumkinligi ko‘rsatib o‘tilgan.

O‘zbekiston Respublikasi Vazirlar Mahkamasining 2004-yil 3-fevraldagi “O‘zbekiston Respublikasi arxiv ishini boshqarishni yanada takomillashtirish to‘g‘risida”gi 49-sonli Qaroriga ko‘ra “O‘zbosharxiv” “O‘zbekiston Respublikasi Vazirlar Mahkamasi huzuridagi “O‘zarxiv” agentligiga aylantirildi. Joylarda hokimliklar arxiv bo‘limlari o‘rniga Arxiv ishi hududiy boshqarmalari tashkil qilindi.

Mustaqil O‘zbekistonda bozor iqtisodiyotiga o‘tish jarayonida ko‘plab xususiy, nodavlat tashkilotlar, korxonalar va ularning arxiv fondlari vujudga keldi. Nodavlat tashkilotlar idoraviy arxivi ularning mulki hisoblanadi.

Davlat va nodavlat korxonalar arxivi fondi hujjatlarini saqlash uchun hujjatlar saqlaydigan joylarning mavjudligi va undagi talab darajasida shart-sharoitning bo‘lishi muhim sanaladi. 1996-yilga qadar respublikada faqat 9 ta davlat arxivlari uchun maxsus qurilgan bino mavjud bo‘lgan. 68 ta davlat arxivlarining binolari hujjatlar saqlash uchun moslashtirilgan binolar bo‘lib, ularning ko‘pchiligi hujjatlar bilan to‘lgan va idoraviy arxivlardan davlat saqlovi uchun hujjatlar qabul qila olmas edi. Arxivlarning rejali butlashni ta‘minlash uchun respublika bo‘yicha 1,5 mln dan ortiq yig‘ma jild saqlanadigan joylar qurilishi lozim edi.

2008-yil 26-avgustda qabul qilingan Vazirlar Mahkamasining “O‘zbekiston Respublikasi arxiv ishini yanada rivojlantirishga doir qo‘shimcha chora-tadbirlar to‘g‘risida”gi 194-sonli Qarori bilan tasdiqlangan 2011-yilgacha arxiv ishini va ish

yuritishni rivojlantirish Dasturi hamda Maqsadli mo'ljallariga davlat arxivlari uchun yangi binolar qurish, ta'mirga muhtoj binolarni rekonstruksiya qilish kiritildi. 2011-yilgacha bo'lgan maqsadli mo'ljallariga muvofiq 2008-2011-yillar davomida 18 ta markaziy davlat arxivi, viloyat davlat arxivlari hamda uning filiallariga qo'shimcha arxiv saqlovxonasi qurish, 2 ta davlat arxivi va uning filialiga qo'shimcha arxiv saqlovxonasi ajratish ishlari amalga oshirilishi belgilandi.

Mustaqillik yillarida MAF hujjatlarini butlash hamda saqlash va ularning xavfsizligini ta'minlash maqsadida, saqlovxonalarni havoni mo'tadillashtirish tizimi, yong'inni o'chirish va yong'inga qarshi signalizatsiyaning zamonaviy tizimi, binoda va o'quv zallarida perimetral nazorat va video kuzatish tizimi, metall stellajlar bilan, yig'ma jildlarni kartonlashtirish uchun qutilar, davlat arxivlarini noyob va alohida qimmatli hujjatlarni restavratsiya qilish, konservatsiya qilish va ehtiyot nusxalari ko'chirish uchun yuqori texnologiyali asbob-uskunalar bilan jihozlashga e'tibor qaratilmoqda.

Mustaqillik sharoitida arxiv ishini boshqaruv davlat organi O'zbekiston Vazirlar Mahkamasi huzuridagi "O'zarxiv" agentligi hisoblanadi. Uning tizimiga Qoraqalpog'iston Respublikasi, viloyatlar va Toshkent shahri hududiy boshqarmalari, ularning qaramog'idagi davlat arxivlari (ularning filiallari) hamda markaziy davlat arxivi kiradi.

O'zbekiston davlat arxivlarida hujjatli axborotlar bilan ta'minlash uchun O'zR Milliy arxiv fondi (MAF) tarkibi va mazmuni to'g'risida ilmiy-ma'lumot apparati (IMA) barpo qilindi. Davlat arxivlarining IMA tarkibiga quyidagi ma'lumotnomalar kiradi: 1) arxiv ro'yxati (opislar); arxiv bo'yicha yo'lko'rsatkich (putevoditel); 3) viloyat arxivi bo'yicha qisqacha ma'lumotnoma; 4) fondlar katalogi; 5) tizimli, ismli, mavzuli kataloglar; 6) fondlar va mavzular bo'yicha sharhlar. Viloyat davlat arxivlari filiallarida fondlar katalogi va ro'yxatlar, viloyat davlat arxivlarida bulardan tashqari arxiv fondlari bo'yicha qisqacha ma'lumotnoma va tizimli katalog. Markaziy davlat arxivlarida IMANing barcha turlari albatta bo'lishi kerak.

Hozirgi kunda O'zbekiston Respublikasida 80 dan ortiq davlat arxivlari bo'lib, ularda 6 mln. yig'majildlardan ziyod hujjatlar asrab-avaylab saqlanmoqda. Bu hujjatlardan turli sohalar bo'yicha tadqiqotchilar, talabalar va boshqa mutaxassislar ilmiy, madaniy-ma'rifiy izlanishlarda keng foydalanmoqda.

Hozirgi kunda jahonda globallashuv jarayoni jadallashgan, axborot-texnologiyalari inson faoliyatining barcha sohalariga jadal

kirib borayotgan davrda O'zbekistonda arxiv ishini yanada takomillashtirish masalasi asosiy vazifa bo'lmog'i kerak. Zero, arxiv ishida yangi informatsion texnologiyalarning tadbiq etilishi hujjatli ma'lumotlarga ega bo'lish imkoniyatini kengaytiradi, arxiv hujjatlarini qidirib topishning yangi usullari yaratilishini talb qiladi.

Arxiv ishini axborotlashtirish bu informatika fanining nazariy va amaliy ishlanmalarini arxiv ishiga tadbiq etish yordamida arxiv hujjatlariga ishlov berish texnologiyalari takomillashtirishni, arxivlarni saqlash imkoniyatlarini qidirib topishni talab etmoqda.

Bugungi kunda O'zbekiston arxivlari ish suratini yanada jadallashtirish maqsadida rivojlangan Yevropa davlatlaridagi hujjatlarni arxivlashtirish uslublarini o'rganib chiqish va ularni saqlash choralarini izlab topishni talab etmoqda. Shu madsadda Yevropa ittifoqi institutlari va organlarining arxivlar xizmati, arxivdagi ish jarayonlari va arxivlarni manbalar bilan ta'minlash bo'yicha amalga oshirilayotgan ishlar ko'lami ortib bormoqda.

XXI asrdagi zamonaviy ijtimoiy boshqaruvdagi tezkorlik, axborotlarning o'sib borishi, elektron hukumatning oldinlab ketishi, raqamlashtirish va yangi texnologiyalarning joriy etilishining zaruriyati bo'yicha o'zgarishlar shiddat bilan davom etmoqda. Yevropa ittifoqi a'zolarining ko'payishi ma'muriy boshqaruv madaniyatini tizimlashtirishni talab etadi.

Bugungi kunda yer yuzining ko'pgina davlatlarida elektron hujjatlarni boshqarish va saqlash doirasida ko'pgina ishlar amalga oshirilgan. Elektron hujjatlarning huquqiy-normativ asoslari ham shakllangan. Elektron hujjatlarni tadbiq etishning ba'zi muammolari xalqaro darajada, boshqalari esa davlatning ichki doirasida hal etiladi. Elektron hujjat aylanishini amalga oshirish uchun kelajakda dasturiy ahamiyatga ega bo'ladigan normativ hujjatlarning qabul qilinishi talab etiladi. Ushbu normativ hujjatlar orqali elektron hujjatlar aylanishi, saqlanishi, qo'lga kiritilishi, ulardan foydalanish qoidalari va ishning boshqa ko'pgina jihatlari tartibga solinadi.

Shundan kelib chiqib, arxiv xizmatlarini uyg'unlashtirish maqsadida o'quv kurslari yoki ish yuritishni o'rganish bo'yicha dasturlarni ishlab chiqish taklif qilinadi.

Hozirgi kunda katta o'zgarishlar bo'layotgan dunyoda yashayotgan ekanmiz, bu o'zgarishlar talabga javob beradigan va uzoq muddat davomidagi arxiv hujjatlarini saqlashga va arxiv

me'rosidan foydalanishda ba'zi xavf xatarlarni tug'dirishi mumkinligini e'tibordan qochirishni talab qiladi. Zero, ochiq xildagi arxivlarga tabiiy ofatlar va boshqa fojeaviy holatlarning yetkazishi mumkin bo'lgan ziyonlarning oldini olish hamda shikast yetgan arxiv hujjatlarini tiklash texnologiyalarini yaratishni talab etadi.

Savol va topshiriqlar:

1. Mustaqil O'zbekistonda arxiv ishini takomillashtirish bo'yicha qabul qilingan huquqiy-me'yoriy hujjatlar to'g'risida ma'lumot bering.
2. Davlat arxivlari faoliyqtida amalga oshirilgan o'zgarishlar to'g'risida so'zlab bering.
3. "Arxiv ishi to'g'risida"gi qonunning qabul qilinishi.
4. O'zbekiston Respublikasining "O'zarxiv" agentligi va "O'zbosharxiv" boshqarmasi faoliyatlaridagi farqlar to'g'risida so'zlab bering.
5. Arxiv hujjatlaridan foydalanishda qo'llaniladigan zamonaviy texnik vositalar deganda qanday vositalar tushuniladi.
6. Respublikamizda arxivshunos kadrlarni tayyorlash borasida qanday ishlar amalga oshirilishi ko'zda tutilgan.
7. Elektron hujjatlarning huquqiy-normativ asoslarini qanday tushunasiz.
8. Elektron hujjatlarni tadbiq etishning muammolari qanysi maqomda hal qilinadi.
9. Hujjatlarni arxivlashtirishda zamonaviy G'arb tajribasidan foydalanish deganda nimani tushunasiz.

Mustaqil ta'lim uchun savol va topshiriqlar:

3. *Mustaqil O'zbekistonda arxiv ishini takomillashtirish bo'yicha amalga oshirilgan tadbirlar.*
4. *Mustaqil O'zbekistonda arxiv ishini takomillashtirish borasida zamonaviy G'arb tajribasining qanday usullaridan foydalanish maqsadga muvifiq.*

GLOSSARIY

Arxiv – arxiv hujjatlari majmui, shuningdek arxiv muassasasi yoki korxon, muassasa va tashkilotning arxiv hujjatlarini qabul qiluvchi, saqlovchi va ulardan foydalanuvchi tarkibiy bo‘linma

Arxiv hujjatlar qimmatligini aniqlash ekspertizasi – hujjatlarni saqlanish muddatini belgilash maqsadida ularning qimmatini aniqlash uchun tuzilgan guruh

Arxiv qonunchiligi – arxiv sohasini tartibga solish maqsadida qabul qilingan arxiv ishi bilan bog‘liq qonunlar va qonunosti hujjatlari

Arxivshunoslik – arxivlar haqidagi fan bo‘lib, arxiv ishining tarixi, arxiv faoliyatining vazifalari va xarakteri, ularni komplektatsiya qilish tamoyillari va arxiv hujjatlaridan foydalanishni o‘rganadi

Arxivarius – arxiv xodimi

Baqtriya yozuvlari – Kushonlar davrida shakllangan boxtar yozuvi ijtimoiy va madaniy hayotning hamma sohalarida keng qo‘llangan. Baqtar yozuvi orqali bizgacha ko‘plab noyob hujjatlar yetib kelgan. Kushonlar saltanati davriga qadar davlat mahkamachiligida yunon alifbosidan foydalanilgan bo‘lsa, Kanishka davrida islohot ro‘y berib, yunon alifbosi boxtar tiliga moslashtirilgan. Kanishka davri tangalaridagi yozuvlar boxtar tilida yozila boshlangan. Monumental yodgorliklarda ham boxtar yozuvi na‘munalari uchraydi, jumladan, Ayritomdan topilgan buddaviy haykallar guruhi tag kursisidagi hamda Surx Ko‘tal ibodatxonasiidagi toshga o‘yilgan xotiro bitigi ham shu tilda yozilgan.

Beresta – qayin yoki terak po‘stiga yozilgan matn.

Behistun yozuvlari – Kambiz hukmronligining oxirlaridagi voqealarni va Doro I podsholigining birinchi yillaridagi tarixiy voqealarni o‘zida aks ettirgan Kirmonshoxdan sharqda 30 km masofadagi Bobil bilan Ekbatanni bir-biriga bog‘laydigan karvon yo‘li ustidaga Behistun qoyasiga yozilgan yozuv. Yozuv 105 m balandlikda tik tog‘ qoyasiga fors, elam va akkad tilida yozilgan. Yozuvning umumiy balandligi 7,80 m, eni 22 m.

Bronza qo‘ng‘iroqcha – 1952-yilda Kulob viloyatining Dashtijum tumanidan bronza qo‘ng‘iroqcha topilgan. Qo‘ng‘iroqchaga yunon harfiga o‘xshash bo‘lgan 17 (yoki 18) belgidan iborat yozuv yozilgan edi. Bu yozuv hanuzgacha o‘qilmagan.

Bulla – hujjat o‘rami bog‘langan tizimcha ustidan yopishtirilgan qizil tuproqdan qilingan loy. Unga odatda muhr bosilgan. Bu loy muhr hujjatni adresatga yetguncha hech kim ochmaganiga guvohdir.

Bull – farmon 1952-1955-yillarda turk arxeologlari Kichik Osiyodagi Eron satrapi poytaxti Daskildan ahmoniylar davriga oid 300 ga yaqin farmon topilgan, ulardan 41 ta farmon mixxat yozuvidagi va aramey yozuvidagi muxrlarning bo‘laklari (bull-farmon) bilan tasdiqlangan.

Buxoro amiri Qushbegi arxiv hujjatlari – hozirda O‘zbekiston Respublikasi Markaziy Davlat arxivi fondida (№ I-126) saqlanadi. Ushbu arxiv xonlikning ijtimoiy-siyosiy tarixi, iqtisodiyoti va boshqa masalalarni o‘rganishda muhim manba ro‘lini o‘taydi. “Qushbegi arxivi”ning yuz mingdan ortiq hujjatlari 2656 papkaga joylashtirilib, mazmuniga ko‘ra o‘n bir guruhga ajratilgan.

Vaqfnoma – biror mulkning vaqfga berilganligini tasdiqlovchi hujjat. Biror mulk vaqfga berilayotgan vaqtida vaqf hujjati bir necha nusxada yozilgan va hujjatlarning nusxalari turli xil shaharlarda saqlangan. Buning ma‘nosi vaqf berilganligini tasdiqlovchi hujjatning saqlanishini ta‘minlashdan iborat edi. Vaqf qilingan mulklar sotilishi, sovg‘a qilinishi, meros qoldirilishi man qilingan.

Gemma – qimmatbaho toshlardan zargarlik buyumlari ko‘zlari o‘rnatilib (ularga o‘yib tushirilgan yozuvlar ham bo‘lgan), ulardan muhr sifatida foydalanilgan hollar gemma deyiladi.

Geterografiya – matn tuzishda o‘zga til so‘zlarining “so‘z-signal” vazifasida ishlatilishi, ya‘ni o‘z tili so‘zlarini o‘zga tildan “qolip” so‘zlar orqali ifodalashdir.

Dinori adliya – Mirzo Ulug‘bek davrida zarb etilgan oltin tanga pul; vazni 4,4 gr.ga teng.

Dorug‘a – shaharning harbiy boshlig‘i

Yobisa – qo‘riq yer

Jufti gov – bir juft ho‘kiz yordamida haydab ekiladigan yer.

Jo‘ybor xo‘jalari arxivi – arxiv hujjatlarida xonodon vakillari tomonidan sotib olingan mulklar, do‘konlar, qishloqlar va hokazolar qayd etilgan.

Zulqidor – iqtidor (kuch qudrat) egasi

Ixrojot – saroyning kundalik xarajatlari uchun raiyatdan to‘planadigan maxsus yig‘im.

Kadxudo – oila boshlig‘i.

Kalontor – qishloq, daha oqsoqoli

Kino-foto-fono-hujjatlar markaziy davlat arxivi – O‘zSSR XKSning 1943-yil 18-fevral qarori bilan O‘zSSR kino-foto-fono-

hujjatlar markaziy davlat arxivi tashkil qilingan. Kino-foto-fonohujjatlar – biror tarixiy, siyosiy, ijtimoiy-iqtisodiy xarakterga ega bo‘lgan kino, fotosuratlar va ovozli yozuv shaklidagi hujjatlardir.

Kursiv yozuv - Baqtriya yozuvining ikki turidan biri bo‘lib, so‘zdagi harflarning biri ikkinchisiga ulanib yozilish uslubidir. Rivojlangan baqtriya kursiv yozuvi Eski Termez - Qora-tepa budda monastir devorlarida, kushon-sosoniylar va eftaliylar tangalarida, Uruzgandagi devor yozuvlarida va Tochi vodiysidan topilgan bitiklarda uchraydi.

lapidar yozuv – matnda harflarning o‘zaro bog‘lanmagan holda yozilishi

Maktuboti Temuriya – O‘zbekiston Respublikasi Fanlar akademiyasi Sharqshunoslik instituti qo‘lyozmalar fondida 2278 raqam ostida saqlanayotgan maktublar majmuasi. Majmua 191 varaqdan iborat bo‘lib, XVI asrda kitobat qilingan.

“Maktuboti Allomiy” – “Maktuboti Abulfazl”, “Inshoyi Abulfazl” (“Abulfazl (Allomiy) tarafidan bitilgan va (ko‘chirilgan) maktublar”)i deb ham ataladi. Maktublarning asosiy qismi Boburiylar saltanati (1526-1858)ning atoqli podshohlaridan Jaloliddin Akbar (1556-1605) nomidan, bir qismi vazir va yirik tarixchi olim Abulfazl ibn Muborak Allomiyning shaxsiy mazmundagi maktublaridan iborat. To‘plam uch qismga bo‘lingan. Undan bizga uchdan ikki qismi, ya’ni ikkita daftar yetib kelgan. U Allomiyning qarindoshi Abdusamad ibn Afzal Muhammad tomonidan tuzilgan.

“Muraqqayi Mir Alisher” yoki “Majmua’yi murosilot (“Maktublar to‘plami”)” – o‘z davrining nufuzli ruhoniylari – Abdurahmon Jomiy (1414-1492), xo‘ja Ubaydulla Axror (1404-1492), xo‘ja Axrorning o‘g‘li xo‘ja Muhammad Yaxyo (1500 yili o‘ldirilgan), xo‘ja Axrorning safdoshi va kuyovi Mir Abdulavval Nishopuriy (1495 yili vafot etgan) va boshqalarning Sulton Abu Said Mirzo (1451-1469), Sulton Husayn Mirzo va Alisher Navoiyga yo‘llagan maktublarini o‘z ichiga oladi. To‘plamga Abdurahmon Jomiyning 334 ta xatlari kiritilgan bo‘lib, ular shaxsiy mazmunda bitilgan xatlar hisoblanadi. Xo‘ja Axrorning maktublari esa 128 ta bo‘lib, ular mazmunan Abdurahmon Jomiy xatlariga o‘xshashdir.

Mamlaki podshohiy – podshoh (xon) devoniga tegishli yer-suv.

Man – og‘irlik o‘lchovi; vazni 4,32 gr.ga teng bo‘lgan o‘lchov birligi.

Monumental yozuv – yozuv usulidan qat’iy nazar xotiroq maqsadida yozib qoldirilgan epigrafik yodgorlik. Monumental yozuvlarga belgilarning o‘zaro ulanmasligi, harflarning burchakli (qirrali) va dumaloq shaklda yozilishi xos bo‘lib, bu so‘zlarni o‘qishda yengillik tug‘diradi.

Mulki xurri xolis – soliq va boshqa to‘lovlardan ozod etilgan yer-suv.

Mug‘ tog‘i sug‘d hujjatlari – 1932-yil bahorida Tojikiston SSR Zahmatobod tumani Xayrabod qishlog‘i yaqinida Mug‘ qal‘asi qo‘rg‘onining xarobalaridan to‘qilgan hujjatlar. SSSR FA **professori** A.A.Freyman boshchiligidagi ekspeditsiyaning izlanishlari natijasida jami 79 ta hujjat topilgan, shundan 74 tasi sug‘d tilida, 1 tasi arab tilida va 3 tasi xitoy va yana biri turk tilida bo‘lgan. Ular turli materiallarga – chirmaga, taxtaga va qog‘ozga yozilgan.

Naqshi Rostam yozuvi – Persopoldan shimoldagi Naqshi Rostamda yozilgan yozuv. Ahmoniylar shohlari qabrlariga kirishda, qoyaga mixxat xatida Doro I ning qadimgi eron, elam va akkad yozuvlaridagi xatlari yozilgan. Unda shox shajarasi va Eronga tobe mamlakatlar ro‘yxati hamda etnik va huquqiy asoslari bitilgan bo‘lib, Doro I mamlakatni idora qilishda undan foydalangan.

Niso – Parfiya davlatining markazi Mixrdartkirtda Eski Niso qal‘asi bo‘lgan. Bu yerda shoh qasri joylashgan.

Omil – qishloq oqsoqoli.

Palimpisest – Ikkinchi marta yozuvlari yuvib tashlanib qayta ishlatilgan sopol parchasining yuza qismida saqlanib qolgan yozuvning o‘rni (izi). Eski Nisodan topilgan arxiv hujjatlari tush bilan sopol parchalariga yozilgan. Sopol parchalari bir necha marta ishlatilgan. Eski yozuv yuvib tashlanib o‘rniga yangi xat bitilgan. Sopol parchasining yuza qismida eski yozuv o‘rnining saqlanib qolishi palimpisest deyilgan.

Parfiya arxivi – Parfiya davlatining markazi Mixrdartkirtda Eski Niso qal‘asi bo‘lgan. Eski Niso (Turkmaniston hududi) shahridan vino ombori topilgan. U yerda ko‘plab arxiv hujjatlari aniqlangan. Bu hujjatlar tarixga Parfiya hujjatlari nomi bilan kirgan.

Persopol arxivi – 1933-1934-yilda Chikago universiteti Sharqshunoslik instituti arxeologik ekspeditsiyasi E.Xersfeld rahbarligida Persopolning shimoli-g‘arbiy burchagida qal‘a devorini kovlab ochildi. U yerdan ko‘plab elam yozuvidagi mixxat matnlari topilgan. Ular

shartli ravishda “qal’a devori taxtachalari” (“Таблички крепостной стены”) deb atalgan.

Podshohlik yerlari – hukumatga qarashli yer-suv, mulki podshohiy, mulki sultoniy va mamlaka deb ham ataladi.

Mixrdatkirt – Parfiya davlatining markazi Mixrdatkirt.

Potxi – pal’ma daraxti bargidan yozuv materiali sifatida keng foydalanilgan. Bunday yozuv materiallari potxi deb atalgan.

Sadr – Buxoroi sharifning ichkari qismida joylashgan vaqflarning hisob-kitobi bilan shug’ullanuvchi mansabdor.

Sayfiddin Boxarziy – Buxoro shayxi Sayfiddin Boxarziy XII asrning ikkinchi yarmida Xuroson viloyati Boxarz degan joyda taval-lud topgan. Hirot va Nishopur shaharlarida dastlabki diniy-huquqiy bilimlarni olgan. Keyinchalik u Xorazmga keladi va mashhur Najmiddin Kubroga murid tushadi. Boxarziy undan diniy falsafiy bilimlarni chuqur o’rganib, shayx bo’lib yetishadi. Sayfiddin Boxarziy ustozini Najmiddin Kubroning tavsiyasi bilan Buxoroga jo’naydi. U Buxoroda 40 yilga yaqin yashagan.

Skifat – so’zi tanga yuzasida maxsus yumaloq muhra yordamida hosil qilingan botiqlik ma’nosidagi atama.

Suza arxivi – Fransuz arxeologlari tomonidan Suzadagi akropol-da qazish ishlari davrida elam xo’jalik hujjatlari arxivi topilgan. Bu hujjatlar fanga Suza arxivi nomi bilan kirgan. Matnlar sanasi ko’rsatilmagan, lekin mazmuniga ko’ra, ular ilk ahmoniylar davriga (Kir II podshohligi davriga) taalluqli bo’lishi mumkin deb hisoblanadi.

Surx-Ko’tal yodgorligi – 1957-yilda boxtar tilidagi “Katta Surx-Ko’tal yozuvi” ochildi. Topilgan yozuv to’liq saqlangan 25 qatordan iborat toshtaxta edi. Surxko’tal yozuvi “qurilish”, “barpo etish” haqida ekanligi aniqlangan.

Sug’d tilidagi manbalar – asosan IV-X asrlarga oid bo’lib, turli mazmundagi huquqiy hujjatlar – ahdnomalar, nikoh haqidagi shartnomalar, oldi-sotdi hujjatlari, tilxatlar, Sug’d, Shosh, Turk va Farg’ona hukmdorlari o’rtasidagi yozishmalar, xo’jalikning kundalik faoliyatiga oid hujjatlar, masalan; xarajatlar yozilgan hujjat hamda farmonlardan iborat. Bu hujjatlar Sug’diyonaning o’zidan, Mug’ qal’asidan, Samarqandda Afrosiyobdan, Qirg’iziston va Sharqiy Turkistondan topilgan.

Taxtacha – xumdonda pishirilgan g’isht ko’rinishidagi yozma yodgorlik bo’lib, yuzasiga o’yib xat bitilgan loy taxtacha.

Toxariston yozivi – toxariston yozuvidagi harflar soni 25 ta bo‘lib, gorizontaal chapdan o‘ngga qarab yozilgan.

Trilingva – uch tilda bitilgan yozuvlar. Masalan, Hamadon yaqinida mixxat yozuvli trilingva hamda Uruqda mixxat yozuvidagi trilingva bitilgan alebastr vaza topilgan.

Tuproqqal’a arxivi – 1945-1950-yillarda S. P. Tolstov tomonidan Qoraqalpog‘istonning Ellikqal’a tumanida joylashgan Tuproqqal’a shahar xarobasi o‘rganilgan. Tuproqqal’adan xorazimshoxlar davriga oid teri va yog‘ochga yozilgan arxiv hujjatlari topilgan. Ularning umumiy soni 140 ta bo‘lib, shundan 122 tasi teriga yozilgan bo‘lib, qolganlari yog‘och taxtacha va yog‘ochlarga yozilgan.

Turkiston general-gubernatorligi devonxonasi – general-gubernatorlik devonxonasi hujjatlari O‘zbekiston Markaziy davlat arxivida I-1-fondida saqlanmoqda.

Udaychi – urush paytida navkar va qo‘shinning to‘g‘ri taqsimlanishi bilan shug‘ullangan.

Formulyar – hujjatning boshlov va tugallash qismlaridagi an’anaviy jumalardir.

Xiva Qozilik hujjatlari – Tarixchi olim P.P.Ivanov 1936-yilda Leningraddagi Saltikov-Shedrin nomli xalq kutubxonasidan kutubxona qo‘lyozma bo‘limining ro‘yxatga olinmagan fondlaridan “XIX asrdagi Xiva xonlarining arxivi”ni topgan. Umumiy hajmi 333 daftar, 11.000 varaqdan ortiq bo‘lgan qimmatli arxiv.

Chuhra og‘osi – xon qo‘riqchilari boshlig‘i

Chorpo – to‘rt oyoqli jonivorlar

O‘zbekiston meditsina hujjatlari markaziy davlat arxivi – 1962 yilda Toshkentda tashkil qilingan.

Axborot texnologiyasi – axborotni to‘plash, saqlash, izlash, unga ishlov berish va uni tarqatish uchun foydalaniladigan jami qurilmalar, usullar va jarayonlar.

Elektron hujjat – bu elektron raqamli imzo bilan tasdiqlangan va uni identifikatsiya qilishda foydalaniladigan elektron hujjatning boshqa rekvizitlariga ega bo‘lgan elektron shaklda qayd qilingan axborot.

Elektron arxiv – arxiv maqomiga ega bo‘lgan, tashkilot elektron hujjatlarini jamlovchi, hisobga oluvchi, saqlovchi va foydalanishni amalga oshiruvchi tashkilotning tarkibiy bo‘limi.

Qo‘qon xonligi arxivi – 1939-yilda Sankt Peterburgdagi Saltikov-Shedrin nomidagi Markaziy davlat kutubxona yerto‘lasidan Qo‘qon xonlari arxivi hujjatlari topilgan. Mazkur hujjatlar Qo‘qon xonligi Rossiya tomonidan egallanganidan so‘ng 1876-yilda imperatorning Markaziy kutubxonasiga ko‘chirilgan edi. Qo‘qon xonlari arxivi 1962 yilda O‘zSSR arxiv boshqarmasiga jo‘natiladi, arxiv hujjatlarining mikrofilmlari Leningradda M.E.Saltikov-Shedrin nomli davlat kutubxonasida va SSSR FA Osiyo xalqlari instituti qo‘lyozmalar fondida saqlanmoqda. A.L.Troitskaya tomonidan Qo‘qon xonlari arxivi katalogi tiziladi va 1968 yilda nashr qilingan. Katalogda 5 ming atrofidagi hujjatlar jamlangan. Hujjatlar asosan XIX asming 40-70-yillariga taalluqli bo‘lib, ularda xonlikning bu davrdagi xo‘jalik hayiti aks etgan. Katalog sistemali tartibda bo‘limlarga bo‘lingan, ismlar va geografik nomlar ko‘rsatkichlari hamda atamalar izohlari bilan ta‘minlangan.

Ekspertiza qilish – hujjatlarning (davlat saqloviga qabul qilishda hujjatlarning ilmiy va amaliy qimmatini) qimmatdorligini aniqlash, arxiv hujjatlarini tanlash va ulardan tarixiy, huquqiy va ma‘muriy sohani ko‘rib chiqishda foydalanish. Davlat arxivlaridagi hujjatlarni to‘ldirish, saqlash muddatini aniqlash va saqlash uchun tanlab olish yoki yo‘q qilinish jarayoni

Ekspert komissiyasi – mulkchilik shaklidan qat’iy nazar, korxonalar, muassasa, tashkilotda hujjatlar, shu jumladan boshqaruv (ish yuritish), ilmiy-texnikaviy va boshqa maxsus hujjatlarning qimmatini ekspertiza qilish va ularni davlat saqloviga topshirishga tayyorlash bo‘yicha ishlarni tashkil qilish va olib borish uchun tuziladigan komissiya

Eshik Og‘a (eshik og‘asi) – saroybon; podshoh (xon) saroyiga arz bilan keluvchilarni, shuningdek elchilarni kutib oluvchi mansabdor.

Yagona davlat arxiv fondi (YaDAF) – O‘zSSR MIK va XKS-ning 1925-yil 22-iyul qarori bilan “O‘zSSR Arxiv ishi markaziy boshqarmasi to‘g‘risida”gi nizom tasdiqlandi. Bu nizomga ko‘ra, respublikada Yagona davlat arxiv fondi (YaDAF) tashkil qilindi. Bu fondga hukumat, savdo, sanoat, kooperativ, kasaba uyushma tashkilotlari arxivlari, shuningdek diniy va shaxsiy arxivlar kiritildi. Viloyatlarda viloyat arxiv byuro‘lari (1925-yilda - Farg‘ona, Samarqand, Toshkent, Zarafshon, 1926-yilda – Xorazm, Qashqadaryo, Surxondaryo) tashkil qilindi.

FOYDALANILGAN ADABIYOTLAR:

Rahbariy adabiyotlar

1. Karimov I.A. O‘zbekiston: milliy istiqlol, iqtisod, mafkura. 1-jild. –T.: “O‘zbekiston”, 1996.
2. Karimov I.A. Tarixiy xotirasiz kelajak yo‘q. –T.: “O‘zbekiston”, 1998.
3. O‘zbekiston Respublikasi Fanlar Akademiyasi tarix instituti faoliyatini takomillashtirish to‘g‘risida. O‘zbekiston Respublikasi Vazirlar Mahkamasining 1998- yil 27-iyuldagi qarori. Xalq so‘zi, 1998- yil, 27-iyul.
4. “Arxivlar to‘g‘risida”gi O‘zbekiston Respublikasi Qonuni 1999-yil 15-aprel.
5. “Arxiv ishi to‘g‘risida” 2009 yil 3 noyabr O‘zbekiston Respublikasi Oliy majlisi Qonuni.
6. O‘zbekiston Respublikasi Vazirlar Mahkamasining 2004-yil 3-fevraldagi “O‘zbekiston Respublikasida arxiv ishini boshqarishni yanada takomillashtirish to‘g‘risida”gi qarori.
7. O‘zbekiston Respublikasi Vazirlar mahkamasining 2008-yil 26-avgustdagi “O‘zbekiston Respublikasida arxiv ishini yanada rivojlantirish to‘g‘rsida”gi qarori.
8. O‘zbekiston Respublikasi Vazirlar Mahkamasining 2012-yil 5-apreldagi “O‘zbekiston Respublikasida arxiv ishini takomillashtirish to‘g‘rsida”gi qarori.

Asosiy adabiyotlar:

O‘zbek tilida

1. Is‘hoqov M.M., Alimova R.R. Arxivshunoslik. –T., 2010.

Ingliz tilida

2. T.R.Schellenberg Modern archives. Princihles Techniques. Chicago. 2003.
3. Report on archives in the enlarged European Union Increased archival cooperation in Europe: action plan. Luxembourg: Office for Official Publications of the European Communities, –2005.
4. Nicolas Sims Williams. Bactrian documents. Oksford. 2000.
5. Archive Principles and Practice. Crown copyright. 2011. P.25.

Rus tilida

6. Лившиц В.А. Парфянская ономастика. Санкт-Петербург, 2010.
7. Исхаков М.М. Центральная Азия в системе мировой письменной культуры (древность и раннее средневековье). –Т., 2008.

Qo‘shimcha adabiyotlar

O‘zbek tilida

8. Аҳмедов Б. Ўзбекистон тарихи манбалари (Қадимги замон ва ўрта асрлар). –Т.: Ўқитувчи, 2001.
9. Абдуваҳобова М.Р. Қушбеги архивида тарихий топонимлар ва Бухоро амирлигининг маъмурий-худудий тизими. –Т., 2006.
10. Алимов И.А. Архившунослик. –Андижон, 2005.
11. Бобобеков Ҳ.Н. Қўқон тарихи. –Т.: “Фан”, 1996.
12. Бобоқулов Б. Архив иши назарияси ва амалиёти. Ўқув қўлланма. – Т., 2011.
13. Йўлдошев М.Й. XIX аср Хива давлат ҳужжатлари. –Т.: “Фан”, 1960.
14. Мадраимов А. Фузаилова Г. Манбашунослик. Бакалаврият таълим йўналиши талабалари учун дарслик. –Тошкент, 2008.
15. “Мактуботи Темурия”. ЎзФА Шарқшунослик институти қўлёзмалар фонди. № 2278.
16. “Мактуботи Алломий”. ЎзФА Шарқшунослик институти қўлёзмалар фонди. № 290.
17. “Мураққайи Мир Алишер”. ЎзФА Шарқшунослик институти қўлёзмалар фонди. № 2178.
18. Раҳимов Ж. Ўзбекистон тарихини ўрганишда архив манбаларидан фойдаланиш. –Т.: “Ўқитувчи”, 1995.
19. Абдураззоқ Самарқандий. Матла ус-садайн ва мажма ул-бахрайн. –Т.: Фан, 1960, 1969.
20. Тарихий манбашунослик. –Т.: Фан, 2006.
21. Усанова М. Исмоил Сомоний вақфномаси //Шарқшунослик, № 6. –Тошкент, 1995. 24 – 31- бб.
22. Ҳужжатлар. Архив атамалари изоҳли луғати. –Т., 2000.
23. Ўринбоев А. Ёзишмалар. –Т., 1998.
24. Йўлдошев М.Й. Хива давлат ҳужжатлари. I-II жилдлар. – Т., 1960

Rus tilida

25. Административное устройство Бухарского эмирата в конце XIX – в начале XX века. –Т., 2001.
26. Азаров А.И., Брежестовская Н.В. Государственные архивы и архивное дело в союзных республиках. –М., 1971.
27. Абдураимов М.А. “О малоизвестном источнике по истории аграрных отношений в Средней Азии в XVIв. //Журнал “Народы Азии и Африки”. –М., 1968. № 3.
28. Ахмедов Б.А. “Роль джуйберских ходжей в общественно-политической жизни Средней Азии XVI-XVII веков // Духовенство и политическая жизнь. Сб.статей. –М., 1985.
29. Бартольд.В.В. Туркестан в эпоху монгольского нашествия. Сочинения. Т. II. –М., 1965.
30. Бертельс Е.Е. Из архива шейхов джуйбари. –М., –Л., 1938.
31. Бухарский вакф XIII в. Факсимиле, издание текста, перевод с арабского и персидского, введение и комментарий А.К.Арендса, А.Б.Халидова, О.Д.Чехович. –М., 1979 (ППВ – 52).
32. Вальберг Х. Электронные документы в архивах // Отечественные архивы. 2004. № 1.
33. Дандамаев М.А., Луконин В.Г. Культура и экономика древнего Ирана. –М., Гл.ред. Восточной литературы. “Наука”, 1980.
34. Документы к истории аграрных отношений в Бухарском ханстве. Выпуск I. Акты феодальной собственности на землю XVII-XIX вв. Подбор документов, перевод, введение и примечания О.Д.Чеховича, под редакцией А.К.Арендса. –Т., 1954.
35. Дьяконов И.М. Люди города Ура. –М., 1990.
36. Дьяконов И.М., Лившиц В.А. Документы из Нисы. –М., 1960.
37. Датированные документы из дворца Топраккала проблемы эры Шака I эры Канишка. –П-Б., 1961. –С. 54-71.
38. Жукова М.П. Комплектование архивов электронными документами // Отечественные архивы. 2000. № 2. С. 5–17.
39. Иванов П.П. Хозяйство джуйберских шейхов. –М., –Л., 1954.
40. Исхоқов М. Унитилган подшоликдан хатлар. –Т., 1992.

41. Камалиддинов Ш. С. “Китаб аль-Ансаб” Абу Саъда Абд аль-Карима ибн Мухаммада ас-Самъани как источник по истории и истории культуры Средней Азии. –Т.: Фан, 1993.
42. Камолиддин Ш.С. Происхождение Саманидов. –Т.:IFEAS, 2008.
43. Козлитин И.П. Государственные архивы республик Средней Азии. –М., 1961.
44. Крайская Ж.В. Организация архивного дела. –М., 1980.
45. Лившиц И.А. Юридические документы и письма. Чтение, перевод и комментарии В.А Лившиц. //Согдийские документы с горы Муг. Чтение, перевод, комментарии. Вип ИИ. Изд-во Восточной литературы. –М., 1962.
46. Луконин В.Г. Культура и экономика древнего Ирана. –М., 1980.
47. Максаков В.В. Архивное дело в первые годы советской власти. –М., 1959.
48. Мухамаджонов А.Р. Населенные пункты Бухарского эмирата. -Т., 2001.
49. Петрушевский И.П. Из истории Бухары XIII в. Ученые записки ЛГУ, Серия востоковедческих наук. Вып. I, –Л., 1949.
50. Ростиславов М.Н. Несколько слов о важности вакуфных документов в историческом отношении //Туркестанские ведомости, 1873, №42,
51. Рудельсон К.И., Долгих В.И. Теория и практика архивного дела. –М., 1980.
52. Семенов А.А. К вопросу о происхождении Саманидов //Труды ИИАЕ АН ТаджССР. Т.27. Сборник статей, посвященных истории и культуре периода формирования таджикского народа и его государственности (IX – X вв. н.э.). – Сталинабад, 1955. –С.3-11.
53. Собрание восточных рукописей Академии наук республики Узбекистан. История. Составители Д.Ю.Юсупова, Р.П.Джалилова. –Т., 1998.
54. Справочник по фондам Государственного архива г. Ташкента. Под ред. Остроумовой Д.Г. –Т., 1992.
55. Справочник. Государственные архивы. Т.1,2. Под ред. Ваганова Х.М. и др. –М., 1989.

56. Тилеукулов Г.С. Роль архивов Узбекистана в научно-исследовательской и культурной жизни республики (1918-1980 гг.) –Ташкент, 1995.
57. Толстов С.П. Древнехорезмийская память. 1939.
58. Топраккала. Дворец. –М., 1984.
59. Толстов С.П. Хорезмийская археологическая экспедиция. 1940 г.КСИИМК. 1946 . 12.
60. Толстов С.П. Древний Хорезм. –М., 1948.
61. Толстов С.П. По следам древнехорезмийской цивилизации. –М., 1948.
62. Троицкая Л.А. Каталог архива Кокандских ханов XIX века. –М., 1968.
63. Чехович О.Д. Бухарские документы XIV века. –Т., 1965.
64. Чехович О.Д. Вакуфный документ времени Тимура из коллекции Самаркандского музея. Эпиграфика Востока. ИВ, –М., –Л., 1951.
65. Чехович О.Д. Бухарские поземельные акты XVI-XIX вв. //Проблемы востоковедения, ИВ. –М., 1955.
66. Чехович О.Д. Бухарские акты XIV в. –Ташкент, 1965.
67. Чехович О.Д. Бухарский вакф XIII в. Журнал «Народы Азии и Африки». 1967, № 3, –С.74-82.
68. Чехович О.Д. Крестьянские обязательства 1914 г. на основании мнимой грамоты Исмаила Самани //ИЗ, т. 33. –М., 1950. – С.260-270.
69. Чехович О.Д. Новая коллекция документов по истории Узбекистана //ИЗ, т. 36, –М.: Изд-во АН СССР, 1951. –С.266-268.
70. ЦГА УзССР. Ф. И-323, оп. 1, № 1429.
71. Центральный государственный архив Узбекистана //Каталог. –Т., 1975.
72. Центральный государственный исторический архив УзССР. Путеводитель. –Т., 1948.
73. Центральный государственный архив кинофотофонодокументов Узбекской ССР. Путеводитель. –Т., 1964.
74. Юлдашев М.Ю. Новый архивный источник по истории Средней Азии. – Краткая сообщения института востоковедения АН СССР. № 1, 1951.
75. Юлдашев М.Й. “Новые данные о хозяйстве джуйберских шейхов” //Журнал ОНУ, 1963.

ILOVALAR

ЎЗБЕКИСТОН РЕСПУБЛИКАСИНИНГ ҚОНУНИ 15.04.1999 й. N 768-I

АРХИВЛАР ТЎҒРИСИДА

1-модда. Қонуннинг мақсади ва вазифалари

Ушбу Қонун архивларни шакллантириш, сақлаш ва улардан фойдаланишда юзага келадиган муносабатларни ҳамда Ўзбекистон Республикаси архив муассасалари фаолиятини тартибга солиди.

Қонун Ўзбекистон ҳудудида Мавжуд бўлган барча архив ҳужжатларини тўлиқ қамраб олишга, Ўзбекистон Республикаси Миллий архив фондининг яхлитлигини сақлаб қолишга ва фуқаролар, жамият ва давлатнинг ижтимоий, маданий, илмий ва бошқа эҳтиёжларини қондириш мақсадида архив ҳужжатларини ҳисобга олиш, экспертиза қилиш, рўйхатдан ўтказиш, бутлаш ҳамда улардан фойдаланишнинг ягона тартибини белгилашга қаратилгандир.

2-модда. Архивлар тўғрисидаги қонун ҳужжатлари

Ўзбекистон Республикасининг архивлар тўғрисидаги қонун ҳужжатлари ешбу Қонун ва бошқа қонун ҳужжатларидан иборат.

Қорақалпоғистон Республикасида архив иши Қорақалпоғистон Республикаси қонун ҳужжатлари билан ҳам тартибга солинади.

Агар Ўзбекистон Республикасининг халқаро шартномасида Ўзбекистон Республикасининг архивлар тўғрисидаги қонун ҳужжатларида назарда тутилганидан бошқача қоидалар белгиланган бўлса, халқаро шартнома қоидалари қўлланилади.

3-модда. Асосий тушунчалар

Ушбу Қонунда куйидаги асосий тушунчалар қўлланилади:

Архив - архив ҳужжатлари мажмуи, шунингдек архив муассасаси ёки корхона, муассаса ва ташкилотнинг архив ҳужжатларини қабул қилувчи, сақловчи ва улардан фойдаланувчи таркибий бўлинмаси;

Архив ҳужжатлари – қонун ҳужжатларида назарда тутилган тегишли экспертиза асосида архив аҳамиятига молик деб топилган матнли, қўлёзма ва машинада ўқиладиган ҳужжатлар, овозли ёзувлар, видеоёзувлар, киноленталар, фотосуратлар, фотография плёнкалари, чизмалар, схемалар, хариталар, шунингдек турли моддий ашёлардаги ёзувлар;

Архив фонди - тарихий ёки мантиқий жиҳатдан бир-бири билан алоқадор архив ҳужжатлари мажмуи;

Архив иши – архив ҳужжатларини қабул қилиш, ҳисобга олиш, сақлаш ва улардан фойдаланишни ташкил этишга оид фаолият;

Архив ҳужжатларини доимий сақлаш - уларни архивда, музейда, кутубхонада чекланмаган муддатларда сақлаш;

Архив ҳужжатларини вақтинча сақлаш - уларни архивларда қонун ҳужжатларида белгиланган давр мобайнида сақлаш;

Архив ҳужжатларини депозитар сақлаш – уларни ҳужжатлар мулкдори билан архив, музей, кутубхона ўртасидаги келишув (шартнома) бўйича белгиланадиган шартлар асосида мулкдорнинг архив ҳужжатларига нисбатан мулк ҳуқуқини сақлаб қолган ҳолда архивда, музейда, кутубхонада сақлаш.

4-модда. Ўзбекистон Республикаси Миллий архив фонди

Ҳужжатларида Ўзбекистон халқининг моддий ва маънавий ҳаёти акс эттирилган барча архив фондларининг мажмуи Ўзбекистон Республикаси Миллий архив фонди деб ҳисобланади.

Ўзбекистон Республикаси Миллий архив фонди давлат ва нодавлат архив фондларидан ташкил топади.

Давлат архивларида ва давлатнинг бошқа ҳужжатхоналарида доимий сақланаётган ҳужжатлар, шунингдек давлат ҳокимияти ва бошқарув органларида, прокуратуралар, судлар, давлат корхоналари, муассасалари ва ташкилотларида, банкларда, Ўзбекистон Республикасининг дипломатик ваколатхоналари ва консуллик муассасаларида вақтинча сақланаётган архив ҳужжатлари давлат архив фондини ташкил этади.

Нодавлат юридик шахсларнинг фаолияти натижасида тўпланган архив ҳужжатлари, шунингдек фуқароларнинг шахсий архивлари нодавлат архив фондини ташкил этади.

Ҳужжатларни Ўзбекистон Республикасининг Миллий архив фондига киритиш ёки ҳужжатларни ундан чиқариш эксперт комиссиясининг хулосаси асосида амалга оширилади.

Ҳужжатларнинг қимматлилигини аниқлаш мезонларини, эксперт комиссияларини тузиш ва уларнинг фаолият кўрсатиш тартибини Ўзбекистон Республикаси Вазирлар Маҳкамаси ҳузуридаги "Ўзархив" агентлиги белгилайди.

Ҳужжатларни Ўзбекистон Республикаси Миллий архив фондига киритиш масаласини ҳал қилиш учун юридик ва жисмоний шахслар давлат архив муассасасининг талабига биноан ҳужжатларни экспертизага тақдим этишлари шарт.

5-модда. Архив ҳужжатларига бўлган мулкдорлик

Давлат архив фонднинг ҳужжатлари давлат мулкидир ва улар давлат тасарруфидан чиқариш ва хусусийлаштириш, олдисотди ёки мулк ҳуқуқини бериш билан боғлиқ бошқа битимлар объекти бўлиши мумкин эмас ҳамда фақат вақтинча фойдаланиш учун берилади.

Нодавлат архив фондларининг ҳужжатлари нодавлат юридик шахсларнинг - фонд эгаларининг мулкидир. Жисмоний шахсларнинг архив ҳужжатлари шу шахсларнинг хусусий мулкидир.

Вафот этган фуқароларнинг архив ҳужжатлари, қонун бўйича ёки васиятнома бўйича меросхўрлар бўлмаса, шунингдек архивнинг эгасини аниқлаш имконияти бўлмаса, давлат мулкига ўтади.

6-модда. Архивлар тузиш ҳуқуқи

Ўзбекистон Республикасининг юридик ва жисмоний шахслари архивлар тузиш ҳуқуқига эгадир.

Ўзбекистон Республикаси ва Қорақалпоғистон Республикаси давлат архивлари (уларнинг филиаллари) тегишли равишда Ўзбекистон Республикаси Вазирлар Маҳкамаси ва Қорақалпоғистон Республикаси Вазирлар Кенгаши томонидан тузилади.

Вилоятлар давлат архивлари (уларнинг филиаллари) ҳамда Тошкент шаҳар давлат архиви тегишли вилоят ва Тошкент шаҳар ҳокимларининг қарори билан тузилади. Маҳфий архивлар тузишга йўл қўйилмайди.

7-модда. Архив ҳужжатларини доимий сақлаш ҳуқуқи

Давлат архив фондининг ҳужжатлари давлат ҳужжатхоналарида доимий сақланиши керак. Ҳужжатларни қабул қилиш ва рўйхатдан ўтказишни амалга оширадиган, уларнинг асралиши ва улардан фойдаланишни таъминлайдиган давлат архивлари ва уларнинг филиаллари давлат архив фонди ҳужжатларининг асосий ҳужжатхоналари ҳисобланади.

Давлат архив фонди ҳужжатларини вазирликлар ва идораларда доимий сақлаш Ўзбекистон Республикаси Вазирлар Маҳкамаси ҳузуридаги "Ўзархив" агентлиги билан келишилган идоравий норматив ҳужжатлар асосида амалга оширилади.

Давлат архив фондининг ҳужжатларини доимий сақлаш вазифаси топшириладиган вазирликлар ва идораларнинг рўйхати Ўзбекистон Республикаси Вазирлар Маҳкамаси томонидан белгиланади.

8-модда. Идоравий архивлар

Давлат ҳокимияти ва бошқарув органлари, корхоналар, муассасалар ва ташкилотлар архив ҳужжатларини вақтинча сақлаш, улардан хизмат, ишлаб чиқариш, илмий ва бошқа мақсадларда фойдаланиш учун идоравий, бирлашган идоравий ёки идоралараро архивлар тузишлари мумкин.

Идоравий архивларда вақтинча сақланаётган ҳужжатларни рўйхатдан ўтказишни Ўзбекистон Республикаси Вазирлар Маҳкамаси ҳузуридаги "Ўзархив" агентлиги ва у ваколат берган давлат архив муассасалари амалга оширади. Рўйхатдан ўтказиш тартиби ва рўйхатдан ўтиш гувоҳномасининг шакли Ўзбекистон Республикаси Вазирлар Маҳкамаси томонидан тасдиқланади.

Давлат архив фондининг ҳужжатларини идоравий архивларда вақтинча сақлаш муддатининг меъёрлари Ўзбекистон Республикаси Вазирлар Маҳкамаси томонидан белгилаб қўйилади.

Идоравий архивда вақтинча сақлаш муддатлари ўтганидан кейин доимий сақланиши керак бўлган архив ҳужжатлари белгиланган тартибда давлат архивларига топширилади.

Идоравий архивларнинг архив ҳужжатларини сақлаш ва улардан фойдаланиш тартиби Ўзбекистон Республикаси Вазирлар Маҳкамаси тасдиқлаган низомда белгиланади.

9-модда. Фуқароларнинг шахсий архивлари

Хусусий мулкида архив ҳужжатлари бўлган фуқаролар уларнинг асралишини таъминлайдилар ва архив ҳужжатларини доимий ёки депозитар сақлаш учун давлат архивлари, музейлари ва кутубхоналарига топширишлари мумкин.

Депозитар сақлаш учун топширилган архив ҳужжатлари, уларнинг мулкдорлари ҳужжатларни сақлаш шартномасини ўз вақтида узайтирмаган бўлсалар ва мазкур ҳужжатлар архивга, музейга ва кутубхонага топширилган пайтдан бошлаб юз йил мобайнида уларни талаб қилиб олмасалар, давлат мулкига ўтади.

10-модда. Қайта ташкил этилаётган ва тугатилаётган корхоналар, муассасалар ва ташкилотларнинг архив фондлари

Корхоналар, муассасалар ва ташкилотлар қайта ташкил этилганда уларнинг архив ҳужжатларини келгусида сақлаш улар томонидан тегишли давлат архив муассасалари билан келишилган ҳолда амалга оширилади.

Корхоналар, муассасалар ва ташкилотлар тугатилганда уларнинг архив фонди ҳужжатлари тегишли давлат архивларига қонун ҳужжатларида белгиланган тартибда топширилади.

11-модда. Архив ишини давлат томонидан бошқариш

Архив ишини давлат томонидан бошқариш Ўзбекистон Республикаси Вазирлар Маҳкамаси, Қорақалпоғистон Республикаси Вазирлар Кенгаши, вилоятлар ва Тошкент шаҳар ҳокимликлари томонидан архивлар ишини бошқариш ваколатли давлат органлари орқали амалга оширилади.

Архив ишини бошқариш ваколатли давлат органлари Ўзбекистон Республикаси Вазирлар Маҳкамаси ҳузуридаги "Ўзархив" агентлиги ҳамда Қорақалпоғистон Республикаси, вилоятлар ва Тошкент шаҳар архив иши ҳудудий бошқармаларидир.

Ўзбекистон Республикаси ва Қорақалпоғистон Республикасининг давлат архивлари (уларнинг филиаллари), вилоятлар давлат архивлари (уларнинг филиаллари) ва Тошкент шаҳар давлат архиви бевосита архив ишини бошқариш ваколатли давлат органларига бўйсунди.

Архив ишини бошқариш ваколатли давлат органининг фаолиятини ташкил этиш тартиби ҳамда тузилиши Ўзбекистон Республикаси Вазирлар Маҳкамаси томонидан белгиланади.

12-модда. Давлат архив муассасаларини молиялаш

Давлат архив муассасаларини молиялаш тегишли бюджетлар маблағлари ҳисобига, шунингдек бюджетдан ташқари маблағлар ҳисобига амалга оширилади.

Пулли хизматлар кўрсатишдан ҳамда молиялашнинг бошқа кўшимча манбаларидан олинадиган маблағлар архив муассасаларининг моддий-техника базасини ривожлантиришга ҳамда уларнинг ходимларини моддий рағбатлантиришга йўналтирилади.

13-модда. Архив муассасаларининг хизматлари

Давлат архив фонди муассасалари ва идоравий архивлар Ўзбекистон Республикаси Вазирлар Маҳкамаси белгилаган тартибда хизматлар кўрсатади.

Фуқароларнинг ҳуқуқлари ва манфаатларини ижтимоий ҳимоя қилиш учун зарур бўлган архив маълумотномаларини, шунингдек давлат ҳокимияти ва бошқарув органларига архив маълумотномаларини ва ҳужжатларнинг нусхаларини бериш бепул амалга оширилади.

14-модда. Архивларни бутлаш

Давлат архивлари давлат ҳокимияти ва бошқарув органлари, давлат корхоналари, муассасалари ва ташкилотларининг фаолияти жараёнида вужудга келган ҳужжатлардан, шунингдек улар томонидан қўлга киритилган ёки уларга бошқа юридик ва жисмоний шахслар топширган ҳужжатлардан бутланади.

Давлат архивлари фуқароларнинг шахсий архив ҳужжатларини шартнома асосида мулк қилиб олишлари мумкин. Фуқароларнинг архив ҳужжатлари сотилаётганда давлат архиви уларни мулк эгаси эълон қилган нархда сотиб олишда устувор ҳуқуққа эга.

Нодавлат юридик шахсларнинг архивлари ва фуқароларнинг шахсий архивлари давлат архив фонди ҳужжатларидан бутланишига йўл қўйилмайди.

Ҳужжатлари Ўзбекистон Республикаси Миллий архив фондига бутлаш мақсадида топширилиши лозим бўлган корхоналар, муассасалар, ташкилотларнинг рўйхати Ўзбекистон Республикаси Вазирлар Маҳкамаси ҳузуридаги "Ўзархив" агентлиги томонидан белгиланади.

15-модда. Ҳужжатлар сақланишини таъминлаш юзасидан ҳужжатлар мулкдорларининг мажбурияти

Ўзбекистон Республикаси Миллий архив фондига киритилиши лозим бўлган ҳужжатларнинг мулкдорлари

уларнинг сақланишини таъминлашлари ва кўпайиб боришига кўмаклашишлари шарт.

Алоҳида қимматли ва ноёб архив ҳужжатларининг суғурта нусхалари тайёрлаб қўйилади.

Архив ҳужжатларини алоҳида қимматли ва ноёб ҳужжатлар жумласига киритиш, шунингдек уларнинг суғурта нусхаларини тайёрлаш ва сақлаш тартиби Ўзбекистон Республикаси Вазирлар Маҳкамаси ҳузуридаги "Ўзархив" агентлиги томонидан белгиланади.

Қимматли, ноёб архив ҳужжатларининг лозим даражада асралишини таъминламаётган нодавлат юридик шахслар суд қарори билан ҳужжатларга бўлган мулк ҳуқуқидан маҳрум этилишлари мумкин, шундан сўнг бу ҳужжатлар сақлаш учун тегишли давлат архивига топширилади.

16-модда. Ўзбекистон Республикаси Миллий архив фонди ҳужжатларини давлат ҳисобига олиш

Ўзбекистон Республикаси Миллий архив фондининг ҳужжатлари, уларнинг сақланаётган жойидан қатъи назар, давлат ҳисобига олиниши керак. Мазкур ҳужжатларни давлат ҳисобига олиш тартиби Ўзбекистон Республикаси Вазирлар Маҳкамаси ҳузуридаги "Ўзархив" агентлиги томонидан белгиланади.

17-модда. Архив ҳужжатларидан фойдаланиш

Ўзбекистон Республикаси фуқаролари, шунингдек чет эл фуқаролари ва фуқаролиги бўлмаган шахслар давлат архив фондининг архив ҳужжатларидан қонун ҳужжатларида белгиланган тартибда фойдаланадилар.

Нодавлат архив фондининг ҳужжатлари, шу жумладан, жисмоний шахсларнинг хусусий мулки сифатида ўзида сақланаётган архивлар юридик ва жисмоний шахсларнинг фойдаланиши учун фонд эгаларининг розилиги билан берилиши мумкин бўлиб, улар архив ҳужжатларининг асралишини таъминлаш мақсадида улардан фойдаланишни чеклашлари мумкин. Чеклашлар хизмат топшириғини бажараётган ҳуқуқни муҳофаза қилиш, назорат қилувчи органларнинг ходимларига

нисбатан, шунингдек, қонун ҳужжатларида назарда тутилган бошқа ҳолларда татбиқ этилмайди.

Архив ҳужжатларининг махфийлик даражаси, шунингдек, Ўзбекистон Республикаси Миллий архив фондининг давлат ва тижорат сирини ўз ичига олган ҳужжатларидан фойдаланишга доир чеклашлар Ўзбекистон Республикаси Вазирлар Маҳкамаси томонидан белгиланади.

Фуқароларнинг шахсий ҳаёти тўғрисидаги ёки уларнинг ҳаёти ва хавфсизлигига таҳдид туғдирувчи маълумотларни ўз ичига олган архив ҳужжатларидан фойдаланишга доир чеклашлар, ҳужжатлар тайёрланган вақтдан эътиборан етмиш беш йил муддатга белгиланади. Ушбу муддатдан олдин ана шундай ҳужжатлардан фойдаланишга фуқаронинг ўзи томонидан, унинг вафотидан сўнг эса - унинг меросхўрлари томонидан рухсат берилиши мумкин.

Давлат архив муассасалари давлат архив фонди ҳужжатларидан фойдаланишни улар илмий-техник ишловдан ўтказилаётгани ёки қайта тикланаётгани муносабати билан чеклаб қўйиш ҳуқуқига эгадир.

18-модда. Архив иши соҳасидаги халқаро ҳамкорлик

Ўз архивларига эга бўлган юридик ва жисмоний шахслар архив иши соҳасидаги халқаро ҳамкорликда қонун ҳужжатларига мувофиқ иштирок этишлари мумкин.

Ўзбекистон Республикасидан четга олиб кетилган архив ҳужжатларини қайтариш халқаро шартномалар асосида амалга оширилади.

19-модда. Ўзбекистон Республикаси Миллий архив фонди ҳужжатларининг Ўзбекистондан олиб чиқилиши

Ўзбекистон Республикаси Миллий архив фонди ҳужжатларининг асл нусхаларини ёки уларнинг ўрнини босувчи нусхаларини Ўзбекистондан олиб чиқилишига йўл қўйилмайди, ушбу модданинг иккинчи қисмида назарда тутилган ҳоллар бундан мустасно.

Ўзбекистон Республикаси Миллий архив фондининг ҳужжатларини чет элда кўргазмага қўйиш ёки қайта тиклаш

мақсадида Ўзбекистондан вақтинча олиб чиқилишига Ўзбекистон Республикаси Вазирлар Маҳкамаси ҳузуридаги "Ўзархив" агентлигининг рухсати билан қонун ҳужжатларида белгиланган тартибда йўл қўйилади.

20-модда. Низоларни ҳал этиш

Архивлардан фойдаланиш масалаларига доир низолар суд томонидан ҳал этилади.

Юридик ва жисмоний шахслар архивлар тўғрисидаги қонун ҳужжатларини бузганлик учун етказилган зарар ўрнини қонун ҳужжатларида белгиланган тартибда қоплашлари шарт. Зарар ўрнининг қопланиши айбдорларни қонун ҳужжатларига мувофиқ жавобгарликдан озод этмайди.

21-модда. Архивлар тўғрисидаги қонун ҳужжатларини бузганлик учун жавобгарлик

Архивлар тўғрисидаги қонун ҳужжатларининг бузилишида айбдор бўлган шахслар белгиланган тартибда жавобгар бўладилар.

Ўзбекистон Республикасининг Президенти И. Каримов
"Ўзбекистон Республикаси Олий Мажлиси Ахборотномаси",
1999 й., N 5, 120-модда

Ўзбекистон Республикасининг Қ О Н У Н И

Архив иши тўғрисида

Қонунчилик палатаси томонидан 2009 йил 3 ноябрда қабул қилинган

Сенат томонидан 2010 йил 7 майда маъқулланган

1-боб. Умумий қоидалар

1-модда. Ушбу Қонуннинг мақсади

Ушбу Қонуннинг мақсади архив иши соҳасидаги муносабатларни тартибга солишдан иборат.

2-модда. Архив иши тўғрисидаги қонун ҳужжатлари

Архив иши тўғрисидаги қонун ҳужжатлари ушбу Қонун ҳамда бошқа қонун ҳужжатларидан иборатдир.

Агар Ўзбекистон Республикасининг халқаро шартномасида Ўзбекистон Республикасининг архив иши тўғрисидаги қонун ҳужжатларида назарда тутилганидан бошқача қоидалар белгиланган бўлса, халқаро шартнома қоидалари қўлланилади.

3-модда. Асосий тушунчалар

Ушбу Қонунда қуйидаги асосий тушунчалар қўлланилади:
алоҳида қимматли ҳужжат — ўчмас тарихий-маданий ва илмий қимматга, жамият ҳамда давлат учун алоҳида аҳамиятга эга бўлган, ҳисобга олиш, сақлаш ва фойдаланишнинг алоҳида тартиби белгиланган архив ҳужжати;

архив — архив ҳужжатларини жамлаш, ҳисобга олиш, сақлаш ва улардан фойдаланишни амалга оширувчи муассаса;

архив иши — архив ҳужжатларини жамлаш, ҳисобга олиш, сақлаш ва улардан фойдаланишни ташкил этиш бўйича фаолият;

архив фонди — юридик ёки жисмоний шахслар фаолияти натижасида яратилган, тарихий ёки мантиқий жиҳатдан ўзаро алоқадор архив ҳужжатлари мажмуи;

архив ҳужжатлари — фуқаролар, жамият ва давлат учун аҳамияти боис сақланиши лозим бўлган матнли, қўлёзма ва

машинада ўқиладиган ҳужжатлар, овозли ёзувлар, видеоёзувлар, киноленталар, фотосуратлар, фотография плёнкалари, чизмалар, схемалар, хариталар, шунингдек бошқа моддий жисмлардаги ёзувлар;

архив ҳужжатларини депозитар сақлаш — архив ҳужжатларини уларнинг мулкдори (эгаси) билан архив, музей, кутубхона ўртасидаги келишувда (шартномада) белгиланадиган муддатлар ва шартлар асосида мулкдорнинг (эгасининг) архив ҳужжатларига бўлган мулк ҳуқуқини (эгаллик ҳуқуқини) сақлаб қолган ҳолда сақлаш;

идоравий архив — юридик шахснинг архив ҳужжатларини жамлаш, ҳисобга олиш, сақлаш ва улардан фойдаланишни амалга оширувчи таркибий бўлинмаси;

иш юритиш — юридик шахснинг ҳужжатлаштириш ва расмий ҳужжатлар билан ишлашни ташкил этиш бўйича фаолиятини таъминлаб берувчи жараён;

Миллий архив фонди — Ўзбекистон халқининг моддий ва маънавий ҳаётини акс эттирган, тарихий, илмий, ижтимоий, иқтисодий, сиёсий ва маданий аҳамиятга эга бўлган архив ҳужжатларининг тарихан таркиб топган ва доимо бойитиб бориладиган мажмуи;

Миллий архив фондининг давлат каталоги — архив ҳужжатлари Миллий архив фондининг таркибига киритилган архив фондларининг ҳажми ва таркиби тўғрисидаги асосий маълумотлар мавжуд бўлган ҳисобга олиш ҳужжати;

ноёб ҳужжат — ўзида мавжуд бўлган ахборот ва (ёки) ташқи белгилари бўйича ўхшаши йўқ, йўқотилган тақдирда ўзининг аҳамияти ва (ёки) асл қўлёзмалиги нуқтаи назаридан ўрнини тўлдириб бўлмайдиган алоҳида қимматли ҳужжат;

суғурта нусха — алоҳида қимматли ҳужжат ёки ноёб ҳужжатнинг бошқа моддий жисмдаги, асл нусхада мавжуд бўлган ахборотни ўқиш ёки кўриш (эшитиш) имконини берувчи кўчирма нусхаси; шахсий таркиб бўйича ҳужжатлар — ходимнинг иш берувчи билан меҳнатга оид муносабатларини акс эттирувчи архив ҳужжатлари.

4-модда. Архив ҳужжатларига бўлган мулк шакллари
Архив ҳужжатлари хусусий ҳамда оммавий мулк шаклларида бўлиши мумкин.

Давлат ҳокимияти ва бошқаруви органларида, давлат корхоналари, муассасалари ва ташкилотларида турган архив ҳужжатлари, шунингдек улар томонидан давлат архивлари, музейлари ва кутубхоналарига топширилган архив ҳужжатлари давлат мулки ҳисобланади ҳамда мазкур ҳужжатлар давлат тасарруфидан чиқариш ва хусусийлаштириш, олди-сотди ёки мулк ҳуқуқини бошқа шахсга ўтказиш билан боғлиқ бошқа битимлар объекти бўлиши мумкин эмас.

Давлат корхоналари, муассасалари ва ташкилотлари давлат тасарруфидан чиқарилган ва хусусийлаштирилган тақдирда уларнинг архив ҳужжатлари, шу жумладан шахсий таркиб бўйича ҳужжатлар давлат мулки бўлиб қолади ва белгиланган тартибда давлат архивларига топширилади.

Нодавлат корхоналар, муассасалар ва ташкилотларнинг архив ҳужжатлари, шунингдек жисмоний шахсларнинг шахсий архив ҳужжатлари уларнинг хусусий мулкидир.

Вафот этган фуқароларнинг Миллий архив фондининг давлатга тегишли бўлмаган қисми таркибига киритилган шахсий архив ҳужжатлари, васиятнома ёки қонун бўйича меросхўрлар бўлмаганда, шунингдек архив ҳужжатларининг мулкдорини аниқлаш имконияти бўлмаган тақдирда, давлат мулкига ўтади.

5-модда. Қайта ташкил этилаётган ва тугатилаётган корхоналар, муассасалар ва ташкилотларнинг архив ҳужжатлари

Корхоналар, муассасалар ва ташкилотлар қайта ташкил этилаётганда уларнинг архив ҳужжатлари тегишли давлат архивлари билан келишилган ҳолда мазкур корхоналар, муассасалар ва ташкилотларнинг ҳуқуқий ворисларига топширилади.

Корхоналар, муассасалар ва ташкилотлар тугатилаётганда уларнинг архив ҳужжатлари қонун ҳужжатларида белгиланган тартибда тегишли давлат архивларига топширилади.

2-боб. Архив иши соҳасидаги давлат бошқаруви

6-модда. Ўзбекистон Республикаси Вазирлар Маҳкамасининг
архив иши соҳасидаги ваколатлари

Ўзбекистон Республикаси Вазирлар Маҳкамаси:

архив иши ва иш юритиш соҳасида ягона давлат сиёсати амалга оширилишини таъминлайди;

архив ишини ривожлантириш ва архивлар фаолиятини қўллаб-қувватлашга доир давлат дастурларини тасдиқлайди;

архив иши ва иш юритишнинг ҳолати устидан давлат назоратини амалга ошириш тартибини белгилайди;

архив ҳужжатларини жамлаш, давлат ҳисобига олиш, сақлаш ва улардан фойдаланиш тартибини белгилайди;

Миллий архив фонди тўғрисидаги ва Миллий архив фондининг давлат каталоги тўғрисидаги низомларни тасдиқлайди;

архив ҳужжатларини Миллий архив фонди таркибига киритиш ҳамда унинг таркибидан чиқариш тартибини белгилайди;

Миллий архив фондининг давлатга тегишли қисми таркибига киритилган архив ҳужжатларини доимий (муддатсиз) сақлашни амалга оширадиган вазирликлар, давлат қўмиталари ва идораларнинг рўйхатини тасдиқлайди;

архив ҳужжатларининг махфийлик тоифаларини, шунингдек давлат сири ва қонун билан қўриқланадиган бошқа сирни ўз ичига олган архив ҳужжатларини кириб кўришга доир чекловларни белгилайди;

архивларни ташкил этиш, қайта ташкил этиш ва тугатиш тартибини белгилайди;

архивларнинг асосий иш турлари бўйича вақт ва ишлаб чиқариш намунавий нормаларини белгилайди;

архивлар ва идоравий архивлар томонидан хизмат кўрсатиш тартибини белгилайди.

Ўзбекистон Республикаси Вазирлар Маҳкамаси қонун ҳужжатларига мувофиқ бошқа ваколатларни ҳам амалга ошириши мумкин.

7-модда. Ўзбекистон Республикаси Вазирлар Маҳкамаси
ҳузуридаги «Ўзархив» агентлигининг архив иши
соҳасидаги ваколатлари

Ўзбекистон Республикаси Вазирлар Маҳкамаси ҳузуридаги «Ўзархив» агентлиги (бундан буён матнда «Ўзархив» агентлиги деб юритилади):

архив иши ва иш юритиш соҳасида ягона давлат сиёсатини амалга оширади;

архив ишини ривожлантириш ва архивлар фаолиятини қўллаб-қувватлашга доир давлат дастурларини ишлаб чиқади ҳамда амалга оширади;

архив иши ва иш юритишнинг ҳолати устидан давлат назоратини амалга оширади;

Миллий архив фондининг давлат каталогини юритади;

архив ҳужжатларини белгиланган тартибда Миллий архив фонди таркибига киритади ҳамда унинг таркибидан чиқаради;

ҳужжатларнинг қимматлилигини аниқлаш экспертизасини ўтказиш тартибини белгилайди;

архив ҳужжатларини алоҳида қимматли ҳужжатлар ва ноёб ҳужжатлар сирасига киритиш тартибини, шунингдек суғурта нусхаларни тайёрлаш ва сақлаш тартибини белгилайди;

архив ҳужжатларини кириб кўриш тартиби ва шартларини белгилайди;

давлат мулки бўлган архив ҳужжатларини ёки уларнинг ўрнини босувчи кўчирма нусхаларини, шунингдек Миллий архив фондининг давлатга тегишли бўлмаган қисми таркибига киритилган архив ҳужжатларини ёки уларнинг ўрнини босувчи кўчирма нусхаларини Ўзбекистон Республикасидан ташқарига вақтинча олиб чиқишга рухсат беради;

Миллий архив фондининг давлатга тегишли бўлмаган қисми таркибига киритилган архив ҳужжатларини тасарруфдан чиқариш ёки универсал ҳуқуқий ворислик тартибида ёхуд бошқа усулда бир шахсдан иккинчи шахсга ўтказиш учун рухсат беради;

архив ҳужжатлари давлат архивларига топширилиши лозим бўлган корхоналар, муассасалар ва ташкилотларнинг рўйхатини тузиш тартибини белгилайди.

«Ўзархив» агентлиги қонун ҳужжатларига мувофиқ бошқа ваколатларни ҳам амалга ошириши мумкин.

8-модда. Маҳаллий давлат ҳокимияти органларининг архив иши соҳасидаги ваколатлари

Маҳаллий давлат ҳокимияти органлари:

Миллий архив фонди таркибига киритилган, тегишли ҳудудда жойлашган давлат архивлари ва идоравий архивларда турган архив ҳужжатларининг сақланиши учун лозим даражадаги шарт-шароитларни таъминлайди;

Миллий архив фонди таркибига киритилган, тегишли ҳудудда жойлашган архивлар ва идоравий архивларда турган архив ҳужжатларининг ҳолати устидан давлат назоратини амалга оширади;

тегишли ҳудуддаги давлат архивларини молиялаштириш миқдорини ўз ваколатлари доирасида белгилайди.

Маҳаллий давлат ҳокимияти органлари қонун ҳужжатларига мувофиқ бошқа ваколатларни ҳам амалга ошириши мумкин.

3-боб. Миллий архив фонди

9-модда. Миллий архив фондининг таркиби

Миллий архив фонди таркибига киритилган архив ҳужжатлари Ўзбекистон халқи маданий меросининг ажралмас қисмидир.

Миллий архив фонди Миллий архив фондининг давлатга тегишли қисмидан ва давлатга тегишли бўлмаган қисмидан иборатдир.

Миллий архив фонди таркибига киритилган архив ҳужжатларининг фуқаролик муомаласига ушбу Қонунда белгиланган чекловларга риоя этилган ҳолдагина йўл қўйилади.

10-модда. Архив ҳужжатларини Миллий архив фонди таркибига киритиш

Архив ҳужжатларини Миллий архив фонди таркибига киритиш Ўзбекистон Республикаси Вазирлар Маҳкамаси томонидан белгиланган тартибда амалга оширилади.

Миллий архив фонди таркибига киритилган архив ҳужжатлари мулкдорига мазкур ҳужжатлар рўйхатдан ўтказилганлиги тўғрисида гувоҳнома белгиланган тартибда берилади.

11-модда. Архив ҳужжатларини Миллий архив фонди таркибидан
чиқариш

Архив ҳужжатларини Миллий архив фонди таркибидан
чиқариш Ўзбекистон Республикаси Вазирлар Маҳкамаси
томонидан белгиланган тартибда амалга оширилади.

12-модда. Миллий архив фондининг давлат каталогини юритиш
Миллий архив фондининг давлат каталогини юритиш
«Ўзархив» агентлиги томонидан амалга оширилади.

13-модда. Миллий архив фондининг давлатга тегишли қисми
таркиби

Миллий архив фондининг давлатга тегишли қисми таркибига, кимнинг
эгаллигида турганлигидан қатъи назар, доимий (муддатсиз) сақланиши лозим
бўлган, давлат мулки бўлган архив ҳужжатлари киради.

14-модда. Миллий архив фондининг давлатга тегишли бўлмаган
қисми таркиби

Миллий архив фондининг давлатга тегишли бўлмаган қисми
таркибига доимий (муддатсиз) сақланиши лозим бўлган,
нодавлат корхоналар, муассасалар ва ташкилотлар фаолияти
натijasида яратилган архив ҳужжатлари, шунингдек жисмоний
шахсларнинг шахсий архив ҳужжатлари киради.

15-модда. Миллий архив фонди таркибига киритилган архив
ҳужжатларининг фуқаролик муомаласи хусусиятлари

Миллий архив фондининг давлатга тегишли қисми
таркибига киритилган архив ҳужжатларини тасарруфдан
чиқариш мумкин эмас. Мазкур ҳужжатлар йўқолган ёки
емирилган ҳолларда улар Миллий архив фондининг давлатга
тегишли қисми таркибидан чиқарилади.

Миллий архив фондининг давлатга тегишли бўлмаган қисми
таркибига киритилган архив ҳужжатлари фақат «Ўзархив»
агентлигининг рухсатига биноан тасарруфдан чиқарилиши ёки
универсал ҳуқуқий ворислик тартибда ёхуд бошқа усулда бир
шахсдан иккинчи шахсга ўтиши мумкин.

4-боб. Архивларни ташкил этиш

16-модда. Архивларни ташкил этиш шартлари

Архивларни ташкил этиш учун архив ҳужжатларини сақлаш ва улардан фойдаланиш талабларига жавоб берадиган моддий-техник база, шу жумладан бино (хоналар), зарур жиҳозлар, муҳофаза воситалари ҳамда ёнғинга қарши воситалар бўлиши шарт.

Архивларнинг асосий иш турлари бўйича вақт ва ишлаб чиқариш намунавий нормалари Ўзбекистон Республикаси Вазирлар Маҳкамаси томонидан белгиланади. Махфий архивлар ташкил этилишига йўл қўйилмайди.

17-модда. Архивларнинг турлари

Архивлар давлат ва нодавлат архивлари турларида ташкил этилиши мумкин.

18-модда. Архивларни ташкил этиш, қайта ташкил этиш ва тугатиш тартиби

Архивларни ташкил этиш, қайта ташкил этиш ва тугатиш қонун ҳужжатларида белгиланган тартибда амалга оширилади.

19-модда. Идоравий архивларни ташкил этиш

Корхоналар, муассасалар ва ташкилотлар архив ҳужжатларини жамлаш, ҳисобга олиш, сақлаш ва улардан фойдаланиш учун қонун ҳужжатларида белгиланган тартибда идоравий архивларни ташкил этиши мумкин.

5-боб. Архив ҳужжатларини жамлаш, ҳисобга олиш, сақлаш ва улардан фойдаланиш

20-модда. Архив ҳужжатларини жамлаш

Архив ҳужжатларини жамлаш архивлар, идоравий архивлар ва жисмоний шахсларнинг шахсий архив ҳужжатларини архив ҳужжатлари билан тўлдиришни ўз ичига олади.

Давлат архивлари давлат ҳокимияти ва бошқаруви органлари, давлат корхоналари, муассасалари ва ташкилотларининг фаолияти натижасида яратилган архив

ҳужжатлари, шунингдек улар томонидан олинган ёки уларга нодавлат корхоналар, муассасалар ва ташкилотлар ҳамда жисмоний шахслар топширган архив ҳужжатлари билан жамланади.

Архив ҳужжатлари давлат архивларига топширилиши лозим бўлган корхоналар, муассасалар ва ташкилотларнинг рўйхатини тузиш тартиби «Ўзархив» агентлиги томонидан белгиланади.

Нодавлат архивлар ва жисмоний шахсларнинг шахсий архив ҳужжатлари давлат мулки бўлган архив ҳужжатлари билан жамланишига йўл қўйилмайди.

Жисмоний шахсларнинг шахсий архив ҳужжатлари сотилаётганда давлат архивлари имтиёзли сотиб олиш ҳуқуқига эга бўлади.

Корхоналар, муассасалар ва ташкилотлар шахсий таркиб бўйича ҳужжатларни жамлаши шарт.

Архив ҳужжатларини жамлаш тартиби Ўзбекистон Республикаси Вазирлар Маҳкамаси томонидан белгиланади.

21-модда. Ҳужжатларнинг қимматлилигини аниқлаш экспертизаси

Ҳужжатларнинг қимматлилигини аниқлаш экспертизаси сақлаш учун танлаб олиш мақсадида ҳужжатлар ёки архив ҳужжатларининг қимматлилигини белгилаш бўйича чоратадбирлар мажмуини ўз ичига олади.

Ҳужжатларнинг қимматлилигини аниқлаш экспертизасини ўтказиш тартиби «Ўзархив» агентлиги томонидан белгиланади.

22-модда. Архив ҳужжатларини ҳисобга олиш

Архив ҳужжатларини давлат ҳисобига олиш қуйидагиларни ўз ичига олади:

архивлар ва идоравий архивларда ҳисобга олиш ҳужжатларини тузиш; архивлар ва идоравий архивларда йиғма ҳужжатларни тузиш ва уларни «Ўзархив» агентлигига тақдим этиш;

Миллий архив фондининг давлат каталогини юритиш.

Архивлар ва идоравий архивлардаги ҳисобга олиш ҳужжатларига қуйидагилар киради:

ҳужжатларнинг келиб тушиш китоби;

архив фондларининг рўйхати;

архив фонди варағи;
архив рўйхати;
архив фонди йиғмажилди.

Архив ҳужжатларини давлат ҳисобига олиш тартиби Ўзбекистон Республикаси Вазирлар Маҳкамаси томонидан белгиланади.

Жисмоний шахсларнинг шахсий архив ҳужжатларини ҳисобга олиш улар томонидан мустақил амалга оширилади.

23-модда. Архив ҳужжатларини сақлаш

Корхоналар, муассасалар ва ташкилотларнинг архив ҳужжатларини, шунингдек жисмоний шахсларнинг шахсий архив ҳужжатларини сақлаш улар томонидан мустақил амалга оширилади.

Миллий архив фонди таркибига киритилган архив ҳужжатлари доимий (муддатсиз) сақланиши лозим ва уларни йўқ қилиб ташлаш тақиқланади.

Миллий архив фондининг давлатга тегишли қисми таркибига киритилган архив ҳужжатларини доимий (муддатсиз) сақлаш давлат архивлари, музейлари ва кутубхоналарида, шунингдек рўйхати Ўзбекистон Республикаси Вазирлар Маҳкамаси томонидан тасдиқланадиган вазирликлар, давлат кўмиталари ва идораларда амалга оширилади.

Миллий архив фондининг давлатга тегишли қисми - таркибига киритилган архив ҳужжатларини вазирликлар, давлат кўмиталари ва идораларда доимий (муддатсиз) сақлаш «Ўзархив» агентлиги билан келишилган идоравий норматив ҳужжатлар асосида амалга оширилади.

Миллий архив фондининг давлатга тегишли қисми таркибига киритилган архив ҳужжатларини идоравий архивларда вақтинча сақлаш ушбу Қонуннинг 24-моддасида белгиланган муддатлар мобайнида амалга оширилади.

Миллий архив фондининг давлатга тегишли бўлмаган қисми таркибига киритилган архив ҳужжатлари архивлар ва идоравий архивларда, шунингдек жисмоний шахсларнинг шахсий архив ҳужжатлари таркибида сақланиши мумкин.

Корхоналар, муассасалар ва ташкилотларнинг архив ҳужжатлари, жисмоний шахсларнинг шахсий архив ҳужжатлари

архивлар, музейлар ва кутубхоналарга депозитар сақлаш учун топширилиши мумкин.

Корхоналар, муассасалар ва ташкилотлар шахсий таркиб бўйича ҳужжатларни сақлаши шарт.

Архив ҳужжатларини сақлаш тартиби Ўзбекистон Республикаси Вазирлар Маҳкамаси томонидан белгиланади.

24-модда. Архив ҳужжатларини идоравий архивларда вақтинча сақлаш муддатлари

Миллий архив фондининг давлатга тегишли қисми таркибига киритилган архив ҳужжатларини идоравий архивларда вақтинча сақлашнинг қуйидаги муддатлари белгиланади:

давлат ҳокимияти ва бошқаруви органлари, Ўзбекистон Республикаси Ҳукумати томонидан ташкил этиладиган хўжалик бошқаруви органлари, шунингдек республика бўйсунувидаги давлат корхоналари, муассасалари ва ташкилотларининг архив ҳужжатлари — ўн беш йил мобайнида;

маҳаллий давлат ҳокимияти органлари ва давлат бошқаруви органларининг тегишли ҳудудий бўлинмалари, вилоят бўйсунувидаги давлат корхоналари, муассасалари ва ташкилотларининг архив ҳужжатлари — ўн йил мобайнида;

туман ва шаҳар бўйсунувидаги давлат корхоналари, муассасалари ва ташкилотларининг архив ҳужжатлари — беш йил мобайнида;

устав фондида давлат улуши бўлган, чет эл инвестициялари иштирокидаги корхоналар, бошқа ташкилотларнинг архив ҳужжатлари — ўн йил мобайнида;

илмий, технологик, конструкторлик ва патент ҳужжатлари — йигирма йил мобайнида;

капитал қурилиш бўйича лойиҳа ҳужжатлари — йигирма беш йил мобайнида;

телеметрик ҳужжатлар — беш йил мобайнида;

овозли ёзувлар, видеоёзувлар, киноленталар, фотосуратлар, фотография плёнкалари — тайёрланган вақтидан бошлаб уч йилдан ошмаган муддат мобайнида;

машинада ўқиладиган ҳужжатлар — беш йил мобайнида.

Миллий архив фондининг давлатга тегишли қисми таркибига киритилган архив ҳужжатларини идоравий архивларда

вақтинча сақлаш муддатлари ўтгач улар белгиланган тартибда давлат архивларига топширилади.

Агар қонун ҳужжатларида бошқача ҳол назарда тутилмаган бўлса, фуқаролик ҳолати далолатномалари ёзувлари, нотариал ҳаракатлар ёзувлари, шахсий таркиб бўйича ҳужжатлар, суд ишлари ва хўжалик китоблари идоравий архивларда етмиш беш йил мобайнида сақланиши лозим.

Фуқаролик ҳолати далолатномалари ёзувлари, нотариал ҳаракатлар ёзувлари, суд ишлари ва хўжалик китобларини идоравий архивларда вақтинча сақлаш муддатлари ўтгач улар белгиланган тартибда давлат архивларига топширилади.

25-модда. Архив ҳужжатларининг бут сақланишини таъминлаш

Архивлар ва идоравий архивларда архив ҳужжатларининг бут сақланишини таъминлаш архивлар ҳамда корхоналар, муассасалар, ташкилотлар раҳбарларининг зиммасига юклатилади.

Миллий архив фондининг давлатга тегишли бўлмаган қисми таркибига киритилган архив ҳужжатларининг бут сақланишини таъминламаётган мулкдорлар суд қарорига биноан мазкур ҳужжатларга бўлган мулк ҳуқуқидан маҳрум этилиши мумкин, шундан сўнг бу ҳужжатлар сақлаш учун тегишли давлат архивига топширилади.

Корхоналар, муассасалар ва ташкилотлар шахсий таркиб бўйича ҳужжатларнинг бут сақланишини таъминлаши шарт.

Жисмоний шахслар ўз шахсий архив ҳужжатларининг бут сақланишини мустақил равишда таъминлайди.

Алоҳида қимматли ҳужжатлар ва ноёб ҳужжатларнинг суғурта нусхалари яратилади.

Архив ҳужжатларини алоҳида қимматли ҳужжатлар ва ноёб ҳужжатлар сирасига киритиш тартиби, шунингдек суғурта нусхаларни тайёрлаш ва сақлаш тартиби «Ўзархив» агентлиги томонидан белгиланади.

26-модда. Архив ҳужжатларидан фойдаланиш

Архив ҳужжатларидан фойдаланиш хизмат, ишлаб чиқариш, илмий, маданий, маърифий, таълим мақсадида ва қонун

ҳужжатларида тақиқланмаган бошқа мақсадларда амалга оширилади.

Архив ҳужжатларидан фойдаланувчилар:
архив ҳужжатларидан фойдаланиш тартибига риоя қилиши;
архив ҳужжатларининг бут сақланишини таъминлаши;
архив ҳужжатларига етказилган шикастлар ёки архив ҳужжатларидаги етишмовчиликлар аниқланганлиги тўғрисида тезкор равишда архив ва идоравий архив ходимларига хабар бериши;
архив ҳужжатларидан олинган маълумотларни бузиб кўрсатиш ёки сохталаштиришга йўл қўймаслиги шарт.

Архив ҳужжатларидан фойдаланиш тартиби Ўзбекистон Республикаси Вазирлар Маҳкамаси томонидан белгиланади.

27-модда. Архив ҳужжатларини кириб кўриш

Архивлар ва идоравий архивлардаги архив ҳужжатларини кириб кўриш фойдаланувчига илмий-маълумотнома аппаратини, шунингдек тегишли архив ҳужжатлари ёки уларнинг кўчирма нусхаларини тақдим этиш орқали таъминланади.

Архивлар ва идоравий архивлардаги архив ҳужжатларини, шунингдек жисмоний шахсларнинг шахсий архив ҳужжатларини кириб кўриш уларнинг бут сақланишини таъминлаш мақсадида чекланиши мумкин, қонун ҳужжатларида назарда тутилган ҳоллар бундан мустасно.

Фуқароларнинг шахсий ҳаёти тўғрисидаги ёки уларнинг ҳаёти ва хавфсизлигига таҳдид туғдирувчи маълумотларни ўз ичига олган архив ҳужжатларини кириб кўришга доир чекловлар архив ҳужжатлари тайёрланган вақтдан эътиборан етмиш беш йил муддатга белгиланади. Ушбу муддатдан олдин мазкур ҳужжатларни кириб кўришга фуқаронинг ўзи томонидан, унинг вафотидан сўнг эса шу фуқаронинг меросхўрлари томонидан рухсат берилиши мумкин.

Архив ҳужжатларини кириб кўриш тартиби ва шартлари «Ўзархив» агентлиги томонидан белгиланади.

Архив ҳужжатларининг махфийлик тоифалари, шунингдек давлат сирини ва қонун билан қўриқладиган бошқа сирини ўз ичига олган архив ҳужжатларини кириб кўришга доир чекловлар

Ўзбекистон Республикаси Вазирлар Маҳкамаси томонидан белгиланади.

28-модда. Архивлар ва идоравий архивлар
томонидан кўрсатиладиган хизматлар

Архивлар ва идоравий архивлар Ўзбекистон Республикаси Вазирлар Маҳкамаси томонидан белгиланган тартибда хизматлар кўрсатади.

Фуқароларнинг ҳуқуқлари ва қонуний манфаатларини ижтимоий ҳимоя қилиш учун зарур бўлган архив маълумотномаларини, шунингдек тегишли давлат ҳокимияти ва бошқаруви органларига архив маълумотномаларини ва архив ҳужжатининг кўчирма нусхасини бериш бепул амалга оширилади.

29-модда. Архив ҳужжатларини Ўзбекистон
Республикасидан ташқарига олиб чиқиш ва Ўзбекистон
Республикасига олиб кириш

Давлат мулки бўлган архив ҳужжатларини ёки уларнинг ўрнини босувчи кўчирма нусхаларини, шунингдек Миллий архив фондининг давлатга тегишли бўлмаган қисми таркибига киритилган архив ҳужжатларини ёки уларнинг ўрнини босувчи кўчирма нусхаларини Ўзбекистон Республикасидан ташқарига олиб чиқишга йўл қўйилмайди, ушбу модданинг иккинчи қисмида назарда тутилган ҳол бундан мустасно.

Давлат мулки бўлган архив ҳужжатларини ёки уларнинг ўрнини босувчи кўчирма нусхаларини, шунингдек Миллий архив фондининг давлатга тегишли бўлмаган қисми таркибига киритилган архив ҳужжатларини ёки уларнинг ўрнини босувчи кўчирма нусхаларини Ўзбекистон Республикасидан ташқарига вақтинча олиб чиқишга «Ўзархив» агентлигининг рухсати билан қонун ҳужжатларида белгиланган тартибда йўл қўйилади.

Хусусий мулк бўлган, Миллий архив фондининг давлатга тегишли бўлмаган қисми таркибига киритилмаган архив ҳужжатлари ёки уларнинг ўрнини босувчи кўчирма нусхалари Ўзбекистон Республикасидан ташқарига олиб чиқилиши мумкин. Бу ҳолда олиб чиқилиши билдирилган архив ҳужжатлари «Ўзархив» агентлиги томонидан белгиланган тартибда

ҳужжатларнинг қимматлилигини аниқлаш экспертизасидан ўтказилиши лозим.

Қонуний асосларда қўлга киритилган ва (ёки) олинган архив ҳужжатларини ёки уларнинг ўрнини босувчи кўчирма нусхаларини Ўзбекистон Республикасига олиб киришга рухсат берилади.

6-боб. Яқунловчи қоидалар

30-модда. Архивларни молиялаштириш

Давлат архивларини молиялаштириш Ўзбекистон Республикасининг Давлат бюджети маблағлари ва қонун ҳужжатларида тақиқланмаган бошқа манбалар ҳисобидан амалга оширилади.

Давлат архивларининг пулли хизматлар кўрсатишдан ва молиялаштиришнинг бошқа манбаларидан олинган маблағлари қонун ҳужжатларида белгиланган тартибда уларнинг моддий-техника базасини ривожлантириш ҳамда ходимларни моддий рағбатлантиришга йўналтирилади.

Нодавлат архивларини молиялаштириш уларнинг мулкдорлари маблағлари ва қонун ҳужжатларида тақиқланмаган бошқа манбалар ҳисобидан амалга оширилади.

31-модда. Архив иши соҳасидаги халқаро ҳамкорлик
Архив иши соҳасидаги халқаро ҳамкорлик Ўзбекистон Республикасининг қонун ҳужжатлари ва халқаро шартномаларига мувофиқ амалга оширилади.

32-модда. Низоларни ҳал этиш

Архив иши соҳасидаги низолар қонун ҳужжатларида белгиланган тартибда ҳал этилади.

33-модда. Архив иши тўғрисидаги қонун ҳужжатларини бузганлик учун жавобгарлик

Архив иши тўғрисидаги қонун ҳужжатларини бузганликда айбдор шахслар белгиланган тартибда жавобгар бўлади.

34-модда. Айрим қонун ҳужжатларини ўз кучини йўқотган деб
топиш

Қуйидагилар ўз кучини йўқотган деб топилсин:

- 1) Ўзбекистон Республикасининг 1999 йил 15 апрелда қабул қилинган «Архивлар тўғрисида»ги 768–I-сонли Қонуни (Ўзбекистон Республикаси Олий Мажлисининг Ахборотномаси, 1999 йил, № 5, 120-модда);
- 2) Ўзбекистон Республикаси Олий Мажлисининг 1999 йил 15 апрелда қабул қилинган «Архивлар тўғрисида»ги Ўзбекистон Республикаси Қонунини амалга киритиш ҳақида»ги 769–I-сонли Қарори (Ўзбекистон Республикаси Олий Мажлисининг Ахборотномаси, 1999 йил, № 5, 121-модда);
- 3) Ўзбекистон Республикасининг 2004 йил 30 апрелда қабул қилинган «Ўзбекистон Республикасининг айрим қонун ҳужжатларига ўзгартишлар ва қўшимчалар киритиш тўғрисида»ги 621–II-сонли Қонунининг (Ўзбекистон Республикаси Олий Мажлисининг Ахборотномаси, 2004 йил, № 5, 90-модда) XIX бўлими.

35-модда. Қонун ҳужжатларини ушбу Қонунга
мувофиқлаштириш

Ўзбекистон Республикаси Вазирлар Маҳкамаси:
ҳукумат қарорларини ушбу Қонунга мувофиқлаштирсин;
давлат бошқаруви органлари ушбу Қонунга зид бўлган ўз
норматив-ҳуқуқий ҳужжатларини қайта кўриб чиқишлари ва
бекор қилишларини таъминласин.

36-модда. Ушбу Қонуннинг кучга кириши

Ушбу Қонун расмий эълон қилинган кундан эътиборан
кучга киради.

Ўзбекистон Республикаси Президенти И. КАРИМОВ
Тошкент шаҳри, 2010 йил 15 июнь № ЎРҚ-252

ЎЗБЕКИСТОН РЕСПУБЛИКАСИ
ВАЗИРЛАР МАҲКАМАСИНИНГ
ҚАРОРИ
05.04.2012 й.
№ 101

ЎЗБЕКИСТОН РЕСПУБЛИКАСИДА
АРХИВ ИШИНИ ТАКОМИЛЛАШТИРИШ
ТЎҒРИСИДА

“Архив иши тўғрисида”ги Ўзбекистон республикаси Қонуни талабларини амалга ошириш мақсадида Вазирлар Маҳкамаси
ҚАРОР ҚИЛАДИ:

1. Қуйидагилар:

Архив ҳужжатларини жамлаш, давлат ҳисобига олиш, сақлаш ва улардан фойдаланиш тартиби тўғрисида низом [1-иловага](#) мувофиқ;

Ўзбекистон Республикаси Миллий архив фонди Давлат каталоги тўғрисида низом [2-иловага](#) мувофиқ;

Архивларни ташкил этиш, қайта ташкил этиш ва тугатиш тартиби тўғрисида низом [3-иловага](#) мувофиқ;

Архивлар ва идоравий архивлар томонидан хизматлар кўрсатиш тартиби тўғрисида низом [4-иловага](#) мувофиқ;

Архивлар мутахассисларини Ўзбекистон Республикаси корхоналари, муассасалари ва ташкилотлари ҳужжатларини тартибга келтиришга компетентлиги юзасидан аттестациядан ўтказиш тартиби тўғрисида низом [5-иловага](#) мувофиқ;

Архив ҳужжатларини Ўзбекистон Республикасидан ташқарига олиб чиқиш ва архив ҳужжатларини Ўзбекистон Республикасига олиб кириш тартиби тўғрисида низом [6-иловага](#) мувофиқ тасдиқлансин.

2. Вазирликлар ва идоралар, Қорақалпоғистон Республикаси Вазирлар Кенгаши, вилоятлар ва Тошкент шаҳар ҳокимликлари, шунингдек корхоналар, муассасалар ва ташкилотлар архив ҳужжатлари Ўзбекистон Республикаси Миллий архив фонди таркибига киритилган ўз архив фондларининг ҳажми ва

таркиби ҳақидаги маълумотларни белгиланган муддатларда ва шаклларда тегишли архивларга мунтазам равишда тақдим этилишини таъминласинлар.

3. Ўзбекистон Республикаси Вазирлар Маҳкамаси ҳузуридаги "Ўзархив" агентлиги:

архив ҳужжатлари Ўзбекистон Республикаси Миллий архив фонди таркибига киритилган архив фондлари мулкдорлари учун ўз архив фондларининг ҳажми ва таркиби ҳақидаги маълумотларни тақдим этиш, шунингдек ҳужжатларни архив сақловига топшириш босқичида ҳужжатларни тўғри тартибга келтиришни ташкил этиш бўйича услубий қўлланмаларни бир ой муддатда ишлаб чиқсин;

архив ҳужжатлари Ўзбекистон Республикаси Миллий архив фондига киритилган архив фондларининг ҳажми ва таркиби бўйича маълумотлар базаси шакллантирилишини ва кейинчалик уларнинг тизимли равишда ҳисобга олинишини уч ой муддатда таъминласин.

4. Вазирлар Маҳкамасининг "Ўзбекистон Республикасида маданий бойликларнинг олиб чиқилиши ва олиб кирилиши масалаларини тартибга солиш тўғрисида" 1999 йил 23 мартдаги 131-сон [қарорига](#) (Ўзбекистон Республикаси ҚТ, 1999 й., 3-сон, 15-модда) [7-иловага](#) мувофиқ ўзгартиришлар ва қўшимча киритилсин.

5. Давлат ва хўжалик бошқаруви органлари, маҳаллий давлат ҳокимияти органлари ҳамда бошқа ташкилотлар бир ой муддатда ўз идоравий норматив-ҳуқуқий ҳужжатларини ушбу қарорга мувофиқлаштирсинлар.

6. Мазкур қарорнинг бажарилишини назорат қилиш Ўзбекистон Республикаси Бош вазирининг ўринбосари А.Н. Арипов зиммасига юклансин.

Ўзбекистон Республикасининг Бош вазири Ш. Мирзиёев

MUNDARIJA

SO‘Z BOSHI	3
-------------------------	---

I BO‘LIM. QADIMGI VA ANTIK DAVR ARXIVLARI

1-§. Arxivshunoslik kursining predmeti, metodologik asoslari, maqsad va vazifalari	6
2-§. Markaziy Osiyoda qadimiy yozuvlar, yozuv madaniyati va arxiv ishining mujudga kelishi	11
3-§. Ahmoniylar hukmronligi davrida Yaqin Sharq arxiv ishi an‘analarining Markaziy Osiyo xalqlariga ta’siri	17
4-§. Yunon-Baqtriya, Parfiya va Kushonlar davrida davlat ish yuritish an‘analari va arxivlar	32

II BO‘LIM. MARKAZIY OSIYONING ILK VA RIVOJLANGAN O‘RTA ASRLAR ARXIVLARI

5-§. Afrig‘iylar davriga oid Tuproqqal‘a arxiv hujjatlari	46
6-§. Mug‘ tog‘i sug‘d hujjatlari	52
7-§. Markaziy Osiyoda o‘rta asrlar (IX-XVI asr boshi) davlat ish yuritishining taraqqiysi	70
8-§. So‘nggi o‘rta asrlarda davlat devonxonalarida ish yuritish: Jo‘ybor xo‘jalari arxivi, Buxoro amirligi Qushbegi arxivi, Xiva va Qo‘qon xonliklari arxivlari	92

III BO‘LIM. XIX ASR SO‘NGGI CHORAGI VA XXI ASR BOSHLARIDA O‘ZBEKISTONDA ARXIV ISHI

9-§. Turkiston o‘lkasi mustamlaka davri arxivi (XIX asr oxiri – XX asr boshlari)	124
10-§. O‘zbekistonda arxiv ishi (1917-1991)	129
11-§. Mustaqillik davrida O‘zbekistonda arxiv ishining takomili ...	136

GLOSSARIY	141
FOYDALANILGAN ADABIYOTLAR	148
ILOVA	153

QAYDLAR UCHUN:

QAYDLAR UCHUN:

Mas'ul muharrir:

*O'zbekiston Respublkasi Fanlar akademiyasi tarix institutining
yetakchi ilmiy xodimi, t.f.d. S.Shodmonova*

Taqrizchilar:

*Nizomiy nomidagi Toshkent davlat pedagogika
universiteti dotsenti, t.f.n. Z.IIhomov
Toshkent davlat sharqshunoslik instituti,
Markaziy Osiyo xalqlari tarixi kafedrasi mudiri, tarix fanlari nomzodi
I.Haydarov*

O'zbekiston Respublikasi Oliy va o'rta maxsus ta'lim
vazirligining 2017-yil 24-avgustdagi 603-sonli buyrug'iga asosan
nashrga tavsiya etilgan.

O'quv qo'llanma Toshkent davlat sharqshunoslik instituti O'quv-
uslubiy Kengashining 2017 yil 30-mart 8-sonli bayonnoma qarori
bilan nashrga tavsiya etilgan.

Bosishga ruxsat etildi:10.11.2017
Bichimi 60x84 1/16/ Shartli 11,5 b.t.
Buyurtma № _____

© Toshkent davlat sharqshunoslik instituti, 2017